

德化县志

# 德化县志

清·乾隆十二年 鲁鼎梅主修  
王必昌主纂

福建省德化县地方志编纂委员会整理

一九八七年

# 德化县志

鲁鼎梅修 王必昌纂

---

福建省德化县地方志编纂委员会整理

德化县印刷厂印刷

开本850×1168 1/32 字数:300,000字

批准证号:泉新出字第0167号

1987年12月印刷 印数:1—2000

---

内部发行

## 出版说明

为保存文化遗产，研究德化历史，以增进人们对旧社会的了解，因而整理重印清乾隆版《德化县志》。

这部志修成于清乾隆十二年（1747年）。由鲁鼎梅主修，王必昌主纂。

鲁鼎梅，字调元，号夔堂，江西新城人。乾隆七年（1742年）进士，八年至十四年任德化县知县。后调任台湾县知县。

王必昌，字乔嶽，号后山，德化县城人。乾隆十年进士。十一年，应鲁鼎梅之聘，主纂《德化县志》。十七年，又受鲁鼎梅聘请，前往台湾县修志，八个月告成付梓。王曾任湖北省郢县知县，任职三年，政绩卓著。

乾隆十一年二月，知县鲁鼎梅决定重修县志，聘请本县名士王必昌等人负责编纂。鲁本人除披阅前志外，且四处“问询故老，备悉遗事”，并录下采访材料；治政余暇，还参与校点定稿。于次年六月修成。

乾志是德化自明代凌邦辉纂修第一部邑志以来的六部志书中较好的版本。由于民国时期地方不靖，几经兵燹，乾志已残缺不全，幸福建师范大学图书馆完好地保存刻本，经抄写复印，作为这次整理的蓝本。

本志内容较为丰富、全面。包括历史沿革、地理概况、典章制度、历代人物以及民间风习等；分为沿革、疆域（附风俗）等十六种专志，以及《德化县形胜全图》、《县境图》、《县署图》、《学宫图》和《戴雲晴峰》等十二风景图（共十六图）。还有序、跋多篇。是总汇德化自然、社会、政治、军事、经济、艺文诸方面一部较完备的志书。全书十八卷。它为后人保存了大量翔实可贵的地方原始资料。但是从中显现封建社会的缩影，诸如明、清时代封建社会的科举取士，用人制度，文物典章和伦理道德观念等，都蕴含着封建时代色彩。如已婚（包括订婚）妇女不嫁二夫，以守节为荣，以再嫁为耻；统治者为贞女烈妇勒石立坊，为达官贵人树碑立传；忠于统治者为英雄豪杰，不忠于统治者为逆子贰臣。封建主义、唯心史观充塞字里行间，这是时代和阶级的局限。对此，我们绝不能一脉相承，而应取其精华，弃其糟粕，以历史唯物主义观点来阅读、研究这部志书，才有助于资政、存史、教育，而裨益于社会主义精神文明建设。

这次整理，保持旧志原貌，不加修改。仅目录序言部分比原来较详，以便于查阅。但为了帮助读者解决阅读古文的困难与障碍，一则加以点断，二则作必要的校注。原则是，对不见于工具书的本地个别地名、人名和地方性史实掌故等加注，以期读者对内容能较好理解；对错别字、衍夺、疑义字和记叙明显错误或矛盾处，则用不同版本互相参照，进行他校或理校，而后加注；遇无法判断的就存疑，俟后来就正于高明。

这部志书的重印再版，是根据福建省地方志编纂委员会《关

于整理出版福建地方志的工作条例》有关规定,在县人民政府领导下,编委会于1985年聘请江中卫、李明志、周荣昌、叶星铸、郭明朗同志断句、标点,并由江中卫、李明志同志具体负责并校注。

在整理这部志书过程中,承蒙福建省地方志编纂委员会副主任陈树田的关心和支持,福建省地方志编纂委员会办公室廖宗刚同志审阅与校正,谨此致谢。

由于年代久远,篇幅浩繁,况且人力不足,水平有限,缺点舛错难免,竭诚希望方志学家和同行以及社会有识之士不吝指正。

**福建省德化县志编纂委员会**

1987年5月

# 德化县志目录

凡例 .....	( 1 )
<b>德化县志序</b>	
德化县志序 .....	陈大受 ( 3 )
序 .....	高 山 ( 4 )
德化县志序 .....	吴嗣寿 ( 5 )
序 .....	高景蕃 ( 6 )
序 .....	刘毓珍 ( 7 )
序 .....	杜昌丁 ( 8 )
序 .....	晋鼎梅 ( 10 )
序 .....	曾 晋 ( 11 )
序 .....	萧国琦 ( 12 )
序 .....	林 昱 李志昱 ( 13 )
重修德化县志序 .....	王必昌 ( 14 )
<b>编纂姓氏</b> .....	( 17 )
<b>捐资姓氏</b> .....	( 19 )

## 卷一

## 旧序

- 沈孟化序..... (24)
- 桂振宇序..... (25)
- 郝 斌序..... (26)
- 范正辂序..... (28)
- 方祚隆序..... (30)
- 林汪远序..... (31)

德化县形胜全图..... (35)

## 卷二

- 沿革志 ..... (69)
- 表..... (72)

## 卷三

## 疆域志

- 星野..... (75)
- 封圻..... (76)
- 形胜..... (76)
- 里社..... (77)
- 市廛..... (79)
- 附风俗..... (80)



## 卷四

## 山川志

山	( 85 )
水	( 95 )
桥渡	( 100 )
陂	( 110 )
井	( 111 )
附物产	( 112 )

## 卷五

## 建置志

城池	( 146 )
公署	( 149 )
坛	( 154 )
仓	( 156 )
铺	( 157 )
坊	( 158 )
附院堂义冢	( 160 )

## 卷六

## 民赋志

户役	( 163 )
----	---------

田赋	( 169 )
屯粮	( 174 )
解司转解物料	( 180 )
起运	( 181 )
支应	( 182 )
协济	( 185 )
耗羨	( 188 )

## 卷七

### 学校志

学官	( 190 )
崇祀	( 197 )
书籍	( 203 )
泮额	( 203 )
学租	( 205 )
书院	( 207 )
附社学	( 209 )

## 卷八

### 祠宇志

庙祀	( 212 )
附寺宇	( 217 )
宅墓	( 226 )

## 卷九

## 礼仪志

- 庆贺····· ( 229 )
- 接诏····· ( 230 )
- 迎春····· ( 230 )
- 耕藉····· ( 232 )
- 救护日月····· ( 233 )
- 祈祷晴雨····· ( 234 )
- 乡饮酒礼····· ( 234 )
- 乡约讲读····· ( 236 )
- 祭祀····· ( 237 )

## 卷十

## 武卫志

- 兵制····· ( 259 )
- 险要····· ( 263 )
- 汛塘····· ( 265 )
- 教场····· ( 266 )
- 附盗贼····· ( 266 )

## 卷十一

## 秩官志

- 文职····· ( 277 )

武职.....	( 305 )
---------	---------

## 卷十二

### 科目志

甲科.....	( 313 )
荐辟.....	( 333 )
掾吏.....	( 334 )
封典.....	( 335 )
任子.....	( 336 )

## 卷十三

### 人物志(上)

名宦.....	( 338 )
乡贤.....	( 340 )
宦迹.....	( 344 )
忠烈.....	( 352 )
治行.....	( 354 )
孝友.....	( 361 )
义行.....	( 366 )

## 卷十四

### 人物志(下)

文学.....	( 374 )
---------	---------

隐逸·····	( 381 )
耆寿·····	( 383 )
列女·····	( 387 )
侨寓·····	( 400 )
方技·····	( 402 )
释道·····	( 404 )

## 卷十五

### 艺文志(上)

诗·····	( 411 )
赋·····	( 453 )
序·····	( 458 )

### 艺文志(下)

记·····	( 481 )
碑文·····	( 487 )
杂体文·····	( 496 )

## 卷十六

### 古迹志

楼亭·····	( 510 )
胜迹·····	( 516 )
塔·····	( 530 )
龙潭·····	( 532 )

## 卷十七

### 五行志

水·····	( 534 )
火·····	( 535 )
木·····	( 535 )
金·····	( 536 )
土·····	( 537 )

## 卷十八

撫佚志 ·····	( 538 )
跋 ·····	( 542 )

## 凡 例

一 前志刻于万历甲辰，代更而版已灭；后志成于康熙丁卯，事显而类犹繁，兹各纲而目之。如星野、形胜、风土、里社，则归疆域；井陂、桥渡、物产，则归山川；建置、人物等志悉如之，以免零杂，非故为异同。

一 旧志山川拘于脉络，东西莫辨。今悉次其远近、分合，标而出之，俾阅者了然。

一 学校为崇圣尊贤之地，旧志乡贤名宦祠则载祀典，未免两概，今为汇入。

一 典礼所有，必备纪之，昭其制也。旧志所载仪文多略，铺叙不伦，而耕藉之礼，旗纛之祭，亦复阙如。兹悉参通志详定，惟圣朝追封从祀，另载学校。

一 关隘之设，所以弭盗安民。旧志险要、盗贼，分为两册。故另辑武卫，以剿除旧事附之，亦见设险防变、昔人捍御之功。

一 防汛之官，讲武卫民，所系诚重。旧阙题名，兹悉登入秩官。

一 旧志科目甲乙榜不填名次，贡生不分恩、拔、副、岁。兹悉注明分叙，惟无可查者仍之。

一 人物流品不一，旧志错杂铺叙，又有缺弗纪者，错出之

英，独擅之美，未由见矣。补其阙略，品而传之，庶几风徽各著。

一 诗赋序记，旧悉入文籍。兹集采名人游览题咏，即附于山川、岩寺诸志中，以便披阅；更为搜录，登之艺文。

一 盖棺论定，表德扬徽，不及生存。惟节妇年例合者，量登之以嘉苦志。

一 邑自康熙丁卯至今，甲子一周，文献未纂，虑其将失，率笔辑之，如其雅驯，以俟君子。



# 德化县志序

## 德化县志序

德化，闽西南<sup>①</sup>小邑也。肇置后唐长兴间<sup>②</sup>，由晋迄明，代有损益，卒隶泉州。

我朝雍正之十有二年，世宗宪皇帝允前总制郝公请，升永春为直隶州，而以邑属焉。邑与州近，便统辖也。其地山川匝匝（*án zā*），民朴而勤，物产足以自给，陶埴且以致远。本富者十七，而末富者十三，号为易治。然自明季屡遭兵燹，邑既凋耗。国家休养生息，垂百余年，而后民气大复。盖昔之政也桀，今之政也一；昔之疆也扰，今之疆也宁；昔之役也繁，今之役也息；昔之敛也棘，今之敛也纾。熙熙然享太平之福者，吏与民久已共乐兹土矣。

鲁令鼎梅，任邑三载，理甚无事，间搜阅邑乘，患其芜漫而缺失也，爰集邑之儒生，馆谷而修辑之，裒然成帙。上诸方伯，以序请于余。公余披览，见其体裁整飭，疑信不淆。晰疆域则奠丽以昭，考沿革则废置以辨，综经制则保义（*yì*）有纪，详土物则赋式无苛，录人物则微行章，述艺文则黎献备，几几乎称善志焉。

抑余犹有进者，民之所望于吏者，在乎政，而政之所及于民者，在乎心。《诗》曰：“恺悌君子”，诚得夫强教悦安之术，而善出之，斯下之。被其化者，渐渍而不及觉，鼓舞于不自知，将见海疆僻邑，仁让聿兴，风俗聿厚，于以仰副圣天子求宁观成之至意，讵不益光斯志哉！令其勉之。是为序。

时皇清乾隆十二年仲冬月，太子少保、巡抚福建等处地方、提督军务、兵部尚书、加三级祁阳陈大受撰。

## 序

《周礼》外史掌四方之志，小史掌邦国之志。如土地、风俗、物产、贡赋之类，靡不森然毕陈，然犹一国而书之也。秦设郡县，历代沿之，即弹丸小邑，亦有书乘。大者上之朝廷，备礼官采择；次亦俾治事者得以按籍而稽。其山川土田之广狭肥瘠，赋役之多寡，礼乐文章之盛衰，民俗之贞淫，方物之盈缩，悉了如指掌，而无毫发遗漏。志之系也，顾不重哉？

余膺简命于闽省有旬，宣屏翰之贵。自顾非才当重任，恒以耳目不及为惧，下车即访各郡邑。民间之利弊，风俗之淳薄，而尤望诸守令之靖，共恪职以相与有成也。

乾隆丙寅，德化鲁令修辑邑志成，余披阅之，见其记载详而规制备，不漏不支，足以信今而传后。尤喜德之民朴而好礼，冠裳文物，悃信明义，视昔有加。盖圣朝重熙累洽，久道化成，山陬海澨，罔不讫厥声教，重以列宪之后先抚循训导，以臻兹盛

也。夫人不天，不因天不人不成。今德山明泉清，地衍原沃，其人亦既富且穀，而其险肤儗(yuān)薄者，亦往往而有。贾子云：“移风易俗”，使人回心而向道，类非俗吏之所能为也。予所深望于鲁令尹<sup>③</sup>者，廉以率物，礼以止暴，勤宣政教，以底一道同风之隆。则其有功于德者，岂独一志哉？

乾隆十一年，岁次丙寅八月穀旦，福建布政使司布政使历城高山题。

## 德化县志序

郡邑之有志，犹邦国之有外史也。考星野、沿革、建置，纪山川、户役、风物、官师、乡贤，采咏讴、艺文，其载笔也贵详，其叙事也贵核。顾通都大邑，类有成编，若邑介荒遐，率多因陋就简，言湮事远，寢微寢泯，上之人于何采择，下之人于何则效欤？

德化建县，自后唐长兴间，旧隶泉，今辖永。地处万山之中，舟车商贾所不到。其民愿朴，安耕凿以自乐。有宋迄明，科名渐起。我国家重熙累洽，以养以教，涵濡百年之深，故生齿日繁，近则甲第辉映，文教益隆焉。

鲁君燮堂，以名进士来莅兹土。下车三年，政平讼理，百废修复。慨然念志乘之荒略，得请于上。罗名宿，广征辑，盖搜六十余载之潜德、幽光、遗文、轶典而汇为成书。其间纲目贯注，条理井然，详而有要，核而能慎。览斯志者，思盛朝之沐养，怀先

达之流风。农安于耕，士齿于学，彬彬乎衣食足而礼让兴也。夫征文考献，垂令甲而贡轺轩者，贤司牧之责也；振贤育材，砥廉节而正风俗者，使者之心也，故乐为之序。

赐进士出身、钦命提督福建等处学政、吏部文选清吏司郎中兼翰林院检讨、钱塘吴嗣爵题于桃溪使院。

## 序

余自客岁奉命观察闽南，若兴、若泉、若永，皆在所辖之境。而德化一邑，昔属泉，今隶永，距余所驻鹭门且数百里。余以巡察至其地，见其峰岚耸秀，高出诸邑，迤迤起伏，若龙蟠凤翥。而山川洄澂，又皆有襟带拱卫之势，心焉异之，以为此亦奥灵之区也。次按其城邑之建置，田野之垦辟，津梁沟浚之修整，皆井井有条，而风俗朴茂，与古为近。不禁喟然曰：“我国家声教四讫，濡文而涵化者，壤无陋矣！”以良有司处此，化民成俗，无难也。

邑令鲁君，兴废举坠，治行彰美。今年秋，乃以所辑邑志请序于余。余维邑之有志，与一统志，暨各省州郡之志，如根幹枝叶之承，缺一则有弗闻其详者。夫山川岳渎之精华，与元化之鼓荡，随时递发；而笔墨之纪载，亦因是以弥新。故前之文献，借以永其传；后之文献，赖以发其光。岁久将湮，志可勿重修也哉？

鲁君以其公余，会集群贤，搜讨旧闻，编纂类次，莫不条分

缕析，寓意深长。匪特流峙之蜿蜒，扶輿而喷薄，与夫人物育产之盛，一一如列之画图，令我若重游其地。即兹邑之所以开辟于唐宋，渐著于元明，而增兴于我朝，鼎盛于今日者，纘（zuǎn）武恢猷，煦沫而提撕之，牧是土者，与有力焉。亦可次第而想其成劳也已。

且夫徽溯于曩贤，业崇于继起，风力日上，地灵斯协。后之吏于斯、籍于斯者，睹兹邑乘，其间事业文章，炳炳烺烺与日月争光者，屈指几何人？余或稍有可述，或遂渺焉莫考矣。然则抚前人之遗韵，振千古之遐思，其宁不愧乎有奋兴也欤！自今以往，上之敦率益以懋，下之征迈益以励，表循良，蒸髦士，将使异日秉笔之儒，大书特书，以志不朽者，胡可易量？

余既嘉鲁君治行，而又喜是编考核之精，寓意之远，而足以教也。于是乎书。

乾隆十有一年丙寅仲秋之吉，赐进士出身、福建分巡海防兴泉永道、前山东道监察御史、仁和高景蕃题于鹭门公署。

## 序

天道无鬱而弗宣之理，人事无漏而不传之奇。然宣之，传之，因其时亦必待其人耳。余乙丑岁奉简命来永州德邑。呈志四册，阅之颇略。弁其首，系前邑令范君载瞻于康熙二十六年编次。计其时，盖以花甲一周矣。其间盛衰、得失变易者，不知凡几；风俗、政治因革者，不知凡几；忠、孝、节、烈湮没者，亦不知凡几。

又况旧属于泉，今隶于永，版图既已非故，乘载亦应更新，则斯志不容已于修也，余已心焉识之。会春来奉例巡查抵德。德令鲁君燮堂慨然以邑乘为己任，余喜所见略同，因举其概而陈之。

夫志，非修之难，重修为难；重修亦非难，征前信后为难。非曰纪山川而必依傍形胜也，取其无分民有分土之意也；非曰谱世系而徒纪载姓氏也，取其善足以劝、恶足以惩也；非曰录菁华而仅标榜文艺也，取其有关于民生、有裨于国计也。且学校为人才之本，风俗为政事之征，与夫民赋物产之规，庙坛享祀之典，孰是可缺而弗讲者？此其搜罗殆尽，参订无讹，又岂异入之任？燮堂唯唯。阅数月而书成，呈稿于余，余披览而竟。见其厘旧编新，山若为之增辉，川若为之增润；城池关隘屹然为之巩固，文章制度焕然为之一新。而且蓬蒿荆棘，几人为之伸眉；僻巷幽闺，几人为之吐气。不禁喟然叹曰：“斯亦六十年来人与时俱运会，一结而成之者也，岂曰联编缀牒小补云乎哉？”或曰：“是书一成，太史登之，即可以佐文明之盛。”余未知，亦不暇计。倘异日者永州诸务粗备，有事于此，且将以之为楷模焉。燮堂其有以许余否？是为序。

时乾隆十一年丙寅岁中元节，赐进士第出身、奉直大夫、知永春州事宁河刘毓珍题。

## 序

《周官》“外史掌四方之志”，《公羊疏》亦纪孔子使子夏

等，求百二十国宝书，盖即求此志也。自班氏以志为史家一体，余史承袭几二千年，阙者惟陈、李二史耳。究之，若纪、若传、若表，亦无非志，今省郡州县，各使立志，犹古《周官》外史意也。

德化旧属泉，近隶永，土瘠民贫，禾莠间出。荷圣朝厚泽，涵濡风会，駸駸日上，邑故有志，六十年来苦残缺矣。令长鲁君燮堂，慨然以搜辑为己任。书成，邮一编属序于余，余因是叹君之用心为独远也。

今夫托之空言，不如见诸实事也，夫人知之矣，昔张子韶判镇东，尝大书于壁曰：“此身苟一日之闲，百姓受无涯之苦。”今君之殷殷为此志也，曾是思闲者而出此哉？

志沿革，则必思兴自古者何时，宜于今者何术；志疆域，则必思扼要应备者何方，畝田宅里者何策；志山川，志建置，则因地制宜，小大疏密何以勿略；志民赋，志学校，则教养兼施，乐业向化，何以可久；志祠宇，则何以为无忝馨香；志礼仪，则何以为不愆典制；志武卫，则何以为不拔干城；志秩官，志科目，志人物，则又思何者副众望、协舆评，何者名不辱科第、行足垂简策。诸若艺文古迹，五行摭佚，一一朗列，亦岂徒侈听闻，实以资考镜也。余知君殷殷此志，其用心必有在矣。

往余莅永，值州界初分，亦欲饬所属商及志乘，会以告养归，不果。今重来此地，君已先获我心，何愉快如之！郑夹漈有言：“志之大原起于《尔雅》。”盖为其自天文、地理、人事，下逮金石、草木、虫鱼，条分缕举，后世志体相似，故以为托。

始非不知《周官》原有四方之志也。君今以注《尔雅》之才，得名士互相考证，叙次俱井井有法。异日大廷考文征献，将汇采四方之志，君兹帙得不入外史氏所掌哉？余乐君能仿班氏之学，以寄其心也，因于书成，述梗概而为之序。

乾隆十二年，岁次丁卯仲春望日，永春直隶州知州青浦杜昌丁题并书。

## 序

将使一代之文献列眉指掌，炳炳千百载间，何恃乎？恃有一代之史耳。然非邑各有志，则虽有良史才，亦无从按之而成书。盖史综四方之志，志备他日之史，其大小不同，同归于慎。故志者，史之原本也。天下文章莫大乎是矣！

德化邑于万山之巅，其民朴，其俗俭，其山峩峩，其川壑激，其泽多泉。衍其种，宜谷蔬。礼乐文章彬彬古之遗，宜居是邦者多伟人也。

鼎梅奉简命授令兹土，心焉数之。公余阅载瞻范君所纂邑乘，深幸前此之文献，勒有成书矣。还念邑自天崇<sup>④</sup>以后，兵火屡遭，遂失藏版。范志<sup>⑤</sup>惟凭抄本，不无因陋传讹。况自重熙累洽，而后兴废举坠，视昔有加焉，而官斯土、居斯土者，燬迹亦日益隆。盖距范令修志时，已六十年矣。即以思旧多草创，则犹有待于修；化事日新，则乐为之修；历时已久，则又不得不亟为之修也。夫幽光、潜德，譬若珠藏，等之玉韞，造物之秘也。国



有其人，没弗与传，有司之过也。将欲传之，必寄其任于生长是邦者之耳濡目染，是广而搜焉，慎而辑焉，荐绅先生事也。故忘其固陋，延邑名儒王君后山<sup>④</sup>辈，馆而修之。厘旧编新，目张纲举，得十有八卷，付之剞劂。盖甚幸甲子一周之文献，粗有成书，庶几备他年良史之采择也已。

首沿革，从其朔也。次疆域暨山川，辨守土，标其镇也。志建置，稽兴废也。若学校、礼仪诸册，又皆礼乐文章之所系焉。摭佚之志，无所取诸，取诸遗也。人物之纪，则凡有可表笔，以示劝善，善从长，古之训也。是为序。

时乾隆十有一年，岁次丙寅六月上浣，赐进士出身、知德化县事江西新城鲁鼎梅题于龙浔官署。

## 序

地周百里，民生之利病，俗尚之浇淳，经画激劝之方，系于长令。受兹职者，悉心而理。揆措置之源流，审道民之先路，鉴于前迹，亦持以敷理有方之藉也。

德化之志，自范公载瞻之修，缺有间者六十年矣。岁癸亥，黎水燮堂鲁公以名进士视篆于德，莅政四年，百废具举。披阅前志，慨然久之。间询故老，备悉遗事。既乃集诸名宿，授以意指，分析条例，若网在纲，叙次论断，归于精核简当。综一邑之内人物风土数十年间之迹，了然若指诸掌。

余观夫德邑，环山之中，层峦叠嶂，缘疆而望，四面皆低。非

舟车往来走集之区，故无浮嚣淫靡之习。民生其间，惟土物爱，风教固殊焉。造物不域，地以生才，秀灵之气，勃于溪谷，由来旧矣。兹之志也，岂徒为此间景物纪胜哉？将俾生斯土者，顾名思义，披览之下，憬然于以德化民之意。地虽僻而多才，善可风则必录。瘠土之民，莫不向义所为，经画激劝之方，于是乎在。余以谫陋，谬秉兹铎，佐公为理于是举也。睹公之治，爰载笔而为之序。

时乾隆十有一年孟秋，丙辰恩科举人、壬戌会试明通榜、德化县儒学教谕、樵川曾晋拜手撰。

## 序

邑之有志，由来旧矣。古者太史氏，乘轸轩采风问俗，登之王朝，非志则无以载。史所未备而俟其采择，故其功用殆与史等。

德邑向与吾惠同属泉之股肱县。其地多山，五华凤翥，輿图称秀丽焉。风醇俗厚，人之生斯土者，尚勤俭，砺廉节，说礼敦诗，彬彬尔雅，与泉属无异。迩来泉、永分隶，而德为永州首邑，遂与泉郡隔属。然民风土俗，犹仍其旧。

惟是邑志自兵燹后，原版无存。而旧尹范君所纂，不无因陋就简，仅存什一于千百，又缺略。六十年来，潜德幽光，未登史册。新城夔堂鲁老先生，既治德化之四年，兴利除弊，百废具举，风土人物，焕然一新。公余之暇，慨然邑乘之宜修，而因陋就简

之不足为一邑文物光也。于是集邑之绅士，相与重订而编辑之。纲举目张，灿若列眉指掌；建置沿革，源委森然；疆域山川，条理井然；礼仪学校，仿诸郡城，而制肃然；物产田赋，准以风土，而法厘然。至人物各传，显微阐幽，考善征行，视旧志所纪，独加详悉。琦尤读其龙浔一赋，意思深远，浑涵无际。举是邑之流者、峙者、洪者、纤者，矫然杰出，而幽异者无不舍盖于胸中，而流露于咏叹。淫泆之下，有与志相为发明者，洵足为一邑文物之光，而备当代良史之采择者矣。

今年春，琦秉铎兹邑，适书告成。庆是邑文献之有征，而叹先生之为功于邑人者大也。于是乎言。

时乾隆十有一年孟秋穀旦，雍正癸卯正科举人、以教谕管德化县训导事、螺阳萧国琦拜手撰。

## 序

邑之有志，将使信于今时，传于后世，上以显盛世涵濡之化，下以征草野兴起之由也。虽官斯土者分内事，然匪其人，未易任矣。我邑侯燮堂鲁老父每，莅治三年，百废具兴，政通人和。熟悉乎山川风土之大概，奢俭贞淫之大端。簿书之暇，翻阅旧志，慨然以重修为己任。盖念前此简陋之贻讥，而尤惧他日文獻之弗传，侯之心良苦矣！爰馆绅士王君后山若而人分辑之。书既成，复柬致柘浦闻碧李君子署加较阅焉。是举也，侯岂以私意杂其间哉？

夫天地精华之气，上为日星，下为河岳，而中则为人，不以德邑异也。今试仰焉、俯焉。于星分，则属牛女日月之照，霜露之坠，振古如斯也；于《禹贡》，则为扬州戴雲之高，龙门之深，振古如斯也；若夫宦迹、治行、孝友、文学、义行、节烈，地无论大小，人无论穷达，迹无论显晦，有人倡之，旋有人踵之，后先芳躅，亦振古如斯也。而侯则以善善恶恶之心，为是是非非之举，未尝厚责人，亦未尝不以圣贤望人，盖不薄今人爱古人，居然善善从长之意也。其词质，其事允，其义昭。城池公廨焕然聿新，礼乐文物灿然备具。至若武卫、摭佚之纪，又皆补前志之所未备。则是举也，侯岂以私意杂其间哉？

我德于前属泉，于今归永，不一者隶籍之更至，一者醇朴之气。圣人云：“十室之邑，必有忠信。”则今日之征文考献，又何时地之足区哉？而侯以苦心持之，大才出之，将戴雲愈高，龙门愈深，日月霜露亦因之而新且润矣。昱等不文，喜其成也，而谨为之序。

时乾隆十有一年，岁次丙寅六月穀旦。治，年家晚弟林昱  
同顿首拜撰李志昱

## 重修德化县志序

德自置县迄今，八百一十五年。宋元之代，志乘久湮。明邑先辈凌邦辉尝纂修之，年月无考。其后再修，则并其载笔之人亦失传。万历甲辰，周侯命初重修，严整有法，泉郡志多取以为

槽。越天启丁卯，桂侯葺我命邑庠士徐育元复加补辑，未及钁版而兵燹，泐更散佚莫问矣。

我朝鼎兴，文教一新。县承宪檄征志，吾宗庠士夏声摭拾烬余以应。限期迫逼，其多疏略固宜。康熙丁卯，范侯载瞻乃取其稿本重订之，以付梓人。按其自叙云：“家遗天一阁藏书，有德化旧志。”又云：“捧接宪檄，知无成书，未稔其所藏者，果万历志否耶？”而学博方公栋吉叙直云：“邑乘历创设以迄于今，无刻本。”因是邑人承误，谓志自范侯始；昌每读而疑之。以为宋政和而后，明隆万以来，邑之人才辈出，文事不宜荒陋，间于名胜处得前人留题反覆之，窃信所疑之非妄。且人物有志，而乡贤邹丁溪闾焉，他可知矣。生斯长斯，百年桑梓，顾使曩哲流风，莫之省忆。呜呼！文献既微，征信奚自？因循岁月，传闻异辞，不禁掩卷而三叹矣！

幸逢夔堂鲁父师慨然为兹邑立不朽之盛业，约八里绅士，撤旧志而新之。时乾隆丙寅二月也。师以慈父而为明师，即以大儒而为良史，于志德何有？乃蚤夜孜孜，日出坐堂皇，听民事，退辄就稿，点点画画，心裁而手定之。创著义例，援据公牍，访诸故老所传，采诸闾里所记，发残碑于棒莽，讨断简于蠹笥，上穷建创之始，中悉措施之宜，复益之以巡行之所闻见。为志一十有五，各冠以小序，加之论断，凡十有八卷。其志艺文，备录时贤者，为吾邑鼓文风也。志人物，则在德言德，宁恕毋刻。葉台山有云：“惟是非之不谬，斯惩劝之有神。固不必搜瑕掩瑜，过为吹索，而非轻于持论者所能窥测也。”越十月，授梓甫半，而

《万历志》出于郑明经淇瞻家，师亟取而参校之，鲜所异同。夫以邑人百数十年不一见之书，而完好无缺，淇瞻之功也。而证合无违，则师之心源妙契于古也。今岁丁卯六月朔告成，师集同官及诸绅士宴饮合乐以落之。有执爵而言者曰：“邑志之成以丁卯者，于今三矣，倘古谚所云‘水画丁，罗簪纓’之应乎！请赋柏梁体诗以鸣盛。”师笑而许之。

昌幸厕门墙，躬逢盛会，喜吾邑之文献得师而盛，复得师而传，后之向古者有考焉，乌可忌所自邪？若夫师之善政不胜书，其大者已略具于今志。他日太史氏当有大书特书，不一书而足者，则永誉汗青，益为诸志重也已。

赐进士第出身、吏部观政、王必昌拜手撰。

### 校 注

- ① 闽西南：即今闽中（偏南）。
- ② 长兴间：指长兴四年（公元933年）德化正式建县时。
- ③ 鲁令尹、令长：指知县鲁鼎梅。
- ④ 天崇：为明天启、崇祯两年号的简称。
- ⑤ 范志：指康熙六年知事范载瞻主修的县志。
- ⑥ 后山：王必昌的别号。

（注校 江中卫）

# 德化县志编纂姓氏

李青震<sup>举人</sup>  
浦城人

林 昱<sup>举人</sup>

连如璋<sup>岁贡</sup>

陈开材<sup>岁贡</sup>

陈时夏<sup>贡生</sup>

郑文煌<sup>贡生</sup>

黄守仁<sup>监生</sup>

谢祈出<sup>生员</sup>

陈其遇<sup>生员</sup>

涂廷观<sup>廪生</sup>

苏廷望<sup>生员</sup>

陈拱璧<sup>生员</sup>

王必昌<sup>进士</sup>

李志昱<sup>举人</sup>

郑惠琇<sup>岁贡</sup>

毛际泰<sup>贡生</sup>

林焕彩<sup>贡生</sup>

方鹏奋<sup>贡生</sup>

葉乘龙<sup>监生</sup>

张天溱<sup>生员</sup>

许应瞳<sup>生员</sup>

刘世庚<sup>生员</sup>

张应宿<sup>廪生</sup>

陈元斌<sup>生员</sup>

赖汝腾生员

周维新廪生

陈 媚生员

郭观光廪生



# 德化县志捐资姓氏

贯生

陈时夏 林焕彩 方鹏奋 郑文煌

以上各捐银六两

林凤鸣 郑玉桢

以上各捐银四两五钱

陈瑞璧 陈哲谋

以上各捐银三两八钱

徐光世 陈宗猷 陈廷芬

乡宾

生员 陈凤鸣 陈光璧 林文绵 方廷梧 林锡华  
郑文源 郑文泌 张廷镜 郑国柱

以上各捐银三两

贯生 毛际泰 陈开模

以上各捐银二两三钱

原任永安学训导 赖 铨

举人 许应曜

贯生 连国器

岁贯生 连如璋

## 监生

陈廷元	林端倬	方廷献	曾殿选	黄守仁	陈天祐
郑志仁	徐弘编	林标简	郑邦光	林元魁	许天瑞
王正奇	苏旌聘	陈天麟	林尔升	葉秉龙	许明健
苏光清	李攀龙	连黄中	林尔拔	苏鍾麟	黄安国
许振元	陈廷珠	林翘材	陈振甲	苏际盛	方福降
童起文	林际春	王继贤	林翘薪	陈元徽	黄廷佐
林起元	黄朝选	林长茂	陈自新	张元龙	陈元策
赖 钧	林文丰	赖汝起	林文明	黄振拔	郑应元
苏祖望	张文感	毛联登	林长春	方正学	苏邦俊
赖汝挺	陈鹏南	郑文镐	苏南金	林时会	赖必陞
陈应麟	赖 炜	陈元音	苏廷简	赖世爵	苏经文
陈文彬	章大纯	陈殿元	林标榜	苏龙文	林开普
曾联科	陈元沾	李经瑞	苏天爵	梁天持	方启运
林基元	苏廷瑞	章雲奇	苏廷贤	蒋天赐	林如珪
彭启泰	陈从鳌	苏廷贵	李经玺	苏廷圭	陈开荣
陈时羽	苏至元	章德辉	李文坡	林栖凤	陈元辉
李经斑	郑元焯	苏清俊	陈廷选	蒋善闻	陈大猷
林应龙	陈雲从	郑光国	许明圆	郑桂森	黄章成
陈葛元	苏清选	陈元器	郑瑞麟	张应时	陈肇元
林允贤	刘腾凤	黄廷纶	苏殿安	苏起凤	

以上各捐银二两

原任临漳县知县 王维斗

**原任枣阳县知县** 王继美

**举人** 许宝三

**贡生** 林天馥 苏可象 方鹏程

**乡宾**

连奇标 林凤钦 章星焕 陈德山 涂应魁 陈南金

许德素 章星晃 陈文华 涂元英 陈廷址 陈时捷

陈世撰 黄澄湖

**监生**

林天馥 徐启泰 陈义熿 黄元吉 苏至成 江栋选

彭振芳 许斌元 毛廷瑞 张文敏 方鹏振 陈嘉谋

林如璋 陈连璧 赖启泰 易文明 陈忠谋 许孕秀

陈廷瑞

以上各捐银一两五钱

**举人** 徐天攀

**岁贡生** 陈澍 陈栻 郑应骥 陈栢

**乡宾**

徐怀液 赖肃宇 郑振郁 赖廷抡 赖暑 曾五福

**生员** 赖必捷 苏士祚

**监生**

许雲祥 徐为邨 陈天宠 徐光岳 曾浩漪 郑必达

赖宁达 苏正雅 陈必泰 林大堪 章振文 许鸣凤

林峰鍾 许振德 陈文韬 林宏基 章魁雋 许元凤

陈大烈 许万鍾 黄守让 陈必烈 许明哲 陈廷芳

苏登瀛	李廷勋	张文胜	苏廷纶	连文昉	陈正泰
陈光受	许天祐	章华国	苏光禄	李廷宝	苏希仁
林德盛	许玉宝	苏士莪	刘祥华	李廷华	曾居元
章祖德	林光祖	苏腾蛟	蒋天爵	苏宜春	黄梦卜

以上各捐银一两

**岁贡生** 李献馥 苏焕文

**乡宾**

徐国生	刘日章	刘日靖	徐仕若	林仰台	许光炬
徐为邨	郑克峻	凌存仁	涂嗣燧	陈时英	

**监生**

连德馨	林凤翔	董瑞显	陈开楚	郭元俊	凌青雲
陈瑞凤	蒋升闻	陈苍璧	许大佐	涂元章	涂振凤
章荣国	苏炳文	许拔德	陈时敏	许扬德	

以上各捐银七钱五分

许玉鸣 黄光祖

以上各捐银六钱

**岁贡生** 郑 暹 刘元鐸 赖德宣

**乡宾** 张守轩

**监生** 苏玉书 黄廷珪 涂振丰

以上各捐银五钱

**耆民** 林起文 陈珍誉

**监生** 曾正选

以上各捐银四钱

乡宾 毛日章 毛大玃 毛一夔

以上各捐银二钱五分

乡宾 涂允亮

生员 涂应昌 涂有淮

以上各捐银一钱

# 德化县志卷之一

## 旧序

郡若邑各有纪乘，微论减省烦剧，皆以风土之宜，人物之考，笔而存之，征信于当世，以示来者。此盖权舆于《禹贡》、《周礼》之职方，今班孟坚之志地理所自昉矣。

吾闽中独温陵称形胜奥区，人文渊藪，龙得其辖下最古。治代各有书，明兴纂修者再，然邈邈（古“往”字）趯趯（lùcù），旁魄不足征信示后。

邑侯南城周命初先生，下车观风考俗，抚恤民隐，振作士类，一时斐然。向风三年，满其秩以最考，迁荆襄独山刺史。以去时，余家伯备员邑博士，亦以秩满迁西平。命翁怆然曰：以余之不穀，滥竽斯土者幸三稔于兹耳。目之所睹记，若人物之倣倪，若风教之渐濡，若山川之伟丽，岩峦之幽奇，较之往代，更宏巨而蒸鬯，乌可令其文采不彰耶？乃引新斥陈，裒益而纂修之。以一编授予，而征余言以为序。

余惟志者志其事而摭其实也。《禹贡》所纪田赋高下，坟垆黎赤，以至筱簞菌箨龟鱼之细；《周礼》则及于山藪、川漫、男女、

畜扰之粗；而班孟坚则又详于政治、风俗、奢俭之故。总之，于奠民生、益治道而要其大，则以经济翊世、行谊表著当年者为川岳重。

余卒業斯编，审观其郊垌绣错、里巷嶙峋之谣俗，因以知厝注所宜，控驭所急，用以恢牧爱而畅仁风。历览其峰峦之嵌崖、滢泓而渊澂，又足以广其神识，而助发其渊轶之思，备考其縫掖冠烏之伦。如宋苏欽之洁已奉公，林扬休之调闽政绩，郑轮、郑軫，林洽、林瀛并以兄弟登第，所至有冰檠声，为当代仰止。明则有凌侍御①风裁，敢言人所惮避。郑计部，金玉君子，时论推戴焉。单合浦②之冰操高尚，林乐会之保障琼海，林南陵之却例金、清宿蠹，均之迈越时流，足传汉循良者，诚未易缕指也。此其倣傚俊伟之行，真足扬挖千古、彪炳来祀，曾何不擅其奥区之胜，挈其渊藪之精耶？周侯于此，独加注存，诚有所见于其大矣！后之览者得是志，而以发鹭翹（dao），扬凤彩，戴雲、五华若增而高，丁溪、龙门若浚而深，励世风、征文献，尚亦有赖哉！又何所论其减省、其烦剧，而不与上国齿也？斯编也，即轶班氏，而上与《禹贡》、职方并垂不朽，夫谁曰不然？周侯讳祐，江右南城人，字君眷，命初其别号云。

明万历甲辰，赐进士第、湖广参政永定沈孟化谨题。

夫载事之书，取传信不取传臆（yàn），而邑志更重。图绘山川，描写人物，旌既往，励将来，于是乎券。吏兹土者，举废葺颓，阐微扬幽，讨实录而参核旧编，勿沿讹袭舛，前后相蒙，

亦是当官应为事。

余下车览龙浔志，反覆披阅，人文递衰递盛，山川风景亦因递换。自周命初甲辰之役，历二十余祀，多宜举、宜葺、宜闾、宜扬，父老乡绅所传告者，或鼎新，或复故，则微禄薄饷，无不可捐。与士民规置，两岁缮营，自谓可幸无阙。然遗芳隐迹，尚未表彰，窃欲取旧志而参补未备。乃簿书鞅掌，未遑旁及，忽而卧病，倦骨渐生，请乞归田里，尝以一局未了为歉。至三四请，而上弗许，仍守篆视事，而鞅掌如前日，竟不获寄心毫楮，修文人之业，第当人文浸昌浸炽，计不敢以此局诿后人。一日，命诸生操觚从事，诸生逡巡谢不敏，必欲借笔名公。余固谓忠孝节义，亦其人自足重耳，岂以名公重耶？学者游精翰墨，终岁搦管，它日纂史翼经，直行其志，岂异人任？而耳目前睹记，不能扬扝，必乞言文致，厚自谦让为？博士林先生乃晋学院屢旌德行，生员徐君育元，篆笔受事才匝月，汇次成编。其薰白余，余因而参核之，厘舛彰幽，千百年古迹芳名，恍从烟草消沉中顿为生色。向者簪纓纪世，兹复蝉联，未易计量。行且与大国驱驾中原，岂第政和以后诸君子哉？若前人已经扬厉，不必赘为润色，即今采摭增补，不敢谬为铺张。只此三代直心，传信而行，后有作者，考献征文，抱心相印，则此志为左券。

明天启丁卯，文林郎知德化县事长林蔭我桂振字撰。

志何昉乎？盖左史倚相能读三坟、五典、八索、九邱之书。



九邱者，九州也。九州之有志，自昔已然。迨后州分为郡，郡分为邑，郡有纪，邑有载，总括其旨，皆属为治之要在乎不没其实事，以传信于后世耳。

我皇清宅中出治，迈古轶今。自世祖章皇帝泊我皇上御极以来，剪除暴逆，海宇又安，文德诞敷，礼兴乐作，亦既润色鸿业矣，犹以未臻尧舜之治，内外大小臣工，皆慎选贤能，责其治，以加于民，殆与上古选德治民之道不谋而合也。间有不贤如余者，亦滥膺兹选。

丙寅秋八月，来守温陵。顾瞻形胜，洵为闽越奥区，人文之盛，可与江左齐驱。乃欣然而喜，复又惴焉而惧。盖惧德寡才鲜，勿能率属致治，以滋不职羞。

是岁冬，浙甬范子载瞻，以巍科世胄除德化令，计深虑远，视邑事如家事，慨然以崇文教、正士习、厚民俗、课农桑、恤孤弱、诛豪猾为已任，而乐尽司牧之道焉。继则相厥所宜，揆厥所急。县署自宋熙宁迄今，递毁兵火，虽几费营缮，究未复旧观。载瞻兴废葺坠，乃捐秩禄，创建堂宇及两廊庑，以肃民瞻。宾阳、北镇二楼，久沦榛莽，亦俱构材整备，以栖汛卒，民益赖有卫焉。若是者且勿论。爰思德化自五代始名县，历宋、元、明及我朝数十百年，其间政治之得失，人物之盛衰，山川之异同，风俗之奢俭，悉载邑乘，皆关切治道，尤宜详核。不徒拘牵故事，徇名失实，必期芟汰芜杂，标领典要，上禀王纲，有当一代令甲而后已。

于是延致名儒，参酌考订，极其周密，草成复加咨讨，博稽

編簡，稍涉舛戾者，咸为厘正。若山川，则戴雲之池，九仙之山，皆各探其本源，辨析无遗；若县长吏，则宋元之有功利于民者，率多网略，皆搜辑补入；至于学校、选举、忠、孝、节、义、文章、词赋，必核名实相副者，择焉而登；妖祥变异出于不经者，疑宁从缺。矢公矢慎，卓然成书。

噫！夫志之纂修，岂易言哉！恒有人曰：“斯举也，必超于人方可任，否则必不称。”又曰：“必徇于人始可行，否则必得谤。”以故中辍者多。载瞻有见于此，是以信之笃而成之敏也，遂竣刻，以全篇请余序。余深喜载瞻服官甫数月，辄著成绩，历历可观者如是。夫能谋始者必克慎厥终，将见次第展其经济，以实事显于时，信于后，岂仅此数端而已？余虽不敏，亦将相率勉励，冀以共体圣天子欲臻治尧舜之意，庶几仰佐千百之什一，诟不快乎！遂忘荒陋，率以数言弁其首。

康熙二十六年丁卯元月上浣，中宪大夫知泉州府事古燕郝斌撰。

夫志者，所以载一邑之政事、民物、山川、田赋之大纲也。格处四明。家遗天一阁藏书最富，搜览简编，阅德化旧志，固知邑处万山之巅，乏土产，鲜人物，无丰功伟伐纪载旧乘。然而风美俗厚，民庶殷富，彬彬一礼乐名区地。

丙寅冬，恭膺简命来莅龙浔，窃见土俗非故，人民稀少，不复曩时纪载，心窃疑之。以为所见不逮所闻，思得一邑志以考证

之。不意捧接宪檄，知无成书。适施张之暇，有郑广文、方学博以一篇授余，取而读之，见其歌诗奏诵，彝教井然，采择编纂，更多详备，乃知二公之留意志事者久矣。

今辂承乏兹土，虽政绩繁多，不遑厘举。无已，不得不襄厥事；无已，不得不从公余之顷，切实而考订之。如星分则属牛女，封域则连七邑也。邑分为里者八，里分为社者三十有九也。山则耸峙于矿岐<sup>③</sup>，水则朝宗于省会也。津梁关隘，兴废靡常；物产民风，简朴如昨也。城垣公廨，昔罹水圯，不复旧观；学校坛壝，近赖人功，得瞻巍焕也。典礼惟循乎旧章，田赋悉遵乎新制。序记词赋，宁切无华，古迹旧闻，宁简勿溢。此邑之大概，去古不甚相远者也。

若夫远稽人物，则如陈仆射之勋名，著于史册；邓德安、张龙州之事业，貽于社稷；绪马平<sup>④</sup>之道学，传于奕祀；黄义乌<sup>⑤</sup>之教泽，洽于人心。官师之不容或略者，类如斯也。至里党先达称表表者，凌侍御之功伟然，赖太史<sup>⑥</sup>之文炳若，林程以尚义而划丁溪，郑沛以谦逊而号君子。其他或以文华著，或以长厚称，或以孝友重乡评，或以端方式颍俗，以至闾仪淑德，逸躅高风，指不胜数。是与曩时之所习闻者，斐然大异，乌得不亟为表彰、律后进而扬先德哉？

爰定卷帙，付之枣梨，阅三月而书成。辂因是更有思焉。夫考订编纂，辂之责也；搜罗采辑，缙绅先生事也。使异日者采鞞轩，登史馆，俾作者慨然叹慕，曰：“是志也，事核而该，体严而备，蔚然为一代信史之所资。”则皆属绅衿采辑之功，而非辂

之所敢居也。是为序。

时康熙二十六年八月，德化县知县四明范正轸载瞻氏题于龙浔官署。

自一画闢出文字，而天地、山川之奇，无不尽泄于人间，故雲鸟纪官则笔之，坟典传心则笔之，举从古神圣之聚精会神，遂赫然在人耳目。《禹贡》之为书也，敷土随山刊木，奠高山大川，至九州之贡，道士色贡筐与田赋之上下，锡土姓，声教讫于四海，无不毕载，以成天下之大观。《周礼》之为书也，辨方正位，体国经野，设官分职，以为民极；而冢宰、司徒、宗伯、司马、司寇、司空之中，纤悉不遗。后人因其用字奇古，《考工记》之字又聱牙而不可读，谓此书出于刘歆。尝从扬子雲作奇字，故用以入经，祚隆见《周礼》典雅奥深，垂世立范，实悬日月不可刊之书，非《吕氏春秋》、《淮南》、《鸿宝》所敢追奔颡颥，岂刘歆辈之所能办也乎？是知时有今古，事有创因。圣君贤相之经营，一道同风，固与世推移而汲汲著书立言，弗忍历诸久而磨灭，其心则一矣！

德化，岩邑也。隶于温陵，处万山之中，与尤溪、大田、永福、永春相接壤。然地脉忽而耸峙，俯临他邑，故由来人文每多俊伟超奇，地灵人杰，是耶？非耶？独邑乘历创设以迄于今，无刻本，录写相沿，弗能遍也，恐弗能久，洵此地一大缺憾事也。

喜邑侯载瞻范先生，以巨宗名儒，携宓琴鼓龙浔之三月，殷

然念之。课农训士之暇，集缙绅、耆老、诸生，网罗旧闻，取抄本而手自校，脱者补之，误者厘之，剞劂劳深，兴晨继晷。图书业就，倬汉章天。环邑无贵贱，通（yù）观厥成，相与庆之歌之。今展卷犁然，自礼乐兵农以及于祥异仙释，细大毕收，创将来未有之举。德邑缺憾，至今日而乃无憾。美哉！始基之矣。后有同志薪火相传，踵事增华，历诸久自不至磨灭。此书直与天壤相敌也。

祚隆闻山川清淑之气，不锺于人，则锺于物。然物虽浑金璞玉、珍禽异兽、奇花文木，不得与人等。故朝廷之所褒崇，童叟之所传诵，竹帛钟鼎之所铭勒，率于人为荣。是以忠臣孝子、仁人义士、烈女贞妇，为天地立心，为国家植纪，为宗族邻党流芳。凡宾客往来其地，莫不停车驻足，存则指其门庭，曰：此庐是某之所居也。”歿则指其窆窆，曰：“此冢是某之所藏也。”徘徊顾望而不忍去。所谓有仙而不在山之高，有龙而不在水之深。隶之于字，刻之于版，达之于通邑大都，是天地间一幅莫大文字。祚隆深望德邑山川人物之所可纪者，此也。

刻成，载瞻先生命序，濡毫盥手，于是乎言。

康熙丁卯孟秋，德化县儒学教谕方祚隆撰。

志何妨乎？考列国之风，山川、人物、政治、兴衰，皆具其志乘。权輿乎汉班孟坚作诸志，典贍精详，称一代良史，非郡邑乘比。然志名始此，后有作者，即志一郡一邑，当以一代良史才作之，始足信今而传后。

德邑之设，七百余年。志修于凌邦辉侍御，后庠友王夏声搜辑补之，尚多阙略。今邑侯载瞻范父台，两浙名家，斯文哲匠，弹琴莅德，取邑志新之，考订修饰，刮垢磨光，弘纲细节，灿然具备，且周咨博谋，汪远亦以末材佐一得焉。书成付剞劂，以垂不朽。

盖侯有良史才，前司铎秀水，其邑志皆出手裁，业已悬诸不刊。今取合德志读之，典贍精核，不让班史。曾南丰所称“明足周万事之理，道足适天下之用，文足发难显之情”，殆其兼之。虽然，坐而言，何如起而行，古来有学有守之士，出而司牧，地无论剧易，事无论大小，皆必办之。以长才临之，以小心熟悉其风土人情，措置施設，以展经纶。如国医于人，洞见腑脏，孰无病而宜五谷，孰有病而宜药石，皆实试之而辄效。如志所载，莆田陈公之经国劝农、隆安林公之建塔浚溪、奉化应公之劝奖士类、昆山秦公之独断建学，类皆以小心长才，因乎地，宜乎俗，熟悉风土人情，措置施設，以展其经纶者也。兹志之修，必详必慎，小心长才，于焉见端，而不徒尔也。


侯为人温和宽厚，接士民蔼然如家人父子。初下车详咨民隐，风土人情熟悉于心，而传之于笔，笔之书，即以见诸行事。尝取上谕十六条为之解义，家喻户晓，亶亶（wēi）忘倦；且勤于课士，累月论文校艺，不少休力，以兴起教化为己任。上佐圣天子右文之治，洵足与陈、林、应、秦诸公辉映先后。然则兹志固足信今而传后，而力行善政，以期于必传，则后之视今亦犹今之视昔也。汪远乐与观厥成，而并及之。谨序。

康熙丁卯仲秋，邑举人林汪远撰。

### 校注

- ① 凌侍御：指明御史凌辉。
- ② 单合浦：即单辅，曾任广东合浦知县，故名。
- ③ 矿岐：应为矿山岐。在本县美湖乡阳山村，与永春、大田交界。
- ④ 绪马平：即知县绪东山，广西马平人。（见民国版《德化县志·职官宦绩》）
- ⑤ 黄义乌：即知县黄承讚。浙江义乌人。
- ⑥ 赖太史：指赖垓，邑之名人。（见乾隆《德化县志》卷十四人物志明刘五伦传略）

（校注 江中卫）





德化縣形勝全圖

德化縣形勝全圖


卷一

全圖


上














縣署圖



名不果示

三


學宮圖

德化縣志卷之四

北序殿








戴雲晴峯



卷一

圖

七



德化县志

九仙石室


卷一

繪圖

下













































雷峰夕照

德化縣志

邑人查奉錦謹識補刊



# 蕉溪温泉

陸陸天地遠  
 際論為炭為  
 鐘氣運紘四  
 西名山皆入畫  
 一溪泉水獨留春  
 采遊雅愛逢任士  
 出浴何款縮太真  
 願作湯盤能自  
 警人人洗滌日常新  
 里人查奪錦繪咏  
 附刊



金雞

洋行

涼傘寨

山尖岐

飛環岩

湯家

泉

池

泉

池

泉


池

泉

池







# 德化县志卷之二

## 沿革志 有表

德化隶永春，新属也。前此名，仍今号，地属泉州。五代以前更析未定，而隶属靡常，亦时势使然耳。正域辨方，必溯所自，盖按图省疆者，首宜稽及也。志沿革。

《禹贡》淮海维扬州，周为七闽地。《周礼》职方氏辨邦国都鄙，以及七闽九貉之人。

郑康成注曰：“闽，蛮之别也。楚熊绎五世孙熊渠之后叔熊自濮如蛮，后子孙分为七种，故谓之七闽。”夏少康封庶子无余于会稽，二十传为勾践。又六世至无疆，为楚所灭。子孙播迁海上，或为君长，谓之百粤。七世至无诸，为闽越王。无诸姓骆。

秦始皇并天下，取百粤，置闽中郡。闽越王废。

汉高帝五年复立闽越王，都冶。元封元年，迁闽越民江淮间，虚其地。其逃亡者，自立为冶县。

建武间，分冶县为会稽、东南二郡都尉。

建安初，置侯官县。即今福、兴、泉、漳四府，龙、永二州。属会稽南部，复析侯

官之北乡，置南平县。即今延平府。

三国 吴永安三年，析侯官县，置建安郡，而以侯官属焉。

晋太康三年，属晋安郡。析建安，置晋安，即今福州。增置原丰等县。原丰即今闽县。

长乐、怀安、福清县地。侯官即今侯官、古田、闽清、永福、福安县地。

南北朝 宋属晋平郡。泰始四年，改晋安为晋平，寻复晋安。

梁天监中，析晋安郡地，置南安郡。即今兴、泉、漳等府地。侯官仍属晋安。

安。

隋平陈，省侯官，併入原丰，改为闽县，属泉州。开皇九年，改晋安为泉州。

州，废南安郡属焉。其地仍是今之福州。大业初，复为闽州，三年改建安郡。

唐析闽县，复置侯官县，属建州。武德元年，改建安为建州。六年，为泉州，析南安，置丰州。

贞观元年，省丰州，併入泉州，即今福州。嗣圣十六年，析泉州，置武荣州。景云二年，改泉州为闽州，复改武荣州为泉州，是为今之泉州。开元十

三年，改闽州为福州。

开元二十二年，经略使唐修忠招谕南平山洞酋长高伏来归。

二十九年，开拓置尤溪县，属福州。后属延平府。

天宝元年，改福州为长乐郡。

永泰二年，析侯官、尤溪地各一乡，置永泰县。宋崇宁九年，改永泰县为

永福县。

贞元中，析永泰之归义乡置归德场。

五代唐长兴四年，伪闽王延钧升长乐郡为长乐府，升归德场为德化县。

晋开运二年，伪闽以福州为东都。领福、泉、建、汀、漳、镛、鐔七州，未几，为南唐所灭。

汉乾祐元年，南唐改潭州为剑州。二年，升泉州为清源军。析尤溪归剑州。割尤溪之常平、进城二乡益德化，归清源军。

宋乾德二年，改清源军为平海军。太平兴国三年，复为泉州，领县七，德化居第四。南安、晋江、同安、德化、永春、清溪①、惠安。置龙浔驿、上壅驿。

后俱废。

元至元十五年，改泉州为泉州路。县属仍旧。设东西团、清泰里、小尤、杨梅团四巡检司。明初因之，洪武二十年度。

大德二年，改泉州路为泉宁府。至正十八年，立泉州分省。

明洪武元年，改为泉州府，领县如宋，德化居第五。晋江、南安、

惠安、安溪、德化、同安、永春。置高镇巡检司。万历间裁。

国朝因明之旧，以县去府远而丁粮少，列为末属。晋江、南安、惠安、同安、

安溪、永春、德化。

雍正十二年，总督郝玉麟奏升永春为直隶州，割德化及延平

府之大田县隶焉。大田县，明嘉靖十四年，割德化黄认团及尤溪、永安、漳平三县地置。

年代	总 部	郡直隶州	县
唐武德元年	泉州都督府	建州	
六年		泉州 <sup>今福州</sup>	
贞观元年	岭南道	泉州	
景云二年	闽州都督府	闽州	
开元二十九年	福州都督府	福州	侯官 尤溪
天宝元年	江南东道 <sup>治苏州</sup>	长乐郡	侯官 尤溪
上元元年	福州节度使	长乐郡	侯官 尤溪
永泰二年		长乐郡	永泰 <sup>侯、尤、析各乡</sup>
大历六年	福建观察使	长乐郡	永泰 <sup>今永福</sup>
贞元元年		长乐郡	永泰 <sup>归德场</sup>
乾宁三年	威武军节度使	长乐郡	永泰 <sup>归德场</sup>
五代梁开平	王氏据	长乐郡	永泰 <sup>归德场</sup>
唐长兴四年	王氏据	长乐府	德化 <sup>归德场升为县</sup>

年 代	总 部	郡直隶州	县
晋开运二年	王氏据	东都 <sup>今福州</sup>	德化
汉乾祐元年	南唐据	清源军 <sup>今泉州</sup>	德化
周显德二年	南唐据	清源军	德化
宋乾德二年	威武军节度使	平海军 <sup>泉州</sup>	德化 <sup>置龙得驿</sup>
雍熙二年	福建路	泉州	德化
元至元十年	福建行中书省	泉州路	德化
大德二年		泉宁府	德化
明洪武元年	福建布政使司	泉州府	德化
国朝顺治三年	福建布政使司	泉州府	德化
雍正十年		永春州	德化

论曰：“德化于唐为归德场，壤错五州，犬牙相入。自延钧建县，而邑名以定。虽山多田少，舟楫难通，然东抵省会，南接兴、泉，北通延、建，西达龙、漳，亦一要区也。休养生息，不易民而治，端在良司牧哉。”

### 校 注

① 清溪：今安溪縣。五代周顯德二年，南唐置清溪縣，屬泉州，宋因之。宣和三年，改為安溪縣。

（校注 江中衛）



# 德化县志卷之三

## 疆域志

画野分疆，非但以域；民也生斯，聚斯，宅畋幹止。长民者，有经理之责焉。德化处万山中，寒暖之候视外邑稍殊，而封域四暨可耕之土，什不二三，民居其间，习尚亦别。验天时，辨地利，观民风，留心司牧者，不藉有所考欤？志疆域。

## 星野

星家论闽中星分，其说不一，大都以闽为越地，乃《禹贡》扬州之域，而以星纪之次属之。按星纪为牵牛、斗、婺女三星于辰在丑谓之赤奋，若于律为黄钟。斗建在子，为吴越分野。《晋书》载：“魏陈卓云：‘吴、越州郡，九江入斗一度，庐江入斗六度，豫章入斗十度，丹阳入斗十六度。会稽入牛一度，临淮入牛四度，广陵入牛八度。泗水入女一度，六安入女六度。’”宋《武安志》载：“郑宗疆《星经》云：‘周天之数，每星一度，辖地一千四百六里有奇。’今考闽中九郡，汉时始隶职方，属会稽南

部。其地西届樵川，西北尽柘浦，东抵长溪，而清漳襟带岭南，距会稽俱不上数百里，则九郡星分，当並隶牛一度①。”德化疆域上接延、建、邵、汀，下达福、兴、漳、泉，适当全闽之中。闽之星分，视会稽邑之星分，视九郡可耳。

## 封 圻

德化县在福建布政使司西四百一十里，永春州北三十五里，原隶泉州府属，距泉州府一百八十五里。

县治阆阆②之境：东达宾阳门，西达金成门，相距一里许。提封之境：东极清泰里，西极尤中里，南极大剧岭，北极梅上里，广一百八十里，袤一百二十里。四至之境：东八十里逾张地岭入永福界，西一百里逾山坪头入大田界，南二十里逾虎豹关入永春界，北一百里逾大官岭入尤溪古迹口界。四隅之境：东南至半林格八十里入仙游界，至塔岭隘十五里入永春界，至天马格二十里亦入永春界；西南至儒山石牌格三十里③，至苏坑隘二十里④俱入永春界；东北至清从山五古村一百二十里入永福界；西北至蕉岭隘一百里入大田界，至石牌格一百里入尤溪念九都界。周围计八百里，皆崇山峻岭，岩谷幽邃，人日行不过三十里。官路所经村落，无栉比之家。小径杂出于山谷间，舆马不能至。

## 形 胜

县治枕山凭溪；山曰龙浚，盘若睡龙；溪曰浚水，环如腰带。

县前一水南来，会成丁字。水靛⑤而不激，山膩而不峻。双鱼揖于前，黄龙、大龙翼于后。凤翥南朝，绣屏北拥。妙峰镇其左，大旗护其右。西有双阳、斤山⑥之秀，东有七台、石牛之雄。其形胜故甲诸邑。

邑山发脉于尤中里矿山崎，从西方来。耸起双阳，为永春、晋、南、莆仙诸邑之祖龙。自西而东⑦则戴雲、九仙，为永福、闽清诸邑之祖龙。由戴雲南下三十里为邑治，盖下游之源头也。水皆散流外邑，凡南行诸水，悉东注于永福，北行者亦转而归永福。西行者则入大田，达于尤溪。

## 里 社

宋编五乡辖十里十一团：

集贤乡 县西北，  
辖里三； 永丰里、新化里、雲峰里 明洪武间，  
併入新化。

归德乡 县东南，  
辖里三； 灵化里、归化里、惠民里。

永宁乡 县东北，  
辖里三； 嵩平里、清泰里、善均里。

常平乡 县西北，辖  
里一、团七； 贵湖里 明洪武  
间裁。 东团、西团、上壑团、下

壑团 “壑”今  
改“涌”、杨梅中团、上团、下团 明洪武间，  
併入中团。

进城乡 县西北，  
辖团四； 小尤上团、中团、汤泉上团、下团。

明洪武十四年编五乡，辖一隅、八里、十团、一都 后存一隅、二

里、五团。

归德乡 辖隅一、里二，后存隅一。 坊隅；归化里 永乐十年，併入坊隅。 灵化里 永乐十年

併入坊隅。

集贤乡 辖里三，后存一。 永丰里 天顺六年，併入坊隅。 新化里、嵩平里 永乐十年，併

入新化、善均。

永宁乡 辖里三，后存一。 善均里 天顺六年，併入清泰。、清泰里、惠民里 永乐十年

併入永丰。

常平乡 辖团五，后存三。 杨梅上团、下涌团 天顺六年，併入杨梅上团。、杨梅中团、

东团、西团 永乐十年，併入东团，为东西团。

进城乡 辖团五、都一，后存团二。 汤泉上团、汤泉下团 永乐十年，併入下涌。 小尤

上团 天顺六年，併入新化。 小尤中团、黄认团 嘉靖十五年，割属大田县。 十八都 永乐十年，併入。

小尤上团。

国朝因明之旧隅、团俱改称里，编八里，辖四十八社。康熙十八年以后，裁城内上市、下市二社，併城外上下市等社，实存三十九社。

在坊里辖社八；高卿社原城外上市、大脚、高洋三社并入。、瑶市社、原城外下市、瑶台二社并入。  
 英山社、良泰社、蔡径社、石杰社、茅岐社、上林社。

新化里辖社五；科荣社、后格社、李山社、上翰社、尊美社。

清泰里辖社六；峰魁社原上峰魁、下峰魁二社并入。、南埕社、萧坑社、邱坂社、  
 登龙社、不老社。

梅中里辖社五；葛坑社、梅峰社、横溪社、龙濠社、淳湖社。

梅上里辖社六；下涌社、曾坂社、桂阳社、田地社、汤头社、  
 汤岭社。

东西里辖社一；东西社原东社、西社并入。

汤泉里辖社四；小铭社、大安社原大铭、常安二社并入。、桂林社、丰厚社。

尤中里辖社四；实丰社原实丰、罗坑二社并入。、彭溪社、路口社、山坪社。

## 市 廛

县内上市 县内下市

南关市 东关市 西关市

赤水格市距县北三十五里，尤溪、大田二县分路于此。

## 风 俗 附

邑介丛山，地高而寒，岩谷间阳曦罕照，岚气鬱深，晨起山村尽失。每值阴雨，霾雾霏霏，迷离竟日。春夏之交，梅雨连旬。盛暑时，西北诸里有被不撤絮者。八九月间，人婴瘵症，十室九卧，鲜知医药，亦不为害焉。

邑无平原田，率依山陔岸，崎岖层梯叠级，冬夏贮水如池。岁惟一收，间有两熟者，冬则乾之。水者涂泥，乾者疏理。土皆黑壤、赤壤，间有白壤，鹵不可治。泉源清峻<sup>⑧</sup>，灌溉不劳，亩涂高仰，潦弗为灾。近山多雨，浹旬晴霁，即苦旱，年无甚稔，亦未尝大荒。产谷仅资民食什之六。迺来栽种地瓜，蔓延陵阜，又勤种麦，可补民食什之二。余则取资于外邑，而舟楫不通，负贩艰难矣<sup>⑨</sup>。

农居山谷专事稼穡，妇女辟绩之外无他业。园蔬、池鱼、山果仅取自给，弗鬻于市。蟹、蛤、鱼、盐皆从外邑转贩。蔬果荐新亦自州治而来。百工艺事多藉外人。市无巨商大贾。稍有力者营田积谷，以图温饱，不肯出资营什一之利。细民肩佣负贩自食其力，故无万金之户，亦鲜饥饿之人。黄冠、缁衣、乐工、厮役，众咸贱之。游手、偷儿则尤少云。

士风在宋政和而后称极盛，入明稍替，化、治以降，闒焉无闻。隆、万以来，人咸知学，科名日振。

国朝文教覃敷，科第后先辉映。州县试士常数千人，以五经

应乡闹者，甲于诸邑。士以笔砚为恒产，教授为生涯。穷村僻壤有塾学，稚子不任力作，概令读书，虽樵牧童竖，罕不识字者。

邑俗俭啬而有仪，衣服粗朴，墙壁萧条，乡民聚族而处。有客，族众咸具衣冠出拜揖，致茶，供果品；偶或失礼，众面訾(zǐ)之。亲邻有庆，辄走贺，宴集为乐，不精饮饌。疾病死伤相恤，丧未卒，哭不敢解颜。祭祀必丰洁，岁节、忌辰皆有荐。惟冠礼久废，婚者不亲迎云。

迎春日，老稚竞看土牛，群集于云龙、龙津二桥。元旦鸡初鸣，男女盛服，谒堂拜祖先及所祀之神，爆竹焚楮，质明驰贺亲邻。越四日，陈设酒肴俟神降，谓之接神。上元作灯市，三五家共结华表于通衢。十三日放灯，十六日收灯，谓之灯节。节后沿村落议书社礼，遣子弟从师。三月上巳，用枫叶染秫米为青饭。端午饌角黍，饮菖蒲雄黄酒，沿门插蒲艾以辟邪。七月中旬，家家祭祖，男女思慕，真若祖考之来格。有外出者，虽远必归。八月俗传墓门开，各祭于墓。冬至捣糯米粉为馄饨子，荐于家堂。十二月二十四日，扫净屋尘，用蔬菜、酒、果祀神及灶，谓之送神。除夜祭祖，谓之辞年，令稚子爆竹燃炬守岁。一年风俗大略如此。

气候视州治每迟二十日<sup>⑩</sup>。村民罕用通书，惟观树芽、听鸟声以定播种之期。潦暎(hàn)丰歉之兆，都有口诀，大略亦可纪焉。俗自元日顺数至八日止，一鸡、二犬、三猪、四羊、五牛、六马、七人、八谷，若其日天色晴明，则所属之物必蕃，否则灾。立春后繁霜则多旱，俗云：“春霜三朝透，水田可种豆。”

四月芒种，望晴雨以占岁，云：“芒种雨，火烧土；芒种晴，水流坑。”是月二十六日，最宜北风，相传云：“熟不熟，但看四月二十六，北风吹过南，无钱亦去担，南风吹过北，有钱余无谷。”夏秋晴雨，则卜夏至，云：“夏至不转雷，大水十八回。”又云：“六月初三雨，七十二云头。”言多骤雨也。冬来晴雨视重阳，云：“重阳无雨一冬晴。”若亘寒则占冬至，云：“冬至在月头，严寒在年兜，冬至在月末，严寒正二月。”此所谓田家五行，其余方言俚语不可胜载。

邑无烧香号佛邪教，妇女不登山游寺。而俗最尚鬼，乡村各立小祠，四季祈福，岁节展祭，新春张帜鸣锣，迎演神像，诞日优觴。四月八日，相传太子佛诞，浮屠氏托名浴佛，遍走闾巷。七月，乡民广结盂兰盆会以荐亡，谓之普度，各家岁首延巫祈禳，锣鼓相闻。偶沾疾病，轻则召巫行符，重则迎神取药，少延医者。此风不息，盖有自伤其生者矣！若夫亲丧，多用僧道，名曰“填还功果”，则大义未明也。至于乡里难处之事，每相率而誓于神，以了其局，则又神道设教之遗意，未可概以为讥也。

邑俗负气而好争，计较锱铢，报复睚眦。闾巷细民咸持门第以推流品，动辄举奴隶为诟谇，辨曲直，惟期取胜。是在贤者倡以礼让之风耳。至于风水之说，溺惑尤甚。溺女之习，亦多有之。此则士君子所不乐道者，愿深思而亟转之也。

邑有畬民，以钟、蓝、雷为姓。按：《汉书》云：“盘瓠，帝誉之畜狗，负少女入终南山，止石

穴中，生六男六女，自相匹配。织绩木皮，染以木实，以为服饰。楚粤为盛，闽中山溪高深之处，间有之。槃、蓝、雷，其种类也。”今德化畬民无



祭姓。其鍾姓者，未详所自始。三姓交婚。女不笄饰，裹髻以布，男结髻，不巾帽。随山种插，去瘠就腴。于深山中编茅架木为居，惟了山主赁税耳。《万历志》称：“其嫁女，以刀斧资送。人死，剝木纳尸，少年群集而歌，擘木相击为节，主者一人盘旋四舞，乃焚木，拾骨浮葬之。将徙，取以去入。”

本朝遵制编保甲，从力役，视平民无别，惟岁时祭祀、死丧，尚仍其旧。迨来与土民联婚姻，改其焚尸浮葬之习，亦足见一道同风之化云。

论曰：“德邑幅员辽阔，地瘠民疲，农勤稼穡，士尚文学。司政教者，诚虑周于下而计其盖藏，行修于身而示之礼让，则唐、魏之遗风不屑屑道矣。夫移风易俗，诚非俗吏所能为，然有居民之责者，政未可诿为异人任也。”

### 校 注

① 德化隶会稽牛一度，会稽即今浙江省绍兴县，与闽省境界悬殊，据地图，德化与会稽经度差二度余（会稽在东经约 $120^{\circ}30'$ ，德化在东经 $117^{\circ}55' - 118^{\circ}32'$ ），纬度差四度余（会稽约在北纬 $29^{\circ}35'$ ，德化在北纬 $25^{\circ}23' - 56'$ ），古今分法不同。

② 鬲阆：民国志作“城垣”。

③ 西南至儒山石碑格三十里；民国志作二十五里。

④ 至苏坑隘二十里；民国志作一十里。

⑤ 靛：系“静”之误。

⑥ 斤山：民国志作“芹山”。

- 
- ⑦ 自西而东；民国志作“自西而北”。
- ⑧ 峻；应为“浚”之误。
- ⑨ 《风俗》头两段是记述本县气候与农田水利等情况，民国志将其删去。
- ⑩ “气候视州治每迟二十日”段，系记气候谚语，民国志将其独立成《谚语》一节，不归于《风俗》。

（校注 江中卫）

# 德化县志卷之四

## 山川志

千岩竞秀，万壑争流，堪舆胜概，莫过斯矣。环德皆山也。群峰崷峩（zēlì），势若飞来；俯瞰长流，曲折奔注。宜展齿所经多抽吟也。因载其原委，并采古今题咏，择其言尤雅者附之，以留山水清音。志山川。

### 山

龙浔山 在县治东北隅，县之主山也。屹立千尺，气象峥嵘。麓阜盘转，势若龙蟠。凭高一览，远近溪山、村落、林原如在襟带间。巔多石笋礧礧，其阴生马齿白石。国朝虞生涂廷观赋：“惟龙山之厓厓（zuīwēi），镇浔水之窾（yān）渊。既蜿蜒而奔（bēn）壑，亦磅礴而嶙峋；势狞狰以蹲踞，羌擎柱于苍旻。堆青抹紫，簇绣长春。屹尔海邦之镇，灼然疆域之尊。溯自星分牛女，地擅闽中。五华攒翠，双髻嵌空。雲驰如戴，屏绣似楼。岩石礧礧，奇树鬱葱。曦含朝旭，爽御晚风。辐辏万家，烟火参差，城郭西东。若乃雲桥锁浪，丁字画波，双鱼盪荡，石柱嵯峨。塔则冲霄兮磅礴，亭则登高兮盘陀。睡龙醒五丁之凿，焰石斑玉笋之罗。岳阳楼之大观，缤纷紫气，醉

翁亭之胜概，酝酿太和。所以天马冲岚，雪山积邃，七台东挺，九仙西峙。南堤则辉览凤翥，北岭则嵎负虎贲。涌泉天插，瀑布飞碎玉之虹；液洞云连，双阳献妆金之帜。叠嶂嶙峋，层峦嵌巖。树痕偕地轴旒旒，鸟语共山光妩媚。尔乃天晴日霁，选胜探幽，和阳满绿，异露垂秋。名流蹀展而把臂，仙客握尘以来游。采香茎于南浦，攀杜若兮芳洲。亭榭干霄，仿佛斗宫牛殿；山川满目，依稀海市蜃楼。爰有案头仙吏，玉皇书记，暂滴人间，因物见志。陟崚嶒以赋诗，临嶮嶂而望气。绿畦蒲秀，花催麦浪双岐；紫圃杏芳，人识桑阴三异。危陔摇曳兮鹤立鸾栖，绝顶翱翔兮车驰马戏。至夫地脉坟起，人物阶升。比户弦歌，近紫阳之追琢；载途讴舞，推刘令之振兴。奕叶簪花，林朝清文章卓卓；渊源理学，苏待问风节棱棱。盖川岳毓灵恒泄，奇于瀛州蓬岛，而英豪拔萃直藉，锺乎霞蔚云蒸也。歌曰：“龙山峒岬兮树绕云烟，雉堞回环兮珪方璧圆；高人韵士兮展齿踟蹰，登高作赋兮累牍连篇。千蹊桃李兮锦映霞鲜，山有知己兮地以人传，地灵人杰兮于斯万年！”

**双鱼山** 县治案山也。两峰并趋，临于丁水，状如双鱼。**进士王必昌**诗：“巨灵作字付双鱼，为启文明壮邑居，雷雨勒成鳌顶谶，却留南浦护天书。”

**凤翥山** 在县正南，为县治重案，明靓尖秀，高出诸峰，如鸟之跂（qí）。一名鷗山。训导方祚隆诗：“丹穴飞来势未停，碧梧高顶一峰青。伫看举翮翔千仞，翻翮乘风舞紫庭。”举人林汪远诗：“凤鸟何年至？兹山独得名。垂天鸾作翼，画地水成丁。不与群峰伍，自然环翠并。春风声竹柏，蹶展听和鸣。”里人毛一夔诗：“览辉千仞飞来势，秀拔层峦出几重？彩翰欲翻新草木，锦苞仍壮旧花封。天标仪世无双岫，瑞应鸣阳第一峰。不数群山难比翼，朝朝惟有片云从。”

**大洋山** 在县治北，峦阜透迤，两翼舒展，有鸾翔凤舞之势。明知县秦霭改建学官于其阳。

**妙峰山** 在县东隅。山顶有妙峰庵、龙山观，今废。**明庠生郭昉**诗：“爱竹地铺金玉影，看松风送管箫声。一心如水无尘染，两足生霞衬步行。”

大旗山 在县西隅，形如展旗，拥卫县治。旧城堞环其巅。

登高山 在县治西南大卿社。旧有亭有塔。今废。

薜萝峰 在县治东南瑶台社。万松苍翠，下为程田寺。

黄龙、大龙二山 在县北。高耸对峙。邑未筑城时，民结寨避兵于此。

大帽山 圆若覆帽。一在县北隅，一在清泰里东南隅。

绣屏山 在县北新化里。峭削端丽，若张巨屏。其上有仙人迹。

园林山 在新化里东北。花木森列，四时鬱葱，登览如入园圃中。

科荣山 层峰崒峩，林壑蔚然，为县北奥区。

心慈岭 在科荣山左。岭南崎峻，岭北纡折，上有观音亭。

毛一夔诗：“仆唤犹依地，余行已在天。不知高欲了，尚谓去茫然。苔①滑多危足，钟轻半落烟。自成出世路，鸡犬白云边。”

腾岩角山 在科荣山之北。峰峦峻秀，状如龙角。

金鸡山 在腾岩角之东。其上为塔仔崎，宋僧普明牧牛时，累小石为塔仔，今犹存。

虎贲山 在金鸡山之东。山势陡拔嵯峨，涧泉清冽，最宜竹茗。山顶有寨，甚险，可避兵。翠微一亭，曰“有这亭”。国朝进士李道

泰诗：“有这亭宜绝壑边，万竿修竹雨和烟。避兵三百六三日，举似山僧已二年。”

祥云山 在虎贲山北，戴雲山南。雲气常萃，故名。

戴雲山 在新化里。高逼霄汉，雄跨三十里，上常有雲气覆

之。其东为大戴雲，西为小戴雲②。小戴三峰耸峙，顶有方池，水深不可测。分为九派，下注九溪。

南流三溪，曰猛虎溪、东埔溪、李山溪。东流四溪，曰祥雲溪、双芹

溪、黄石林溪、后宅溪。北流二溪，曰中兴坑、卢地溪。大戴之峰一石如釜，与山同大，倒覆其

颠。暑月顽雪不散，又名迎雪山。旧传有“天下无山高戴雲”之语。本志称为温陵、莆仙、永福、长乐诸郡县祖龙。今以形势考之，实德化龙浔诸山之祖也。

明知县秦霁诗：“天下无山高戴雲，闽南保障帝乡闻。川陵满地开图輿，星斗依人

作类群。光岳千年培正气，胶庠百代启斯文。天家物色南来异，一带青青万里芬。”里人郭维举诗：“竞说无山高戴雲，山光雲气两氤氲，步雲直向山

头望，天外雲山让几分。”国朝岁贡方今泰诗：“戴雲高出万山颠，四面无山可与连。呼吸崔嵬通帝座，逍遥龙戾净尘烟。灵鍾郡邑跨闽胜，秀毓人文

映壁躡。直陟峰头舒望眼，朗吟声彻九重天。”

屏风山 在戴雲之南。形似屏风。

雲峰山 峰多雲气。在新化里，古为雲峰里，以山名也。

黄石林山 在戴雲山东北。

双芹山 在小戴雲东北二十里。

荐獬山 在双芹山东北二十里，山类獬豸，讹呼“荐獬”。

赤水格山 在大戴雲之北，状如狮蹲，山腰为赤水格市。

大尖山 在新化里上翰社吉岭乡。孤峰耸拔。山顶有泉，久旱则溢，久雨则微。麓有龙峰岩。亦名雲頂山。

雲盖山 在吉岭乡。山右有十八峰，作罗汉参禅状。有水左旋，泻下十八瀑，吼石奔雷，骇人心目。

九仙山 永福、闽清两县祖山，尤溪之南，大江之西，诸山所发脉也。山势高广，东为东西里，西为汤泉里。峰凡有九，嵯峨奇怪，如芙蓉，如攒笋，名胜差比武夷。相传昔有隐士九人居此，俱仙去。详见《艺文》、《古迹》、《岩寺》诸志。明知县杨文正诗：

为爱山灵振客衣，春光称适翠霏飞。悬崖幻怪天呈巧，隐洞尼珠地发机。古木齐雲烟嶂合，石潭吞日玉壶肥。九仙去去何时返，惟见山僧卓锡归。”永春知县夏忠诗：“洞有闲门峰有台，鸿濛宁是五丁开？人传灵异皆白狗，我爱寥天托始孩。入暮群山望气度，凭虚绝险吊奇来。一官碌碌身如许，选胜于兹百虑灰。”

鸡髻寨峰 状如鸡髻，势极险阻。汤泉、东西里交界中立石门隘。

帘幕贵山 在东西里，形似贵人立帘幕间。

大仙崎 秀削如抽笋，距大戴雲北二十里。国朝举人林汪远诗：“孤峰直上更

无前，丰骨棱棱欲峙天。绝顶洪濛胎日月，仙风几阵散朝烟。”

桂阳山 在大仙崎西十里莲花峰左。

莲花峰 五峰齐耸，如莲并蒂，因名。

渐山 在梅上里。层冈叠嶂，广袤逶迤。

香林山 在曾坂社，距县治八十里，香林寺在焉。莲花峰正峙其前。明御史凌辉诗：“香山苍翠峙湖西，高阁峥嵘接汉齐。门外潭深龙隐卧，檐前桧老鹤来栖。昔年曾备东华近，今日重瞻北斗低。胜业别来经十载，几回回首思凄凄。”

钟山 在梅上里西中坑。其山四面石壁，形如覆钟。山麓小

洞旁有岩洞，广丈余，深二丈许，名蔡岩。香林寺僧道徽跌逝于此。

姑洒岭 在桂阳社彭坑村，与钟山对峙。僧道徽寂于蔡岩，其姑郑氏于岭上哀号寻之，因名。

仁齐山 峦阜巍峨。旧有天齐仁圣庙在其麓。

吉山、崎山 俱在梅上里。下有三峰寺。

岱山湖 极高峻，山脊石磴，嵌嵌里许。中开大坪，可容千人。元时剧贼居之，既去，覘其灶凡十八，今呼为十八灶。

汤岭 在梅上里。有温泉。

莲花崎 在梅中里。众峰尖秀，状若莲花。

泰华山 在梅中里淳湖社。上有泰华洞。

石湖崎山 牛宅寨山 虎头寨山

梅峰山 在梅中里之北。上有梅峰寺，下有梅峰隘。南为唐帽山，左为三层阶山，右为清从山。距县治东北一百二十里。从五古村入永福界。

大官岭 在县西北尤溪界首。

狮子山 在汤泉里。高踞狞狰，状如奇兽攫搏。上有狮子岩。

里人徐士万诗：“征鸿肃肃此山经，古地频来问佛灵。垒石空中留宿雾，密林深处点疏星。步登绝巘疑瑶阙，语吐层台动帝廷。无那光阴容易过，秋雨春雨不堪听。”

石狮崎 在狮子岩之东，太湖之北。明庠生张文昭诗：“尔狮何处远飞来？化作峻嶒画幃

开。半岭闲云悬古树，一天芳草砌高台。咄咄吹风探石髓，萧萧解磬破苍苔。与君十载相携约，还是京华共看梅。”



仙济山 亦名仙寨，在小铭社。峰峦峭峻，顶上平坦。相传有仙人以牛将石犁去，耙复一横一直，今有仙牛迹、仙人足迹。

太湖山 四面崔巍，旁列十二峰。其顶平凹如船形。有池阔数丈，一碧如镜，影涵太空，名青草湖。其山亦名金碧峰，龙湖寺在焉。左为新化里，右为尤中里。与矿山崎正相对。宋特奏黄奎诗：“一带回

环底处山，势如飞楫下平川。须知欲到菩提岸，好是常悬般若船。纜向龙湖弘利济，撑从苦海度人天。当年普照如乘此，无复须巾撒向前。”

矿山崎 在尤中里。从大仙峰迢递而南，直奔戴雲，为郡邑诸山之祖。产铁矿，有矿处皆官山，采矿熔铁例纳邑进士山租，俗呼进士山。

牛眠山 状如牛眠。

屏山 椿松夹翠，莫辨四时，山形如屏。

金鸡山 昔人闻山上有鸡鸣，其阴有金鸡寨。

酒坛寨山 极高险，无水泉。昔人避寇其上，贼围而困之。有女子取酒浣衣以示贼，贼疑其有水，解围去。

岩市南山 山形峭拔，上平如掌。有泉一泓，清莹不竭。

虎头山 有古寨，周七里许。中如画图，外极险峻，避兵者依之，万夫莫敌。

大仙峰 在尤中里。双峰插汉，如仙人角髻立于雲表，亦名雲盖山。可望见大田县，上有仙峰岩。明大学士张瑞图诗：“翘首苍冥咫尺加，大千世界落飞霞。”

九霄丹露承仙掌，万壑晴雲盖碧纱。崑芳峰前开佛国，嵯峨岩上散天花。分明灵气通无际，漫说蓬瀛去路赊。”

栋山屏 在县西北界，与玳瑁山对峙，层峦耸翠。

白岩山 为县西南界，有太白岩。自矿山至此诸山，俱尤中里。

双阳山 在县西和睦场，距县治四十里。有大阳、小阳，望之翠如叠指。郡邑龙脉实分于此；从大阳西北行者，为五华，为戴雲、九仙；从小阳南行者，为雪山，为天马，入于兴、泉二郡。

八仙崎 在上林社。群峰拥翠，上有大石盘。

五代寨山 在上林社。高险陡绝。相传五代时人避兵于此。

斤山 一名盖竹根山。高五里，广十里。峰峦尖秀如文笔。

五华山 五峰并峙，状如莲华。上有寺。唐咸通间，僧无晦凿石筑室，与虎同居，号虎蹲岩。今其地有虎迹。端午泉在岩侧。

鸡髻崎山 峰顶嶙峋，类鸡髻。

卓笔山 一峰独耸，卓立如笔。

金钟山 形如覆钟，金液洞在焉。景致幽奇，泉水香冽。

自双阳至此诸山，俱在坊里上林社。

舟山 山形如舟，与雪山接。

雪山 在邑西南。山势博衍数十里，南为永春，北为德化，高插雲汉。冬月积雪其上，曦阳数日不消。产茶绝佳，树多唐时旧植。秋晴登眺，可见泉城北山、紫帽诸峰。国朝贡生黄宪文诗：“彤云密布六花飘，翘首层峦积态饶，看到诸峰新霁后，宛然天半晒琼瑶。”

困山 在英山社。峰峦壘大而秀，状如高廩。上有石堂、石灶、石鼎。相传秦汉隐君子居此。亦名琼山。见《大明一统志》。

明举人李雲阶诗：“踏来秋草径，青黛落层阴。涧水浮萝壁，山花笑竹林。雲间霞半树，天际寺千寻。何代隐居者，苍苔石室深？”

欧山 横跨溪坡之侧。有欧氏世居其下，因名。

火烽山 在欧山之东。自舟山至此，诸山俱在坊里英山社。

高洋岭 在县南五里。岭半有泉甘美，里民陈焯捐留大松，以憩行人。

金城山 山下高洋村。

罗城山 一名豪城。形如覆釜，四围峭拔，顶上平坦，有泉水。

大剧山 南为大剧岭。高峻而长，可七里许。属永春。岭顶立虎豹关，永德交界。自高阳至此，诸山俱在坊里高卿社。

天马山 在蔡径社。双峰高耸插天，状如马。其南属永春。

双桂山 在石杰社。旧名双髻山，状如黛鬟。山顶双桂洞祠，传有仙人乘白马来此。

大戴崎 在双桂山东。连城山在双桂西。进龙山在双桂北。

观音崎 一名白泥崎，产磁土。碧象岩在其巅。

擎雲山 在良泰社。顶如丫髻，峻绝凌云。旁有笔架山，三峰联耸，与擎雲俱名五凤山。

白牛石鼓山 有石隆起而伏如牛，又有石如鼓。谚云：“石鼓鸣，白牛起。”樵牧者时或见之。

龙门山 在十二岸乡。两峰壁立数百仞，南北夹峙如阙，涧水经其下，曲折十余里，霄光一隙，阳曦罕射。

水府山 林壑幽窈。宋苏十万庙在焉。

东济山 形势崔巍，有涧泉泻流而下。自龙门至此诸山，俱在坊里茅岐社。

石柱山 在南埕社。一峰耸秀，如柱擎雲。国朝廩生郑由吾诗：“石柱嵯峨沪水

边，巨灵伸指探雲烟。氤氲佳气巉岩透，缥缈祥光碧翠联。五色纷披容正丽，寸肤触出色澄鲜。凌霄壁立东流砥，不数江郎欲接天。”

蟠龙山 在荐獬山东南，石柱东北，相距各二十里。

飞仙山 两峰角立，悬崖削壁中有瀑布泉，数千仞飞流直下，激沫成雾，最为奇观。亦名岱仙瀑。飞仙亭俯临之。毛一夔诗：“足

快寻幽兴，奇观岂但泉？有山皆入幻，无木不先天。雲鸟千崖共，岩空一字悬。浮生能免事，微醉亦飘然。”

湖山 在飞仙山之东。

石牛山 在清泰里极东，距县治三日程。城中望之，巍峨插天，苍翠欲滴。山顶望见兴、泉二郡。其中幽奇险绝（详见《古迹志》）。上有石洞，状如牛头，故名。李道泰诗：“翠黛望三日，逶迤一眺临。应闻看月啸，

未快伐山心。洞壑疑无隐，梯阶恐不深。待携康乐伴，重与恣幽寻。”黄宪文诗：“纤繩直上白雲端，蹶尽藤梯怪石盘。山带烟岚晴似雨，人沾秋气暑犹寒。彩雲捧日红沧海，玉露凝霜吟剑坛。放眼分明河汉近，千峰万嶂子孙看。”

七台山 在县正东六十里。巉岩耸峙。众山莫偶。上平广有水泉，可屯聚。

飞凤山 在邱坂社，为县东北界。高千仞，石笋嶙峋如锯齿。极巔一石，形似飞凤，因名。相传有女仙驾凤来此。黄完文诗：“嵯峨天半耸晴

空，世说灵娥宅此中。凤宿何年成怪石？人从遗迹挹仙风。松涛传籁层台冷，海日扶轮古洞红。更看彩霞天际抹，恍疑身在蕊珠宫。”

银瓶山 在清泰里北。双峰并峙，其一稍低小若瓶。

石鼓山 有石状如鼓，在银瓶右。

均山 在清泰里，古为善均里，山因里得名。

灵山 奇峰削壁，常兴雲气，遇早禱雨辄应，故名。

天湖山 在登龙社龙山乡。矗起千仞。顶上一湖，纵可百亩，横半之。无水泉而沮洳涂泥，顿足则方围震动。

天平城山 在南埕乡。宋苏十万屯兵拒元处。巍峨阻深，前临大溪。国初，寇聚于此，凿磴为道以入。

高瀑山 在萧坑。巉岩险巖。东七里许为马蹄岭。宋陈蔚统军拒元既被害，所乘马载之驰归，过邑东南关，身首分坠，遂自奔至此，蹄脱，复奔至白马埕奋死。

罗城山 在萧坑社长基乡。宋苏十万募义兵拒元于此。

高发山 有石鼓岩，石壶张自观道人修炼于此。

雷峰山 在峰魁社螺坑乡。

蕉溪山 其麓有蕉溪，因名。

苏墓山 在清泰里之南。山形如壺。其东有苏十万墓。自石柱至此诸山，俱清泰里。

论曰：“德化山号有万，灵迹胜景，所在皆是。偶举一邱一壑，致之泮、镐、鄂、杜，则柳子所云‘贵游之士日增千金而愈不可得者’，乃群萃僻处于斯，徒深选胜者一踣蹶耳。”

## 水

浚溪 在县治前。环抱县城，亦名腰带水。上流为涂坂溪，

下流为董坂溪。

丁溪 在县前丁方。浚水东流，丁溪南注，纵横若“丁”字。发源琼山③下，为九漈溪，至罗溪受雪山、洋岭、蓝田、英山诸水，再下受火烽山水，经张墩乡，抵双鱼山，旧依山斜流。濂云：“水流‘丁’字，官荣自至。”又云：“水画丁，罗簪纓。”宋元符中，邑士林程捐资五十万，买田凿流，会于浚溪，一夕雷雨决成。既而程之子林扬休由太学登高第，吴达老贺以诗云：“水向丁流通地脉，人从甲第破天荒。”厥后孙曾皆贵显，邑士亦相继荣登。宋邑令林应龙有诗云：“水从鳌顶分丁派，人向蟾宫占甲科。”明天启间，沙淤，知县林大佛重浚。

林汪远诗：“戴雲三十里，到此听潺湲。笔卓

翥峰峙，波飞得岸掀。画丁传有谶，折水凿无痕。文字光河洛，凡流岂等伦！”

郭坂溪 发源戴雲山之阳，为李山溪，经苏坂、东厝乡，合东埔溪水，至邱店村，合猛虎溪及赤水格以东诸水，经郭坂，受新村溪水。南下为白泉溪、石山溪、苏溪，汇于涂坂。

盖竹溪 在盖竹乡。发源斤山，合雪山、金液洞、三漈溪水汇于涂坂。地多修竹，可消暑。

黄宪文诗：“山居三伏候，草阁晓晴时，  
權權④既所厌，啞啞亦非宜。浩然发遐想，清溪良可嬉。乃仿柳州兴，聊为阮子思。徐徐寻沧浪，步步沔涟漪。四面茂林多，傍汀绿竹猗。入耳细流喧，触目清阴垂。绕树众蝉鸣，两岸群鸥随。贪看不觉远，爱景忘其疲。盪礴解衣履，跣趺引樽卮。临流濯纓冠，掬水鉴须眉。爽气入我怀，清风砭人肌。已将尘虑抛，更使烦心怡。日影倏然西，晨光遂已熹。扶筇归别墅，月色在茆篱。”

涂坂溪 在县西五里，郭坂、盖竹二溪⑤汇于此，为浚溪上

流。

纓溪 在县东二里。发源金鸡山，经龙翰乡，入于董坂⑥。

董坂溪 在县东浚溪下流⑦，受纓溪之水。东下十里许，为虎跳港，峭石簇立如列树，溪狭水激。稍下为溪口，受大雲、下仓溪水。又二十里至于龙门。

龙门溪 在茅岐社，距县东三十里。南北岸两峰夹峙，石壁数百仞。溪流一隙，水色深蓝。湍泓湍激，逼石而止，逾石而怒，惊涛喷沫十余里。上流旧有拱桥，北岸遗址犹存，去水百余尺。

庠生郑起蛟诗：“巍然嵌嵬激洪流，知有神鱼破浪游。千尺波澜春正暖，一朝燃尾过龙湫。”

大通溪 在龙门下二十里。受蕉溪之水，又二十里为举口。

南埕溪 距举口二十里。受双芹溪水，经石柱、仓场，至白马埕受双坑水，至赤石口受岱仙瀑水，下为湖坂溪。

湖坂溪 在南埕社。受石牛山水，浚溪之水口也。下与涌溪合流，入永福，达于乌龙江。监生黄守仁诗：“清流如带汇长湖，掩映云山入画图。一叶轻舟时泛月，风光得似

刺溪无？”“平湖水碧又沙明，错落人家两岸生。夜静楼头闲徙倚，溪声隐和读书声。”庠生黄好仁诗：“百里东流又转南，湾环如带碧拖蓝。渔舟晚唱前汀去，月满湖山影满潭。”“沿溪深处石嵯岈，松竹阴森间野花。错落烟村多傍水，西湖风景似非耶？”

花桥溪 在上林社。发源和陸场双阳山，至暗林口，受五华山水。至大屈尺，入于白泉溪。

大雲溪 发源天马山之阴。经石杰乡，受罗城山阴之水，至下仓。旧志作黄斜溪合高洋溪水，南入于溪口。

蕉溪 在县东北十五里。源出戴雲山之阳，为祥雲溪。合上洋溪水，绕虎贲山东行至蕉口，入于大通。

双芹溪 出戴雲山之阴，入于南埕。

岱仙瀑 在石牛山北。从飞仙山悬崖直下千仞，练白劈青。至山半则沫溅瀑飞，滃然不知其为水；或猛风飘荡，则水不知其所之，令人目眩胆碎。旁有油瀑，石壁如削。水小溜，直并入赤石口。康生郑秉钧赋：“龙浚之东，石壺之北，飞仙山立，嵌岑秀卓。奇峰陡而欲摇，峭壁悬而成削。厂广深而还明，翠嶂耸而乍伏。则有清流激湍，岩壑奔腾。初涓涓其始出，继洋洋其泓泓。经村落，过仙亭，荡林麓，触砢砢。浸淫谷口，飞泻无停。遂乃吼若春雷，怒如秋风。下临无地，百仞溜空。劈开石壁云深，斜倚天梯雾冢。波涛涌于岸畔，泡沫散于林丛。匹练挂一隙之洞，虹桥驾万山之中。是诚洞天之胜概，福地之龙藏者也。当其春和景明，晴光摇曳，波纹兮斜飞，珠帘兮点缀。草树杂而鲜妍，风日清而佳丽。浮光漾兮千寻，澄素辉兮无际。至若阴雨连绵，汹浪喷薄，百里闻声，仰望眩目。长鲸高坠兮吸百川，虬龙鼓沫兮惊山谷。巨灵沸地吐暨墙，屏翳倾盆泻河洛。势更雄于寻常，峡尤溢而磅礴。尔其骚人游子，搜冥探奇。步仙灵之迹，访真人之遗，策扶筇以流憩，蹑屐屣而委蛇。扞绝壑，寻曲埼。酌清泉而觉爽，临涟漪以赋诗。歎(xù)焉俯瞰，陡然神飞。恍似槎乘天半，浑若棧过峨眉。石上投兮，经时委地，水奔流兮，倏忽珠玑。恨无御风之神，有惭列子，不必登华之榭，羞杀退之。嗟乎！人生有几？足迹难遍。洞井岩泉，千态万变。名山鹤立，美不胜收。则有如九曲之武夷，一方一壑；飞石之恒山，两崖急戾。他如泰岱之水帘，随风穿线；南衡之舒流，一幅白练。屈指此与许，孰轻而孰贱？而顾不具载于地輿，徒尔埋没于僻县。夫岂兹山灵，犹欲隐而未彰，抑亦在采风，急表章而述撰？”李道泰诗：“怪崖不可即，倚石抱杈枒。瀑作千山雨，人乘八月槎。风幡摇散落，渴螭饮参差。倘得凌虚过，应惊架百花。”里人毛一夔诗：“岭树含青黛，岩天贯白虹。仙源应接汉，凡水岂鸣空？泻壁飞晴雨，奔崖荡晓风。庐山高瀑布，论此未能同。”

石牛溪 发源仙游九座山顶，随石牛山曲折而来，入于湖坂。



邑水皆散流外县，其受外县之水者，惟此一涧耳。

涌溪 在东西里。发源戴雲山阴，曰卢地溪。合九仙山东张岩溪水，为赤水西溪。至上涌乡合中兴坑水，入梅上里为下涌溪、曾坂溪、山茶溪、香林溪、湖头溪<sup>①</sup>。至清泰里为九窠溪，受左溪水，过螺潭，入涌口与浚溪汇，达于永福。

左溪 在梅中里。发源戴雲山阴，为黄上林溪。经东溪，合后宅溪水，为龙潭。宋真西山先生禱雨处，即左溪上流。至九窠，入于涌溪。

小尤溪 在尤中里。发源九仙山麓小铭乡。西行为上翰溪。自赤水格以西水皆西行，又合倚阳乡左涧之水，经徐洲溪，至巩口入大田界<sup>②</sup>，达于延平。倚阳右涧则入水春，转安溪，达于笋江。

古井潭 在县治鸣凤桥下。一石横砥，溪水洄漩，深不可测。

泗洲坝潭 在石杰乡。水底明净，不留沙石。

大温潭 在清泰里萧坑社侍卫乡山下。自北而南长里许，水皆温，冬月水族多聚于此。

温泉 一在清泰里蕉溪桥下，南北七泓，沸者可宰牲，和者可盥浴。一在梅上里汤岭。虞生郑大夏赋：（以谁、尚、重、洲、酿、春、色为韵）“龙得之域，蕉溪之温，有泉

涌沸，歛斯腾斯。畴火而煊，孰炉而炊。气熏蒸其焱焱（yàn）兮，凭温温而探之；妙阴阳之鼓填兮，洵不可臆而知。尔其微淡澹滢，泔灑沆漭，烘烘

隆隆，焠和滢畅。尽水而凉，此何汤场！抑人有言，羿射九日而坠块坎得离妃，故焯焯（tūn）兮炎上。若乃风晨月夕，游兴正浓，想涤骸垢，冀整肌

容。骚人结伴而戾止，过客驻车而适从。泳游游濯，荷造物之为依举烽。允为水而不成冰兮，解冻凝之繫松。其或谈今说古，比拟汤泉。七地散出，

语本坡仙。庐陵六一，题咏流连。将军布疑浣，丞相井惊燃。李唐曾取以名官兮，又胡为乎明皇更之而不然？怅兹泉之僻处兮，曷不于通都大邑也，而在丛山复岭之偏？遂表识以无闻兮，待选胜于名贤。羌亨毒之神奇兮，独于是泉而酝酿也；毋亦禀性之不栗冽兮，焯鸿溶之异相也？若宝积之卓锡兮，疑广州之廉让也。一泓温克兮，消融寒涨也。爰为歌曰：‘阳燧煦煜，大地回春。纳涧投渠，得气之纪⑩。沾濡沕注，太和纷纶。可濯可湘，无劳燎薪。搜奇览胜，聊且问津。’乃廉载歌曰：‘溪以蕉名，冶工不识。有温其泉，万川之特。临流溯游，悦怿无极。蕞尔微区，孕灵增色。’”黄宪文诗：“人云源石始温泉，炎液流黄然不然？  
 暨沐无劳烟火力，他年应继七汤传。”

论曰：“德化水不通舟⑪，斯为瘠邑矣。然高源落自雲间，故层冈重阜，灌溉有资，畚鍤得而及之，无遗利焉。自雷雨画丁，而后人文化成，则观其流泉，此地固一奥灵之区也。”

## 桥 渡

雲龙桥 在宾阳门外龙浚山麓，浚溪下流，邑治之锁钥也。创自五季，名通济，更名化龙。宋熙宁中，邑人苏唐卿建于城之东隅。庆元己未，桥圯，知县事葉益命僧了性募移今所，未就。嘉定中，知县事季端谊命邑人林士元等成之。长三十二丈，广二丈六尺，覆以屋，凡十九间三十三楹，中有亭曰“密符”。邑绅黄奎记。岁久，附桥居民阴毁之。明宏治三年，里人林宗源等重建。少□□□陈迁记：“德化邑治之东有化龙桥，五季时已载于清源旧志，则桥之作久矣。历宋至元，尚完固。明初犹然。后有坊民附桥而居，惑于术家言，忌其不利于居，常阴毁之，故洪流从而崩坏之，所存者独遗址耳。役大费烦，后人莫有倡兴复之举者，民之病涉者多岁月矣。景泰、天顺间，邑之耆民德茂辈，欲为民舍涉而徙，皆有志兴复之，惜乎罔就绪而已。至宏治庚戌岁，德茂之子曰宗源，欲成父志，以白金数镒为首倡。县典幕刘

君溥、教谕陈君恺、泉州卫旗屯怀远将军马凯、福全所武德将军蒋元启，各捐俸以助之。而邑之好义者福塘陈晃、桂林赖荣、致仕知县留成，照磨林敬、东西团郑祎、下涌郭元旺、坊隅郑旺辈，无虑百余人，皆克广德心，不吝所有以左右之。毛聚尘积，合而为五十余镒。乃选有才幹者林崇、林康、郑绍六、林广大、林清、郑明德、周膺、涂山诸人分理其事。运材于山，浮石于水，及陶、瓦、砖、铁之务，而宗源则始终总其要领也。经始于庚戌秋，毕工后二年壬子秋九月，凡两期岁而功成。邑人重其事，故承泽黄先生廷魁以吉丰司训致仕家居，与其弟义官廷守为之立石，以纪其功，而以记文请于余。余尝闻昔蔡忠惠守泉，作桥于洛阳江，后世王暉轩迈题其祠壁曰：‘欲知公之忠，须读三谏诗；欲知公之惠，须读万安碑。’王梅溪赋诗亦有‘真是济川三昧手，清源游戏作虹梁’之语。今宗源一布衣，亦能如忠惠之用心。成事如此，焉知后人无有如暉轩、梅溪之咏叹者乎？又闻此桥当德化要冲之处，而邑之山川气脉未尝不关系焉。方其完壮时而生齿庶繁，四境鸡犬相闻，衣冠文物若林扬休、苏总龟、黄龟朋诸杰接踵而出。厥后颓废，则生齿文物亦因之寥落。今桥将复成，又有白袍曰：‘林真者破天荒而起，继真者又未可量。’虽云物数之有定，然桥之力亦不可诬也。岂徒一时利涉之功而已哉！嘉靖十一年壬辰冬，桥成。癸巳，知县刘晃、里民郑旺是用为记。

莆田司谏郑一鹏记：“德化古志称：‘龙得有溪，发源于龙得深处，经县前而之东。有一渚自南来会如丁字，故曰丁溪。’往时惟厉揭焉。宏治庚戌岁，坊隅耆民林宗源、林康、郑旺等，忧民之病涉，募众金筑石桥六间，构亭于上，赍之以彩，名曰‘化龙’。邑人永丰司训黄廷魁嘉其绩，征文立石以记之。呜呼，休哉！不幸数终于嘉靖壬辰，御寇者误炬，全功尽界煨燬中矣。邑士民无不尽伤心。龙川刘君晃令兹邑，前首事郑旺偕林春、林鸾等以鼎建上之。金曰俞，复授以经营柄。会廷魁子天球由国子生授广东临高县丞，途经之任，悼父口之口，见其举，曰：‘都因计费。’刘君暨掌教南海黄君輿、司训东莞张君泮捐以己之俸，黄君天球脱以行之需，郑君旺等助各有数，而慕效乐施者又百余人，费乃备。遂命日授徙木、陶、瓦、琢石以致用。经始于癸巳年十一月，延乙未年六月方毕。括费五十余镒，未尝取诸帑。但见缝瓦涂壁，枚枚其茨，叠石积柴，实实其址。长三十六丈，旁之栏槛从其所长，内之丹雘遍于旅槛，规模制度多于前功。落成之日，官民

咸称快焉。越三载，黄君天球致仕归，与公游于桥，睹而色喜，作而曰：‘桥成矣，公之功，不燬于前火矣！吾先君子无以传继踪迹而不落，球请捐资醵石张大其事，以续吾先君子。’余嘉而叹曰：‘桥梁乃王政之一事，宜为宰者率先之。殖财贵能赈施，宜好义者之必终其事。有子考无咎，宜为后者怀幹盥（gǔ）而不忘。刘君晃等陋溱洧之济，为輿梁之修，可谓仁矣！郑旺等货不必藏己，力恶不出于身，可谓义矣！黄君天球博施用劳，前功不佚，可谓孝矣！一桥立而众美集，斯石也，’，万历间<sup>⑫</sup>，知县施汀重修。教谕刘庸以范世也，岂徒纪功云哉？’ 文芳记

略曰：“化龙桥重建于嘉靖乙未，迄今万历丁亥，迹六十年于兹矣。颓折朽坏日甚。前任秦公霭、黄公承贛首议葺治之，后竟以事辍。今施君莅任数月，振修百废，即计费募金，又捐俸益之。命工量日，使巡检邱天爵督其役，而规模工费埒诸作者。余闻术家云：‘邑治本龙得腰落，而龙得转为左臂横抱之势少缩，化龙桥当要冲，接左麓而关截东流，则邑之山川气脉所由系焉。’当昔完壮时，生齿日繁，衣冠日盛，若林场休、苏总龟、黄龟朋豪杰辈出，谁云物数有定哉？则今斯桥之修也，将巩固未艾而继昔，诸杰行彬彬然起矣。是则同其大有造也，岂特为利涉之具己哉？乌可忘，乌可忘！施君讳汀，浙万历己亥秋，洪水桥坏。庚子冬，知县周佑重建增高，之吴兴人。”

**更名起龙。**郭维翰记：“吾邑山既环抱，水亦澄莹。其派沪溪，其渚丁溪，至城东汇为巨浸。有桥卧波，偃蹇横截，峙龙得之足，而联双鱼之轴。北通延津、沙、尤，南走郡城、莆阳诸孔道，盖邑治之要冲云。桥所由来，肇自五季，不能远述。自嘉靖乙未，邑人黄天球等重建，迄今万历七十年，听烟岚风雨，几见倾颓。而济人之功载之有永者。昆山秦公、义乌黄公、曹川施公修葺之力也。己亥秋，天吴贾怒，而桥与基一旦尽坏，于是南北二分，襄裳难涉，虽星轺之使传檄来往者，犹必有所待而后渡。视昔缔造之功，不为前修独擅之美耶？抑成亏有定，待其人而后行耶？庚子冬，江右周侯甫莅兹土，化瑟日调，报政浹旬，荐绅文学及诸父老咸知侯之才，足以有为，而愿树乎不朽之业，签以为言，侯曰：‘是兴举之首务，而平政之宏略也。’遂具陈桥当复，状闻于院、道、府诸名公，咸得请。始相基、度务、量力、审时，稍募募及赅缓之余若干缗，捐俸继之，而博士华君岳、沈君孟作，尉刘君忠位，暨荐绅、孝廉、文学皆有助，而侯日亲程督之。伐石瓮址拟于旧，而高且坚；市木为梁拟于旧，而材为榱桷，为栋楹，为瓦砖，

为冶铁，为匠直之属，各有条理拟于旧，而廉舂锄之役役，以公自谗與邪许，其来如子民之效也，侯之倡也。更始于辛丑之冬，告成于癸卯之秋。来往而提携者欢声载道，于是荐绅、孝廉、文学以次称贺，父老忙舞前为寿，曰：‘幸哉！公之以大利利我也。桥存则公之德存，乌可以无记？’乃走书币征言于余。余，乡人也，喜谈乡事，而侯之德在龙浔且波及焉，何敢辞？盖尝历览名都区邑，其人文盛衰与其山川气运相为符合，而整顿于贤司牧之手。无论元凯之于富平，李冰之于华阳，即如吾泉万安者，非蔡忠惠奚赖哉？先正有言：‘一命之士，苟存心于爱物，于人必有所济。’以侯之仁心为质，宜其所济者宏也。侯又言堪輿家谓：‘化龙一桥，翁受邑山川之气，文事当兴。’况今落成之日，适与宾兴期会，必有群龙奋起，霖雨苍生，独盛于向时者，更字桥曰‘起龙’。即是而知侯之功于造士乎有赖，非口济人利涉已也。侯讳佑，别号命初，建昌南城人。兴利除奸，爱民下士，它日当更载《循良传》中，不具记。特记其建桥之始末若此云。”

国朝顺治三年，寇熾。六年，知县王榜鳩建，壮丽坚好，更名“雲龙”。十六年己亥复燬。康熙十五年丙辰洪水，石址悉坏。六十一年壬寅，知县熊良辅倡建。雍正六年戊申，知县金鼎锡继之，俱未就。十二年甲寅，知县黄南春建为拱桥，六墩五瓮，高三丈三尺，长三十二丈，宽一丈五尺，翼以石栏，屹然巨观。

记：“邑之东有雲龙桥，上木下石，为县城锁钥，往来通衢。自五季而至大清，由来久矣。康熙丙辰，水火交侵，遂倾圮焉。熊、金二使君有志恢复，

因工大费繁，行而终止。迄今数十载，深厉浅揭，望洋而叹者，不知凡几！雍正十一年，予奉天子命复宰龙浔，不揣绵力，勉从父老之请，择吉兴修，

吁尧罚项，劝民题捐。都人士欣欣乐助。六十年之颓废，于今复振。是桥也，长三十二丈，宽一丈五尺，高三丈三尺，六墩五瓮，左右石栏。兴工于

雍正甲寅，落成于乾隆丙辰。计其工料，糜金钱一百七十万有奇。虽曰人事，亦气运使然。继自今长虹亘驾，民无病涉之忧，砥柱中流，土庆雲龙之会矣。是为记。”庠生谢祈出诗：“龙光霁现浔东，刚喜登雲有路通。万载乾坤枢轴壮，一方带砺霸局同。势吞长涧疑初月，影入晴川讶晓虹。从此往

来廉利济，何人不颂使君功？”涂廷观诗：“苍龙蜿蜒卧城东，万里行程一旦通。驾岸鳌金冲背出，凭空牛铁铸形同。半规磴绕分新月，万顷波洄吸彩虹。珥笔应教题柱客，相将敲韵谱新功。”

**鸣凤桥** 在解阜门外。地甚卑下，傍城为岸，南北筑石坝，架木桥。浚溪、丁溪汇流，屡有水患，然輿徒要冲，时坏时葺。康熙庚午，知县范正格题曰“攀龙附凤”。历任邑令俱有修建。雍正年间，知县黄南春修建者再。乾隆八年，知县鲁鼎梅重建。

记：“邑南门之外有鸣凤桥，背倚雉堞，前迎风囊，卧波拱翠，浚水、丁溪合流其下，实西南往来要津也。地卑岸窄，不利石梁。自明以来，长驾栈道，中经水圮，迭修迭废。前令黄君尝葺之，未几，复渐次就颓。岁癸亥，余<sup>①</sup>初莅邑，过斯桥则有倾坏之忧，虑其缓之，而愈难图也。爰令生员张天濂、耆民陈汝度董而新之，旁翼栏楯。木取其坚，工鸠其良。经始于是年十二月，落成于甲子二月。糜金百四十有五两。而行者遂有履坦之安。夫芳草洲边皆横野渡，穷崖泽畔亦驾小梁，偶有倾坏，则厉揭维艰，修理宜急矣。然或地当通衢，拥棹横江，往来行人犹可舍陆乘流，以济一时之便。至若地处山陬，不通商舶，则往来行旅，专藉桥梁，一有倾坏，其不便于民，较通邑大都舟楫之利者为尤甚，其修理尤不可缓也。德邑地僻人稠，山多田少，若谷若货，岁取足于他郡者什之二三。山溪阻隘，水运无由，商贾之经由其地者，率皆负贩，而桥适当西南往来之冲，通商利民，实交系焉而不可废颓者。此令之所不敢不汲汲以图也。抑尤有虑焉，桥地当冲要，汇流所经，而木脆易朽，其不能梁以石，而使之久而不敝者，地势使然也。不能梁以石而梁以木，而能使之历久常新者，人力相继之所可为也。先民有言：‘一命之士，苟存心于爱物，于人必有所济，’是用记其资之易，成之速，以望来者。”

**龙津桥** 在金成门外。旧名“广济”，宋熙宁中建。以苏钦居其侧，更名“旌贤”。绍兴中圯，知县事李嵩建，疏水为十三道，改名“李公桥”，永春陈知柔铭。嘉定间，易石址，寻敝。嘉熙二年，知县事葉彦琰重修。岁久复圯。明宏治八年，县尉刘

**谿重建。**提学副使慈溪扬子器记：“德化治前有水曰谿，循谿而西上，仅三十步许，旧有木桥名‘广济’。宋熙宁中，县令李嵩鼎建。嘉定间，易以石址。庚寅燬于火。嘉熙戊戌，令葉彦琰重建，改今名。中历兵革，屡燬屡复。洪武三十一年，洪水猛作，民居漂荡，桥亦崩坏，景象为之索然。以后生民稍复，共构以木。至正统中，邓贼流劫入境，大肆斲伐之虐，而桥又废不举。会四明刘君谿来尉是邑之明年，独员署事，先举宫、坊、牌，次谿楼、廊宇，以渐修葺。惟是桥工繁费夥，而未之暇。及邑之父老张昂、郑真荫进告于庭，曰：‘夫桥为一邑之壮观，利百姓之往来，匪直风水所系，抑或政令所关也。圯坏已数十年，未有能举之者。每于春夏淫潦之时，溪水涨漫，民不得已，则假于舟以渡，往往有遭其覆溺者，盖不可以一二数也。愿吾侯俯从民望以为之。’尉遂即旧址，始捐己俸，委所告者二人总其事，以司出纳之费。复募得僧得安持数遍谒于乡，于是输财乐施之士，肩摩而踵接；趋事赴工之民，蚁聚而云集。若致政留君成、太学生陈君旭、邑之人郭元旺辈，又为巨擘。命匠陈汝六等刊石于山，运木于陆，肇工于宏治三年闰九月既望，毕工于宏治八年二月吉日。桥成，计有四大窠，覆以屋，计二十二楹。总其费，计银千有余两。适于朝觐之秋，尉以公去，不可留。时邑□□□”。

国朝康熙丙辰洪水，石址荡圯。庚申，教谕王钦祖捐俸募建木桥，旁施栏楯。岁久坏，今未复。

**龙济桥** 在县上市水门外。明知县胡惟立建。嘉靖四十年，蓬壺贼吕尚四作乱，知县张大纲激之，以固城守。

**惠政桥** 在谿上流涂坂溪。宋时设石山、邱店等铺，官道经此。康熙丙辰，水圯。宋县尉孙应凤诗：“百仞崖边有此桥，地平路稳玉骢骄。惠而知政今如此，拈起桥名问国侨”。

**乐陶桥** 在谿下流乐陶乡。康熙丙辰，水圯溪南一涧。乾隆三年，庠生陈其遇募建拱桥。

**溪口桥** 在乐陶下十里，自州治由天马岭达于邑北诸里要

道，溪阔桥险。

牛牯桥 在溪口下十里。石址存。

龙门桥 在十二岸龙门山。旧传“天下无桥高龙门”，盖拱桥也。兴废莫考。今北崖石址悬峭壁间，去水百余尺。想其高拱而起，横跨溪全流，结构危坠，真堪心战！山后有小拱桥。

大通渡 在龙门下二十里。自仙游西乡达于邑北诸里要道。

石柱渡 在大通下三十里。

仓场渡 在石柱下三里。邑东往永福、嵩口要道。

湖坂渡 在湖坂溪。自大通以下，溪阔水悍不可梁。

高洋拱桥 在县南六里。往州治大路。

心慈桥 在县北十里心慈岭下。

信筊双桥 在郭坂社，距心慈桥十里。乾隆九年，知县鲁鼎

梅重修。监生葉乘龙记：“去邑治西北二十里为郭坂乡，戴筊双溪合流于此。有两桥焉，相对如筊，即古所谓双龙桥也。创于唐，重新于明，兴废几更。我朝康熙甲子，洪水漂坏，范邑侯捐俸创建，经今六十余载。岁久复颓，河梁日暮，游子苦之。乾隆癸亥秋，贤侯鲁公来莅斯土，百废俱兴。

甲子春劝农经此，见颓毁过半，遂捐俸重修。取材鸠工，命龙董之。龙深感侯之心于利济也，爰踊跃会同乡人郑橙等，计日量工，不期年而桥成。盖视旧制完固有加矣。继自今往来河梁者，如履康庄，无复有日暮之叹。侯之利济所暨，岂独德之人己哉！宜戴德者之欲寿诸贞珉，以志不朽也。是役也，经

始于甲子之冬，告成于乙丑之夏。龙不文，亦私幸董事之，庶几无咎焉。因敬为之记。”

谢公桥 距信筊桥五里。明崇祯间，邑士谢启表建。毛一羹诗：“客

窗倚水梦难成，错听溪声作雨声。山路仄询地主姓，石桥还记谢公名。蛩吟孤枕何曾断？鸡促秋天未肯明。王事不忘宵一卷，前贤多少此中情。”



会龙桥 在上翰社。自赤水格西行入大田者经此。

双岸上桥 石桥也。距会龙桥二十里。

双岸下桥 木桥施屋。距上桥三里。俱往大田要道。

锦溪桥 在小铭乡。雍正七年里民陈世泮建。

大铭桥 在大铭乡。雍正八年里民林君宝建。

暗桥 在赤水格北十里石门岭下。

路口双桥 距石门五里。右往尤溪古迹口，左往尤溪念九都。

涌岭双桥 在桂林乡。自路口左出，至此十五里。

汤头桥 在汤头乡。拱桥盖亭，距涌岭十里。

西城桥 在汤岭下。距汤头十里，架木施屋。明天启元年建，国朝顺治丁亥寇燬。己亥冬，尤溪僧募建。康熙乙酉三月水圯。乾隆十一年十一月，庠生苏廷望、里人王仕卿、周天作、黄国辅募筑拱桥。长十丈，阔一丈四尺，高三丈。知县鲁鼎梅建。自涌岭桥至此，往尤溪念九都大路。

花桥 在上涌乡虎跳港。往桂阳社经此。乾隆九年知县鲁鼎梅建。

梁桥 在上涌洋。从路口右出，至此五里。乾隆九年，知县鲁鼎梅建。

下涌桥 在下涌社。距梁桥五里。乾隆十一年知县鲁鼎梅建。

山茶桥 在曾坂社。距下涌桥五里。乾隆十二年，知县鲁鼎梅建。劝捐序，“德邑为九闽孔道，行旅之由延、建以及漳、泉者，往来必经焉。故邑治北自大官岭，南抵虎豹关，道路之政孔急。余受粤四载，渐次平治，中间溪河险阻，成梁数四，独山茶一桥犹有待。非姑缓也，以其岸高而涧阔，中流之柱无所施，梁必以石，工斯大矣！且前有为之者，

旋兴而复废，任事者出于再举，故未能勇肩。近采巡听行道之苦，固有举斯桥以相望者，余固不敢不汲汲也。爰因奉例巡行，亲历其地，进左近之绅士

陈时夏、苏殿安、陈天麟、凌青雲、陈殿元、凌奎、曾居元、曾桂山、苏廷贤、曾联科等，而切计之。之数子者，皆乐于为善者也。然积少以成多，积

小以致大，则又非数子之可独为。用是立之以簿，俾里居往来之善士，皆得各出金钱以共襄善举。庶斯桥一成，而王道之荡平，于吾德邑见之矣。若夫

修德获报之说，人共知之，应无俟余言之赘。是为序。”

**洪坑口桥** 距山茶桥五里。

**美洋桥** 在田地社，距洪坑口五里。拱桥施屋。自梁桥至此往尤溪古迹口大路。

**石幢柄桥** 在县东南六里。往仙游大路。

**纓溪桥** 在县东二里。乾隆九年，知县鲁鼎梅建。

**蕉溪桥** 距纓溪桥十五里。往永福大路。康熙间，知县范正格建。石址施屋，久墩未复。

**双桂桥** 旧名连波桥，在石杰大雲溪上流。宋时建。石址施屋。宋县尉孙应凤诗：“桥前巧匠剪春罗，桥上亭亭景物和。明夜元宵一团玉，连波还解似金波。”

**下仓桥** 在大雲溪下流。石址施屋而高壮。

**花桥** 在县西二十里。往小尤中经此。耆民林渐谋募建。

**通丁桥** 在英山社。明邑绅李雲阶建。记：“是桥不知阅几百年。迨汤荡为灾，桥址倾

颓。金语子曰：‘葺之未坏易，新之既坏难。’乃募缘而重造之。向为堵者四，今联而为一。石用旧者十六，新者十四。费金二十五两有奇，族众及

居民所捐与夫邻乡之乐施者。万历壬寅年十一月兴工，次年二月竣事。主者予，而分董则继宗、继明、道容、道光也。以水会于丁溪，乃命之

曰‘通丁桥’云。”

九瀑桥 在英山社九瀑乡。

大卿桥 在县南张塘乡。宋绍兴中，知县事林及斃石坝，架以木。国朝乾隆十一年丙寅，原任南乐县知县陈应奎妻封孺人郑氏建为拱桥。

通驷桥 在瑶市社龙翰乡。

洞口桥 在蔡径社徐坑乡。

梁溪桥 在新化里。宋时建，今废。宋县尉孙应凤诗：“夕照斜阳柳外鸦，杏园衰谢野

人家。欲寻春色无寻处，  
尽在桥边野草花。”

登龙桥 在尊美乡水口。乾隆七年，监生林峰鍾倡建。

瀑兜桥 在上翰社。明宏治间，里民黄舜建。

洋中桥 在小尤乡。

和乐桥 在彭溪社，耆民陈洪涟建。

上瀑桥 从龙桥 罗星桥 彭水桥 俱在彭溪社。

徐洲桥 虹桥 山坪桥 俱在小尤中。

左溪龙潭桥 乾隆五年，里民陈崇高建。

论曰：“雨毕而除道，水涸而成梁，先王之制也。邑断绝舟航，鱼盐悉资负贩，非有桥渡，其何以济？且地多溪壑，溼潦骤生，数步之隔，望若蓬瀛，空山日暮，行者苦之。则因地制宜，随时修葺，端有望于存心济者矣！”

## 陂

丁溪陂 在双鱼山下。宋元符中，邑士林程捐资浚溪以应  
 讫，复筑陂开圳以灌田。圳长二里许，自县前南市坂至县东下董  
 坂皆资其利。今犹呼为林厝圳。

官陂 深一丈，阔二丈，长八尺。 上董坂陂 深七尺，阔二丈，长三丈五尺。 郑陂 深五尺。

阔一丈，长二丈五尺。 下董陂 深八丈，阔三丈，长五丈。 俱在坊隅里。

南埕通济陂 深一丈，阔一丈二尺，长二丈五尺。 在清泰里。

小官陂 深一丈，阔一丈五尺，长二丈。 郭洋陂 深八尺，阔一丈五尺，长一丈五尺。 峡头陂 深八尺，阔一丈五尺。 濂头陂 深六尺，阔二丈，长三丈五尺。 俱在小尤中团。

洪坑口双陂 深八尺，阔二丈，长二丈五尺。 泗洲前陂 深七尺，阔四丈，长二丈五尺。

陂头陂 深六尺，阔二丈，长二丈五尺。 俱在东西团。

园宅陂 深一丈，阔二丈五尺，长三丈。 山茶陂 深一丈，阔二丈五尺，长三丈。 留坂陂 深二丈。

阔二丈，长二丈。 俱在杨梅上团。

论曰：“邑田多在高阜，陂蓄之所难及，惟资山泉。浹旬不雨，民即苦病。傍溪筑陂，春夏洪流暴激，倏倏坏，屡有增设，亦屡有变易。诸陂皆宋明旧迹，所庐深广之数，了如指掌，

存之以见前人之留心于水利也。迩来依仿建筑，下流蝉联布列，殆亦有所由兴欤！”

## 井

龙眼井 在县治东。径四尺八寸，围一丈四尺四寸。俯瞰深洞，泉大而甘。幹规巨石为之，高三尺二寸。

罗汉井 《万历志》云：“在县东罗汉寺前。水极清冽。寺废久。故老相传：‘分司内松一株，枝幹苍古，势若龙蟠，乃五代时寺僧手植者。’”井无可考。今按图南书院即分司旧址也。松坏于康熙十一年夏。乾隆十一年，知县鲁鼎梅建书院，仍凿井并植大柏于门庭。

雲居井 在鸣凤桥东南山下。有泉涌出，味最清甘。

城内四井 明知县张大纲凿。一在分司前，今废；一在城隍庙前，今存；一在城东市旁，今存；一在城西南马路下，今废，改在城西市旁。先是城中无井汲，饮溪水。嘉靖辛酉，永春吕尚四乱，驱数万入围邑城者七日。钥门阖城，苦饮泥浆。纲曰：“予责也。”寇退，亟凿四井。

廨中井 极清冽。嘉靖乙丑，知县何谦所凿也。旧廨中日用，皆里甲佣夫挑运，岁费十余金。谦一日公余，见肩水者趋而进，指其水叹曰：“民之膏脂也。”遂捐俸凿井。

永嘉井 在上翰社吉岭乡永嘉寨。深三十余丈。

造福双井 在西关外泮岭下。地窄民稠，赖井资用。因附记之。

论曰：“耕田而食，必凿井而饮。‘井养不穷，’《易》之训也。邑城既濒溪，乡多夹涧，故井瓮绝少。然如张令之为民防患，何令之为民借力，一事虽微，而泽且与井俱长，又乌可或略耶？”

## 物 产附

### 谷之属

早稻 有早仔，师姑早，俱六月熟，米色白。

寄种 附插于早稻之旁，至冬乃熟。长芒，米小而硬，色红。又有无芒者，俗呼寄种稳，米红、白二色。

占稻 无芒而粒小。《湘山野录》云：“宋真宗以福建田多高仰，闻占城稻耐旱，遣使求其种一十石，使民蒔之。”《三山志》

谓其有早、晚二种。《邵武志》谓其种有六十日可获者，有百日可获者。邑田岁仅一熟，早稻寄种已少，此种更稀。

圣君早 即赤早。  
七月熟。

白头莲

鸡母稳

富贵稳 亦名赴季。

台湾稳 种来自台湾。  
竹梢稳 俱八月熟。米色白。  
徐国稳 即大冬，邑惟此种最盛。

糊稳 有芒，俱九月熟。米色红。

赤冬 米色红。

重阳冬

三斤冬

栗壳冬 俱有芒，米圆白甘美，九、十月熟。

以上粳稻。

重阳秈

银朱秈

虎皮秈

火烧秈 红芒

无芒秈 俱九、十月熟。

以上粳稻。

畚稳

畚冬

畚秈 以上山畚所种者，味俱香美。

大麦 麩也。俗呼鼓槌麦；有类麩而壳稍异者，俗呼米麦。俱长芒。

**小麦** 秣也。俗呼面麦，可磨为面。又一种名蜈蚣麦。俱无芒。

**荞麦** 秆红花白，实三棱而黑，秋花冬实。

**黍** 有番黍、钓钩黍。又有黍仔，种于山麓。

**豆** 菽总名。大者有黑、白二色，小者有绿、赤、白、黑数色，俱少种。

按：“德化五谷不备，岁俭一收。谚云：‘半年辛苦半年闲。’盖地瘠而民复习于惰也。黍豆之属既稀，即二麦亦少种者，俗咸谓其不宜岚雾。不知邑地高寒，麦性耐之。余<sup>⑩</sup>癸亥冬刊示劝谕各里社遍种。数年来群庆丰登，亦足以资民食之什一云。”

## 帛之属

**苧布** 缉苧为之，纺而织者，力作之人所衣。不纺者以糯糊抽过织之，曰“糊布”。又有杂棉纱织之者，曰“罗布”。

**葛布** 缉葛皮为之，山间偶有作者，甚粗。

## 货之属

**磁器** 泥产山中，穴而伐之，碾而出之，碓舂细滑，入水飞澄，淘净石渣，顿于石井以澆其水，乃砖埴为器。烈火煅炼，厚则

绽裂，薄则苦窳。甕、瓶、罐、甌（bù），洁白可爱。饮食之器，多粗拙。虽有细者，较之饶州所作，终不能及。

**铁矿** 出矿山崎。采矿熔铁者例纳邑进士山租。邑原有七炉供饷，然每时兴时废。



纸 以竹穰为之。粗者名火纸，稍细而厚者名古纸，土人用以事鬼。又有连四、磨边等纸。

蓝淀 马蓝，叶大，丛生，茎短有节。折其茎以土壅之即生。槐蓝，叶小，蔡襄《江南月录》云：“采以器盛，水浸，除滓梗，搅之以灰，即成。”

黑烟 烧松木及竹叶为之，勦罨所需。

香 有松香、有枫香；吉兆藤香，即土降真香，少有。

茶 产高山者佳。

烟叶 崇祯初年始种之。邑田仅一收。迩来民稍习勤，冬至种麦，清明附种烟叶于麦旁，麦熟即厚壅以粪，大暑后收烟种稻，稻更丰收。但下年只可种麦与稻，以休地力；若仍种烟，多难活。

蜜 蜂小而微黄，人家畜以木厨，结房作蜜。有黑蜂，食而不作，盖雌蜂也。绞出蜜，取房炼之，则成黄蜡。

油 有茶油、桐油、菜油、柏油。

饼药 桐子壳烧灰淋汁熬成。

石灰 炼石为之。

薯榔 茎蔓似薯，根似何首乌，皮黑肉红，染皂所用。

棕 乡民间于墙下种之，以供绹索。

苎 产小允中，一科数十茎，宿根。至春自生，岁二刈。曰春苎、月苎、寒苎。

黄麻 可编  
索。

砖

瓦

## 蔬之属

芥 味辛辣，其品不一：青芥似菘而有毛，紫芥茎叶通紫；白芥子粗大，色白如粱米，可入药；又有花芥、石芥、鸡爪芥。

菜薹 一名萝卜。其子可入药，俗呼六月菜。

白菜 种来自北方，而味不及。

油菜 叶如白菜，青色，根微紫。子可压油。冬田闲旷尽宜栽种。

芥蓝 叶厚，其色如蓝。

蕹菜 蔓生，花白，茎中虚。摘其苗以土壅之辄活。本出东夷古伦国，番舶以瓮盛之，故名瓮菜。能解野葛毒。

菠薐 又作波棱。出西域颇梭国，讹“颇”为“波”。俗呼赤根菜。

苦蕒 《诗》“薄言采芑”是也。味苦，可傅蛇虫咬伤。

蒼苾 叶厚而柔，晒之难乾，俗呼厚叶菜。茎灰淋汁洗衣极白。

茼蒿 叶似艾，花如小菊，性冷微香，令人气满，不可多食。

苋 紫、白二色。不宜与鳖同食。

茄 有紫者、白者、青者，形俱长。

王瓜 先百瓜生，故名。微有刺，俗呼刺瓜。

丝瓜 性寒。老则其中结丝，名天罗布。

苦瓜 皮皱，味苦甚。有青、有白，长可尺余。其瓢初生色白，至熟转红，核如木鳖子而小。

菜瓜 长尺许，色绿而斑点。

冬瓜 益气耐老，除心胸满，去烦热。《肘后方》云：“发背欲死，取冬瓜截去头，合疮上，瓜烂去，更合之，未尽，疮已

敛小，即用膏药养之。”

瓠 亦名瓢。味甘。有缘架生者，有附地生者。大腹小头。老则去穰为器。又有葫芦瓠，瓢瓠，俱可为器。又一种俗呼番瓠，形

圆而扁，肉黄味甘。拔火毒，炮伤，砂子入肉，切片傅之立出。有极小者，名金瓜，皮纯赤有瓣。

豆 菜豆，长如箸。虎爪豆、刀豆、鱼鳅豆俱以形名。红、白二豆有数种，架生。

芋 形圆而大，状如蹲鸱，蜀川谓之芋魁。其小者如卵，生于大魁之旁。又有蕉芋，形长而大。

山药 蔓生。茎紫，叶青有三尖角，似牵牛而光泽，开细白花，结实如铃。生山谷间，根细如指，白色，极繁实。

薯 有红、白二种。根如姜芋之类，大者一枚重斤余。又有寸金薯，类山药而差大，长可一二尺，白如玉，色味极珍美。

番薯 万历间，闽人得之外国。碣膺山地皆可种。茎叶蔓生，根如山芋、蹲鸱之类，味极甘。有红、白二种。生食、熟食、晒

乾、磨粉皆宜，亦可酿酒。迩来栽种甚盛，粮糗多资于此。又有一种略短而圆、肉色纯黄者，为芋薯。

**蒟蒻 (jǔruò) ⑭** 苗叶及根酷似天南星，但茎斑、花紫为异耳。土人取根大者刮磨，入米汤，煮之成冻。其小

者仍种于园中。

**姜**

**葱** 胡葱，香葱也。又长生葱，七月种，性寒。凡杖疮、刀疮，砍截膜未断，取葱连根捣烂，锅中摊热，敷之皆愈。

**蒜** 《本草》：“葫，大蒜也。”久食伤人损目。若心痛者，用酸醋煮，不用盐，取饱顿服之，立愈。

**韭**

**薤** 似韭，叶阔多白，无实。凡用葱薤，皆去青留白。

**胡荽** 即园荽，或谓之香荽。最发痘毒。

**葵菜** 叶圆似葵花，俗呼奇菜。

**芹** 荻芹，茎之白者可菹(zū)。赤芹，茎叶俱可菹。

**葶菜** 叶似葎，味似芥，极辣。生于幽涧，移种畦圃反不发。

**苦菜** 生山中，味甚苦。

**笋** 详见竹之属。

**蕈** 亦名菌，俗谓之菇。畚人斩木于深山，雨雪滋冻而生，曰香菇、木耳。菇生石上者曰石耳菇。又有胭脂菇，生深林平沃地

面，鲜红而光泽，其底与茎俱白色。杂菇生山中，名色不一，熟可食，生则毒人。中其毒者，用生脂麻搗酒，服之即愈。

**蕨** 蔓生野山中，拳芽可茹。性微冷。取根捣碎，用水澄之即为粉，可疗饥，土人以相馈遗。

土芮 藤紫，叶圆，根似芋。康熙四年，  
饥民往戴云山掘取食之，赖以全活。

### 果之属

- 桃 红桃，白桃，莺嘴桃，苦桃。又  
有矮桃，树高者仅三四尺，秋熟。
- 杏 花如红梅而丰艳，实  
如梅而甘。邑少有。
- 李 珠李，大如龙眼，色青红，味淡  
而酸。粉李、夫人李，皆少有。
- 柿 重色柿，大，径二寸。牛心柿，圆而长。糖柿，无核。山柿，  
小而多核，俱宜晒乾，乃温而补。又有油柿，可渍汁裱纸。
- 栗 外刺如蝟，  
熟则罅拆。
- 椎 柯树实，似  
栗而绝小。
- 梨 有青消梨，菜梨，  
狗梨，鹅梨。
- 林檎 一名来禽，一名花红。  
实似梨而小，六月熟。
- 枇杷 一名卢桔。叶似驴耳状，四时不凋。谢瞻赋云：“粟金秋之  
青条，抱青阳之和煦。肇寒花于结霜，成炎果乎纤露。”
- 石榴 紫榴，皮斑赤，肉薄，核大，味酸。  
玉榴皮黄，子晶莹如水晶，少有。
- 香椽 树有刺。叶大而微厚。实大者长尺余，  
黄色，皮厚而香，瓤微酸而苦。
- 柚 树高一二丈，叶重台而大，花五瓣而卷。实  
圆大，金黄色，皮厚，肉小而白，味酸。

- 柑** 凤柑，皮皱，不堪食。红柑，取外邑柑核种之而生者，皮多青而味酸。
- 橘** 猴橘，花、叶、密而尖，实小如钱。金橘，树、叶、花、实俱小。又有一种极小者曰金豆，俱不堪充果品，仅可蜜煮。
- 酸枣** 色青而巨核，味涩而微酸。糜其肉杂以蔗糖，可为饵。
- 杨梅** 木似荔枝，叶细阴厚，实生青，熟红、白二色，俱极酸。
- 白果** 状如橄榄。有壳无核。
- 葡萄** 一名马乳。
- 波罗蜜** 种自荷兰国移来。实生于树幹上，皮似如来顶，剖而食，甘如蜜。

## 药之属

- 黄精** 二月生苗，高一二尺。叶如竹叶而短，两两相向，茎梗柔脆，本黄，末赤。四月开细青白花。子白如黍，亦有无子者。根如嫩生姜，黄色。八月采。
- 天门冬** 春生。藤蔓大如钗股，高至丈余。叶如茴香，极尖细而疏滑，有逆刺。根大如指，长二三寸，一二十枚同撮。
- 百合** 茎高三尺许。叶如柳，四面攒枝而上。四五月开白花，长蕊下覆，花心有檀色。很小者如蒜，大者如碗，数十片相累，如白莲花，可蒸食或以为粉。子生枝叶间，不附花。一名强瞿。
- 天南星** 苗似荷。梗高尺许。叶似茺蔚，长枝相抱。花似蛇头，紫色。结实成穗似石榴子。根似芋而圆。

**何首乌** 春生苗。叶叶相对，如山芋而不光泽。其茎蔓延竹木、墙壁间。根大者如拳，各有五棱瓣，似小甜瓜，赤者雄，白者雌。本名交藤，因何首乌服而得名。

**括楼** 亦作瓜蒌。《诗》云“果臝”，《尔雅》云“天瓜”，《本草》云“地楼”，蔓生，花浅黄色。实在花下。亦名黄瓜。搗其根作粉，名天花粉。

**茵陈** 春生苗，秋枯，经冬不死，春复因旧苗生新叶，故名。又一种大叶者，曰山茵陈。

**茯苓** 多年樵砍之松，气味未绝，其精气盛者结为茯苓。又多年松脂流入土中变成。自作块，不附着根上。其抱根而轻虚者为茯神。

**土茯苓** 俗又呼为山萆薢。

**金樱子** 生郊野中，类蔷薇。有刺，开白花，实如小石榴。煎膏固精。

**山梔子** 一作支子。佛书呼为“薝蔔”。花开六出，其实七棱。亦名越桃。

**决明子** 苗高四五尺。叶似苜蓿而大。花黄白色。秋深结角，其子生角中。如羊肾，主明目。

**菝葜子** 亦名茴香。叶似老胡荽，疏细作丛。开花如伞盖，黄、白色。实如麦而小。

**蒟蒻** 似茴香，而实差小，味尤香冽。

**蓖麻子** 可压油。形如牛脾。

**香附子** 莎根也。

**苍耳** 《本草》作“果耳”，即《诗》所谓“卷耳”。一名羊负来。

车前子 即芨芨也。好生道旁。  
邑无大叶长穗者。

薏苡 春生苗。茎叶如黍。开红、白花  
作穗实青、白色，形如珠而长。

枸杞

地骨皮 即枸杞  
根。

吴茱萸 叶似椿而阔厚，实似椒子，  
嫩时微黄，熟则深紫。

谷精草 春生谷田中。叶细，花白而小，圆似  
星，又名戴星草。二三月采花用。

香薷 似白苏而叶细。生  
山谷石上者尤佳。

稀签 俗呼火  
炊草。

益母草 《诗》谓之“穉”，《本草》谓之“充蔚”。郭璞云：“叶  
似荏。方茎。白花，花生节间。”今园圃、田野所产，白

花者稀，淡红者多。  
宜于孕妇，故名。

石韦 一名石皮。丛生石上。叶如  
柳，背有毛，而斑点如皮。

鸡项草 叶如红花，叶上有刺，青色，亦名千针草。根似小萝藦。枝  
条直上。三四月苗上生紫花，八月叶凋。其根可治下血。

石菖蒲 出石涧。叶有脊如剑，一寸九节者佳。其无  
脊者名溪荪，生下湿地。大根者名菖阳。

刘寄奴

猴姜 根生大木或石上，引根成条，上有黄毛及短叶附之。又有大  
叶成枝，面青绿色，有青黄点，背青白色，紫点；无花实，



取根用。《本草》谓之骨碎补，又名胡孙姜。生枫树上者，治牙痛甚效。

石南藤 其苗蔓延木上，四时不凋。叶可治腰痛。

黄连 出戴云山。叶如小雉尾，草经霜不凋。

青蒿 常蒿绿色，此蒿独青色。

蒴藋 亦名木贼，即接骨草。轻虚无心。主续筋骨。

马鞭草 其穗类马鞭。又一种名牛托鼻。

夏枯草 至夏而枯，味辛寒。

泽兰 俗呼千里吉。

艾 有大叶者，有小叶者。

紫苏 叶下紫色，甚香。夏采茎叶，秋采实。

薄荷 叶尖。夏秋采茎叶曝乾。

忍冬花 藤生，绕覆草木上。苗茎赤紫色。叶上下微有毛，花黄、白相间，凌冬不凋。又名金钗股，又名老翁鬚。俗呼金银

花，又名左缠藤。

甘菊 茎紫，气香而味甘者为真。

白藓皮

- 海金沙 蔓生。叶底有金粉。  
俗呼竹园荑。
- 鹤虱 俗呼牛舌  
菜花。
- 金石斛 出石牛山。  
味甘平。
- 茜草
- 蒲公英 味苦性  
平。
- 威灵仙 用根去  
芦。
- 射干 俗呼仙人掌。多贴石壁上生，  
如手掌。能治肠痔泻血。
- 黑丑
- 扁蓄 味苦平。  
利小便。
- 百部
- 羊蹄 秃菜也。叶狭长。色深绿。茎节间  
紫赤。采根醋磨，涂癣速效。
- 山豆根 俗呼雨伞  
子根。
- 葛根
- 土葛
- 木瓜 似香  
椿。
- 蝉退 去翼、脚，  
用治风病。
- 穿山甲 即鯪鲤  
甲。

- 姜黄 叶青绿，长一二尺许，阔三四寸，有斜文，如红蕉叶而小。花红白色。根盘屈，类生姜而圆。
- 独脚莲 一茎一叶、根如蒜，可辟蛇。
- 金不换 性热，治风。
- 方正草 叶狭而长，蓝色，平分四方，攒茎而上。其实六瓣。可治金蚕蛊。
- 盐麸子 叶如桔子，秋熟为穗，粒如小豆，上有盐，似雪。食之，酸咸止泻。

### 木之属

- 松 有五鬣者，有三鬣者。花上黄粉名松黄。其节为松明，其脂为白胶。皮上绿藓衣名艾，纳香用，和诸香烧之，其烟不散。
- 柏 樊宗师《园谕》谓柏为“苍官”。其子香而可蒸（ruò）。又有叶侧向而生者，名侧柏。
- 桧 柏叶松身。
- 杉 木类松而劲直。叶附枝生，若刺针然。土人作宫室，以此木为上。
- 樟 亦名豫樟。极高大。叶似楠而尖长，木理润密，气味辛烈。熬其汁成脑，置水上火燃不息，今呼樟脑是也。又有禽鸟含种所生者为鸟樟，子可压油。
- 榧 亦作楠。其木直上。柯叶不相妨。
- 椿 木之寿者，折其枝叶置花瓶，经月不枯。一种名竹叶椿，其叶类竹。

梲 叶如侧柏。

椶 木可为器，极耐久。

桑

柘 与桑异种，皆可饲蚕。

黄木 其色黄。

榷子 其色赤，俱坚而泽。

榱 亦可为栋宇，但易腐，不如杉。

怪杉 略似水绵，而木理轻松，心赤色。

杜松 叶似杉而小尖，劲如刺。木似松而文细，其色赤。

水绵 类杉。修幹而细叶。滨水处多植之。

桐 叶有三权，结子如胡椒。可食者曰梧桐，叶圆而未尖，三月开淡红花。子可压油者曰油桐。又一种花、叶不相见，花不结

子，材可琴瑟。《禹贡》“峯阳孤桐”即此，俗呼浮桐。

梓 似桐而叶小，花紫。陵机云“楸之疏理白色而生子”者，俗呼浮梓，用以为木屐。

相思木

金荆 俱坚而有文。

**白花梨** 木理极细腻。皮微有刺者，黄心，木理稍粗。

**柯** 木修直，可作船桨，子名椎。

**苦楝** 即株木也。子名苦楝，可食。

**楝** 《东皋杂录》：“江南自春至夏，有二十四风信，梅花最先，楝花最后”。

**冬青** 其叶常青，四时不改。唐禁中呼为“万年枝”。

**槐** 叶细而青绿。其花可染黄，角可入药。

**檀** 叶似槐。

**木槿** 叶如橄榄。实可浣垢。俗呼圆墨子。

**皂荚** 《南史》云“黄尘污人衣，皂荚相料理。”又一种曰肥皂，亦可浣衣。

**椒** 木有刺，子朵生，颗粒似蜀椒而辛，香不及。俗呼花椒。

**乌柏** 叶似梨、杏，花黄白，子可压油。

**漆** 邑山膏，无拱抱者，故不以取漆。

**棕榈** 亦曰拼榈。子嫩未吐者曰棕鱼，可采充茹。

**枫** 似白杨，叶圆而歧，有三尖。春发，秋红，冬落。取其脂可为香。土人于上已日采叶渍米为青饭。

**槲** 木如石榴。皮黄，子赤，如枸杞子，而头尖。枝可剉以染黄。生山石间。

柳 叶狭长而青。枝柯长软而下垂。虽纵横颓倒植之皆生。

梓柳 皮如槐、檉。叶如栲而狭长。生水侧。

水杨 叶阔阔而赤，枝条短劲。多生水岸。

罗汉松 叶长而狭，色苍秀可爱，凌冬不凋。

吉兆藤 紫色。其根为降真香。

按：德化素号产木之区。盖穷岩邃谷，水道隔越，砍运维艰，故得老其材也。迩来人稠用杂，旦旦斧斤，兼以铁灶、磁窑广需柴炭，几并万林而赅之，贾木者于是不入矣。

竹之属 戴凯之《竹谱》：“竹有生日，谓五月十三日移植最宜。亦谓竹醉将枯则生花。或云劈竹多用辰日。”山谷

诗云：“夏栽醉竹逾千个”，又云：“根须辰日刷<sup>②</sup>(Zhū)。”

猫竹 性极坚劲，可编筏。冬笋不出土，味最佳；春笋乃能成笋。初解笋时砍之，渍以灰，成襪作纸。

方竹 枝叶扶疏，外方内圆，可为杖。笋秋末生。

篁(guī)竹<sup>⑤</sup> 生深山者万竿挺立，性坚，色苍白。移植则细小。

石竹 节疏而平，其坚如石。

紫竹 小，而色纯紫。可作箫。

- 箭竹 可作箭。《禹贡》曰：“筱土人取为弩箭，不用雕削。”
- 绿竹 夏笋甚美。土人重之。
- 赤竹
- 苦竹 性坚，色微紫。一名雪竹。四月笋，味甚苦。
- 筋竹 肉厚而窍小，可为弓弩材。
- 油竹 肉厚而叶长阔。可为枪，中虎即毙。
- 调丝竹 节疏，性柔。丝之，以作灯笼。
- 乌竹 色纯黑。
- 斑竹 山间有之，不及湘江者。
- 凤尾竹 梢叶森秀。
- 人面竹 亦曰佛眼竹。其幹与常竹无异，惟节间上下向背突起如人面。可以为杖。
- 葫芦竹 节大，节小。
- 观音竹 高仅尺余，密筱扶疏。
- 箬叶竹 叶大，可絮舟篷。
- 淡竹 叶可入药。

盖竹 本小末大。俗传宋僧  
普明所倒插牛梢也。

千岁竹 花黄白。实  
似橄榄。

芦竹 生溪涧湿处。  
丛小叶疏。

## 花之属

牡丹 闽中绝少。邑地  
高寒，故宜。

芍药 有深红、浅红、  
淡白三种。

莲 红白二种。又有午时莲生九仙、石牛山池中，  
花白，大径二寸，浮于水面，午开酉苞。

菊 有数十种。好事者谱传之。又一  
种花深黄色，如滴金，四月开。

兰 黄山谷云：“一幹一花而香有余者兰。一幹五七花而香不足者蕙。”今邑山中所生，人家所植，俱一幹五七花或十余花，及紫、白二种，皆谓之兰。又有一种茎叶似马蓝，开花成穗而香，谓之翠兰。窃尝考之《传》曰“德芬芳者佩兰”，《楚词》所谓纫秋兰以为佩”是也。今之所谓兰，叶既无香，花虽香，亦不过经夕而止，果可佩乎？古有兰省，盖以兰藏之书中辟蠹，故名。今之所谓兰，果可辟蠹乎？《草木疏》曰：“兰为王者香草，其茎叶似泽兰，广而长节，节中赤，高四五尺”。今之所谓兰，其形状果如是乎？吴草庐尝著《兰畹说》，辨之俱悉。

梅 有绿萼梅、红梅、碧梅、鹅梅、山梅。品梅，一花三实。  
蜡梅，黄山谷谓香气如梅，类女工燃蜡所成，因名。

桂 一名木犀，有丹、黄、白三色，凡  
色胜则香薄。四时开者曰月桂。



- 山茶** 花深红色，冬盛开。单瓣，大径三四寸者曰川茶。千叶者曰宝珠茶。又有腊蒂茶，花小如钱，粉红色。
- 洋茶** 有红，有白；圆者，六角者，红白斑点相间者。又有牡丹茶，花如牡丹，深红色。
- 海棠** 有红，有白。又有垂丝海棠，色淡红而多叶。西府海棠，树高二三丈，俗谓之棠梨。
- 碧桃**
- 绯桃** 花俱千叶。
- 榴花** 有大红、浅红、黄、白数种，俱千叶。
- 紫薇** 俗谓之“不耐痒花”，爪其皮则枝幹俱动。又谓之百日红。
- 紫荆** 木似林檎，花深紫可爱。
- 木槿** 朝开暮落，有白者、紫者、粉红者。
- 杜鹃** 一名山躑躅，一名山石榴。三月盛开，有深红、浅红及紫色，俗传杜鹃啼血滴地而成。此花千叶者佳，单叶者名满山红。
- 绣球** 一花众蕊团簇如球，初青后白，其大如碗。又一种卉生，花青蓝色。
- 木芙蓉** 初开甚白，向晚则色转红。春暮花开至秋。
- 辛夷** 花初发如笔，又名木笔。单瓣者紫色，重瓣者粉红色。
- 玉兰** 花似辛夷，重瓣而白。树高大。
- 蔷薇** 枝幹有刺。花红紫色，三月盛开如锦。又有野蔷薇，香亦清冽。

- 长春** 枝幹有刺。花紅，四時常開。
- 寶相** 藤生。花類繡球，而秀整過之。
- 茉莉** 夏開，白色，妙麗而芳郁。
- 瑞香** 一簇數十蕊，外紫，中白，冬盛開。東坡詞云：“領巾飄下瑞香風，驚起謫仙春夢”。
- 玉樓春** 又名欲留春，即百葉梔子花。俗呼水梔子。
- 棣棠** 條生。花淡金色。梅聖俞所謂“鞞鄂芸黃殿後花”是也。
- 郁李** 一名車下李。一名御園李。
- 噴雪** 花細白，如雪亂點。亦有千葉者。《通志》名“泼雪”。
- 金錢** 深紅色，圓薄如錢。
- 凌霄** 一名兔絲藤。生附大木，其花黃，有毒，凌晨仰視花露，滴目則爽明。詩云：“凌霄倚樹生，樹倒凌霄死。勸君莫倚勢，倚勢亦如此。”
- 紫花** 藤极大，蔓延高树上。开花成穗，可作茹。
- 粉蝴蝶** 花白色，瓣类燃成，有黑紫点，边如刻剪。
- 金丝蝴蝶** 黄色，心多长瓣。
- 滴滴金** 叶露滴地而生，秋开花，黄如金色。

**汉宫春** 花色金黄，略似滴金而美。春末夏初开。

**锦竹** 一名石竹。丛生，高尺许。花如锦缎。李太白有“石竹绣罗衣”之句。

**剪春罗** 花淡红色，旁如刻剪。秋开者名剪秋罗。

**秋海棠** 绿叶紫纹。花粉红色，含吐以次递开。

**夜来香**

**一丈红** 茎高，花密，攒枝直上。

**葵** 心常向日。

**鼓子** 以端午开。又名龙船花。

**萱** 一名鹿葱。草之可以忘忧者。《本草》谓：“花名宜男”。

**玉簪** 质素而香。诗云：“宴罢瑶池阿母家，飞鸾扶上紫雲车。玉簪坠地无人拾，化作东南第一花。”

**鸡冠** 秋开。有紫、白、黄、水红、五色数种。又有矮脚鸡冠，高数寸，即寿星鸡冠也。又有垂丝鸡冠，其花最大。《本草》

云：“白鸡冠子凉，止肠风、泻血、赤白痢及妇人崩中带下。”

**金凤** 花如飞凤，有红、白、紫、粉红、五色、千叶数种。

**蕉** 芭蕉。叶长而大，老则心中抽萼作花，如倒垂茵萼。每开一瓣，则子骈生附萼，凡数十枚，生育熟黄。又有红蕉高仅二三

尺，茎小，开金红花极丰艳。又一种名美人蕉，叶小而尖，亦开金红花，又名月蕉，以其叶生如月之数则花也。

**老来娇** 一名秋红，一名雁来红。叶初生即纯红。

**昙花** 叶类昌阳而绝大。花瓣挺出叶间如臂。其苞如掌，开则散垂，深紫色。

## 草之属

**仙草** 捣烂绞汁，和面粉煮之成冻。

**鼠曲** 叶如马齿苋，上有白毛。黄花。俗于清明采之作糍。

**茭** 种泥浦中，初生笋可食。

**藻** 根生水底。叶敷水上。

**浮萍** 有大小二种，俗谓之蕪。

**茅** 白花。《诗》“手如柔荑”即此。

**芒** 似茅，可为绳索、屨履。

**菅** 似茅而光泽无毛，根下五寸许。有粉者，柔韧可为索。

**苦草**

**瓦松**

**花瓶草** 叶如兰，植于案头瓶中。

**虎耳** 八芳草之一也。可栽于石上为玩。

芦荟 妇人取以代膏。

凤尾

遍地锦 俗名花针头。

淡酸草

猪母苋

枪刀草

蔚蕉 似菖蒲而大。行血散气。

藜 茎大者可以为杖。

龙鬚草 种水中。编为席，利暑。

鸡矢藤

金丝五叶藤

贴壁藤

仙巴掌 状如鞋底，两面有刺，接叠而生，无枝叶。

### 畜之属

牛 黄牛，角缩而短悍。水牛，丰硕而重迟。水牛新孳，其下乳治以充饌，名曰“乳饼”。

羊 岁两生息。

猪

犬

猫

《酉阳杂俎》云：“猫名乌圆。其  
目睛且暮圆，及午，黑睛如线。”

鸡

鸭

家畜曰鸭。  
野曰鳧。

鹅

东坡云：“鹅能惊盗，亦能却蛇。盖其粪能  
杀蛇，园池养鹅，蛇即远去。”一名舒雁。

鸚鵡

性甚驯。善认主人之居。邑俗谓之三损鸟，一  
损谷，二损屋，三损乡里和睦。故鲜有畜者。

月兔

月一产三  
四子。

鹭鸶

畜之，绳系其  
颈，使捕鱼。

## 毛之属

虎

山中间  
有之。

豹

尾赤而文黑为赤豹。  
文圆者曰金钱豹。

熊

类犬豕。而性轻捷，好攀援上高木，见人则颠  
倒自投地而下。冬蛰不食。饥则自舐其掌。

鹿

性惊防。分背而食，食则相  
呼。群居则环其角外向。

獐

《尔雅》谓之“麋章。麋，其总名  
也。性善惊，饮水见其影辄奔走。

- 鹿 獐类也。皮可为履  
舄，胜于众皮。
- 山羊 《尔雅》谓之“羴羊”。有肋  
力，甚能陟峻。生深山岩穴中。
- 野猪 亦名山猪。似家猪，但腹小脚  
长，毛色褐，牙利如镰刀。
- 山犬 状类家犬，赤苍  
色，好食果实。
- 豺 似狗而长尾，白颊，  
高前广后，其色黄。
- 獾 似狐而小，青灰色，肤  
如伏翼，水居食鱼。
- 狻 字亦作“狸”，口锐身长似猫。香狸，所过处草木皆香。玉  
面狸，面白色。九节狸，尾有九节。笔狸，脊毛可为笔心。
- 猴 胡孙也。《诗》谓之  
“獠”，性躁而多智。
- 豪猪 毛黑如锥。鬃有刺，怒则奋  
以射人，其刺可以为针。
- 兔 《礼》曰  
“明视”。
- 竹鼯 俗呼菅豚。苍色，如鼠，食竹蒿根。人  
或竹刺入肉不可出者，啗此物立消。
- 山獐 状如鼠。腊而食  
之，甚香美。
- 鼠狼 生山野中，似鼠而大，  
色赤。能食鼠捕鸡。
- 鼯鼯 形似鼠狼，苍黑而小。尾  
多毳。善缘藤萝而走。
- 鼯鼠 似蝙蝠而小。  
膏疗耳聩。

鼠 穴虫之黠者。善窃，昼伏夜动。俗称为耗鼠。

## 羽之属

喜鹊 《禽经》云“鹊俯鸣则阴，仰鸣则晴。人闻其声则喜。故云喜鹊。”

乌 纯黑而反哺者曰慈乌。腹白而不反哺者曰鸦，亦名鸛。又一种似乌而小，多群飞作鸦声者，曰慈鸦。

鸠 《诗》曰：“宛彼鸣鸠。”《集传》曰：“鸣鸠，斑鸠也。”陆氏曰：“似鸲鸠项有绣文。”《本草》云：“斑鸠又名斑鸠，

春分化为黄褐侯，秋分复为斑鸠。”又云：“黄褐侯如鸠，作绿褐色，声如小儿吹竽。”

布谷 《诗》曰“鵲鸠”。《集传》云：“秬鞠也。亦名戴胜。”

山鹊 俗呼山鹞。《尔雅》：“鹞，山鹊。”注：似鹊而有文彩，长尾，嘴、脚赤。

莺 《诗》云“仓庚”。疏云：“黄莺。又名黄鹂、鹂鹂、黄公、黄栗留。”昌黎诗云：“麦黄韵鹂鹂。”东坡云：“苦厌黄公

聒昼眠。”欧公云：“黄栗留鸣桑葚熟。”

燕 《诗》谓之“元鸟”。齐人呼为“𪗇(yī)”。庄子谓之“意”。而陶隐居云：“胸紫身小者为越燕。斑黑而声大者为胡燕”。

雀 一名嘉宾，言栖宿人家如宾客也。又有黄色者，八九月飞稻田间，多至数百。

白头公 似雀而大，头有白点。

鹈鹕 飞则鸣，行则摇，长尾尖喙，背上青灰色，腹下白，颈下黑如连钱。



- 信鸟** 亦名进鸟。似鹁而小，能为百禽声。忽鸣而过庭檐间，其占为有喜。
- 鸬鹚** 《释鸟》云：“桃虫。鸬，其雌鸬”。陆机曰：“鸬鹚也，似黄雀而小。化而为雕。其喙尖利如锥，取茅秀为巢，巢至精密，以麻续之，如刺棘然”。一名林雀，一名巧妇，一名工雀，一名女匠。
- 百舌** 似鸬鹚而身差长，无喙，毛苍嘴尖。《朝野杂录》云：“春啖夏止。”张芸叟诗云：“学尽百禽语，终无自己声。”
- 啄木** 嘴尖舌长，穿木食虫。
- 吉吊** 略似百舌，群飞鸣聒如云“吉吊”。因以名之。
- 画眉** 白眉褐质，善鸣好斗。
- 鹌鹑** 形小而善斗。
- 鸬鹚** 俗呼八哥，似鸬而有喙。剪其舌端，能效人言，又有白点者差小。
- 鸬鹚** 形似牝鸡，臆前有白圆点，背间有紫赤文。鸣声重大，若曰“行不得也哥哥”。飞必先南翥。
- 雉** 雄者有冠，长尾。身有文彩，善斗。其羽为翟。
- 白鹇** 白质黑章红颊，首有冠绶，尾长三四尺。性闲雅，可畜。
- 锦鸡** 羽毛有白圆点。喙藏肉绶，日午天晴则徐舒其绶，人谓之吐锦。
- 鸳鸯** 雌雄未尝相离，人得其一，一思而死。
- 鳧** 水鸭。其飞甚速。

**鹭鹭** 项有长翰如丝，  
欲取鱼则弭<sup>⑥</sup>之。

**翡翠** 青羽曰翡，  
赤羽曰翠。

**钓鱼翁** 如翡翠而小。常宿水  
边，伺鱼出而食之。

**竹鸡** 俗呼“泥滑滑”，盖以其声似之也。  
白蚁闻其声，尽化为水。亦名越鸟。

**孤鸡** 其鸣曰“姑愿”，昼夜不绝。俗传妇  
以姑虐死，化为此鸟，其声故云。

**杜鹃** 一名怨鸟。夜啼达旦，红渍草木。凡始鸣皆北向啼，苦则倒  
悬于树。《说文》所谓“蜀王望帝化为子规”是也。至今寄

巢生子，百鸟为哺其  
雏，尚如君臣云。

**鸢** 鸢类。鸣  
则将风。

**鸱** 伯劳也。以五月鸣，应阴  
气之动。残贼之鸟也。

**鸢** 似鸱。青黄色，燕颌勾喙，向风摇翅，乃因风  
飞，急疾击鸟雀食之。《诗》曰“晨风”即此。

**鸱** 《周礼》“哲族氏掌覆妖鸟之巢”。注云：“恶鸣之鸟，若鸱鸢  
也”。贾谊云：“鸱似鸱。”《本草》云：“其实一物。入室，

主人当去。此鸟盛午不见物，夜则飞  
鸣”。又有一种似鸱而小，俗呼孤猿。

## 鳞之属

**鲤** 当肋一行自首至尾无大小  
皆三十六鳞，鳞各有黑点。

- 鯽** 一名鮒。形似鯉，色黑而体促，腹大而脊隆。大小皆有子。
- 鲢** 《本草》作“鱣”。口小鳞细，身扁色白，种来自江西，人家池塘多畜之。
- 鲮** 俗名草鱼。种亦来自江西。土人畜于池塘饲以草，故名。
- 赤眼** 生溪中。如鯉、鲮之类，而眼赤。
- 盍鮓** 尾有星。多穴于田塍或泥岸中。
- 鳝** 或作鳝。似蛇无鳞。《汉书》“鸛雀衔二鳝”即此。夏出冬蛰。
- 鳊** 似鳊而腹大。
- 泥鳅** 《埤雅》：鳊，似鳊而短。以涎自染，难握。与鱼为牝牡。”
- 田瑟** 穴田塍间。无鳞，有刺弹人。俗呼涂虱。
- 贴石** 背偃腹平，其大如指，常贴于溪石中。土人抱石取之为腊。
- 鳊** 巨口细鳞，背上有黑斑文。
- 鳊** 《本草》曰“鱣”。注云：“即鯉鱼也。大首方口，背青黑，无鳞，多涎”。浚溪下流始有之。
- 丁斑鱼** 生泉水中，长仅二三寸。善斗。
- 金鱼** 有数种，俱金红色。畜于盆以供清玩。
- 四脚鱼** 产高山池中。瘦若刀剑，有四脚。性驯。

虾 泥虾，相传稻花所变者，出田中。虾姑，出溪涧中，头大身促，前两足大而长。

蛟鲤 似鲤而四足。鳞甲坚厚。常吐舌出涎，俟蝼蚁满其上，乃卷而食之。即穿山甲也。

## 介之属

鳖

蟹 生涧田中。

螺 田螺、溪螺、池螺。

蚌 字亦作“蚌”。生池泽中。

## 虫之属

蜂 其类不一。虎头蜂、黄腰蜂，窠土中。豹瓢蜂窠树上。土人取其卵以为珍味。

蝉 蛻壳入药。

蝶

萤

蝇

蚊

蛇 青竹蛇，与竹同色，有赤尾者小而不可犯。花蛇，好入人家捕鼠。簸箕甲蛇，长数十节，黑白相间。蚺蛇，蛇之绝大者，可

食，身有斑文如锦。缦缦蛇，如缦。  
又有泥蛇居泥中，食鱼不啖人。

蜥蜴 似蛇而四脚，尾青碧。以五色备者为雄，而不备者为雌。又有一种身小而状似龙，生草间。俗谓之“草龙”。俱不啖人。

蜈蚣 多足。能制蛇，亦啖人。

蛙 背青绿色。韩昌黎诗“一夜青蛙鸣到晓”即此。又有黄文者，谓之金钱蛙。

鳝 大腹而脊青，其鸣甚壮。一种黑色，俗谓之蛤子，亦名水鸡。土人以为珍味。又一种名石鳞鱼，生深山涧中，亦名谷蛛。其

味尤珍。

蟾蜍 身促，腹大，背黑，皮上多瘳磊。跳行舒迟。

虾蟆 背有黑点，身小。能跳接百虫，善鸣。

蝙蝠 类鼠而有翼，昼伏夜飞，一名伏翼，一名飞鼠，一名夜燕。

斑猫 豆叶上甲虫也。甲上有黄黑斑文，如巴豆大。

螽斯 蝗类。青色。长角，长股，能以股相切作声。性和集。一生九十九子。

螳螂

蟋蟀 雄者背有龙文。能斗。

蜘蛛

蜈蚣

蚯蚓 白屈者  
可入药。

蜈蚣

蚁

论曰：“山川奥鬱之气，鍾而为人，产而为物，不以蕪尔而或异也。夫草木虫鱼有资多识，岂读《尔雅》所能穷欤？则渔、樵、农、圃，皆问察之藉矣。因就所见闻为之胪厥族属，辨其名色，聊以备一邑之稽考，非敢云订补图经也。”

### 校注

- ① 苔：原刻本字迹模糊，据民国志补入。
- ② 东为大戴雪，西为小戴雪；应为东为小戴雪，西为大戴雪之误。
- ③ 琼山：民国志作“雪山”。雪山：民志作“琼山”。
- ④ 襦：系“襦”之误。
- ⑤ 郭坂、盖德二溪：民国志作“国宝、花桥、盖德三溪汇于此”。
- ⑥ 纓溪经龙翰乡入于董坂：民国志作“流经龙翰、西墩，南流入浚溪”。
- ⑦ 董坂溪在浚溪下流：民国志作“浚溪中游”。
- ⑧ 涌溪水至上涌乡“合中兴坑水，入梅上里为下涌溪”：据民国志载：“合东坑洋溪，始名为涌溪。”此说可信。
- ⑨ 小允溪经徐州溪至巩口入大田界：民国志作：“经徐州、墓湖，复受上丰水，北流经长潭尾而入大田。”
- ⑩ 纪：此字不叶韵，疑为“纯”之误。
- ⑪ 德化水不通舟：不尽如是，浚溪曾有一段时间通航。据民国志载：

产溪下游的湖坂溪“与涌溪汇合，水平而深，可通舟楫。”据传：永泰嵩口常有船只到本县水口运木炭、海纸往福州，至清末民初尚通民船。

⑫ 万历间：民国志作“万历十五年”。

⑬ 余：指知县鲁鼎梅。

⑭ 蒟蒻：一名“嫩香蒲”，草名。

⑮ 箠竹：此竹伤人则死，叶细节疏，宜作箠（miè）丝。《僧赞灵笋谱》：“箠竹，吴越多生。”

⑯ 弭：疑为“饵”之误。

（校注 江中卫）

# 德化县志卷之五

## 建置志

古人建邦启土，疆域既定，营建斯兴。邑虽蕞尔，以固封守，则有城池；以布政令，则有廨署；以承祭祀，则有坛壝。斯其建置之宏者欤！至若备储有仓，传命有铺，旌善有坊，与夫收穷泽枯之所，又皆不可或缺者也。星罗棋布，而邑之規制昭矣。志建置。

### 城 池

邑旧无城。明嘉靖三十六年，知县邓景武申请建筑。南临浚溪，东自龙浔山麓环山而上，北绕大洋山，西抵大旗山巔，下达于溪。周八百三十七丈，高一丈三尺。下石上砖。开二门，东为“宾阳”，西为“有年”。三十九年，知县张大纲改缩西偏城垣，截大洋、大旗二山于城外，存城垣六百六十八丈，视旧制增高西北，浚濠深丈余；建北镇楼，以资远瞭。东筑月城，东西二门，俱建敌楼。

岁贡生陈石记。



“天下郡邑，莫不有城池之设，所以固圉卫民也。德化县治，建自五季，迄今六百余年，独不城者，以县夙称乐土故耳。迨嘉靖丁巳，邑侯邓文翁，甫莅兹土，奋然以思曰：‘备预不虞，古之善制也。’一旦，召集父老，以筑城之意告之，民皆响应。各殫乃力，取石于山，索砖于陶，经之营之，几及一年，而功遂告成。城垣周围，八百三十七丈，石砌于下，而砖覆之，高一丈有奇。形胜东瞰西邛，诚百雉之壮区也。

岁庚申，倭寇倡乱，剽掠永春，将克日唾手德化，谍知有城乃遁去。时邑侯张衡翁，思邓侯筑城之功，因喟然叹曰：‘公当其劳，我享其逸，德化之有城，不惟邑人世世戴公，余亦阴受公赐矣！’顾制阨而艰于守，可若何？乃申改而狭之。城之东如其旧，西则改从县后山而下，循田中趋西门，周围六百六十八丈，高则合东西城皆增之。北城及西门建敌楼，外凿濠深丈余。东门城楼，视西北高广过之，外筑月城，登其上屹然金汤。

次年辛酉夏，蓬壶叛民吕尚四率胁从者三万人，环攻十有余日，势甚猖獗，而我师卒能乘胜直捣巢穴，盖以城完而守固也。

噫！邓侯固有功于民，而张侯能成邓侯之志，是亦有功于邓侯者也。嗣后屡经寇变，深山穷谷之民，扶老携幼，鱼贯而入，寇退则反。盖自有此城，而人民以安，县治以固，二侯之奇勋伟绩，岂特彪炳一时哉！

语曰：有功德于民则祀之，其张、邓二侯之谓欤！”

四十三年五月，大水坏东西城垣，署知县泉州府检校谢启光葺之。后屡有水患，时坏时葺。

四十四年，知县何谦开北门，名曰：“拱辰”。建敌楼，设窝铺。

万历十九年，知县丁永祚开南门，名曰：“来凤”。

侍郎庄国贞记：

“德化县，泉郡之西北鄙也。由五季创邑治，逾六百余年弗克城。城自

嘉靖丁巳邑侯邓君景武始。然其时仅为东西二门。迨乙丑，侯何君谦复建门于其北，而南犹阙焉。丁侯始至，登陟城垣，眺瞩方隅，俯而若有思也。已而叹曰：‘《传》有之，南门者，法门也。在昔圣人南面听政，向明而治。小之郡若邑，大之天下，于以布法坊民一也。即德化壤地褊小，介在万山中，然亦天子附庸国。业已周环雉堞矣，而门仅三面，向明之方阙焉弗备，其何其示民？且也郡于今日，人文焕发，彬彬才俊。每春秋比士，列荐书常数十计，邑去郡不二百里，而寥简特甚，即比士于乡，鲜有应者，斯其故岂尽在士？或亦德之地脉未开耳！夫龙得山若枕，而丁溪水汇于其前若带，固胜区也。必山泽通气，而后休祥启焉，文明臻焉。今者门制有阙南，北限民，山泽之气，毋乃犹塞而弗通欤！第令更建门于南，背接峦嶂，面瞰溪流，若引诸纤紫之水，纳之襟裾间，用疏达其湮郁，而宣融其文明，庶几有蔚然而起者。’侯以燕语博士先生，诸弟子闻之，皆曰：‘侯实将有大造于我，奈何爱区区之力而以烦公帑耶？’遂相率诣于侯。侯为躬度厥址授之，而又捐俸倡焉。经画已具，畚鍤咸集。始于辛卯之二月，数旬而功竣。”

崇祯十四年，知县李元龙增高城垣三尺，分雉堞为一千垛，重建“北镇楼”。

国朝顺治四年，寇燹四门敌楼。寻以城北荒寂，田地洿湿，闭拱辰门。

康熙十五年四月十六日，大雨，溪水暴涨，白浪淹城。沿溪一带，城垣庐舍，尽湮为壑。伪知县葉丽生督民修筑未就，伪知县辜錕继成之。仍旧址改“来凤门”为“解阜门”，“有年门”为“金成门”，并建敌楼。东南开水门一，西南开水门二。二十五年，知县范正格缮葺城垣，重建“宾阳”、“北镇”二楼。今“北镇楼”废，址犹存。五十年，知县殷式训奉文修理城垣。

开新门于城之西北隅，移教场于学官后山。人文由是不振，绅士乃赴宪呈请复旧。六十年，知县熊良辅奉文修理城垣。

乾隆十年，知县鲁鼎梅奉文修理城垣。

## 公 署

县署 在龙浚山西南，浚溪之北。即唐贞观中归德场治所。五代唐长兴四年，升场为县，因置廨。东西相距，前横阔二十二丈，后横阔四十四丈，直深四十八丈四尺。

宋熙宁间，知县事陈居方营缮旁为仓库、吏舍，中为大堂，后为宅堂。

绍兴十三年，知县事吴崇年凿山广其基，为室十有二间。知县事蒋雕继建缙仁堂于廨东。辛次膺为之记。

乾道七年，知县事陆汝建清真堂于廨西，又有梅台及秋香、驯雉、盍簪、绿野、绿锦诸亭。建年失详。

淳熙四年，外门及大堂毁。知县事林叔度重建大堂。五年，知县事刘隆重建外门。十一年，知县事郑旦之改绿野亭为学道堂，绿锦亭为双清亭。

绍熙元年，知县事季元才建中门。

绍定三年，复燬于火。知县事林倚建中堂。黄之望继营厅事。葉彦琰建重门及鼓楼。胡应梅于门内立两虎，东为吏舍，西为仓库、犴狱，厅事后西为书院，旁为百花亭。

淳祐四年，知县事黄忠叟建大门。己酉冬，吴一鸣于大门外

立宣诏、班春二亭，新四围墙垣。

元至元丙子、至治壬戌，县署两毁。尹翟彬、簿李德仁、达鲁花赤千奴、尹沈思蕴、尉王良质相继建修。

明洪武间，知县王贞、丞余表、簿古彦辉大加修葺，规制完整。

正统十三年，毁于沙寇邓茂七，典史王志安重构正厅。

景泰七年，厅复毁。

天顺六年，知县李青重建，并建仪门。

正德十四年，知县张绂重建谯楼。

记：“泉，闽之雄郡，德为泉之属邑。群山翠嶂，一溪迤邐，小涧会溪为‘丁’字之形，有文明象，而德邑爰立。然地广人稀，里户沿革，十仅存半。县治仪门之外，旧有水门，上设谯楼，悬钟鼓以司更瞭望。尤庠狱、捍御攸关也。

余乙亥秋，蒙授职莅此。目其谯楼，东西厦瓦压于上，级圯于下，旋葺旋颓。粤丁丑之夏，朝觐归，椽蚀栋倚①，颓复过半。凡出入、启阖、司更、瞭望，实维有艰。矧邻封流寇猬集，覬覦启侮，用切战兢，而我邑民庶，又困于诛求之烦，不可以纤毫扰也。载思之无何，乃自捐俸及圉夫之余者三十两，市杉百株。尼于上命，弗遂营葺，日复一日，而倾圯尤甚。乃金谋请支公帑无碍官银七十两，再凑市杉、佣匠、买料，申蒙巡按侍御周命允。爰就戊寅季冬，交承兴工，令民之敦恋耆年者董其事。迄己卯孟夏落成焉。翠飞高建，非藉是夸壮观，实足以捍患而御侮矣。此后保障有道，庶几无虞乎？

或曰：“长府可仍，奚庸屑屑为此？”殊不知惟事事乃有备，有备乃无患。此古之格言，为政之大要也。”

嘉靖元年，知县胡呈章重建申明、旌善二亭。始建未详年代。

九年，知县许仁重修县廨，前为正堂，左幕厅，右架阁库。两廊为六房、承发科。幕厅东为典史廨，架阁库旁为吏舍，际留仓。仪门内，西为狱，外东为土地祠，外左为申明亭，右为旌善亭，南为渔楼。

二十七年，知县绪东山重修县署。

四十四年，知县何谦重建后堂及土地祠。

天启五年，知县桂振宇建寅宾馆于仪门之东。匾曰“虚受”。以仪门西为纠察祠。

国朝顺治三年，寇燬县署。六年，知县王榜构内外堂及后廨。八年，知县何之旭构狱屋五间。

康熙二十六年，知县范正格捐俸建两廊、六房、吏舍，修内、外堂，寅宾馆，土地祠。

举人谢青钟记：“德，九邑耳，规制他无足述，旧惟县署及学宫巍焕之观，殆与上国齿，载诸邑乘详已。鼎革初，山寇一炬，尽成焦土。迨戊子岁，王邑侯榜实始经营。然听事之堂，仅立四壁，后宅前楼，潦草粗具而已。历任因仍，遂成旧贯。及甲午再变而寇攘，甲寅再变而海踞，丙辰之夏，天吴肆虐，又从而漂荡之，并所谓四壁粗具者，倾颓腐圯，骘骘乎不可复问矣！”

今父母范公，世育名科，学术经济，雅有渊源。膺简命来莅兹邑，慨然以百度维新为己任，劝农桑，剔蠹弊，读法，课艺，兴学，明伦，凡所以整躬率物者，无非本经术为治理。期年之内，百里尽登枉席。乃捐俸鸠工庀材，初葺正堂，次建两庑，修渔楼，次设常备两仓，又次建土地祠、寅宾馆、赞政堂，以及库司、架阁、铺屋、狱堂。凡昔所有，莫不厘备。既墜以丹，洵美而文，荒陋于焉改观。深山父老，咸欢忭感叹。共谓前代二百余载隆盛之规，废几五十年所矣，不意今朝复见昌明景象，而不劳民，不伤财，

是侯之仁且能也。夫修废举坠，不失旧观，古人一燕息嬉游之所，犹且载笔金石，以传不朽，况兹奉法莅民地欤？是不可以无记。爰叙梗概，寿诸枣梨云。”

乾隆五年，知县黄南春于廨右再建土地祠。十年，知县鲁鼎梅重修大堂及两廊、仪门、谯楼、申明亭、旌善亭。

典史廨 在县署东偏。明嘉靖九年，知县许仁修建。三十二年，典史关一德捐俸重修。国朝顺治四年，与县署同毁于寇，典史李潜鳞移建于来凤门之东。康熙十五年，水圯。十六年冬，典史颜志美仍就县署东旧址重建。前为门，中为厅事，后为内廨。

儒学教谕署 在县治西后宅，与县廨毗连。顺治四年，寇毁。十二年，训导林甲继捐俸建一厅四房。先是，训导与教谕同署，康熙四年，奉文裁教谕，十七年复设。四十九年，教谕陈文海捐俸修葺。堂西建旁舍一所，廊房四间，周以垣墙。五十年，教谕力子侗捐俸重修。于堂东建书房二间，堂前建露亭，改造大门。

乾隆十二年夏，教谕曾晋捐俸修建。

知县鲁鼎梅劝捐序：“生民之大经曰教曰养，是故圣人虑逸居之无教，而董之以师儒之职，居之于庠序学校之地，所关至钜也。然非其人，则政不举而事且弗具，城阙佻达有由然矣。

德邑学博曾君铭三，以鸿才硕彦，英年受职。甫至，即申明先王之教，慨然以造士为己任，邑人士靡靡然从之。所居讲舍不足以蔽风雨，曾君念学校之地，教所自出，不容苟且，方具牍请帑，以肃冠裳之会，而及门诸生谓讲业请益之席，未可迁延申请，重烦案牍。弟之于师，古人皆有执贽之义，愿与同人贖金而理之。或者曰：‘不可。吾师式化德邑且期月矣，野处

之秀，闻风者喁喁向往，则是举也，谁不愿以束脩请海，岂其门外麾之欤？’诸生不能决，请于余。噫，异哉！生等之勇于义，而曾君之化之有成也。由前之说，为义之正，由后之说，为见之大。正大而天地之情可见矣。

序其语弁之于簿，俾吾德邑之俊秀欲挾赞而来学于曾君者，得与名焉。将学校振饬而教化彰明，养道于是乎有终矣。则吾不知善在曾君也夫，抑善在德邑也夫！”

**儒学训导署** 在县治西上市。康熙二十年，训导李蚤春以谕、训同署，窄狭难居，捐俸买置一厅一房，建门左、右为房二间。二十七年，训导方祚隆捐俸筑墙于其右，建上、下二间。

**驻防厅** 在上市新街。先是，顺治五年，副将蔡调羹以西门内民舍为副总府。十一年寇毁。十四年，汛防千总徐登创于上市北街之南。

康熙十五年水圯。十六年，千总马虎移今所。

## 附：旧署

**分司行署** 在县治东宋教场地。明洪武九年，知县王贞建。景泰五年，知县李青修。正德十一年，知县张绂重建。后废。今建为图南书院。

**丞厅** 在县治东南沙坂。宋建炎三年建。明永乐间，以县不满万户，丞罢，厅废。

**簿厅** 在县治西偏。宋淳熙二年，主簿赵师雯重建厅东为三友堂。绍兴十一年，主簿黄廷瑞修。明永乐间废。

**尉厅** 在县治东三百余步，坐南向北。宋太平兴国间，建西

偏为讲武亭。庆元三年，县尉赵汝曾重修。嘉熙间，以射主山为嫌，移基于北。淳祐七年，尉孙应凤仍旧址重建。东为甲仗库，东偏为双瑞亭，有池可二亩，凭水为阁。尉洪格为记。明永乐间废。

巡检司 一在县西北东西团，一在县东清泰里，一在县西北小尤中，一在县北杨梅上。俱元至元间设，后俱废。明洪武二十年，江夏侯周德兴徙东西团巡检司于同安县之官澳，其故址为预备西仓；徙清泰巡检司于惠安县之黄崎村，其故址为屯仓。

高镇巡检司 在县北汤泉里。明洪武间设，后圯。嘉靖九年，知县许仁斥东西团刘坑乡慈济宫，改建前堂一间，东西廊二间，门楼二间，绕以垣墙。后移于湖岭。万历年，裁巡检司署，废址犹存。

阴阳学、医学 俱在县治西。洪武十八年设，后废。

僧会司 在瑶市社程田寺。洪武十六年设。

道会司 在县治西南高卿社崇道宫。洪武十六年设。今废。

龙得驿 在县治西。宋嘉定六年，知县季端谊重建。元因之，后废，即今儒学教谕署址。

上壅驿 在县西北东西团，距县六十里。宋时设，元因之。后废。

## 坛

社稷坛 在县西大旗山下，浚溪之北。旧即地而祭，宋绍兴



间，知县林及始甃二坛。邑人立庵其侧。嘉泰甲子，知县事赵彦瀛建斋厅，甃坛墼，植以松柏，更新庵，字额曰“祐善”。

淳祐己酉，知县事吴一鸣重修。立石为主。

明洪武三十一年，圯于水。三十三年，主簿古彦辉重甃，并建神厨、神庠、宰牲亭、斋戒所。后俱废。

正德十六年，因防寇以其地西偏作教场。

嘉靖九年，知县许仁请复教场于县东旧地后竟未复，即其地立华表于坛南。坛式四方各二丈五尺，取大社五丈而杀其半也。高三尺，陛各三级。坛下北深九丈五尺，东西南各五丈，周繚以垣，立四门。路由北入。坛上树石为主，高二尺五寸，方一尺，埋于坛南土中。去陛一尺五寸，露出圆尖。国朝因之。

风雲雷雨山川坛 在县南丁溪之西。明洪武六年建。三十三年，主簿古彦辉重修，后圯。

嘉靖九年，知县许仁重建，立华表于坛南。坛式：四方各二丈五尺，高三尺，坛东宽四丈八尺，坛西宽五丈。今垦田三丈八尺，田长十六丈三尺，充武庙灯油。坛南宽一十丈七尺。今垦田七尺，田广六丈七尺，充武庙灯油。坛北宽五丈，周以短垣。国朝因之。

邑厉坛 在县西。明洪武六年建于县东妙峰山麓，南向。十三年，知县王贞拓而广之。坛前建亭，坛东立石，刻钦祭文。

文曰：“普天之下，后土之上，无不有人，无不有鬼神。人鬼之道，幽明虽殊，其理则一。故天下之广，兆民之众，必立之君以主之。君总其大，又设官分职于府、州、县，以各长之。各府、州、县又于每一百户内，设一里长以领之。上下之职，纲纪不紊，此治人之法如此。天子祭天地神祇及

天下山川王国，各府、州、县祭境内山川及祀典神祇，庶民祭其祖先及里社土谷之神。上下之礼，各有等第，此事神之道如此。尚念冥冥之中，无祀鬼神，昔为生民，未知何故而歿其间，有遭兵刃而横伤者，有歿于水、火、盗贼者，有被人取财而逼死者，有被人强夺妻妾而死者，有遭刑祸而负屈者，有天灾流行而疫死者，有为猛兽毒蛊所害者，有为饥饿冻死者，有因战斗而殒身者，有因危急而自缢者，有因墙屋倾颓而压死者，有死后无子孙者。此等鬼魂，或终于前代，或歿于近世，或兵戈扰攘，流移于他乡，或人烟断绝，久缺其祭祀，姓名混没于一时，祀典无闻而不载。此等孤魂，死无所依，精魄未散，结为阴灵，或依草附木，或作为妖怪，悲号于星月之下，呻吟于风雨之时。凡遇人间节令，心思阳世，魂杳杳以无归，身堕沉沦，意昏昏而望祭。兴言及此，怜其惨凄，故敕天下有司，依时享祭。在京都有泰厉之祭，在王国有国厉之祭，在各县有邑厉之祭，在一里各乡有乡厉之祭。斯神依人而血食，人敬神而知礼。仍命本处城隍以主此祭。”

东偏立宰牲厨二间，房一间。后以东方为生育之地，非厉鬼所安，嘉靖十年，知县许仁迁今所，立华表于坛南。国朝因之。

乡社坛 明洪武六年，令各里、团，每一百户内立坛一所，祀五土、五谷之神。坛式：周围四丈，高二尺，坛下广各三丈，深四丈六尺，缭以墙。各乡少有立者。

## 仓

明洪武二十四年，建预备仓四。东仓二间在县西，西仓五间在东西团巡检司故址，南仓四间在新化里，北仓五间在杨梅中团。

嘉靖三十七年，移西、南、北仓于县廨之西。

万历九年，移东仓于旧学地。后俱废。

旧志云：“按预备二字之义，所以备不虞，赈凶荒也。前朝有宪令：‘将历年积谷银两，候冬成买谷贮仓。’又奉文：‘每年青黄未接，散给各役工食，或棠下户贫民，其银扣收在库。新开征时，从里班之便，自认上稻，照时估值，即以扣收之银起解。则在仓无朽坏之谷，在民无饥饿之苦，在官无久耗之费。典守者不至赔累，而仓可常盈，民可不扰。即著为令甲可也。’”

国朝康熙二十六年，知县范正轺建常平仓四间编湛、恩、汪、涉，在县治仪门左右。五十二年，知县殷式训建仓八间编生、众、用、舒、崇、塘、比、栉，在县廨西。

雍正十年，署知县林兴泗建有备仓二间，在仪门东偏。

乾隆三年，知县黄南春建仓八间编风、调、雨、顺、国、泰、民、安；六年，建仓四间编时、和、年、丰；七年，建仓四间编贤、亲、乐、利，俱在县廨西。九年，知县鲁鼎梅建仓五间编仁、义、礼、智、信；十年，建仓五间编福、寿、富、康、宁；又建仓六间编孝、友、睦、姻、任、恤，俱在县廨西。

## 铺

宋制以军士充役，谓之铺兵，元因之。铺置铺兵五人。

石山铺在县西北。二十里邱店铺 二十里赤水铺在十八都。

二十里半林铺在汤泉上。 二十里汤头铺在下涌团。 二十里汤尾

铺 二十里中腰铺俱在汤泉下。达尤溪县界。

明设铺二：在城曰县前铺，南达永春界者曰高洋铺。离城十里。嘉靖四十四年，知县何谦重建铺舍。

国朝因之。雍正十三年，以大田县改隶永春州，路经本县西界，添设倚洋铺在实丰社。大垵铺在尊美社。苦青洋铺在实丰社。每铺额设铺司一人，兵二人。

## 坊

### 宋

恢义坊 在县治西。

仁寿坊 在龙济桥。

旌孝坊 在县治西。为孝子张兴渭立。

褐魁坊 为上舍优等第一人释褐苏总龟立。

使星坊 宣和中，为苏欽登第立。

应宿坊 绍兴中，为陈师文登第立。

朱紫坊 在儒学前。

制锦坊 在县门前。

绣使坊 为提刑陈师文、运判苏欽立。合使星、应宿二坊为一。

熙春坊

好德坊 以市廛富乐、民俗醇厚，故立。

师模坊 郡守吕用中为辟邑人张过典教立。

## 明

步瀛坊 在杨梅上。永乐三年，训导吴仲贤为举人凌辉立。

攀桂坊 在杨梅上。知县孙应辰为举人凌辉立。

锺秀坊 在东西团。永乐十二年，知县刘谥为贡士蒋应立。

登雲坊 在杨梅上。永乐十八年，邑监察御史凌辉为举人曾灏立。

擢桂坊 在杨梅上。永乐十八年，教谕赵琬为举人曾灏立。

常德坊 在城隍庙前。宣德四年，教谕朱希亮为举人余英立。

青雲坊 在儒学左。知县何复为举人余英立。

凤鸣坊 在分司西。宏治七年，府县为举人林真立。

星郎世美坊 为万历间贡士林栋、林枢兄弟立。

以上坊俱废。

恩荣二坊 在石杰后房街。御史陆清源为封承德郎郑扬及子户部主事沛立。

望隆玉署坊 在来凤门内。御史陆清源为翰林院左春坊赖核立。今废。

## 国朝

昇平人瑞坊 在县大门左。康熙五十三年，旌百有四岁老人张岳荣。

节孝坊 在上林社桥头坊。雍正六年，旌连时质妻陈氏。

节孝坊 在上林社甲头乡。雍正六年，旌连宏籍妻陈氏。

节孝坊 在高卿社张乾乡。雍正七年，旌陈天桂妻潘氏。

节孝坊 在梅上里卓地乡。乾隆三年，旌陈存若妻苏氏。

寿妇坊 在十八格。乾隆三年，旌百有四岁寿妇林李氏。

## 院堂义冢附

养济院 在西关市头。明洪武初，知县王贞创于龙得山麓。久废。

嘉靖九年，知县许仁斥县东真君淫祠改建。

仁和刑部员外郎邵经邦记：“惠政有成者，竹屋许公令德化，而民书之也。见任则不书，此何以书？以见济院则书也。济院者何？存恤孤老，国之宪纲，公之有事也。夫存恤孤老，著于令甲，月饩岁糴，寒有帛、煖有絺，此常格也。常何以书？他邑其常也，德化其创始也。邑处遼谷间，制属裁减，前令以其减也，而行之太简，微公百年亦旷典耳。乌得而无书？

且夫减者，限银谷，省力役，寡里甲，薄征艺，如何其能改作也？当县郭门之东，故属龙得山趾，曰‘慈济庙’，非祀典也，公得而正之。所谓仍旧贯也，而又何改作焉？然则公之作者亦多矣。里之塾，射之圃，肄武之场，浚溪之开，与夫乡贤名宦之祠，百废殆皆兴也。他则何不书？闻诸唐、虞为政，史臣赞之曰：‘困穷无告不废’。文王治岐，孟子称之曰：‘鰥、寡、孤、独必先。’则小民之情犹然也。于是以其言告于庠，陈子名伯容、周子名翊，因学博黄君名與以告于仁和邵子。邵子曰：‘夫仁者，其存之，靡其底也；其施之，靡其迤也。由博施济众以至匹夫匹妇之所不能尽，而必视如己者，岂有他哉！天之化物也，本以并育并行，而蠕走蠢动，一或息焉，天无极功矣。地之变形也，本以生长收藏，而摧残夭折，芥或遗焉，地非究德矣。司牧者，亦犹是也。既已求牧与刍而得之，而必视其疥癬，察其肥瘠，俾痒痾疾痛，切于吾身，然后政事有成，而正祥可致，诸福可臻，丰年可

介，庶育可敏，教化可成。登人材，厚风俗，明礼义，行王政，以上企唐、虞、有周，如斯而已矣。若是乃吾儒分内事，而公何取，必于书之哉？’

公名仁，字元夫。故同里同，且联姻娅，其闻道视余为先。兹任也，细而穷闾，大而通显，明而台察，亲而僚属，合声同词，可无嫌也。乃若学博而行正，守绳而执义，生平无负颜之心，而通贯有契道之旨，则乡评右之，所在归之，而兹邑之名宦，当不可缺，吾胡可逊也？遂为记。”四十年，寇燬移建今所，大小八间，国初燬。

康熙二十三年，知县傅以履仍旧址始建三间，后屡增建。今一连八间，小厅一间，外有门墙。

育婴堂 在下市东南水门内，一厅二房。雍正二年，奉旨建。

#### 漏泽园

一土名东岳旁空地。嘉靖九年，知县许仁置。后废。

一土名垵头格。在薛萝峰之麓，今瑶台书院墙外。贡生苏重光、监生林士品、林升丽捐筑灰堆。

一土名塔兜濼。在县东南瑶市社。

一土名金锁形。在县南。

一土名员山仔。在县南。

一土名塔后山。在县南。

一土名北门头。在县北古城外。

一土名军仔山。在县西南鹏都乡。

一土名梅模(chòu)坑。在科荣社涂坂溪头。曾、李二姓积年控争，乾隆八年，奉按察司批断归官。

论曰：“邑当五代以前，固未遑议经营之事也。宋、元之

间，规制迭兴，而草创未备。有明邓、张诸人出，于是城郭官室，宗庙祭祀之礼，需次就绪焉。自承平以来，政通人和，百废具兴。按志而稽，可知建置视昔完备矣。”

### 校 注

- ① 倚：以文意疑为“欹”之误。
- ② 肄：查字书无此字，疑为“肆”之误。

（校注 李明志）



# 德化县志卷之六

## 民 赋 志

赋出于田，粟米之征也。徭由户口，力役之征也。我国家监古定制，岁惟正供资经费，前代无名诛求，悉从厘革。重垦种，豁虚赔，均丁徭于田赋，膏泽时行，穷黎咸蒙乐利。踊跃输将者，殆亦有所由劝与！志民赋。

### 户 役

唐立租庸调法，其赋闽中以钱。

五代中，伪闽计口算身丁钱，后折变输米五斗。至宋时，取官斗较量，得七斗五升，令民折价送纳。

嘉祐三年十一月，诏以兴、泉计丁出米最重，或贫不能输，主户与减二斗五升；客户减四斗五升为定例。

宋、《役法》：“以衙前主官物，里正、户长、乡书手课督赋税，耆长、弓手、壮丁逐捕盗贼，承符人力、手力，散从官给使令。”至和中，知泉州蔡襄极论其弊，请照产钱定役。已乃更

著《役法》。罢甲头保正，而差役雇役之议迭更。

元丰八年，分主、客户，以丁力多寡科差兼论资产。自衙前役重供应者，辄至破产。南渡后，诏州、县殿最以生齿多寡为差，有司率置增户口。

元定人户为十等。立科差法。有丝料、包银、夫役三项，皆视丁力输办。

明初，定闽中即令民以户口自实。洪武十四年，始颁黄册式，户目凡七：民、军、盐、匠、医、弓兵、铺兵。令各以本等占籍，十年则核。其老幼生死而更造之。凡科敷物料及差役，十年一事。男子年十六以上为成丁，丁当米一石，事其身贵者；老者、痲瘡残疾者皆复之不事。其《役法》：里甲、老人谓之正役，均徭、驿传、民壮谓之杂役。里甲之役籍在坊者，为坊长；在乡者为里长。岁轮现役，专掌钱粮、勾摄公事及出办上供物料，后乃以支应官府杂供、私馈，无名百出。

正德十四年，御史沈灼议行八分法：每丁岁征银八分，以充岁办等料，差役仍十年一事。十五年，议将通县费用分正、杂二纲，以丁四粮六法科派，繁靡如故。

嘉靖十六年，御史李元阳再议征银储库，用有定则。但额外支应，仍令里长贴办。又杂泛名色猥琐甚，或借办铺户，全不偿价。均徭之役，最重者库子，似宋之衙前，而流弊亦似之。心红、纸札、酒席、下程，传索不贲。

嘉靖末，除正杂之名，止称纲银，以丁四粮六为则。其实差丁米分十段派编，法颇详明，既而加派金华兵饷，丁四粮八。

万历初，都御史庞尚鹏始议一条鞭之法：通十岁中，粮税起存额若干，纲、徭、兵站额若干，统为一条，曰“纲银”。凡院、司、府、县供应、祭祀费用、生员试赏、举贡进士盘缠、牌坊皆统焉，曰“均徭银”。凡诸司祗候、隶兵、库子、门子、仓库夫、坛夫、斋夫、膳夫、斗级、禁卒皆统焉。民供其入，官司其出，著为令甲。

国朝定鼎，赋役悉照万历条编，余尽蠲免。邑处山僻，曾无大役，征海军兴，供应实繁，里长日期不胜其苦。于是移之各社，应役者名曰“地方”。社设地方一人，甲设小甲一人。其初用以觉察非常，及是专管起夫，各铺各村，排门冗唤。海氛告平，民始苏息。

康熙五年，刊行《赋役简明全书》，户口人丁开原额收除，实在实征。十七年，又于卫所屯丁新编加增屯户丁粮，而丁役归于画一。

旧志：洪武二十四年，户，二千七百二十七户；丁口，一万七千九百丁口。

嘉靖元年，户，一千一百九十五户；丁口无考。嘉靖四十一年，户，一千一百五十四户；丁口，五千五百八十丁口。

隆庆六年，户，一千七十三户；丁口，六千三百九十五丁口。

万历十八年，户，一千八十七户；丁口，五千五百八十五丁口。万历三十六年，户，一千一百一十户；丁口，五千六百二十四丁口。

天启七年，户，一千一百二十一户；丁口，五千七百二十四丁口。

国初，户，一千一百一十七户，丁口，四千四百四十七丁口。内有优免二百八十二丁，每丁征料盐银八分七厘五毫五忽五微四沙。无优免一千七百六十二丁，每丁征料盐三差银三钱一分一厘五毛五丝九忽九微三纤三沙。妇女口并不成丁，二千四百二十六，每丁口征食盐课银一分八厘一毫五忽九微七纤五沙。

康熙元年，审增男子成丁二百一十五丁。食盐课五百九口。以后每五年一次清编。二十五年，署县撤启明条陈里甲偏枯之弊，详请匀编丁米。略云：“伏查德邑共八里，一里辖管十班。赋·役额载：‘成丁二千二百五十九丁，民米五千九十三石。’遵照宪行，清出新丁，开除老、故，每里应编成丁二百八十余丁。倘有清出溢额，另行分派。每里应拨民米六百三十余石；每班应编成丁二十八丁，应拨民米六十三石零。丁产相为权衡，赋役递为表里，调剂均平，方免偏枯。诂现征册载：‘有成丁仅百余丁，苗米仅四百余石为一里者；有成丁四五百丁，苗米八九百石为一里者，有七八丁，配米八九石为一班者；有五六丁，配米三四百石为一班者。有富户米数十石只载册数丁者，亦有无米贫户光丁存册者。’多寡悬殊，偏枯偏累。

兹确查成丁不得隐漏，老、故必要豁免，除旧贯可仍，粮户无事更张，并米数无几，册载一丁情愿守户，以及贫户光丁或间有不愿开除者，俱听从民便，照旧造册外，其余照依额数，按里、按班均匀。但苗米衰多益寡之中，尚有已值役、未值役之分。查前届编拨，方今五载，十班之中，五班轮过里役，五班未经轮役，兹截长补短，合无将已轮役五班之米多者，即拨补已轮役五班之米少者；将未轮役五班之米少者，即于未轮役五班之米多者按

补。自此富豪不得诡避差徭，贫弱或免重复苦累。但事出至公，不无恩怨。况米多应拨，丁少应增，多系富豪巨室；米少应补，丁多应减，皆属单寒下户，保无毁誉出于爱憎，臧否生于好恶。详请宪夺应否照此均匀编审，硕画批示，里甲得免枯菀等情，详奉分守兴、泉道丹批‘申丁米里、班，各安均平，毋使有偏枯之弊。院檄节次严飭，靡不如是。该县既秉公力行，剔弊清编。查其已役未役，寡多益寡，八里十班，丁米一例，原无私曲，毋庸计其恩怨也。仰即刻日审竣，造册速报’缴，蒙布政使司批‘如详，从公均编，勿受贿闪。纵有豪猾，执法裁抑，俾无偏枯之弊。如有阻挠，指名申究’缴，又为里甲偏枯等事，再查得德邑里甲相沿积弊，牢不可破。如在坊里四甲连慎究苗米三百石有奇，并梅上里六甲苏凤与九甲林光显各二百石零为一甲者；如清泰里二甲黄胜兴苗米一十石零，并尤中里二甲邱郭远米六石，与四甲留仕朝米一石四斗为一甲者，多寡悬殊。虽现在阜平，里甲并无杂派，倘遇轮值，有公务排年，苗多富厚之家，得以从容趋事；苗寡单寒之户，方且倾家不足。卑职目击小民，枯菀不均，深为恻。兹蒙有丁米调剂里甲公平之令，卑职实力奉行。但虑富家巨室，多怀怨尤，好恶爱憎，阻挠良法。业将情形具文详报，随蒙钧批‘如详，从公均编，勿受贿闪，纵有豪猾，执法裁抑，俾无偏枯之弊。如有阻挠，指名申究’缴。蒙此仰遵宪批，随将通县苗米五千九十石零，除寺租外，照八里八十班通盘匀算。每班约编米六十三石左右。间有一二班，全户不便拆散及无零户可添者，多寡上下亦不过一二石而已。更酌量已轮役未轮役甲分米石，杜绝躲避偏累等弊。躬亲编拨，并不假手吏胥。现在里甲公平编定册籍申报。第恐卑职署事无几，苗多之家，百足钻营，旧弊复萌。伏乞为穷民作主，申飭力行。将均平米册发下照征，勒石永著为例。庶豪强狡计莫施，贫民永保生全等情，详奉布政使司批‘据详均编米石，务令里甲并匀，俾无偏累。如有势力阻挠者，指名申究。如详勒石永遵’缴。”

康熙五十年，编审八里。实在人户丁口，五千一百九十四丁口。内料盐丁二百八十二丁，料盐差丁一千九百七十七丁，食盐课二千九百三十五口。共征银六百九十三两七钱七分一厘五毫七丝八忽三微三纤。

康熙五十二年，钦奉恩诏，嗣后编审，有增益人丁，止将实数造入《盛世滋生册》奏闻，永不加赋。

雍正二年，巡抚黄国材题，准丁粮匀入田粮之内。每田粮一两，匀丁粮银七分八厘五毫三丝二忽八微。

乾隆二年，巡抚卢焯题，豁邑内无着田粮，奉旨并免匀丁银五钱九厘九毫。

实在人户丁口，共五千一百九十四丁口。内男子成丁二千二百五十九丁，食盐课二千九百三十五口。共征银六百九十三两二钱六分一厘六毫七丝八忽三微三纤。

### 附载：

盛世滋生户口，新编实增益男子成丁九百八十一丁。食盐课九百一十四口。共增益一千八百九十五丁口。钦遵恩诏，永不加赋。

### 外屯丁

原额泉州卫在县屯户九百八十六户。康熙十七年，奉文新编，加增屯丁九百八十一丁。每丁征银三钱二厘八毫八丝二忽九微八纤二沙。

乾隆九年，奉文豁免缺额一丁。

实在男子，成丁九百七十九丁。共征银二百九十六两五钱二分二厘四毫三丝九忽三微七纤八沙。妇女口八百一十七口。

### 附载：

盛世滋生屯丁，新编实增益男子成丁，三百二十八丁。钦遵恩诏，永不加赋。

论曰：“一邑户口之赢缩，一方之气脉系焉。熟观往代算身丁加杂派，烦促疾苦，率繁增而不足。今则役减徭宽，丁不加赋，林林总总，滋生齿而多余裕，备述之亦可晓然于虚实之故矣。”

## 田 赋

五代，伪闽王延钧弓量田土，第为三等：上等给僧道，中、下给土著。流寓科法，大率仿唐两税加重。

宋太平兴国中，遣使均福建田税，以土田高下，第为五等；山田又分三等。定出产钱，夏秋二税，以产钱为宗。夏税有折变布税、小麦、秆草三项。秋米有糙、白二米，有折变黑豆一项。凡折变者并与除本税。

元初赋法，征秋租折其三分之二为钞。元贞二年，乃定夏税，诸路不同。

明洪武初，令天下田园山荡等，悉书名数于籍。田分官、

民二等。官田起科，每亩五升三合五勺，民田每亩三升三合五勺。赋分夏秋二税：夏税征钞，秋税征米。官米本折中半折色米，征银解京，本色米存留各仓。民米以十分为率，七分征本色派仓，三分征折色解京。

正德十四年，御史沈灼奏，官米俱折色解京，民米俱存留各仓。官米分四等征纳：三斗以下，每石折银三钱六分；三斗以上，每石折银三钱三分；五斗者每石折银三钱；七斗者每石折银二钱五分。邑官米绝少取民米之折价者补额解京。其民米并秋租钞米，半纳本色，半纳折价，每石折银五钱。新增起科米并浮粮米，俱全征折价，每石二钱五分。凡官、民米皆有加耗，每官米一斗加耗三合五勺，民米一斗加耗七合，准备仓廩亏损，已复纽入正额。其后坐派各仓，每正耗米一石，又增耗米五升，亦作正额支销。官田折解无徭役，民田役重，豪民操鬻田者之急，券不书亩减米，避役鬻田者，悬产不推，迄于死徙，无从究诘，是为浮粮。又有奸蠹入钱飞诡旁射者，亦有山崩水漂，田去产存者皆名浮粮。后渐垦辟，界至相邻，彼此互争，讼端繁焉。

万历十年，下方田之令，均摊浮粮，威令峻急，乡民不谙丈法，丈手公正之役，按步不论丘数。举田段四隅，量为一算，中间墩、岸、沟、藪通作实田。又初发令失“定则”二字，履步时无分上、中、下则，后于局中造册，乃就纸上形势以意填注。里中浮粮，虽赖以除，而不均之害滋甚。旧志云：“方田之法非不善，行法者不善也。刻之以日月，守之以檄使。筹不及徐议，智不暇致详，用之不得其人，主者不能独立。册籍方成，案已至部，事体既定，重于改更；后至



者虽知其失，亦无如何矣。”

旧志：嘉靖元年，官民田地，山、竹、林、池塘、溪、荡、坝，一千五十五顷一十七亩。四十一年，九百八十四顷七十一亩六分四厘四毫九丝六忽。

隆庆六年，九百八十五顷一十七亩五分五厘九毫八丝五忽。

万历四十年，九百八十七顷一十四亩七分四厘九毫五丝八忽。

天启、崇祯间，一千三顷九十一亩四分二厘六毫五丝一忽六微。

国朝康熙三年，知县何之旭奉文丈量，着各里役金报公正，副丈长、弓书算手，依司颁弓步，自班自丈。照上、中、下则，折实核算实在。上则，官、民田二百顷一十二亩五分四厘三毫。中则，官、民田、园、池地，折实一则，三百二顷七十一亩九分七厘七毫五丝二忽。下则，官、民地、池、山、荡，折实一则，五百一顷六亩九分五毫九丝九忽六微。

康熙五年，刊行《赋役简明全书》。每亩科受民米五升七勺三秒四撮七圭。租税米一合六勺五秒三撮五粟。官米四合一勺九秒八撮六圭三粟。计积一十九亩七分一厘三丝七忽六微。为民米一石，带官米八升二合七勺五秒六撮五圭八粟；租米三升二合五勺八秒二撮二圭四粟。共官米四百二十一石五斗六合四勺五秒五撮。租税米一百六十五石九斗五升二合四秒八撮。民米五千九十三石三斗二升八合九勺七撮。内有优免正耗米三百二十一石一斗一升九合八勺六秒。每石征粮料银六钱五分一厘四丝九忽二微一纤。

征官折银二分八厘七毫七丝八忽六微三纤。征租税米银二分一厘二毫一丝二忽六微五纤。无优免正耗米四千七百七十二石二斗九合四秒七撮。每石征粮料银六钱五分一厘四丝九忽二微一纤。征官折银二分八厘七毫七丝八忽六微三纤。征租税米银二分一厘二毫一丝二忽六微五纤。征四差银六钱九分九毫八丝五忽六微一纤六渺八尘七漠。另照万历年间，派征九厘，每亩征银九厘。

顺治十三年，通省田米匀派，新增颜料折色银，每石米派银七厘六丝九忽六微六纤六渺八尘。蜡、茶银，每石米派银三厘七丝一忽四纤三渺六尘二埃四沙。课铁银，每石米派银三厘二毫三丝七忽三微三纤三渺六尘八埃七沙。麻铁翎鏢银，每石米派银一毫四丝九忽三微八纤九渺九尘二埃。螺壳银，每石米派银二毫二丝五忽九微二纤九渺五尘六埃。弓改牛角并弦箭银，每石米派银九分七厘八毫七丝七忽三微六渺五尘四埃三沙。军器、盔、刀、甲银，每石米派银三分七厘七丝五忽四微六纤一渺九尘一埃五沙。胖袄、裤、鞋银，每石米派银三厘四毫八丝九忽六微二纤二渺四尘八埃三沙。

原额：官、民田地、园、池塘、山、荡，一千三顷九十一亩四分二厘六毫五丝一忽六微。内征料折增田地六十三顷二十九亩三分九厘三毫一丝八忽二微。每亩征银五分三厘一毫九丝六忽四微七纤八沙八埃六渺九漠。征料折增差田地、园、池、山、荡，九百四十顷六十二亩三厘三毫三丝三忽四微。每亩征银八分八厘二毫五丝三忽四微二纤五沙五尘三埃四渺八漠。

雍正十三年，册报劝垦料折增田地，一顷一十二亩五分五毫

六丝，于乾隆五年起科。

乾隆二年，奉文豁免，无征逃亡，故绝料折增差田，共七十三亩五分八厘四毫二丝五忽八微九纤一沙。

实在官、民田、园、池、地、山、荡，一千四顷三十亩三分四厘七毫八丝五忽七微九沙。

共征银八千六百三十七两四钱八分九厘一丝八忽九微八纤六沙八尘六渺四漠。

### 附 征。

酒税银，三两六钱。遇闰加银三钱。寺租银，三十三两六钱六分五厘。炉税银八十七两。续增新垦、升科溢额丁米银，五十九两三钱六分八厘九毫五丝。

雍正七年，开报升科田亩溢额银，一百一十六两一钱一分九厘四毫二丝一忽七纤六沙二尘八埃六渺四漠。

绅、衿、吏承地丁豁免银一百五两七钱七分四厘七毫。匀贴颜料不敷银，三十一两二分一厘五毫三丝五微六纤七尘一埃三渺六漠。

### 外 征。

火纸、鱼鲑税银一十七两二钱。牛牙税银一两二钱七分九厘。学租银一十一两九钱八分五厘。

论曰：“邑山高水冷，田在层阜溪谷间，幔回笠盖，如梯如

级，塍岸居十之三，稻惟一收。附邑间有两熟，候水而耕，西成所获，率以人力胜也。寓抚字于催科，其可念已。”

## 屯 粮

明代屯田制，仿自宋卫所，军士以三分守城，七分屯种。又有二八、四六、一九、中半等例。德化屯军属泉州卫，以四六为率。

洪武二十年，令屯军种田五百亩者，纳粮五十石。三十五年，定每军田一分，正粮十二石贮屯仓，听本军支用。余粮十二石，给本卫官军俸粮。

永乐三年，令各屯所收子粒，除下年种子外，照每军岁用十二石正粮为法比较，将剩余并不敷子粒，通行计算定赏罚。二十年，以军士办纳，子粒不敷，除自用十二石外，余粮只纳六石。每屯计田三十三顷六十亩，余粮六百七十二石。

正统十年，准照民间秋粮事例，每石折银二钱五分，解京济边。十四年，拨余丁补种故军土田，每军各顶三名。

邑屯田多在丛山中。军士从他郡调至，水土不习，渐以逃亡。迨沙、尤寇<sup>①</sup>发，调回备寇，田亩日荒，所拨补种，余丁多系冒顶。又报占不审，有田一顷重报两三军，两三军共争一田者；有牵纽肥晓，苟求具数者；有一户之田，分报军、民，民隐其田而争于军者。虽云各顶三名，仅足一名之数。

成化初，遣官清理。除虚稽实，分配<sup>𧇗</sup>（bi 或读pei）补，务足粮额，有正种、贴种、朋种、品搭种等名目。率三、四、五军

并一军，额减于旧。每屯之军，多不过四十名，少止二十名。正种者受田，故军贴种等乃余丁拨补者。

弘治末，给事中倪奉命清查，欲得原额，多侵民田，几至激变，虑妨复命，乃将成化中稽实配补之。田分抽一半，别作新增，两征其租。至御史饶始令停征。后御史屠奏请开豁。

嘉靖中，管屯金事郑令屯田听人请佃，屯法遂坏。

万历十年，复行清丈，遗失亩分得复，而势豪转相承兑，移瘠换腴，增租滥派不可禁。

崇祯间，泉州千户孟应聘等，收租肆虐，佃民流离。邑令姚迟详议，立石禁革。益横，姚令关洋辞任。略云：“德化山高水冷，不比邻邑之一岁两收。地瘠民贫，恒叹小民之三餐四尽。城市背山面水，止通东西一街，乡村越岭逾巅，到处人烟星散。钱粮正额，尚苦有亏，公务些须，亦必加派。一遇早潦，每致流离。止幸深山愚民，绝无矫诈。若以真诚抚之，实可卧理，有何难处之局？其所受害者，屯田尽归巨室，取租多系家人。凡贤缙绅肃家政者，主佃相安，未尝横索。间有新进喜事之仆，乘此路隔二日，僻处山窝，瞒主不知，遂以德邑收租为乐境，三五成群乘舆而至。大斗浮量，额外需索。收租已毕，不肯回家。日则赌钱饮酒，夜则乘醉图奸。佃户不堪，愿退不种。则又具呈粮馆票提监禁。所以一闻呈告，便挈妻子而逃。积怨含冤，日甚一日。

卑职初任，见父老士民，痛哭流涕，具呈求申，定一规例。卑职即问前官，缘何不申？皆言前官下车，每有一番控诉，但因鼠器之忌，不肯为民请命。卑职细思，一榜虽卑，业叨民社，若不为地方兴利除害，不惟负君负民，并负所学。一念勃发，毅然申请。盖自文书出门之日，早知触犯众怒，但与其不申而留，毋宁申之而去也。时蒙道府批示，酌议四款。大约用旧斗

而去浮量，用官等而许加一，革去各项杂费，续蒙准详。卑职遵依，严督各社地方，谕令佃户及时输租矣。先时郡城宦干见有此申，即捏名屯丁陈继贤为首，具呈巡道，便有‘征餉在途，大乱可虞’之语，设计埋伏。卑职初料，宦干侧目，必于事外寻题，未必事中翻局。孰知多口沸腾，粘贴无名谤帖。德民闻知，急往兴化控告按院。卑职嫌其多事，呼而戒之曰：‘道府详行，既苏民困，何必上控？’百姓始言郡中见有谤帖，言：‘县官初任，不知事体，朦胧妄申’。又言：‘德民鸣螺结社，抗拒谋叛，敛金数百，衙门使用。’又言：‘相约共聚于孟千户家，专候按院下马告状。守候县官到府要与讨粮。’卑职初不信也。及到府亲揭谤帖一纸，经送巡道验看。卑职归县，急召各社地方查问原因，皆云：‘宦干收租，有不遵示仍欲多索者，佃户不服，愿同到官。’宦干自知理非，立批收去，实未厌心。回至府城，相订以不收为题，即收者亦混言未收，形容德民不肯还租。其未曾来者，遥听此语，信以为然。虽称德民叛乱，卑职曾写手谕，粘之郡城，倘有未还，卑职代为追给。卑职细查各社屯田若干，今来收去租米若干，未收若干。其还过者，各执收批赴验；未收者各开田主佃户，挨日挨号，逐一躬查，而知收者十八九矣。间有一二未收，实系田主不来，非关佃户刁措。更有好巧宦干设局，持呈求批。卑职实心待人，即批‘速还’等语。伊辈执有批呈，不与佃户一看，持归诬主，只云县官虽批，佃户不理，总是描写德民负租，不乱不止之状，其如已收者影影在也。今将收批造册，申送道府验外，所有未收，开列明白。但求田主到县，即可清还。不过数日，便结此局，亦无容蜚语造谤为矣。

卑职株守之性，不善逢世，且禀受既薄，向有脾病，患在湿热。昔年就教河南，地气乾燥，旧病小愈。今居烟瘴之地，日在云雾中，湿热复发，兼以佃户收批远者不能顿集，卑职急于通查，径坐小兜往取，冲风冒露，忍饥搪寒，遂成噎膈翻胃之症，不进饮食。自揣学究腐儒，以身为的，含沙之时，

早已見端，將來百弩千弓，應弦而至，昔人謂‘驅車堦坂，擢棹滄源’，此其時也。即不病亦當遠引，況病復苦之？自嘆六上公車，三遭賞鑒；功名限量，早已達觀。及今不去，後日必有不得去者。為此泣訴寃台，懇開檻阱而縱麋鹿，實慈悲放生之大德也。

至於德民不叛，自有公論。卑職不敢以憐民之念，曲為民護。但以情理計之，德民向被宦干殘虐，或投水，或懸頸，具悉德民圖畫中，此時含怒呼聲，今蒙道府詳行，實便便宜許多，則彼懷感恩德之下，誰忍生叛亂之想？此情之可據者也。

德邑南抵永春，西枕大田，北貼尤溪，東連仙游，東北永福。五方接壤，試問有一人言德民叛否？五方不言，而獨郡城收租者言之，又理之可駭者也。此系地方事，卑職求去之人，何必瑣瑣？但以屯始，必以屯終，故並為暴白。伏乞老大人俯憐卑職病在心胃，實切性命之憂，懇賜休致，庶免旷官須關。”

九年六月二十一日，邑民周龍珪、寇十六繪圖叩闕。本月二十六日，敕下撫按審奏，民困獲蘇。奏狀：“切惟祖制，一軍一屯，就地耕種，統以衛官。農隙講武，其有獨力難耕，即于本地窮民召佃幫作，計畝收租，辦糧上納，官准解釋法馬，概無二式。加派起科、征納，自有定額，軍民相安，共享含哺鼓腹之樂。迨來軍無實伍，屯沒世豪，臣等僻居山邑，田土軍、民參半，力作聊生。詎意勢豪張威，恃屯酷剝。有泉州衛逆弁某等，不念世荷國恩，通海寇受倭金，各冒屯三十餘戶。遇清查則匿名，奉稅契則隱漏。年享數十萬子粒，並不納糧。迨至比追，誣開佃戶，呈官拘賠。害軍殃民，田主之橫已極。而虎干之虐更慘，亂布馬官斛之祖制，擅造加倍等斗。勒佃運租，盤山越嶺，過縣抵溪，及上船即航海接濟海寇。并集赤棍千餘入山收租，驕馬連雲，酷索下程、土產、夫錢、斗頭、飯米、尖

量、折水。至于本色，原无起科，概藉部文加派，横索十倍正供。稍忤虎威，喝凶拮楚，碎体裂肤。仍势囑粮馆卫经提害，收租则为宦干，告佃则为府差。截途锁拷，酷设水牢，禁死丢尸，饿楚难堪。勒退田屋家业，仍复送官，賂延不审，食尽奔回，催刑保家。田家作苦，所余几何？荡家财，鬻妻子，露体殍丐，尚未了局。崇祯六年十二月内，迫死邹某等数十命，黑惨无伸，迫窜萧某等数百家，哭声载道。吞忍多年，莫敢受理。幸遇本县知县姚迟新任，士民哀诉，蒙申院司道府，轸念民瘼，详议四款，俱蒙立石禁革。某等怒臣众，推首名造谤设阱计陷死地，忿恨县官申请，势迫关详辞任。士民涕泣，奔赴恳留，无奈屈从，和处合同，任做任写，径不遵行。藐宪禁如弁髦，视府县为木偶。迨来斗科等斛，酷索更惨。套某等迭就佐贰，架诬提害，家不停差，颈不停锁，阻截赴诉，莫发盆冤。以致田土抛荒则无粮，编民死窜则无丁。上误军国，下残民命。阖邑士民，本欲相率呼天急救，奈途遥万里、天津严多人之禁，势宦怀截杀之谋。惟臣二人，潜身密躲，冒死陈冤，冀拯万命。恭逢圣明普照，远察民艰，垂念王土王民，伏乞敕下本省抚、按，严加举行。复设屯之祖制，立平准之法程，禁越籍远提之暴，除额外需索之横。庶国屯不至侵蠹，而小民得遂更生。臣不胜惶悚激切待命之至。”

国初设卫守备、千总掌屯政，岁下县征收。顶屯之豪倚以剥佃，军逃匿者概令代纳。设旗甲，甲轮一户，催收通甲屯粮。上下年例烦重，后裁卫归县，民困稍舒。旗甲犹沿其旧。

雍正□年，改为单首，比旗甲稍轻。雍正十年，邑民林昌孕等呈准纳户自征。雍正十二年，知县黄南春详照民粮例开造的名粮额，按社催征。

旧制，每军授田八十亩有奇，岁纳粮六石，折银三两一钱八



分。后奉丈量，合邑缺額，乃請將屯田五十畝者納本色，征米；四十畝者納折色，征銀。

泉州衛在縣屯田地計三十一所：蔡徑屯、石杰屯、溪口屯、后山屯、張墘屯、高洋屯、路尾屯、董坂屯、壑溪屯、石岩屯、南昌屯、蓋竹屯、三滌屯、九滌屯、蘇洋屯、十二翰屯、后坪屯、前埔屯、山寨屯、東際屯、朱紫屯、鄭地屯、蕉溪屯、慶樂屯、溪頭屯、硯坑屯、法林屯、黃坂前屯、湯頭屯、葛坂屯、黃村屯。

原額屯田地，六百六十三頃三十三畝四分一厘五毫一絲四忽。內折價改折田地，四百四頃四十四畝四厘九毫九忽，每畝科米一斗一升七合八勺六秒一撮九粒五黍，每石折價，改折米征銀三錢四分四厘二絲七微五纤一沙七埃。本色田地，二百五十八頃八十九畝三分七厘六毫五忽。每畝科征本色上倉米，一斗二升。

康熙元年，荒蕪田二十七頃二十七畝一分五厘三毫七絲。內折價改折田地，一十六頃六十五畝四分九毫五絲三忽。本色田地，一十頃六十一畝七分四厘四毫一絲七忽。

康熙二年，垦复荒蕪田，四頃七十一畝二分四厘一毫。內折價改折田，一頃二十一畝二分六厘一毫。本色田，三頃四十九畝九分八厘。

康熙十年，垦复荒蕪田，二十一頃五十八畝二厘七絲。內折價改折田，一十四頃四十六畝二分五厘六毫五絲三忽。本色田，七頃一十一畝七分六厘四毫一絲七忽。

康熙四年，清丈溢出新增改折田，八畝四分三厘。

乾隆九年，奉文豁免，无征折色。缺额流荒，共田四十六亩四分八厘一毫七丝。豁免无征本色，缺额流荒，共田八亩八分二厘。

实在屯田地，六百六十一顷八十八亩六分六厘一毫四丝四忽。内折价改折田地，四百三顷八亩一分五毫三丝九忽。实征银一千六百一十七两八钱六分一厘六丝六忽二微三纤九沙六尘四埃一渺。本色田地，二百五十八顷八十亩五分五厘六毫五忽。实征本色上仓米，三千一百五石六斗六升六合七勺二秒六撮。

论曰：“寓兵于农，三代之良法也。屯田以田业军，庶几近古。泉卫之屯，坐德邑者甲于诸县，民多赖屯以耕矣。官旗之弊既清，农有恒业，兵有余粮，正不必高言复古也。”

## 解 司 转解物料

办解香颜各料价值及水脚银九十五两四钱三分四毫一丝九忽二纤一沙八尘八埃三渺一漠。内办解沉香三斤，折价银三两。本色颜料项下，添解红铜二十九斤八两。共部价银四两二钱七分七厘五毫。水脚银一钱四分二厘五毫五丝六忽三微二沙五尘二埃六漠。折色颜料项下，原办本色黄熟铜一斤一十三两六钱二分五厘。新增黄熟铜一斤五两六钱五分，锡二百四十五斤一十四两五钱六分，铜一十六斤一十二两六分。

雍正十二年，奉文将铜、锡价值改办黑铅六百九十五斤一两六分四厘一毫八丝五忽七微一纤四沙三尘。续奉文停办。应解正

价银二十四两三钱二分七厘三毫二丝八忽一微二纤五沙。铜、锡二料原额水脚银一两二钱八分四厘七毫八丝七忽一微六纤六沙三尘六埃二渺。凑解不敷水脚银，二两七分四厘六丝四忽一微一纤四沙七尘一埃一渺。原办黑铅，九百八十一斤五两六钱。

乾隆四年，奉文停办。折价银三十四两三钱四分七厘二毫四丝九忽九微五纤三沙九尘五埃三渺八漠。水脚银四两七钱四分二厘二毫九丝二忽四微五纤六沙九尘四渺六漠，颜料折色银一十九两九钱三分九厘七毫四丝五忽八微六纤二沙四尘三埃一渺一漠，本色铺垫银一两二钱七厘五毫七丝四纤，停解乌梅改折价银八分七厘三毫二丝五忽。

## 起 运

户、工部地丁银三千一百一十八两六钱一分六厘五毫八丝三忽九微二纤八沙五尘八埃三渺四漠。

屯丁银二百九十六两五钱二分二厘四毫三丝九忽三微七纤八沙。

地丁兵饷银四千五百七十五两八钱四分六厘八毫九丝八微四纤五沙。

酒税银三两六钱。遇闰加银三钱。

寺租银三十三两六钱六分五厘。

炉税银八十七两。

续增新垦升科溢额丁米充饷银五十九两三钱六分八厘九毫五

丝。

升科田亩溢额充饷银一百一十六两一钱一分九厘四毫二丝一忽七纤六沙二尘八埃六渺四漠。雍正七年开报。

裁扣银二千二十四两五钱四分二厘三毫八丝三忽八微六纤三沙三尘七埃二渺八漠。

新裁站银三十六两七钱四厘。原编留县支給夫廩。康熙十七年裁充饷。

地丁削免银一百五两七钱七分四厘七毫。

清丈溢出屯粮银三钱三分八厘二毫八丝八忽六微六纤五沙二尘六埃八渺二漠。康熙四年清丈。

劝垦起科银五两九钱八分四厘九毫一忽六微八纤五沙五埃三渺五漠。乾隆五年起科。

上起运额银共一万四百六十四两八分三厘五毫五丝九忽四微四纤一沙五尘六埃四渺三漠外，火纸鱼鲑税银一十七两二钱。牛牙税银一两二钱七分九厘。

## 支 应

布政使司进表长夫银一两五钱。原编银六两。顺治十四年，裁银三两。康熙十七年，裁银一两五钱。

进贡宴赏银九钱五分。康熙十七年裁；十二年复。

泉州府拜进表笺合用纸张绫袱银三钱八分二厘二毫。原编银，一两五钱三分二厘八毫。顺治十四年，裁银七钱六分六厘四毫。康熙十七

年，裁銀三錢八分三厘二毫。

本縣知縣俸薪銀四十五兩。原編銀六十三兩四錢九分。順治十四年，裁銀一十八兩四錢九分。康熙十七年全裁。二十一年復給。

儒學教諭俸薪銀四十兩，訓導俸薪銀四十兩。原編每員銀三十一兩五錢二分。康熙四年，裁教諭。十七年復設。二十一年，奉文兩員合俸分支。乾隆元年加給。

典史俸薪銀三十一兩五錢二分。康熙十七年裁，二十一年復給。

本縣門子二名，共工食銀一十二兩四錢。庫子四名，共工食銀二十四兩八錢。斗級四名，共工食銀二十四兩八錢。皂隸一十四名，共工食銀八十六兩八錢。皂隸學習仵作二名，共工食銀一十二兩四錢。禁卒八名，共工食銀四十九兩六錢。轿、傘、扇夫七名，共工食銀四十三兩四錢。以上每名原編銀七兩二錢。順治九年，每名裁銀一兩二錢，實給銀六兩。帶勻閏銀二錢。康熙十七年全裁。二十二年復給。馬快八名，共工食銀四十九兩六錢。原編每名工食、馬草料銀一十八兩。順治九年，奉文除草料銀十兩八錢不扣外，每名裁銀一兩二錢。康熙十七年全裁。二十二年復給。雍正七年，草料銀裁，每名給銀六兩。帶勻閏銀二錢。民壯二十名，共工食銀一百二十四兩。原編五十名，每名銀七兩二錢。順治九年，每名裁銀一兩二錢，實給銀六兩，帶勻閏銀二錢。康熙十七年全裁。二十二年復給。續奉裁。雍正二年復設。七年，派撥廈門海防二十名，安海糧捕六名，俱乾隆二年裁。派撥本縣典史四名，雍正十三年裁。縣前、高洋二鋪，司兵各三名，共工食銀二十兩六錢六分六厘六毫六絲六忽六微四纤。康熙十七年半給，二十二年全復。孤、貧口糧銀三十六兩。康熙十七年裁半，十九年復給。乾隆三年

十一月，奉旨每名每日加给银一分，年加给银十两八钱，遇闰按日加给。冬夏衣布银四两九钱五分。康熙十七年裁半，十九年全复。囚犯月粮银六两。康熙十七年裁，十九年复给。

儒学斋夫三名，共工食银一十八两外，匀闰银六钱，遇闰加给。原编六名，每名银一十二两。顺治九年裁半给。康熙四年裁三名。十七年全裁。二十二年复给三名：

门子二名，共工食银一十二两四钱。原编五名，每名银七两二钱。顺治九年，每名裁银一两二钱，实给银六两。带匀闰银二钱。康熙四年裁三名。十七年全裁。二十二年，复给二名。

廩生二十名，共廩粮银五十六两，外匀闰银一两八钱六分六厘六毫六丝六忽，遇闰加给。原编银一百六十八两。顺治十四年，裁三分之二。康熙十年全裁。二十四年复三分之一。

膳夫二名，共工食、匀闰银一十三两三钱三分三厘三毫三丝。原编银四十两。顺治十四年，裁三分之二。康熙十七年全裁。二十二年，复三分之一。

典史门子一名，工食银六两二钱。皂隶四名，共工食银二十四两八钱。马夫一名，工食银六两二钱。以上每名，原编银七两二钱。顺治九年，每名裁银一两二钱，实给银六两，带匀闰银二钱。康熙十七年裁，二十二年复给。

春秋二祭、孟夏及上、中、下元、霜降等祭银一百二十五两二钱。原编银一百六两四钱五分。康熙十七年裁银五十三两二钱二分五厘，十九年复。乾隆十一年，匀增银一十八两七钱五分。内崇圣祠祭银六两，文庙祭银五十四两，社稷坛祭银四两二钱，风雷雨山川坛祭银十两。

孟夏常雩祭銀三兩，城隍廟祭銀三兩，土地祠祭銀三兩，天后廟祭銀四兩二錢，名宦、鄉賢祠祭銀六兩，忠孝、節義祠祭銀六兩，邑厲壇上、中、下元祭銀一十八兩，霜降旗纛祭銀二兩。

關帝廟祭銀一十八兩。乾隆三年新設。

文廟香燈銀二兩五錢二分。康熙十七年裁半給，十九年復。

社稷、山川、邑厲壇夫工食銀一兩二錢。康熙十七年裁，二十二年復。

祈晴、禱雨，香燭銀六錢。康熙十七年裁，二十四年復。

鄉飲賓二次銀二兩五錢。原編銀五兩。順治十四年裁半給，康熙十七年全裁，二十二年復給。

新科舉人花巾旗扁銀二兩六錢六分六厘六毫七絲。舊科舉人，盤纏酒席銀三十兩五錢。武舉，盤纏銀一十四兩三錢五分七厘五毫。歲貢，旗扁銀一兩二錢五分。俱康熙十七年裁，二十二年復給。

## 協 濟

興、泉、永道，皂隸一名，工食銀六兩二錢。原編銀七兩二錢。順治十四年，裁銀一兩二錢，實給銀六兩，帶勻潤銀二錢。康熙六年全裁。十六年復設本道衙門，奉文復給。十七年裁，二十一年復給。

泉州府廣平倉斗級一名，工食銀六兩二錢。安海糧捕皂隸十一名，共工食銀六十八兩二錢。泉州府司獄皂隸二名，共工食銀一十二兩四錢。泉州府經歷司門子一名，工食銀六兩二錢。俱康熙二十二年撥協。同安縣湊給，後奉留縣支應。

泉州府推官灯夫二名，工食银一十二两四钱。康熙六年裁，雍正五年，奉文移解同安，汇入地丁解司。

泉州府照磨门子一名，工食银六两二钱。雍正五年奉裁，移解同安汇入地丁解司。

以上奉复留给、实存、支应并协济银一千一百二十一两五钱六分四厘三丝二忽六微四纤外，给社师学租银一十一两九钱八分五厘。乾隆四年，奉文留给。雍正十三年，添设倚洋、大墩、苦青洋三铺司兵共九名，工食连匀闰共银三十七两一钱九分九厘九毫九丝九忽。于大田县裁缺银内，移解本县发给。

### 附载全裁款项：

各衙门雇、募听拨、门皂、答应，上司过往，使客工食银六两。升迁、应朝、祭江并回任祭门银三钱四分。公宴银一钱六分六厘七毫。修置祭祀、乡饮、救护、合用家伙银八两。粮饷道公费银二两五钱。总兵府油烛、柴炭、掾吏廩给等银三两七钱九分三毫三丝五忽。按察司修理家伙、帑褥银一十两七钱。进表随船家伙、各道各首领官合用纸札工食银五两。上司巡历及往来经过，合用心红、纸张、下程等项银四两。布、按分司、府、厅等衙门修理并帑褥等项银五两。往来使客下程银六两五钱三分四厘九毫。士夫归宴、行钱礼币、吊祭银一十两五钱。查盘官合用心红、纸张、下程、门皂、饭米银三两一钱七分。站项下银四百七十五两四钱七分五厘八毫四丝五忽。俱顺治八年全裁。

抚院案衣家伙银四两五钱八分。巡海道桌帑银四两四钱七分



五厘。兴泉道更换桌帙银五两。俱顺治十二年全裁。

左布政使蔬菜、烛、炭银三两六钱四分。兴泉道蔬菜、烛、炭银一十八两五钱一分。本县知县油烛银十两。桃符、门神、花灯银八钱。士夫归宴、行钱礼币、吊祭银八两一钱五分七厘。俱顺治十四年全裁。迎送上司伞、扇银一十两。顺治十二年裁银八两，十四年全裁。

本县知县俸薪、匀闰银一两五钱。典史俸薪、匀闰银一两五分六毫六丝六忽四微。儒学教谕、训导每员俸薪、匀闰银一两五分六毫六丝六忽四微。俱顺治十六年全裁。

本县修宅银二十两。顺治十八年全裁。

本县书办一十二名，共工食银一百二十九两六钱。顺治九年，裁银五十七两六钱。康熙元年全裁。库书、仓书各一名，共工食银二十四两。顺治九年裁半给。康熙元年全裁。典史书手、儒学学书各一名，每名工食银七两二钱。顺治九年，每名裁银一两二钱。康熙元年全裁。

按院 按临考校生员，试卷、茶饼银七两三钱六分。顺治十四年裁半给。康熙五年全裁。

泉州卫归并支給银六百五十三两五钱二分。康熙六年裁。

料剩抵修城银二百三十四两三厘五毫二丝六忽三微三纤二沙。心红、纸张银二十两。修理监仓银二十两。新官到任祭品银四钱四分五厘一毫。

鞭春、春牛、芒神、彩杖、春宴、香烛银二两五钱。季考试卷、茶饼、赏、纸银四两七钱。考生生儒进学，花红、彩旗银二

两三钱一分二厘。管解军黄二册槓銀三两五钱。俱康熙十七年全裁。

本县造报朝覲须知、宪纲、钱粮、民情各册籍银五两。顺治十四年裁三分之二，康熙十七年全裁。

提学道岁考生员，试卷、茶饼、赏、花红银一十九两三钱。顺治十四年裁半给，康熙十七年全裁。

大比年，应试生员并誊录生盘缠银一十四两三钱三分三厘三毫三丝。顺治十五年裁半给，康熙十七年全裁。

教官二员喂马草料共银二十四两八钱。康熙四年裁一员，银一十二两四钱。十七年全裁。

正、陪贡生员往省盘缠银六两。两院助给贡生路费银三两。岁贡生员往京盘缠银二十九两七钱五分。俱康熙十七年裁，二十一年复。二十六年裁。

本县灯夫四名，共工食银二十八两八钱。顺治九年，裁银四两八钱。康熙十七年全裁。二十二年复给。雍正六年仍裁。

## 耗 羨

通县额征民、屯、地、丁、正、杂钱粮额银一万一千六百八十一两六钱八分三厘零外，杂税银一十八两四钱七分九厘，学租银一十一两九钱八分五厘。

应征耗银一千一百六十八两一钱六分八厘三毫零。又每两并封平余二分银二百三十三两六钱三分三厘六毫零。

以上耗羨、平余，共银一千四百一两八钱二厘零。

一、解司公费养廉银五百三十六两一钱九分五厘零。每年额外孤贫口粮、衣布，于此项下扣除抵解。

一、解送永春州州同养廉银一百二十两。

一、存起运水脚一分银一百五两六钱七厘零。

一、存本县知县养廉并加增银六百两。

一、拨给本县典史一员养廉银二十两。又乾隆九年，奉文加给养廉银二十两。

论曰：“先儒陆贄谓圣王立程，量入为出，治化既替，量出为入。民赋固政治之大端也。邑自分疆以来，户口、贡赋、内府及诸司供亿，灿若列眉，至今而日臻上。理稽出纳者，可以概远猷矣。”

### 校 注

① 沙、尤寇：指明正统十四年农民起义领袖邓茂七与王继忠。见民国版《德化县志·武卫盗警》。

（校注 李明志）

# 德化县志卷之七

## 学 校 志

昔鲁侯作泮宫，诗人载歌思乐。学校之设綦重矣。德化学宫自宋迄明，迁徙者三。迨秦令①改建，制度宏整，而昏椽肆虐，荡为灰烬。藉非迭起而修复之，能无叹茂草乎？今则翼翼巍巍，凡隶于学者皆就理焉。盖文治之隆匪一日也。谨稽往制而胪陈之。志学校。

### 学 宫

宋时在县治之东，后迁于县东南隅沙坂，背巽向乾，议者谓弗称南面之义。建炎中，复建于县治东。淳熙中火，知县事颜敏德、郑旦之、梁京、季元才相继修建。

绍定二年，燬于寇。五年，知县事林倚建礼殿，黄之望继成之。端平间，知县事葉彦琰建讲堂。胡应梅复建棖星门、戟门、上为御书阁，淳祐中，吴一鸣继成之。德祐二年，复燬于兵。

元至元三十二年，尹翟彬重建礼殿。元贞中，达鲁花赤奴尹、沈思蕴建戟门、两庑、讲堂、斋舍，绘塑圣贤从祀像。至元四年，教谕林天资建学厅。至正二十六年，总管泉州路推官蔡嗣宗重建礼殿、戟门，殿后建尊德堂，殿东建学堂及两斋，规模略备。

明洪武初，知县王巽、王贞相继修葺。三十三年，知县应履平重修殿庑，建棂星门、明伦堂两斋。仪门内凿泮池，架以石桥。外建学门临于通衢，复建饌堂、号房于明伦堂东。建神厨、宰牲所、祭器房于戟门左。宣德二年，知县何复建戟门及东西庑。六年，知县陈昱建大成殿。七年，重建明伦堂及东西两斋。天顺二年，塑圣贤像，建训导宅。五年，凿泮池。成化十六年，署县狄钟建仪门及学门，仍捐资易临溪民屋以广之。旧右庙左学，弘治十七年，知县胡潜乃易基重建左庙右学。

教谕季聪记：“治之所先在学校，而学校之作新，惟其人能作而新之，可纪也。鲁侯作泮宫，诗人侈诸歌颂，千古一日。德化学自宋、元至我朝，兵火非一次，贤令佐继修非一人。科第辈出，间亦乏焉，亦一时文运之塞，岁久寔坏。弘治癸亥，尹胡侯视篆之初，莅学谒庙，顾宫墙弗称，无以快具瞻。悯人才不利，慨然以作新为己任。金谋莲幕钟君、道、司训陆君惠，皆欲为所欲为，共赞成之。乃计公帑之余，以状闻于当道，允所请。遂择生徒林文等、耆氏②林宗源等董其事，鸠财治工，易文庙于左，塑绘圣贤神像，两庑、戟门、棂星门从而改置焉。易明伦堂于右，两亭、斋号、膳堂、桥门视旧制有加，饬以丹堊，翼然焕然。露台、甬道甃以石，绕以垣。至于厨庖、射圃、祭器之类，靡不更新。始于弘治甲子春，落成于乙丑秋。

夫为政之趋向，贵于所当先而急者，使不知所务，则所行皆末也。今侯斯举在一转移之间，不惟圣贤神灵安所栖，而师生又得从容于讲受之地。士因侯之所作新，业其中，日刮月磨，各相淬砺。穷之所读者何书？达之所施者何术？占龙浔之神秀，挹丁溪之涟漪。科第蝉联，以古人自期待，景行先哲，苏伯承③之贤，林扬休④之政，不得专美于前矣，此侯之所望于诸生者，抑岂非诸生之所愿学者乎？侯名潜，字孔昭，绩溪人。”

嘉靖七年，建敬一箴亭。八年，知县许仁创启圣、名宦、乡贤三祠，复滨溪地之侵于民者，东及学池。学池在射圃东边。嘉靖四十二年，因防寇筑城官卖。西抵县治，前临通衢达于溪，北抵学后山。筑射圃于学宫之东，为诸生习礼之所。

记⑤：“盛世以礼为治，礼备治斯隆矣。然礼有重而似轻，若缓而实宜急者，礼射其一也。曷为重且急也？成德敦化于兹乎？系故虞廷 璽（jì）谗，因侯以明。殷学曰“序”，明伦攸赖。大射、宾射行之于上，而乡射则行之于下，君臣父子之鹄异，取人别士之权悬，盖于焉以观其德也。故悬弧矢于男子始生之日，载其说于《仪礼》、《戴记》之中。文义教于小子入学之初，古道明于夫子伤时之叹，岂不以武备之设，惟力是尚？

德化之崇礼文，斯举雍容揖逊于周旋升降之时，不怨胜己者于下。而立饮之际，庠序之彦，依稀乎克让休风堵墙之观，駉駉乎见闻习熟于尚德之美。上而备郊庙执事之选，宾兴之举以之；下而德教式成，以罔不逊之行，则燕则誉无穷矣，胡可厌忽其繁缛乎？惜由元而后，礼制斯隳，我高皇帝以武射平之。既而育才则礼射是重，命儒学悉建圃以习，郁郁乎、彬彬乎成周之制，宛然复见，岂颺以五礼之大，著之令甲而已哉！圣圣相承，内安外攘之盛，声名文物之懿，超越百王也固宜。德邑射圃久废，士志于材艺者。罔攸于习。予莅学官，询闾其地，莽焉荒茅乱篠，且缺周垣之界，凝眸

慨焉！乃芟，乃薙，乃筑，乃垣，乃白。大文宗赤城高公获受成命，爰撤淫祠，式建观德堂于其北，以间计者三。堂之东西各翼以屋，其间一。堂之前甃以台，台之南为甬道，其广逾丈，其表直抵横道，延至坤隅有门焉。其楹则六，其扁曰‘射圃’也。门堂与壁，黝垩随宜。北甃山麓，西削冈厓，东筑修塘，南饰故垣。道旁植以杉、松、桧、柏，规模整整。经始于己丑季冬之望，落成于庚寅春正之晦。督是役者，耆民鄒世瑞也。又置器物，适诸生之游息，仁诣焉。偕署篆博士兰江童君璞闻之，诏遐迩之民入观焉。诸生陈礼乐之具，习礼乐之比，志必正，体必直，弓矢之持必审必固，必期其中，以成德行，以敦礼义之俗。德人僻居深山，性颇淳厚，力本而轻逐末，庶近礼之本矣。屡罹兵荒流亡之余，耕商其地者，寓民驱俭殆半焉。俗渐浇漓，斗狠健讼，礼仪之教，奚容后乎？尝征民庶之环侍者，拭目节文亨嘉之会，倾耳赞唱诗礼之和，爰慕于中，抵标于貌，有不自知者何居职。夫正直审固之德，威仪端肃之则，触其天也。否则，弦弧刻矢，治睽以威天下，世泰时丰奚事哉！然天理非外铄也，天下之道，由于性得之于心，谓之德体。道有德则本，然所得之天，德全也。自然礼仪卒度而安，矢发中的而俊，成己感人，懿德之好，夫人天机之自动乎？诸生其毋忽之，其懋进之，以仰副圣朝建圃养士之深意。斯于身、于乡、于天下之治，岂曰小补之哉！是为记。”

十八年，训导张洋捐俸，率诸生仍建右庙左学，建训导衙。教训秦璿、知县熊尧赞成之。

莆田知县吴从龙记：“明天子御极，百度惟贞，而庠序尤圣虑之所先殚焉。盖参赞化理，惟天下贤材为之。故自国学以降，处要豁之地，莫不祗承德意，钦若教条。其或僻处一隅，学校颓，纪纲弗振，间亦有之，非杰然特出者为之师儒，其能整顿作新，挽回风化，以求无负于朝廷耶？

德化隶泉旧矣。文庙、明伦堂与县治并立，于时人材辈出，代不乏人。

厥后目学政者眩于浮议，谓明伦堂密迩民居，公私匪便。遂移之文庙右，而人材始弗古。若嘉靖乙未秋，东莞张君泮来训是邑，阅二载，乃奋然论诸生员陈石等暨耆民郭天德等曰：‘人材盛衰，系气化之升降，气化有未淳者，学校之失其地也。盍仍故址，图回气化？余愿捐俸为若邑倡。’金谊厥举，欣然告助者弥旅。遂命工改作堂斋、号舍，惟旧制是循。而于前门，视昔尤高广焉。其为邑之文士谋者，宏且远矣！嗣是，桂林秦君培来教是邑，亦乐捐俸以助之。庚子春，丰城熊君尧来令是邑，凡张君所未备者亦竭力以赞之。

噫！是举也，张君倡之，秦君、熊君相与成之，学校由是复其旧矣。学校之复其旧，则气化之淳，人材大盛之机，于斯肇矣。张君等之于气化，默有转移之功。邑之士他日而科而第，宁不知所自耶？改仍于己亥春，落成于庚子秋。余与张君旧忝师弟谊，乃记其始末云。”

十九年建启圣祠。二十九年，知县绪东山建教谕衙。四十一年，知县张大纲移泮池于棊星门外。隆庆元年，知县何谦重修大成殿、明伦堂及诸衙署。

万历元年，知县秦需移建于城西北大洋山之阳，为今之学宫。中建大成殿，次仪门，次棊星门，外为泮池。东为明伦堂，又东为启圣祠，次名宦祠，前教谕衙；西为尊经阁，阁前朱文公祠，前为射圃，又西为敬一箴亭，次乡贤祠，前训导廡。

记⑥：“余为德化之明年壬申十月，移建学宫于城西北大洋山之阳，又明年癸酉九月成。先是，县堂与学通，在县治之东，褊隘靡侧，士亦频年不振。余始至，谒庙之日，诸生首以为言曰：‘理固尔矣，而财匱食急时，可遽兴此乎？’须之一年，养道以理，民俗渐舒。诸生复以请。余曰：‘可矣。’然群情未谕，于是谋之邑，谋之野。咸曰：‘愿与胥成。’于是请之



府，请之司，请之院。咸曰‘听’。于是相土，饬材，鸠工，虑费。地取山麓之系于官者，而市民田以广其不足。为亩凡一十有二，用金一百三十六两有奇。木取巨植之系于官者，而市民杂植以补其不足。公私之数凡三千二百株，用金三十九两有奇。工之所需有木工、石工、金工、砖埴之工、涂墨之工、设色之工，凡六等，累其直，用金八百三十一两有奇，而诸所奔走杂办之供，不与此数。合其费盖一千二百一十两有奇，而所出则乡先生与博士诸生，与一邑好义之民居其半；官因自以地斥卖，以山给佃，以他役后期赎免者居其半，而其素在于官及小民之各以其所产乐输者，不与此数。程其日，自营始至落成，期年而毕。迨已成而加密之授至，予不得而睹其终。夫学故有而今迁，是旧制之一新也，不可以无记，则已乞之大中丞陈公。学之尊经阁，是昔无而今有也，尤不可以无记，则已乞之太史黄公。制度规模，亦既有名，公为之纪录矣。而输财以赞役者，众之力也，不可使迹无传而功不著，是予之责也。故别为立石以列其名氏。

嗟乎！学之迁，予尝闻昔之图之三十年矣，而事卒不果，今迄底于成。诸生其谓夙望已酬乎？未也。夫学匪成之难，士诚藉之以助其业难；士匪徒业成之难，要以不背圣人之教难。彼昔图之而未能，诸士莫不怅焉歛望。今幸以成，有司者之责塞矣。有司不憚勤众以为士，不将于士有望乎？民之方亟于财也，常征犹患不时入，今莫为督之，举欣欣焉相劝以自效，何也？以为吾邑之材由此而兴也，则无敢靳焉。一邑不靳捐己以为士，不将于士有望乎？然则，学未克迁，望在于士，而难在人；学既克迁，望在于人，而难在士。今天下称人文者，于藩曰闾，于闽曰泉，德化泉属也，旧尝以遐僻自徇，今学之新，正诸士术业一新之会也，而欲答上下之望，何足以难之？诸士其自此奋然自新其业，以遵圣人之教，以显于天下，而共成泉南之盛矣乎？则非徒尔。士昔日之志不虚，而余他日亦与有光荣也。故记赞役者之功，而因述所

期，以告我多士。”

万历中，知县吴一麟、周佑相继修葺。天启八年，知县桂振宇改丹墀、凿泮池于棂星门内，架桥其上。庙前立腾蛟、起凤二华表，禁庙后山脊行人。崇祯七年，知县李元龙、教谕郭嶷重修正殿。

国朝顺治四年，寇燹学宫，明伦堂、启圣祠俱为灰烬。顺治八年，署知县孙白孙始营正殿，未竣。十五年，知县何之旭重撤而建之，殿宇巍然。康熙十年，知县和盐鼎建议仪门及启圣祠，以仪门东为名宦祠，西为乡贤祠。训导林甲继佐之，建两庑及棂星门，缭以垣墙。康熙十八年，教谕王钦祖捐俸重修。三十六年，教谕薛允浩重修。四十九年，知县王调元建明伦堂。

邑举人陈应奎记：“人文之盛衰，视学校之兴废。苟非有廉能之长，慈惠之师，实以作兴之责为己任，安能使凋敝屯否之区，乐育有地，人文蔚勃，咸观光而不变乎？德邑明伦堂，当鼎革之初，与文庙同遭寇燹。自昇平以来，文庙重兴，明伦堂故址尚鞠为茂草，盖六十五年于兹矣。我邑侯王公莅兹土，甫下车，礼贤优士，询民疾苦。孰者废当兴，孰者害当革，弊窦肃清，听断明允。不旬月，风俗一新，民歌来暮焉。初谒庙，集诸生徒行眺明伦堂旧迹，慨然曰：‘是地为教化之所托始，吾官斯土，而使长沦于荒烟蔓草中，邑人士何所取以观法焉？’爰禋吉日，捐廉俸，度规矩，程工于匠，购材于山，问瓦于陶，不借助于募金，不动费于公帑，不烦苦于里社。高扉广狭，一准旧制。经始于己丑十一月，至庚寅四月而落成。巍然焕然！远近之望光至止者，金谓六十余年之废址，今日顿成巨观，非天假我侯之力不及此。自兹以往，邑人士之登斯堂者，诵诗读书，型仁讲让，忠孝礼义之心油然而生。望翥山之耸秀，挹丁溪之沦涟。举凋敝屯否之区，一旦改易，其心

思耳目，行见作亲作师，甄陶而教育之，英髦辈出，云汉为章，将彬彬其日盛焉。《诗》曰：‘岂弟君子，遐不作人。’维侯有之。侯之懿迹，不与德之山水长峙于不朽也哉？爰勒贞珉，以志弗谫。”

五十五年，教谕力子侗捐俸倡修正殿、两庑、仪门及启圣祠。五十七年，知县熊良辅捐俸重建棂星门，造照墙。

邑绅陈应奎记：“龙得学官当有明之末，罹于兵燹，殿宇煨烬。历任贤牧及秉铎于斯者，次第重建，未能悉复旧观。岁久未修，风雨剥落，兼以垣门卑隘，泮桥隔绝，欲入庙瞻圣者，趋跄不前。岁在戊戌，邑侯熊父母以天柱名儒，鳌峰世学，下莅斯土。洁操冰清，高标玉立，仁心惠政，载道兴歌。甫下车，入庙谒圣，见棂星门窄狭，登瀛乏桥，四旁垣墙残缺。喟然叹兴，亟议修治。遂捐廉俸，择吉鸠工，越五月而成。泮水雪蒸，学宫霞蔚，爽豁辉煌，高门有伉。瞻圣而望道者，仰门墙之数仞，儒林齐庆，士类欢腾。谨勒石扬徽，以纪其盛。”

雍正八年，知县稽岳延重建明伦堂。九年，知县齐宗望、黄南春相继成之。十一年，黄南春建仪门，修大门。

乾隆三年，重修学官。邑民有盗墓庙旁者，教谕石澄详院飭县押迁，勒界永禁。六年，重修崇圣祠。乾隆九年，知县鲁鼎梅重修大门。

## 崇 祀

宋真宗封孔子父叔梁纥为齐国公。元至顺间，加封为启圣王。明洪武三年，诏封爵如旧。嘉靖九年，以王系臣爵，改为启圣公。令两京国子监并天下学校各建启圣祠。以颜无繇、曾点、

孔鲤、孟孙氏配，程珦、朱松、蔡元定从祀。先是，颜无繇、曾点、孔鲤皆从祀两庑。洪武四年，国子司业宋濂上孔庙议，言立学专以明伦，今回、参、伋坐享堂上，而其父列食庑间，彝伦颠倒，所当别议。弘治元年，少詹事程敏政复以为言，俱格不行，至是始定配祀启圣祠。万历三十年，以周敦颐之父周辅成从祀。

国朝雍正二年，追封孔子五代木金父为肇圣王，祈父为裕圣王，防叔为治圣王，伯夏为昌圣王，叔梁纥为启圣王，改启圣祠为崇圣祠。又以张载之父张迪从祀。

汉高祖始以太牢祀孔子于阙里。魏正始间，始祀孔子于辟雍。隋命府、州、县学皆以春秋仲月释奠。唐高祖诏立庙，太宗始令致祭，后遂因之。

汉平帝封孔子为褒成宣尼公。唐高宗赠太师。玄宗封为文宣王。宋太祖诏：庙门立戟十六。真宗加为元圣文宣王，寻以太祖讳，改元圣为至圣。徽宗加冕十二旒，服九章，庙门用戟二十四。元成宗又加为大成至圣文宣王。明洪武三年，诏封爵如旧。嘉靖九年，改称至圣先师。

汉安帝时，始祀七十二子于阙里。唐太宗始尊孔子为先圣。颜子为先师，配之。贞观二十一年，复以左邱明、卜子夏、公羊高、穀梁赤、伏胜、高堂生、戴圣、毛萁、孔安国、刘向、郑众、杜子春、马融、卢植、郑康成、服虔、何休、王肃、王弼、杜预、范宁、贾逵二十二人配享。高宗时，赠颜回为太子少师，曾参为太子少保，并配享。玄宗开元间，用李璿（guàn）言，以颜渊、闵子騫、冉伯牛、仲弓、宰我、子贡、冉有、季路、子游、子夏，为

十哲，而以曾参居十哲之次，各为坐像。余弟子悉从祀两庑。开元二十七年，又赠颜回为兖国公，闵损等九人为侯，曾参等为伯。宋真宗又以闵损而下皆为公，曾参而下皆为侯，左邱明而下皆为伯。神宗元丰间，以孟轲同颜回配享，荀况、杨雄、韩愈并从祀。徽宗大观间，以孔伋从祀。理宗淳祐间，加周敦颐、张载、程颢、程颐封爵，与朱熹并从祀。景定间，加张栻、吕祖谦伯爵从祀。度宗咸淳间，以颜回、曾参、孔伋、孟轲配祀，而升颐孙师列于十哲，以邵雍、司马光从祀。元皇庆间，以许衡从祀。至顺间，加封颜回为兖国复圣公，曾参为邾国宗圣公，孔伋为沂国述圣公，孟轲为邹国亚圣公，而以董仲舒从祀。明洪武十五年，诏天下儒学皆立庙祀孔子。二十九年，罢扬雄从祀，进董仲舒。成祖永乐八年正文庙圣贤绘塑衣冠，令复古制。英宗正统间，以胡安国、蔡沈、真德秀、吴澄从祀。孝宗弘治九年，以杨时从祀。

世宗嘉靖九年，诏屏塑像为木主，题曰“至圣先师孔子神位”。改大成殿曰先师庙，戟门曰文庙之门。定四配曰：复圣颜子，宗圣曾子，述圣子思子，亚圣孟子。定十哲曰：闵子损、冉子耕、冉子求、仲子由、冉子雍、宰子予、端木子赐、言子偃、卜子商、颛孙子师。东庑：澹台灭明、原宪、南宫适、商瞿、漆雕开、司马耕、有若、巫马施、颜辛、曹恤、公孙龙、秦商、颜高、鬲赤、石作蜀、公夏首、后虔、奚容蒧(dian)、颜祖、句(gou)井疆、秦祖县、成公祖、句兹、燕伋、乐欬、狄黑、孔忠、公西蒧、颜之仆、施之常、秦非、申枨(cheng)、颜喆。西庑：宓

(fú)不齐、公冶长、公皙哀、高柴、樊须、公西赤、梁纘、冉儒、伯虔、冉季、漆雕徒父、漆雕哆、商泽、任不齐、公良孺、公肩定、鄒(qiāo)单、罕父黑、荣旗、左人郢、郑国、原亢、廉洁、叔仲会、公西舆、如邾巽、陈亢琴、牢步、叔乘。《家语》有陈亢琴、牢县寘，而《史记》无之。《史记》有颜何、秦冉、公伯寮、鄒单，而《家语》无之。《家语》有申枨，《史记》为申党⑨。文翁图所记，又有林放、遽伯玉、申枨、申党。其木主俱称先贤某子之位。春秋以来诸儒，东庑：穀梁赤、高堂生、毛萁、后苍、杜子春、韩愈、程颢、邵雍、司马光、胡安国、杨时、张栻、陆九渊、许衡；西庑：左邱明、公羊高、伏胜、孔安国、董仲舒、王通、周敦颐、欧阳修、张载、程颐、胡瑗、朱熹、吕祖谦、蔡沈、真德秀。其木主俱称先儒某子之位。申党即申枨，改林放、遽瑗、郑众、卢植、郑康成、服虔、范宁七人各祀于其乡。黜公伯寮、秦冉、颜何、荀况、戴圣、刘向、贾逵、马融、何休、王肃、王弼、杜预、吴澄十三人。其后苍、王通、欧阳修、胡瑗、陆九渊，皆增入者。隆庆五年，以薛瑄从祀西庑。万历十二年，又以王守仁从祀西庑；陈宪章、胡居仁从祀东庑。国朝以罗从彦、李侗从祀。康熙五十一年，升朱熹位东哲之次。五十五年，以范仲淹从祀。雍正二年，诏复祀者六人：林放、遽瑗、秦冉、颜何、郑康成、范宁。增祀者二十人：县寘、牧皮、乐正克、公都子、万章、公孙丑、诸葛亮、尹焞、魏了翁、黄幹、陈淳、何基、王栢、赵复、金履祥、许谦、陈澧、罗钦顺、蔡清、陆陇其。乾隆元年，谥陆陇其曰“清献”。三年，升有若于东哲，列朱熹于西哲，复

进吴澄从祀。

## 名宦祠祀

宋集贤院学士、前德化县知县陈靖。载《宋史·循吏传》为宋代循吏第一人。

明文林郎、德化县知县王翼。

文林郎、德化县知县冯翼。

按察使、前德化县知县应履平。

迪功郎、德化县县丞余表。

监察御史、前德化县主簿古彦辉。以上俱万历三十二年，知县周佑纂修邑志，并请入祀。

学宪副使熊洽。号鱼山，诚朴率人，道腴范士，雅有实学，别无异尚。嘉靖三十三年五月，闽、侯、怀三县学呈申学宪朱行县制主，一体入祀。

文林郎、德化县知县胡惟立。嘉靖三十四年入祀。

国朝太子少保、兵部尚书、闽浙总督范承谟。

太子少保、兵部尚书、闽浙总督姚启圣。

福建承宣布政使、司布政使金培生。

按：古人有愿为守令者，以其近民，泽易下究，故所居民富，所去民思，生有荣号，歿则享祀也。昔召公循行南国，民爱其甘棠而不忍伤；羊叔子守襄阳，民望其碑而堕泪。朱邑为桐乡吏，民岁时祭祀不绝，勒之竹帛，垂之青史。视夫贪墨昏庸曾未数年，而身名俱泯者，相去何如耶？后之视今，犹今之视昔。吏

兹土者，其知所鉴也夫。

## 乡贤祠祀

五代唐归德场长颜仁郁。

宋赠朝请郎林程。

转运判官苏钦。

循州知州郑轮。

明中宪大夫、按察副使凌辉。以上俱万历三十二年，知县周佑纂修邑志，并请入祀。

儋、吉二州知州林茂。嘉靖三十八年入祀。

四会知县邹绚。

平乐通判单辅。

封临江府推官郭琛。崇祯六年入祀。

户部主事郑沛。

全椒训导赖孔教。

赠翰林院简讨四会知县赖燦。

按：古人祭有道有德者于瞽宗，又谓乡先生没，而祭于社，乡贤之祀尚矣。盖化俗导民者，非必尽条教之详，法令之密也，固有阴感默诱之道焉。昔庐陵立四忠一节之祠，文丞相少尝游之，叹曰：“死不俎豆其间，非夫也”。厥后，文公果以精忠大节著于天下。德化山川秀淑，风气淳朴，奋发而继起者，何分于古今？瞻其祠，论其世，而动私淑之慕，其在斯乎？



## 书 籍

明万历间，颁发：《四书》、《易经》、《书经》、《诗经》、《春秋传》、《礼记》、《周易注疏》、《尚书注疏》、《毛诗注疏》、《春秋左传注疏》、《公羊传注疏》、《穀梁传注疏》、《礼记注疏》、《周礼注疏》、《仪礼注疏》、《论语注疏》、《孟子注疏》、《孝经注疏》、《尔雅注疏》、《经典注疏》、《文苑英华》、《三儒类要》、《承天大志》、《大明律》。以上俱明季寇燹。

国朝乾隆三年，颁发：《十三经注疏》、《史记》、《汉书》、《后汉书》、《三国志》、《晋书》、《宋书》、《南齐书》、《梁陈书》、《魏书》、《北齐书》、《周书》、《南史》、《北史》、《隋书》、《唐书》、《五代史》、《宏简录》、《明史》。

乾隆七年，颁到：《朱子全书》、《钦定四书文》。

## 洋 额

明制岁科两试，取进入学童生名额，以县上、中、下为差，德化为中学。崇祯间，奉文裁汰，阖邑乡绅，刑部侍郎丁启濬，翰林院简讨赖垓，刑部主事庄尹辰，原任直隶扬州府同知郭维翰，丹陵知县李乔樾，建阳儒学训导张九垓，举人邓孕槐，贡生周鼎等公揭略云：“则壤惟三，成

賦筆于禹貢，辟門以四，吁俊昭于虞廷。惟明主广为蒐羅，斯多士愈加奮勵。德化厥賦惟下，稱縣居中。只緣田少山多，實則士淳民愿。罔敢虛夸以惑眾，亦耻飾厲而欺公。迺來科目弘開，斯文輩起。家弦戶誦，謹守鄒魯之遺風；揆藻摛辭，恪循韓歌之正轍。欽天子成宪，咸愿觀上國之光；沐累朝殊恩，群思效中州之力。伏讀明旨，原為去偽黜浮，爰考士風，率皆欽華就實。汰无可汰，裁无可裁。合懸台臺加意栽培，据情詳覆。幸仍列于中等，俾共叨夫鴻恩，須至揭者。”

國初因之。康熙間，改為小學，歲試取進文武童各八名，科試取進文童八名。雍正元年，特恩加文童額一次三名。二年，奉文准照中學，歲科兩試，各取進文童十二名，武童仍舊。乾隆元年，特恩加文童額一次五名。五年，總督宗室德題請廣額。略云：“德化縣向隸泉郡，前取進泮額一十二名外，尚有撥入府學二三名不等。今屬州轄，則无撥入府學之額。人多額少，不无遺珠。且田邑之武童，現進十二名，德邑只有八名，尤當較量請增，庶不致偏枯。况現在人文日盛，應試文武生童較前加增一倍。而德邑又為附州之首縣，應請將文童加增三名，共取進一十五名；武童加增四名，共取進一十二名。以廣栽培。”奉文歲試武童准加四名，為十二名，文童仍舊。歲科兩試，各取進十二名。八年，知縣魯鼎梅洋請廣額。略云：“遵查德化一邑，旧為山陬，迺來文運昌明，家弦戶誦。雍正二年，定為中學，取進泮額一十二名。但从前系泉郡屬邑，歲科又有撥入府學二三名。雍正十二年，改隸永春州首縣，遂无府學可撥額，反減縮。乾隆五年，經前督院德題請加增泮額三名，共取進十五名，以廣栽培。部議以府學取進童生，統于各屬試卷內較量，撥取或多或少，原无一定之例，遽請增額，恐開冒濫等因。但查德化从前撥進府學歲、科兩試，俱各有二名三名不等，有案可稽，并非无一定者。今以改歸州轄，竟

致除去。在泉属各邑，隐受加增，而德化士子明被减少。每试童生将近二千人，若取进一十五名，实无冒滥云云。”

## 学 租

学田：一十二亩，坐北城外。北至学后山，南至城墙，东西至垣墙及民田。明万历元年，知县秦霭捐置。

学山：土名大洋山。南至学宫，北至古城墙，西至大旗山顶，东至北城头。

嘉靖九年，知县许仁申请毁拆淫祠、中林院等处。地基共七十四亩五厘，估租价听民认纳，每年征银一十一两九钱八分五厘。康熙二十二年，奉文拨给廪生、贫生。乾隆四年，奉文留给社师。坐在坊里双髻山，新化里东埔庵，山兜池尾汤泉里狮子岩、尤井庵、竹林庵，东西里法林寺、感井庵，塔口、洋中等处。

知县许仁牒学：“为处官房租银，以作兴学校，广育人材事。照得新改天妃宫建紫阳书院，其讲堂两旁俱有号房，以居有志会讲生员。其门墙外，旧有铺店六间当上市之会，毁之，则县小地窄，难以容日繁交易之人。存之，民利官便，堪以资日聚志学之彦。为此，本县仍俟召赁，照常起租，每间年纳租银六钱，准居民张琼等承赁，年共计银三两六钱，除嘉靖十年下半年者已收公用外，自后年分县事丛集，无暇及此，合牒儒学掌印官及时征取，以为有志苦学生员充纸笔油烛之用，永为定规。庶几市利以兴，人材以盛，一举而两得也。卷查巡视学校事，蒙提学道副使高，准本县申拆毁淫祠若干座及中林院等处，祠屋虽毁，各祠基地大小，皆未差人丈量，估第租价任民认纳，共计若干银，合候行查明白，续牒并征，以充前费。及照历代皆

建书院以明正学，俱置学田以养英俊。此教化之攸，寓政体之宜，崇者岂徒文具美观而已乎？要在着实举行，不为虚费。牒到已后，该学置簿用印，逐一登记收支数目，以备查考。师儒会讲，务期学明道立，风淳俗美，人材思齐乎邹鲁，汇进于皇朝，以树鸿勋茂绩，岂不伟哉！”

万历二十七年，知县吴景梅拨郑牛生、郑惟德、陈神呈送绝户田四十七亩一分八厘八毫，又拨李德、李雪子、李福呈送绝户田四十亩，共田八十七亩一分八厘八毫，坐东西里上涌乡。

学山：坐东西里上涌乡。土名大仙崎、道士洋、古董格等处。内给佃种山垦田，各量纳租。共六十九亩零。

学田：一段坐在坊里珠地乡。载租谷一千八百斤。康熙二十二年，奉文拨给廩生、贫生。康熙二十八年，产米收入姚兴儒户输纳。一段坐五华寺，载租银五钱；一段坐尤中里陈吴乡，载租银五钱；一段坐狮子岩，载租银一钱。

学山：坐珠地乡。

康熙二十二年，总督姚启圣捐银四十两，置学田三段，共九亩七毫八丝九忽。配产米四斗五升七合四勺八秒。一坐县城后，土名翁仔坂，载租谷三百五十斤；一坐濠上乡，土名潘腰格，载租谷六百斤；二段共田五亩六分一厘七毫二丝。一坐石杰乡，土名乌洋，实田三亩三分九厘六丝五忽，载租谷四百一十斤。知县王之纪捐银一十五两，教谕郑默捐银六两，置学田四亩一分三厘九毫一丝八忽，配产米二斗一升。坐县兜，土名池后巷，载租谷七百斤。立姚兴儒户输课，岁收租谷分给贫生，永令顾名思义。

康熙二十八年，邑庠生郑周礼、父仲璞捐田二段，共载租谷

六百斤。坐南关外，一土名山尾崙、沟尾垞，载租粟四百斤；一土名肖池，餐居垞，载租粟二百斤。每岁收贮，大比年给助科举生员盘费。

地租共银二两二钱五分，每岁收存帮贴文武两闹谕训送试盘费。一地基贰亩，在学署前，载租银二钱；一地基一十八亩，今起盖十七亩半，在南关外石龟，载租银一两七钱五分；一地基在东岳庙下，载租银三钱。

## 书 院

图南书院 在解阜门内。国朝康熙二十八年，知县范正辂建。正厅一座四房，左畔附屋两间，大门一座，门房两间。雍正八年，训导王方英建后宅三间，右畔附屋四间。乾隆九年，知县鲁鼎梅建中堂一座，堂房八间，左右舍十间，仪门一座。记①：

“图南书院者何？治之义学也。叻此乎？前此矣。前此则曷为乎记？葺其旧，增其新，广而屋之，故从而记之也。古之教士者，学校而外，党有庠，家有塾，义学之设视此矣。卜子曰：‘百工居肆以成其事，君子学以致其道，故所居必有常，所习必有业。’诚以少而习焉，其心安焉，不见异物而迁焉，借有其地也。书院之建重矣哉！”

虽然，废而弗建，惧其荒也；建而弗广，病其隘也。荒则落吾业，而隘亦无以广培夫英材焉。治有义学，枕龙浔，揖风囊，地灵所钟，宜人文蔚蒸而起。余承乏以来，公余校士其中，深幸邑之向学者众也。为延名宿掌教焉，月再亲课，第其高下，优者奖之，不及者导之。肄业者日益众，旧舍不足以容。岁甲子，捐俸鳩工，因舍前之地，建一堂八室，左右旁舍十，重门邃宇，视旧制有加。冀沐浴咏歌其中者，少而习焉，其心安焉，不见异物而迁

焉。既不病于隘，而愈以相助于无荒，蒙庄不云乎？风之积也不厚，则其负大翼也无力，他日抟风而上于此基之矣！

司其事者，为耆民陈汝度、曾道修，在工数月，劳勩(yì)备至，工告竣，因记之。”

**雲龙书院** 在东岳庙后观音阁西畔。乾隆三年<sup>⑩</sup>，知县黄南春建。

**瑶台书院** 在瑶市社薛萝峰之麓。乾隆十一年，知县鲁鼎梅、教谕曾晋，训导萧国琦捐俸倡建，举人颜瑛、贡生苏重光、监生林升丽、林士品、生员林文华募建。记<sup>⑪</sup>：“余莅德之四年，建图南书院落成。每公余过访邑人士，就学者皆造焉。顾英才济济，方惧宇舍之不足以容属筮也，既而邑孝廉颜君等以治之南，鼎建瑶台书院，请余与广文曾君、萧君往相其阴阳，因地势规方度向，中立讲堂，旁为肄业之室，又旁为茶烟之所。擘画既毕，各捐清资佐之，观者咸踊跃相庆，出泉贝以经营。阅月，鳩工饬材，上栋下宇，规模备具。垣墉壘茨，渐次就理，行见誉髦咸蒸，渊渊乎弦诵之声起于图南者，即于瑶台观其盛，斯文昌明之兆，后先焜耀，则所望于此都人士者也。因濡笔而为之记。”

**紫阳书院** 在县治西上市。嘉靖七年，知县许仁改天妃宫建。今废。

**丁溪书院** 在县治南丁溪之西，山川坛之左。嘉靖二十六年，知县绪东山建。今废。

郎中郑普记：“德化实温陵西鄙之地。嘉靖丁未春，天官三南绪公米宰是邑。公之为政也，肃廉惠和而不倦，故未几而人阜功济。于是葺紫阳书院，构驾云亭，渐复古义社，卓卓然欲以天下国家之志，尽施于一邑也。其复建书院于丁溪之上，将群多士而亲教之。一日，邑博方君协邑幕芮君，乡宦

郭君、生员李子辈过余而语焉。余叹曰：‘善乎，人文其有兴乎！’方公愕然问其故，余曰：‘君其未察于地之理乎？夫五星之精，照于天，发于地，而入资之以生也。毛黑智长，丰瘠之形，莫不随五行之气而异，矧夫聪明才智之禀乎？吉州之东，有山斜平如仁字，名曰仁山，刘氏世居之。自文节公而下，贤哲辈出，皆以仁愿称。德化之有丁溪，亦以溪纵横似丁字也。夫丁于五行属火。《律历志》曰：‘明炳于丙，大盛于丁也。’邑乘又曰：‘水画丁，罗簪纓’。则人知其为文明之应久矣！然自林扬休登第至于今，落落不可多数，岂地独弗灵于此耶？尝稽林扬休之兴也，一夕雷雨，水决，溪形见，当时叶咏曰：‘地脉曰丁，流溪之应甚明矣。’嗣是则荒芜堙淤，比之残梗卑湫而已，恶足钟淑气而发清材哉？绪公深明其理，于是拨其泥而导其脉，披其藜，使列岫呈高，众流会深，从而辟以书堂左右斋房数十，斋居学者，堂则时讲习焉。夫一夕雷雨，尚能伸汨没为溪之光，绪公廓其源流，复益以道德仁义之泽，清和之渐，贞淑所凝，将不有以演嫡派之传，而吐龙光之秀者欤？君其试观之哉！’方君喜以语诸从学者，咸翩翩有驾空凌霄之志。谓溪之名，馆之功，绪公之德，得余一言而赫然于穹宇之内，不随时而兴灭，是恶可无言以记耶？因共谋予记之。余乃次其事，登之石，而附之地理志焉。噫！后有作者，其尚征于斯文”。

龙浚书院 在龙浚山麓。嘉靖四十年，知县张大纲建。今废，址犹存。

## 社 学附

按：社学之设，仿古党、庠、序之制也。明洪武初，诏天下里社创立。正统间，复敕提学官及州县牧严加课督。嘉靖九年，许令仁请于提学副使贲亨高公，斥各里团淫祠为之，并处置其资用。然贫儒衣食于书，

每辗转求为教读，而奸巧之徒，且以社学与游士为市，渐致废弛。不数年，复转而为梵宫道宇矣。姑按旧志列之，以见一代之制云。

**大卿社学** 在县南张墩乡。一座五间，东西两廊前三架，廊后空地一亩，外门楼一座。

**良太社学** 在宏祠乡。前临大溪。

**济山社学** 在英山社。一座五间，门楼一间。

**南洋社学** 在新化里。中二间，东西各三间，门楼一座，旁屋二间。

**朱紫社学** 在清泰里。一座三间，前门东西厢房各一间。

**梅峰社学** 在梅中里。中一间，东西各二间，前堂一间。

**三峰社学** 在梅上里下涌乡。一座三间，前门一间，东西厢房各一间。

**桂林社学** 在东西团贵湖里。一座三间，东西厢房各一间，前门一间。

**万峰社学** 在汤泉里桂林坊。一座一间，东西厢房各一间，门楼一间。

**伏虎社学** 在汤泉里。一座三间。

**瑞科社学** 在小尤中。一座一间，东有小厅，西有讲堂；厅后房二间，前有拱桥。以上俱嘉靖九年设，后俱废。

论曰：“学校之设，原以养育人材，使濯磨其中者，底于有用也。胡安定教授苏湖，弟子数千，皆通经义明时务。范文正为诸生时，便以天下为己任。苟第曰能文章取科第，于建学明伦何



关焉？我国家崇正学，重师儒，凡所以广厉学官者，详且切矣。士子幸际昌期，宜何如鼓舞以仰副培成乎！”

### 校注

① 秦令：指县令秦霭。见民国版《德化县志·职官、宦绩》。

② 耆氏：疑为“耆民”之误。

③ 苏伯承：即苏钦之字。德化县善均里人。宋宣和甲辰科进士。（见民国版《德化县志·人物、乡贤》）。

④ 林扬休：德化县杨梅人。林程之子。宋徽宗重和元年戊戌科进士。邑登第自扬休始。（见民国版《德化县志·选举甲科》卷十三）

⑤ 记：从内容看，当为县令许仁作。

⑥ 记：从内容看，当为县令秦霭作。

⑦ 杨：乃“扬”之误。

⑧ 申枨：即申党。春秋鲁人。孔子弟子。

⑨ 记：从文章内容看，当为县令鲁鼎梅作。

⑩ 乾隆三年，知县黄南春建；据民国志：“乾隆元年，知县黄南春重修”。

⑪ 记：从文章内容看，当为县令鲁鼎梅作。

（校注 李明志）

# 德化县志卷之八

## 祠宇志

狄梁公抚巡江南，所在淫祠悉奏燬之，而夏禹、泰伯、季子、伍员之庙，独岿然千古，非以其功德在人，宜庙食百世哉。德邑祠宇，其载在祀典者，巍巍翼翼矣。他若白杨青草，尚隐幽宫，故里荒亭，犹存古庙。溯所由来，皆有御捍之功，不可诬也，故详其地，考其兴废创葺，著于篇，而释梵诸宇则附见焉。披而览者，亦可以知所重轻矣。志祠宇。

## 庙祀

城隍庙 在县治西。宋绍定三年庚寅，寇燬。壬辰冬，知县黄之望改建于县治仪门之东。明宣德元年，知县何复迁返旧址。嘉靖元年，知县胡呈章重建正寝二殿及两庑、中亭、大门，规制宏整，庭植柏树。国初知县王宠受修。康熙间，知县和盐鼎再

修，未竣。二十三年，知县傅以履、汛防把总何演荣同修。雍正十二年，知县黄南春重修。乾隆九年，知县鲁鼎梅捐俸重修。先是，庙无门屏，堂廊空旷。自北镇楼废，汛兵借住西畔房庑，人马喧杂，及是增设完密，复即马王庙旧址捐建营房以栖汛兵，庙貌乃肃。记：①“城隍之神，土地民人之所倚毗者也。自京师以迨郡县，皆有庙祀。官其地者，下车必谒，朔望必谒。春秋展祭，载在祀典，非以神能默相吏治，而绥佑一方也哉？

邑有城隍庙，自宋以来，代有修葺。予来令此，始至之日，入庙斋宿，见堂庑倾颓，规制未备，怒然惧其不足以妥英灵也。爰捐俸庀（pǐ）材，斫之砮之，丹之漆之。殿堂阶阼（shì），旧者修，缺者建，兴工于癸亥八月，观成于甲子十月，逾年而功始竣。盖不敢以事神之事，迫于劳民，而崇报之意有必备焉耳。

夫邑之中，令与神皆有事于兹土，而民情幽隐，令之刑赏所未及者，惟神祸福之。天听崇高，令所劳心焦思而为民祈祷者，惟神默相之。神之功伟矣，而可以湫隘嚣尘袞之哉？

记曰：‘以劳定国则祀之，能御大灾，捍大患则祀之。祀之则致敬，致敬故尽物，则斯举也，还以为吾民祈报于神之灵。且使邑之人，知善善恶恶，此中又有赫赫难欺者在，而益加谨感也。庙既成，因缀以所见而记之。’”

按：城隍古无祀典，惟吴越有之。汉唐而后，天下始为通祀。盖高城深池，捍外卫内，其英灵之气，当炳为神也。明洪武二年，封监察司民显祐伯。六年，正诸神封号，改称某州某县城隍之神庙。制如公廨，设公座、几案、笔砚如守令，俾之监察庶民。每岁春秋，与风云、雷雨、山川並坛而祀。邑厉祭，则掌印官牒告于庙，奉神主之。各乡厉祭，里民亦告于

神，请主其祭。

先农坛庙 在宾阳门外。雍正五年，奉旨建。坛高二尺一寸，宽二丈五尺，坛后建正房三间，配房各一间。正房中奉先农神牌。高二尺四寸，宽六寸，座高五寸，宽九寸五分，红牌金字。东收贮祭器，西收贮藉田米谷。配房东置办祭品，西令看守农民居住。周围筑墙，买置藉田，租八百斤。一坐产窑头乡，土名东山洋方泗户屯田；一坐产西墩乡，土名接坑坝仔口庄政户屯田。

关帝庙 在县城内下市，旧在宾阳门外。后迁今所。国朝康熙十一年夏，庙后大松围丈许，忽折压，全庙皆碎，惟神座上瓦椽具存，帝像俨然。知县和盐鼎重建。十五年，洪水荡圮。先是，顺治十八年，知县何之旭祷于神，祈收捕奸民许于敬。功成，建新庙于县治北山巅。自旧庙水圮，春秋朔望祭谒皆在新庙。乾隆六年，知县黄南春改就下市旧址鼎建。

邑绅士记：“汉之季，笃生关圣夫子，义勇忠贞，正气礴天地，其灵爽千古长昭。凡都邑里闾，罔不像祀，而历代帝王迭封累锡，典綦重矣！迨我圣朝，尤崇隆礼，于二祭之外，沛帑嵩祷，复追封其三代，制殿宇阶陛，立皋门与帝阙埒，洵千古未有之盛典也。

德邑旧庙在北山之巅，岁辛亥邑侯黄公莅兹土，朔望拜谒，见庭宇淤隘，下湿上颓，皇然不安。每于宣讲圣谕时，即与士庶商地恢营。但山城桥庙，需理者多。侯乃壬子建鸣凤桥，甲寅建明伦堂，乙卯成云龙桥。丙辰、戊午修东岳及文庙，己未又葺鸣凤桥。十载之间，不遑宁处。辛酉夏，相视帝庙旧址，令庠士裴震良、陈其遇鳩工鼎建。殿陛门庑，悉遵今制，计费金三百余。不三月而圣像庙宇，咸观厥成。此固神之默相，要非我侯勤政之功，曷克臻此！继自今赫声濯灵，保兹岩疆，祐我黎民。神之

灵爽，侯之德泽，当与龙水凤山並永矣。”

天后庙 在龙浔山麓。春秋致祭。

东岳庙 在宾阳门外雲龙桥北。宋嘉熙己亥建，后倾颓。明宣德二年，知县何复重修。嘉靖八年，知县许仁申请，改为阴阳医学惠民药局。未几，仍复。崇祯间火。国朝顺治六年，知县王榜鼎建庙，后为观音阁。乾隆丙辰，知县黄南春重修。以观音阁东为真武殿，西为雲龙书院。

朱文公祠 在解阜门内，图南书院之西。乾隆七年，知县黄南春建。

名宦祠 在学官东。

乡贤祠 在学官西。

忠义孝悌祠 烈女节妇祠 俱在学官之西。雍正元年，奉旨建。春秋致祭。

土地祠 在县治仪门东。康熙三十年，知县范正格建。

南昌朱文公祠 在新化里屏风山麓。明弘治间建。国朝乾隆八年，里人陈鹏南募修。

忠应庙 在石杰乡。祀唐归德场长颜仁郁。宋乾道二年，赐额忠应侯庙。淳祐二年，加孚祐忠应侯。诰云：“德邑泉属也。尔神尝为长于斯，生爱其民，歿而福之，宜也。然天时水旱、虫蝗、疾病，吏请于神而得其效。若吏之昏懦贪墨，以害吾民，而有司不能举者，神岂得不疾去之，以称吾意乎？翊卫二神，一为庄赋，永春人，明待郎庄夏之祖。郁为长时，赋左右之。宋绍定间，以驱寇功，封协祐侯。一为郑昭祖，邑石杰人，初祖仁侯（bào），继郁为长官，

终郡司马，里人拊祀之。昭祖复能惠爱其乡，又尝劝闽王归顺，众为立祠于忠应之侧，请于朝，封翊顺侯。知县事陈居方为记。略曰：“于时僭据，瓜割豆分，惟神忠义，凛凛知天命在宋，力劝闽王上图，民无干戈之扰，生聚晏然。其气节尤为昭著，不特胖蚩有灵而已，故表而出之。”

**水府庙** 在茅岐社水府山。地势阻深，宇基宽广。宋苏十万拒元战歿于此，里人祠之。

**统军庙** 一在南关外双港头。原天后庙地，今并祀天后。一在东关外岳尾街，祀宋统军陈蔚。明嘉靖四十年，吕尚四倡乱，遣其党林文焕夜劫德化，至龙潭岭，望见东南关一带，火光烛天，因遁去。人以为神之功。

**英显庙** 在桂林乡。神，一名谟、一名烈，姓失传。宋绍定三年，以捍汀寇<sup>②</sup>功赐今额。国朝雍正间，庠生赖必捷募修。

**小尤庙** 在尤中里。神，一姓章，一姓林，名俱失传。唐末人避黄巢之乱居于此，歿而有灵，乡人祀之。宋绍定庚寅，汀寇自尤岭来，忽皆遁去，人谓神驱之云。

**福安庙** 一在尤中许卿乡，一在赤水格岭尾。宋大中祥符间，有麻姓兄弟号五公、八公者，尝追贼至尤溪县姜溪。贼散后，歿而为神。治平元年，乡人建庙祀之。

**仙寨庙** 在尤中里仙济山。祀宋义勇朱姓，忘其名。里人涂荣四建。元末寇乱，乡民零星投寨，流寇望见寨内烟火甚盛，不敢犯，盖神力也。

**三贤祠** 在旧冲霄塔下。祀明署知县、泉州通判闻人宗望，

知县林大俊、桂振宇。万历间建。今废。

丁公祠 在三贤祠右。祀明太仆卿丁启藩。万历间建，何乔远记。见《艺文志》③。

姚公祠 祀明知县姚迟。崇祯间建，郭维翰记。见《艺文志》④。

傅公祠 在城隍庙中亭东。祀国朝知县傅以履，汛防把总何演荣。康熙间建，乾隆十年，知县鲁鼎梅重修。

## 寺 宇附

程田寺 在瑶市社。五代唐僧行端修真于此。邑人程国知施田建寺，宋天禧中赐今额。寺多松竹，夏月纳凉，暑气顿消。西为栖莲室，爽塏幽寂。国朝康熙间，僧三檀建。明岁贡黄自勉诗：“寻幽结伴访僧伽，到处逍遥步晚霞。风动绿阴松子落，恍疑空际散天花。”

国朝训导陈长周诗：“松竹青葱恍画图，偶从萝径蹶双兔。但因沉宝思庞蕴，不待铺金问给孤。贝叶重翻新净室，昙花时绕旧缁庐。一生好结东林友，不佩芳兰佩茱萸。”

戴雲寺 在新化里戴雲山。唐袒膊和尚名智亮者居此，后化于泉州开元寺之院居，其徒泥肉身于殿旁。先是，智亮尝自言曰：“身在紫雲，显在戴雲。”乃载归而祀之。慈感，智亮之师也，驻锡此山亦化去，泥其身与并祀。寺居山之中麓，顶址上下各十五里。梁开辟⑤二年造。宋端拱二年，僧怀整重建。

明□□□诗：“卓锡真僧去，灵通俗尚传。每从呼吸地，忽转修辭

天。猿自岩头合，雨于山上悬。神功都寂若，慰满尽桑田。”

知县杨文正诗：“云间突岫画难图，朝夕晖阴气象殊。洞壑留寒长护雪，松萝抱石欲侵途。佛国何年遗只履？龙潭今日蹶双凫。眼前风物流传旧，好向如来证法符。”

**香林寺** 在梅上里。平地临溪。先是为桂阳林姓坟墓。五代末，僧守珍建寺于湖山之北。宋天圣元年，僧了他别择吉地，为林祠堂，移寺今所，旧名“西林”。二年，赐额“香林”。明宣德元年，里人林贞等募众重修。

国朝进士林模诗：“寺隐丛林里，层楼一望悬。晨钟惊客梦，夜雨滴花鲜。溪漾千峰影，雲生万树烟。高僧尘外侣，握手别经年。”

**龙湖寺** 在新化里太湖山，亦名金碧峰。宋绍定间，僧自超建。明嘉靖间燬，里人林正旺施田舍山，募众重建寺，极宏敞，多奇花异木。

明大宗伯田一俊诗：“湖内问天星宿低，花成紫盖雪成泥。今朝咫尺通龙座，下土群山伏马蹄。佛国如甌金作界，神仙有鸟鹤同栖。楼头日辇真堪捧，直到上方第一梯。”

**五华寺** 在上林社五华山。修竹茂林，四山环拱。唐咸通间，僧无晦结庵与虎同居，号虎蹲岩。后坐逝，邑人创寺祀之。寺侧有端午泉。

**九仙二岩** 在九仙山；左为灵鹭，右为仙峰。唐开元丙辰，僧普惠、无比创灵鹭岩，柱础梁栋，皆以石为之。后无比化于山顶，普惠寂于岩中，因并祀焉。宋、元香火不治。明万历年，重新岩前立石坊。知县杨文正题曰“一方净土”。永春知县夏忠题



曰“胜迹维新”。仙峰岩兴废莫考。万历年重建，详见《古迹志》。

明举人李雲阶诗：“游子寻真兴未阑，相将步履入雲端。回峦蹲虎如曾伏，古木盘虬可耐寒。卓锡已惊泉脉涌，雨花又点客身单。扶锄瓮岭入千古，玄度重来自羽翰。”

岁贡王雍诗：“凭凌绝壁倚层空，怪洒珠花傲雪红。半壑龙池神物伏，千寻彼岸铁桥通。鸟文印石封苔古，鸿笔干霄望气东。却喜头陀茶供礼，潇潇两腋自生风。”

岁贡周鼎诗：“千岩竞秀似浮杯，选胜人从天外来。琪树含烟呈翠碧，玉莲喷水映池台。归僧月下双眉白，游客尊前两履颓。惆怅仙人不可御，浩歌一曲出雲隈。”

监生林竣诗：“劈石崔嵬般若台，千峰匝地没烟埃。晓天珠树联蜃起，午日香莲出水开。峭壁洞中摩宝像，万林道上谒如来。最怜丹鼎浮花座，石似江郎几片裁。”

国朝庠生赖元吉诗：“飞梁立刹几何年？灵鹫岩开别有天。洞口冰桃含露熟，池边雪藕带香妍。松苍每引海中鹤，僧老闲如地上仙。夜静虚堂钟几点，尘心敲破欲留禅。”

永安岩 在九仙山南，亦名苕菜岩。宋僧雲济涅槃时，囑其徒曰：“我大劫未尽，化后悬我骸于大椿杪，六十年后则永安于此。”至期椿杪毫光烛天，遂像其骨而祀之，易今名。旁有小涧，题曰“法水流香”。又有会仙室，勺泉泻出石壁间，清旷爽塏，纵目无际。

明左史颜廷渠诗：“永安有禅室，亦傍九仙山。竹与僧俱净，雲将客共闲。空中一鸟下，谷口万花斑。不尽香泉水，涓涓流出关。”

举人李雲阶诗：“室于深谷隐，人自九仙来。禅寂闻花雨，僧孤涅槃台。何时香苻绿，应共碧莲开；未得无生诀，宁论济世才！”

监生张士宾诗：“礼佛空中室，宜人方外山。高天浮沆瀣，曲涧漱潺湲。尊对茶蘼绿，盘行苻菜斑。因多微尚意，谷鸟语间关。”

庠生涂重光诗：“绀殿倚嵒峤，山花屡见招。池蔬曾供酒，涧竹若鸣箫。万象低雲近，千峰带雨遥。岩前有怪石，醉月几清宵！”

**通仙岩** 在九仙山麓，一名竹林庵。与永安岩皆僧无比艺圃处。国朝康熙间，里人赖宁达立乡厉坛祠于其左。

**狮子岩** 在汤泉里，以山形似故名。岩依大石厂为室，巍峨幽窈。宋淳熙己酉，僧妙慈跌逝于此。岩顶一洞深黑，相传有山魃出入。岩前石上仙人迹与九仙山相对。

明官坊赖诗：“丹崖耸峙蔚蓝中，四海人天望不穷。眼阔练光来匹马，山高岚色贯长虹。佛留宝盖千年日，客拥兰台万里风。盘石开襟霄汉近，攀跻端不羨崆峒。”

**大仙峰** 在尤中里山坪乡。高凌霄汉，雲烟缥缈，岩壑清幽，有小武夷之目。元末僧真宗、日宗、萧宗同寂于此。

明大学士张瑞图诗：“翘首苍冥咫尺踪，大千世界落飞霞。九霄丹露承仙掌，万壑晴雲盖碧纱。巉岩峰前开佛国，嵒岩山上散天葩。分明灵气通无际，漫说蓬瀛去路赊。”

**龙峰岩** 在新化里吉岭乡大尖山。昔有崔道居此，化后里人建岩祀之。岩前有池，多午时莲。峰顶有泉，冬夏不竭，生四脚鱼。

**岱德岩** 在吉岭乡雲盖山。岩前山形如菱，右十八峰，左十

八瀑。宋僧灵惠化于此。

金鸡岩 在新化里。宋僧普明择居于此化去。

虎贲岩 在新化里虎贲山。明崇祯间，僧惶衷建。

国朝进士李道泰诗：“谁削奇峰作虎蹲？雁山雾寨未须论。犹疑委宛探幽穴，却认异花藏去春。坐不施蒲频聚叶，径因就石每穿筠。数声磬发空林杪，茶罢僧床月照人。”

涌光岩 在虎贲山麓。

李道泰诗：“窃潭石罅更幽迢，屐齿不须叩仄桥。文鸟法音呈一部，紫樱步障展千条。多因寒地铺雪絮，似欲烘天动野烧。未许俱僮寻此景，犹言灯火是前宵。”

碧象岩 在观音崎之巅。明邑庠生陈至言、里民邱逢源、苏馥吾、颜锺台、孙凤栖、林则宇、吴丽孚，同舍田山建祀大士吴济川像。山产磁土，乡民挖取戕损，勒界禁之。其麓有仙迹石。

庠生陈凤鸣诗：“何年碧象灵岩栖？踏碎琼瑶尽作泥。烨烨宝光开佛土，晶晶白气压丹梯。天花散满山花烂，竹影参差雪影齐。欲觅仙踪归觉路，空余片石漫留题。”

蔡岩 在海上里锤山洞旁。石洞广丈，深倍之。距香林寺三里许，宋天圣间，僧道徽自雕木像置其中，后跌逝于此。下有清泉，自石窦泻出，境甚幽异。

河溪岩 在小尤中科山，刘姓墓域也。峻岩幽邃，临溪悬崖上，有巨石若倚若坠。清水和尚来此，建为岩。

董佛岩 在七台山顶。险峻迥隔人烟，昔有董公蜕化于此。

伏虎岩 亦名金鸡岩，在清泰里梨坑乡。宋时有道人贲姓者

骑虎至此。乡人神之，建岩以祀，真身尚存。

**大白岩** 在县西南界白岩山。宋嘉定间，僧圆通、证圣、顿悟同坐化于此。有虎为卫，因号“虎窟”。

**天马岩** 在天马山之阴。

**石壺洞** 在石牛山上。一石似牛头，上唇为棟，下唇为址，深广可二丈。宋绍兴间，张、萧、章三道人降魔于此。国初时劫火，洞顶倾半。下有岩宇，明崇祯庚辰建，国朝康熙甲子修。

李道泰诗：“远结三山侣，来开绝壑天。魔军容易退，木客更知禅。泉散千溪水，松同万石年。野僧无稻亩，相与种芝田。”“散发悬崖际，精灵长守坛。朝华吞海日，秋爽数林峦。雲柱龙三尺，僧寮石一盆。凿空入缥缈，直上已生翰。”

**金液洞** 在上林社。景幽泉冽。元至正间，道人吴济川、徐友山同化于此。

明□□知县王真诗：“金液洞天山万重，洞门无锁白雲封。龙光长现秋池剑，鹤梦偏惊晓殿钟。五夜丹霞明绝壁，四时苍雪落长松。鼙轮风马群仙至，会送幽人出翠峰。”

庠生李元定诗：“仙人化处白雲重，石磴萦纒碧藓封。海鹤近衔金洞篆，山猿惯听饭厨钟。霞边粲粲三花树，涧畔英英五岳松。疑有吹笙王子晋，天风驾上紫雲峰。”

国朝庠生徐光嗣诗：“登临霄汉回，道侣恍庐山。苍树人烟外，白雲古洞间。钟声敲佛国，液水渡禅关。丹鼎今犹在，浮生叹等闲。”

**紫雲洞** 在高洋乡罗城山麓。吴济川长子曰景阳者修真于此。一日谓其徒曰：“吾道成矣。”遂示寂。洞顶常有紫雲蒸

蔚，因名。

庠生谢祈出诗：“紫雲梵刹入雲端，俯仰崆峒眼界宽。岭峭斜穿门是石，峰回遥拱谷如盘。寺钟晓和书声响，佛火宵陪客话阑。洞古仙灵腾紫气，乾坤一望等弹丸。”

泰华洞 在梅中里淳湖乡泰华山巅。旧传石壶章道人将往金沙经此，见石下藏怪，乃以指书石镇之，深入寸许，有“佛、法、僧”三字可辨，余皆蝌蚪文。

庠生郑振纶诗：“仙篆昭然在石台，纵横蝌蚪印苍苔。道人访道今何处？洞口闲雲自去来。”

雲峰寺 在尤中里栋山屏之麓。

法林寺 在东西里上涌乡。

天王寺 在梅中里。祀宋香林寺僧道徽了他。

西华室 在县治西大旗山顶。

陈长周诗：“隐隐禅栖郭外山，松萝扳尽俗缘删。紫烟满地香浮篆，翠色生衣竹映关。厌逐风尘为客久，且将杖履觅僧闲。招邀更蹑峰头屐，吐纳乾坤一粟间。”

里人毛一夔诗：“草径横雲没，山溪过雨浑。僧孤恒闭户，客至自呼门。品水清留酌，傍松静对言。豆瓜皆手种，素食足邱园。”“积有西华兴，兹行亦快游。空山黄叶寺，野径白雲秋。钟过松皆赤，人闲鸟更幽。园僧忙接客，花下放锄头。”

崇宁室 在县治西北大龙山巅。

陈长周诗：“绿绕青围万壑低，上方钟磬古招提。晴峰客过衣犹湿，秋院僧闲佛共栖。飞帛半空盘石鼠，承尘十笏振莎鸡。狂来戏掷卢敖杖，手倚天门挽彩霓。”

“一径苍茫到绝巅，白云深处问金仙。参差城郭朝烟外，荡漾林峦夕照前。色界几人称白足？香台为我吐青莲。蒲团坐拥皈依久，但学天龙一指禅。”

西天室 在科荣山。

悬灯室 在李山社。祀真空和尚。门径清雅，左有巨石，矗立如柱，刻“擎天”字；右有石榻，可坐十数人。

庠生陈元斌诗：“砢砢石洞柱擎天，觅径攀萝步翠烟。俯睇千家春树里，一灯长向碧峰悬。”

山和室 在汤头乡。有烟云竹树之胜。

青雲室 在梅中里雲溪乡高峰上。

岁贡林凤神诗：“纵目雲溪锦绣铺，青雲有路未全诬。开山移石根偏细，伴月翻经影自孤。渺渺晨钟频唤梦，迢迢归雁乱呼奴。此生未了诗书债，白发巾中误腐儒。”

大仙室 在东西里大仙崎山顶。

济山庵 在琼山之麓。涧水灑其左，繚曲幽清。有雨花亭，明万历年建。

明举人郭维翰诗：“古刹幽偏称，新亭逼寺门。松篁连野色，花雨落天根。黄鸟催人至，青苔印屐痕。何时参小品？超脱已忘言。”

溪头庵 在梅上里桂阳乡。

东埔庵 在新化里洋坑岩下东埔尖。

香林院 在萧坑社黄柏村。高山盘谷，树林阴翳，多生芝兰，到处闻香。宋时有神僧来此，虎跪迎之。

湖山大士阁 在清泰里。前临湖水，右绕斗溪，双流交汇，水石清幽。

赖垓诗：“凭虚四望霭烟收，携手天风快壮游。高阁晴开千嶂晓，寒潭清逼一亭秋。佛光初放林霏满，客舫频移树影流。郑重主人能选胜，置身同似在沧洲。”

国朝庠生黄宗仁诗：“峻峭室刹耸雲边，一鉴澄清瞰两川。洲白溪间时宿鹭，松苍天半每藏烟。源头曾泛桃花饭，渡口犹行太乙船。不信湖山风景好，玉堂佳句尚依然。”

安土庙 在县南瑶市社。明永乐三年建，万历三十六年冬燬，三十八年重建。国朝康熙甲午重修。

纓溪宫 在县东瑶市社溪上。有老松二十八，盘郁苍古，泉石幽佳。宋永安岩僧雲济曾结庵于此。

监生李肅诗：“枫枝柏叶换山容，落尽寒崖晚后钟。最是开人颜色处，都归二十八株松。”“石门不卷夜明帘，水阁松阴尽覆檐。却讶日来非此地，稚川一幅景初拈。”

大卿宫 在县南高卿社。明知县俞思冲有记。见《艺文志》，

崇道宫 在县西高卿社。

道士宫 在东西里上涌乡。一名通济宫。

通兴宫 在梅中里葛坑乡。

按：泉南古称佛国，华刹淫祠，山僧野覩（xi），无处无之。宋志载：德化五乡，寺占五十一所⑥；

净居、天官、妙峰、三际、仪林、五华、中兴、隆安七院⑦在永丰里；神平、相安二院在新化里，清平、灵福、戴雲三院在云峰里，罗汉、程田、千福、普光四院在灵化里，大兴、大雲、皈明、翠峰、观音、塔头六院在归化里，洪圣、东林、长庆三院在惠民里，长兴、为山二院在安仁里，庆乐、龙兴、香岩、长兴、宝积五院在嵩平里，尊胜院在清泰里，乾

福院在善均里，雪峰、皈圣二院在小尤团，小三峰院在中团，兴龙、资化、小中峰、禅林、雪峰五院在黄认团，法林、卧龙二院在东团，地藏、建兴二院在西团，大三峰院在下涌，香林院在杨梅，上天王院在中团，大中峰院在下团，汤坑、法林、卧龙、宝藏四院在汤泉下。庙占九所：威惠庙、灵济庙在县西三十里，忠应庙在归化里，英显庙在半林铺，显应庙在嵩平里，困山庙、小尤庙在县西小尤团，孔太尉庙在嵩平里，乔将庙在新化里。入明以来，长民君子间渐毁之。

嘉靖九年，竹厓许公请于提学副使贲亨高公尽斥各里团寺庙，改为社学。毁拆宇基，听民垦种，充作学租，士民咸喜。邪正盛衰，于焉见矣。故《万历志》仅载十寺。程田、戴雲、仪林、相安、龙湖、狮子、五华、中兴、香林、雪峰。四庙。东岳、忠应、英显、小尤。按：东岳庙嘉靖九年亦改为阴阳医学惠民药局。今兹所牖，视昔几倍，而各乡神宫佛坛，无虑数百，固未暇缕叙也。特摭其著名于远近者，以俟后之反经而正焉。

夫趺化飞升，非所以为训。顾时俗所传，皆在唐、宋之世。毋亦以其荒远莫稽，而姑妄称之欤？不然，胡以近数百年来，概乎未之有闻也？若愚民倡为神佛生日之说，陈乐侑觞，每岁新春妆扮神像，称侯称公，沿途迎演，旗鼓喧哗，饮食侈靡，多者费百金，少亦不下数十金，此又诬神惑民之甚，所当亟加禁绝者也。

## 宅 墓附

五代唐



归德场长颜仁郁宅 在石杰乡。

马家墓 在新化里邱店村，载《地理全书》，俗呼“马王冢”，不知何许人。岭上有石广丈余，墓之主龙自岭而去，后人凿“龙岭”二字于石。

## 宋

转运判官苏钦宅 在县西龙津桥南。今废。

丞相墓 在新化里石山溪头山上。丞相曾公亮祖葬此，常来祭扫，宿路旁山庵，因名相安寺。寺今废。

苏十万墓 在清泰里之南，苏墓山之东。山以墓名。

## 明

训导曹缙墓 在瑶市社薛萝峰。缙，山西蒲县人，由贡士来任三月卒。与其子二柩不能归，庠士为葬于此，岁有泮池租以供祭扫。

## 国朝

千总王世爵墓 在南关外接官亭上员山。顺治十四年，世爵死寇难，葬此。乾隆十一年，知县鲁鼎梅修。

方谓大墓 在薛萝峰。大，古田人，训导方祚隆胞弟，随隆来任。康熙三十七年卒，葬此。历任训导以署西房屋两间系其所起盖，岁拨学租粟一百斤，供祭扫。

论曰：祠宇之载在祀典者，固与日月争光矣。乃颜长官、苏十万诸人，亦得庙食一方，与祠祀同垂不朽，良以其人能自立于天壤也。若螺坑一战，青草城南，遂得长有其墓，又志士仁人之明效大验矣。夫入庙生敬，过墓生哀，人心之所敬所哀，岂无谓也哉！

### 校 注

- ① 记：从文章内容看，当为县令鲁鼎梅作。
- ② 汀寇：指晏彪。见民国版《德化县志·武卫警》卷十一。
- ③ 见民国版《德化县志·艺文、碑文》卷十七。
- ④ 见民国版《德化县志·艺文、碑文》卷十七。
- ⑤ 开辟：据《中国历史纪年表》应为“后梁开平”之误。寺占五十一所：以实计当为“五十五所”。
- ⑦ 七院：以实计系“八院”之误。

（校注 李明志）

# 德化县志卷之九

## 礼 仪 志

安上全下，莫善于礼；以洽幽明，以昭轨物，仪斯著焉。邑处山陬，前乎此者，就简因陋，典制阙如。当明备之世，品节精详，礼之缘义起者，莫不秩秩乎若网在纲，有条不紊矣。志礼仪。

### 庆 贺

万寿圣节前期三日，知县率僚属斋沐，具朝服，迎龙亭，行三跪九叩礼。每日味爽，各官朝服，分东西坐班。本日各官朝服入，司班唱，序班乐作，赞礼生唱：“跪、叩首。”行三跪九叩礼。“兴、平身。”乐止。赞礼生引知县出班，诣香案前，祝圣复班，再行三跪九叩礼。如前坐班。后三日，各官俱朝服坐班。礼毕，于大门外跪送龙亭。

千秋令节前后各一日，各官朝服坐班，本日具朝服叩贺。仪同。

圣寿、元旦、冬至，俱先一日各官具朝服迎龙亭。本日祝圣，仪同上。

## 接 诏

诏书至，知县率僚属，具龙亭彩仗、鼓乐出南关外接官亭迎接。朝使下马，捧诏书奉龙亭中，南向。朝使立于亭东，各官具朝服，北向跪迎。鼓乐前导，朝使上马，同各官随亭后行，至县堂，奉龙亭于堂上。各官分东西序立，朝使东立，西向，赞礼生唱：“众官排班。”乐作，行三跪九叩礼。朝使捧诏授展读生，展读生跪受，诣开读案前宣读，众官皆跪。宣毕，展读生捧诏书授朝使，朝使捧奉龙亭中，各官行三跪九叩礼，礼毕退班。朝使捧诏书交知县颁行。

## 迎 春

预期塑造春牛并芒神于东郊外。立春前一日，知县率僚属俱穿蟒袍补服至春牛所。通赞导至拜位，唱：“就位，各官俱就拜位上香，鞠躬，拜、兴，拜、兴。初献爵，再献爵，三献爵；读祝文。”读毕，通赞又赞两拜，礼毕簪花各官俱簪花。上席酒三巡。属官先行，长官次之，春牛随后。迎至本县头门外，土牛南向，芒神西向。

本日清晨备牲醴、果品。各官具朝服，通赞导至拜位，唱：

“就位，鞠躬，拜、兴，拜、兴。初献爵，再献爵，三献爵，读祝文。”读毕，通赞又赞两拜，兴。导至土牛前，各官俱执彩仗，排立两旁；通赞赞：“长官击鼓。”凡三击，遂搥鼓。鼓手自搥，赞：“鞭春。”各官击牛者三。揖，平身。通赞导至芒神前，揖，平身。礼毕。

土牛胎骨用桑柘木身，高四尺按四时，长三尺六寸按三百六十日，头至尾长八尺按八节，尾长一尺二寸按十二月，鞭用柳枝，长二尺四寸按二十四气。土牛色以本年为法，头、角、耳用年天干，身用年地支，蹄、尾、肚用纳音。天干甲乙属木，色青，丙丁属火，色红；戊己属土，色黄；庚辛属金，色白；壬癸属水，色黑；地支亥子属水，色黑；寅卯属木，色青；巳午属火，色红；申酉属金，色白；辰戌丑未属土，色黄。纳音如甲子年立春，纳音属金，用白色。余仿此。笼头构索，以立春日日干为笼头色说见上。构用桑柘木索，孟日用麻谓寅申巳亥日，仲日用苧谓午卯酉日，季日用丝谓辰戌丑未日。造牛以冬至节后辰日子岁德方取水土。甲年东方甲位，乙年西方庚位，丙年南方丙位，丁年北方壬位，戊年东南方戊位，己年东方甲位，庚年西方庚位，辛年南方丙位，壬年北方壬位，癸年东南方戊位。

芒神服色，用立春日支辰受克为衣色，克衣辰为系腰色。如立春日子属水，衣取土克水，用黄色；系腰取木克土，用青色，余日仿此。头髻用立春日纳音为法。金日平梳两髻在耳前；木日平梳两髻在耳后；水日平梳两髻，右髻在耳后，左髻在耳前；火日平梳两髻，右髻在耳前，左髻在耳后；土日平梳两髻在顶直上。鼈耳用立春时为法。从卯至戌八时，鼈耳用手提，阳时左手提，阴时右手提；从亥至寅四时，鼈耳或揭或掩，寅

时揭从左边，亥时揭从右边；子丑二时全戴盖，寅、亥时为通气，故揭一边；子丑时为严凝，故全戴。鞋、裤、行缠以立春纳音为法。逢金木系行缠鞋裤；金行缠，左阙悬在腰左；木行缠，右阙系在腰右。水日俱全，火日俱无，土日著裤，无行缠鞋子。老少以立春年为法。寅申巳亥老，子午卯酉壮，辰戌丑未幼。身高三尺六寸，按一年三百六十日。

## 耕 藉

照雍正五年颁行

每年礼部颁历预择日期，本县合属前期，致斋二日。

祭品：帛一青色，羊一，豕一，镏一，簋二，簠二，筮四，豆四。

农具赤色，牛黑色，籽种箱青色。所盛籽种，照本县土宜祭日，知县率僚属，俱穿朝服赴先农坛。通赞生导诣盥洗所，盥手、净巾毕，通赞唱：“执事者各司其事。”主祭官就位就拜位，陪祭官各就位，瘞毛血迎神。通赞生导主祭官升坛就位就神前位，唱：“上香，又，三上香。”毕。通赞唱：“跪。”陪祭官皆跪，行三叩礼，兴，复位复拜位。安神，行三跪九叩礼，兴，进帛、进爵、行初献礼。通赞唱：“诣酒尊所。”主祭官诣酒尊所。通赞唱：“司尊者举幂酌酒。”诣先农神位前，就位，跪。通赞唱：“陪祭官皆跪，献帛、献爵，叩首，兴。”诣读祝位，跪读祝文。陪祝者取祝版跪读。祝曰：“维某年岁次某干支，某月某干支，朔越某日某干支，某官某名敢昭告于先农之神曰：惟神肇兴稼穡，粒我蒸民，颂思文之德，克配彼天；念率育之功，陈常时夏，兹

当东作，咸服先畴。洪惟九五之尊，岁举三推之典，恭膺守土，敢忘劳民？谨奉彝章，聿修祀事。惟望五风十雨，嘉祥恒沐于神庥，庶几九穗双岐，上瑞频书夫大有。尚飨！”读毕，三叩首，兴，复位。行亚献礼。通赞唱：“诣酒尊所。”主祭官诣酒尊所。通赞唱：“司尊者举幂酌酒。”诣先农神位前，就位，跪。通赞唱：“陪祭官皆跪，献爵，叩首，兴，复位。”行终献礼。仪同亚献。彻饌送神，行三跪九叩礼。兴。读祝者捧祝，司帛者捧帛，通赞生导诣燎所，焚祝，焚帛，复位。礼毕。

午时，行耕藉礼。知县秉耒，佐贰执青箱播种，耆老一人牵牛，农夫二人扶犁，九推九返，农夫终亩耕毕，知县率僚属暨耆老、农夫，望阙谢恩，行三跪九叩礼。

## 救 护 日 月

凡日月薄蚀，钦天监推算分秒及圆复时刻，行文到县。前期传集僧道，届期结彩于大堂及仪门，设香案于露台上，置金鼓于仪门内，两旁设乐人于露台下，设各官拜位于露台上下。阴阳生报“初亏”。各官俱穿素服。通赞唱：“排班。”班齐。唱：“跪。”乐作，各官行三跪九叩礼。毕，乐止。知县上香毕，通赞唱：“跪。”各官俱跪。知县击鼓三声，众鼓齐鸣；再上香，乐作，各官俱暂起立。阴阳生报“食甚。”食及所推分秒各官仍排班。乐作，行三跪九叩礼，如前仪。阴阳生报“复圆。”鼓声止，

各官俱朝服。通赞唱：“跪。”乐作，行三跪九叩礼。乐止，礼毕。

## 祈 祷 晴 雨

邑多山田，涝不为害，祈晴少举。

凡遇旱，即停征，息讼，禁屠沽。设龙王神坛于城隍庙，牒告城隍，官民朝夕拜祷。

## 乡 饮 酒 礼

顺治初，令京府及直省、府、州、县，每岁举行乡饮酒礼。设宾、僎、介、主酒席，于存留钱粮内支办。凡以申明朝廷之法，敦叙长幼之节，遂为定制云。


每岁正月十五日、十月初一日，于儒学行乡饮酒礼。前一日，执事者于儒学讲堂依图陈设坐次，司正率执事习礼。至日黎明，执事者宰牲具饌，主席及僚属、司正先诣学遣人速宾僎，以下比至。执事者先报曰：“宾至。”主席率僚属出迎于庠门之外以入。主居东，宾居西，三让三揖，而后升堂，东西相向立，赞两拜，宾坐。执事又报曰：“僎至。”主席又率僚属出迎，揖让升堂，拜、坐如前仪。宾、僎、介至，既就位，执事者引宾、僎、介东向，行三跪九叩礼。谢恩毕，执事者唱：“司正扬觶(zì)。”执事者引司正由西阶升，诣堂中，北向立。执事者唱：“宾僎以下皆立。”唱：“揖。”司正揖，宾、僎以下皆揖。执事者以觶酌酒授司正，司正举酒，曰：“恭惟朝廷，率由旧章，敦崇礼教，



举行乡饮，非为饮食，凡我长幼，各相劝勉；为臣尽忠，为子尽孝；长幼有序，兄友弟恭；内睦宗族，外和乡里，无或废坠，以忝所生。”读毕，执事者唱：“司正饮酒。”饮毕，以觶授执事。执事者唱：“揖。”司正揖，宾、僎以下皆揖。司正复位，宾、僎以下皆坐。唱：“读律令。”执事者举律令案于堂之中，引礼引读律令者诣案前，北向立，唱：“宾、僎以下皆立，行揖礼如前。”读毕复位。执事者唱：“供饌案。”执事者举饌案至宾前，次僎、次介、次主，三宾以下各以次举讫，执事者唱：“献。”宾主起席，北面立，执事者斟酒以授主。主受爵，诣宾前置于席，稍退，赞两拜，宾答拜。讫，执事者又斟酒以授主。主受爵，诣僎前置于席，交拜如前仪毕，主退复位。执事者唱：“宾酬酒。”宾起，僎从之，执事者斟酒授宾。宾受爵，诣主前置于席，稍退，赞两拜，宾、僎、主交拜讫，各就位坐，执事者分左右立，介、三宾、众宾以下以次斟酒于席讫，执事者唱：“饮酒。”或三行，或五行。供汤又唱：“斟酒、饮酒、供汤。”三品毕，执事者唱：“彻饌。”候彻饮案讫，唱：“宾、僎以下皆行礼。”僎、主、僚属居东，宾、介、三宾、众宾居西，赞两拜讫，唱：“送宾以次下堂，分东西行。”仍三揖，出庠门而退。

主席知县位于东南，大宾以致仕官为之，位于西北，僎、宾择乡里年高有德之人，位于东北，介以次、长位于西南，三宾以宾之次者为之。除宾、僎外，众宾序齿列坐，其僚属则序爵。司正以教职为之，主扬觶，以罚喧哗失礼者。赞礼以老成生员为之。

### 乡饮酒方位图



### 乡约讲读

圣谕 每月朔望，知县传集绅、衿、耆、庶于公所，奉圣谕牌行三跪九叩礼毕，分班序立：现任官居东，乡绅居西，诸生、耆老列于两旁，兵、民立于庭下。设讲案于庭中，木铎老人振铎，高宣圣谕十六条：

- |           |           |
|-----------|-----------|
| 一敦孝弟以重人伦； | 一笃宗族以昭雍睦； |
| 一和乡党以息争讼； | 一重农桑以足衣食； |
| 一尚节俭以惜财用； | 一隆学校以端士习； |
| 一黜异端以崇正学； | 一讲法律以儆愚顽； |

- |           |           |
|-----------|-----------|
| 一明礼让以厚风俗； | 一务本业以定民志； |
| 一训子弟以禁非为； | 一息诬告以全良善； |
| 一戒窝逃以免株连； | 一完钱粮以省催科； |
| 一联保甲以弭盗贼； | 一解仇忿以重身命。 |

宣毕，鸣讲鼓，约讲立讲案前，高声逐条讲解，兵民肃恭拱听。讲毕，分班团揖而退。其各里社县官不能遍到，则社中绅衿董之。


## 祭 祀

### 社稷坛

春秋二祭，俱用仲月上戊日。祭前三日斋戒。将祭之前一日省牲，治祭物，洁笾豆，扫除坛上下及设幕次中门外。是夕，献官以下就幕次宿。本日献官以下俱夙兴。执事者陈设其坛，坐南向北，设社位于稷之东，设稷位于社之西。每位羊一，用匣盛贮未启盖，居左，在笾之北。豕一，用匣盛贮未启盖，居右，在豆之北。笾四，盛枣、栗、形盐、菹鱼。居左，在羊之南。豆四，盛韭菹、菁菹，醯醢、鹿醢，居右，在豕之南。簋二，盛黍、稷，居笾之左；簋二，盛稻、粱，居豆之右；镛一，盛和羹，居中，在笾豆之南。帛一，黑色，长一丈八尺，用筐装贮米上。别设一小案，阁祝版、香炉，居坛正中。各官俱朝服，执事者捧祝版至幕次金名，金毕，捧置案上。执事者取毛血盘，置神位前牲案下，实酒于尊，加幂，在坛下东北。置水于盆，加帨，在坛下西北。焚香，燃烛，明炬。通赞唱：“执

事者各就位，陪祭官各就位，献官就位。”引赞引献官就拜位。通赞唱：“瘞毛血。”执事者以毛血瘞于坎，在西北隅。启牲匣盖。通赞唱：“迎神。跪，叩首、叩首、叩首，兴，平身。”各官俱一跪三叩，兴，平身。唱：“奠帛，行初献礼。”司帛者捧帛，司爵者捧爵，各立以俟。引赞赞：“诣盥洗所。”献官诣盥洗所。“执事酌水进巾。”献官盥手拭巾。赞：“诣酒尊所。”献官诣酒尊所。“司尊者举幂酌酒。”注酒于爵。赞：“诣社神位前。”献官升，自左阶至神位前。赞：“奠帛。”捧帛者自右进于献官，献官受而举之，仍自左授于执事者，奠于神位前。赞：“献爵。”仪同奠帛。赞：“俯伏，兴，平身。”献官俯伏，兴，平身。赞：“诣稷神位前。”仪同前。赞：“诣读祝位。”献官诣读祝位。赞：“跪。”献官跪。赞：“众官皆跪。”赞：“读祝。”读祝者取祝，跪读于献官之左。祝曰：“维某年岁次某干支，<sup>二</sup>八月某干支，朔越某日某干支，某官某名敢昭告于本县<sup>社稷</sup>之神曰：惟神奠安九土，粒食万邦，分五色以表封圻，育三农而蕃稼穡。恭承守土，肃展明禋，时届仲<sup>春秋</sup>，敬修祀典，庶丸丸松柏，巩磐石于无疆；翼翼黍苗，佐神仓于不匮，尚飨！”读毕，通赞唱：“俯伏，兴，平身。”献官以下俱平身。唱：“复位。”引赞引献官降，自右阶复原位。通赞唱：“行亚献礼。”仪同初献，但不奠帛，不读祝。唱：“行终献礼。”仪同亚献。通赞唱：“饮福受胙。”执事者设饮福位，在坛中稍北。执事者先于社位前割取羊左脚，置于盘，及于酒尊所，酌酒于爵，同立于饮福位之右以俟。引赞引献官诣饮福位，赞：“跪。”献官跪。赞：“饮福酒。”一人自右跪，进爵于献官，献官饮毕，一人自左受虚

爵以退。赞：“受胙。”一人自右跪，进胙于献官，献官受讫，一人自左跪接，捧由中门以退。赞：“俯伏，兴，平身。”献官俯伏，兴，平身。通赞唱：“复位，”献官降，自右阶复位。唱：“跪，叩首、叩首、叩首，兴，平身。”献官以下俱一跪三叩，兴，平身。通赞唱：“彻饌。”执事者各诣神位前，稍移动笾豆。通赞唱：“送神。”唱：“跪，叩首、叩首、叩首，兴，平身。”献官以下俱一跪三叩，兴，平身。通赞唱“读祝者捧祝，进帛者捧帛。各诣瘞所。”献官陪祭官离位，分东西班立，俟捧祝帛者由中道而过。通赞唱：“望瘞。”引赞赞：“诣望瘞位。”引献官至望瘞位。执事者以帛焚于坎中，焚毕以土实坎。通赞唱：“礼毕。”



山川坛 风雲雷雨。城隍附。

春秋二祭，俱于仲月上旬，择日行礼。郡、县多用上巳日。祭

前三日斋戒，前一日省牲治祭物，俱如社稷仪。其坛坐北向南。执事者扫除坛上下，设各官幕次于坛中门外，是夕各官宿幕次。设风雲雷雨位于坛正中，设山川位居左，城隍位居右。祭之日，献官以下夙兴。执事者设风雲雷雨位，帛四；山川位，帛二；城隍位，帛一。帛七段俱白色，丈尺与社稷同。用筐装盛未上。每位各羊一、豕一、镗一、筴四、豆四、簠二、簋二，陈设俱与社稷同。但品物在某品之南者，当改作在某品之北。各官俱朝服，金祝版。执事者实酒于尊，加幂，置水于盥施帨，在坛下东南。焚香，燃烛，明炬。通赞唱：“执事者各就位，陪祭官各就位，献官就位。”就位如仪。执事者先以毛血瘞于坎。通赞唱：“迎神。跪，叩首、叩首、叩首，兴，平身。”献官以下俱一跪三叩，兴，平身。如仪。引赞引献官诣盥洗所，盥手帨巾如仪。次诣酒尊所，执爵捧帛如仪。次诣风雲雷雨神位前，先奠帛，次奠爵。次诣山川神位前，次诣城隍神位前，俱奠献如仪。次诣读祝位。在风雲雷雨神位前，祝曰：年月具官如式。惟神赞襄天泽，福庇苍黎。佐灵化以流形，生成永赖；乘神机而鼓荡，温肃攸宜。磅礴高深，长保安贞之吉；凭依巩固，实资捍御之功。幸民俗之殷盈，仰神明之庇护。恭修岁祀，正值良辰，敬洁豆筴，祇陈牲币，尚飨！”读毕复位。亚献、终献同前。但不唱奠帛、读祝。次饮福受胙；如社稷仪。其胙取风雲雷雨神位前，羊一脚。次彻饌；次送神；次望燎。俱如社稷仪，但改望瘞为望燎。

					东				
					枣盐黍稻韭菁	粟菀稷梁醢鹿	鱼	羊	
							醢醢	豕	
	本县山川之神	帛二	爵爵爵	葵					陪祭位
					枣盐黍稻韭菁	粟菀稷梁醢鹿	鱼	羊	
北	风雲雷雨之神	帛四	爵爵爵	葵			醢醢	豕	祝 献官位 南
					枣盐黍稻韭菁	粟菀稷梁醢鹿	鱼	羊	
							醢醢	豕	陪祭位
	本县城隍之神	帛二	爵爵爵	葵					
					枣盐黍稻韭菁	粟菀稷梁醢鹿	鱼	羊	
							醢醢	豕	
					西				

常雩(yú) 乾隆十一年新颁

孟夏择日行常雩礼。知县率僚属，具朝服赴先农坛，致祭社稷、先农、山川、风雲雷雨之神，用羊一、豕一、各帛一白色，翎一、簠二、簋二、笱四、豆四，行三跪九叩礼。三献俱如祭社稷山川仪。祝曰：“年月具官如式。恭膺诏命，抚育群黎，仰体彤廷保赤之诚，勤劳劝稼，俯惟葑屋资生之本，力穡服田。令甲爰颁，肃举析年①之典，惟寅将事，用申守土之忱。黍稷惟馨，尚

冀明昭之受賜，來牟率育，庶俾丰裕于盖藏。尚飨！”

## 文庙

春秋二祭，月用仲，取时之正，日用上丁，取文明之象。正献官知县，分献官，殿上、两庑俱学官。执事人数：监宰，凡牛、羊、豕为正牲，鹿、兔为脯醢。宰杀之时，务使洁净，其毛血先存少许，以告于神，其余及肠胃皆以净桶盛之。置诸庖房，以俟埋瘞。监洗，凡锅、釜、罍、爵、筮、豆之属，与夫一应器皿，俱监临洗涤洁净。监造膳羞，为饼糗及制造脯醢之属。收发祭器，凡祭器一发一收，皆检视明白，不可遗漏。提调幕次，通赞，引赞，司罍洗，香烛，司爵，司帛，读祝，饮福受胙。执事捧酒一，捧胙一，胙肉先令宰夫割取。

祭前三日，献官、陪祭官及执事者皆沐浴、更衣、散斋；二日，各宿别室致斋；一日，同宿斋所，散斋，仍理庶务，惟不饮酒，不如葷谓葱韭葫薤蒜，不吊丧，不问疾，不听乐，不行刑，不与秽恶事；致斋，惟理祭事。

祭前一日，执事者设香案于牲房外，献官常服。赞者唱：“省牲所。”唱：“省牲。”牛、羊、豕、鹿、兔省之，谓看牲数有无齐足，体有无肥腠（tú），毛色有无纯正。省毕，唱：“省牲毕。”乃退。凡宰牲必取血以告杀，取毛以告纯，以盆盛毛、血少许，入置神位下。

祭器：牲匣以木为之，所以盛牲者。底、盖，朱髹，各高六寸，长三尺三寸，广二尺二寸，两旁钉铜环四，两端二。登，范金为之，所以荐太羹者。鬲，范金为之，所以荐和羹者。筮，以竹为之，所以荐枣、栗、



菱、芡、榛、脯、盐、鱼、饼糗者。豆，以木为之，所以荐菹醢、脾、析豚胸者。簠，范金为之，所以盛黍者。簋，范金为之，所以盛稷者。篚，编竹为之，朱髹，所以盛帛者。爵，范金及磁为之，所以受酒者。尊，勺，罍，尊，所以盛酒者；勺，所以酌酒者；罍，所以罍酒者。盥洗尊、盆、勺、帨，尊，用磁；盆，铜、锡随用。案，祝案一，高一尺二寸，广二尺三寸，长三尺，朱髹，置正殿中，以阁祝版。尊案一，高二尺七寸，广一尺五寸，长五尺。案面刺孔三，下盛以木版，朱髹。置丹墀，以阁酒尊。爵帛案一尺四寸，与酒尊同置丹墀以阁爵帛。香案；香炉，香合，牲盘，祝版，以梓楸木或柏木为之，高八寸，广一尺二寸，别作一架阁之，用白纸书文贴版上。祭毕揭焚之，藏版与架，再用。烛龙。即满堂红，俱用铜铁线结电网，不用糊纸及纱绢。其底裹以铁藁，皆防焚烛之虞。

祭物：太羹，《周礼》注：“煮肉汁不和。”和羹，《周礼》注：“肉汁加以五味。”黍，结穗如稻，散垂而不毛。高而似芦者非。稷，《礼》谓：“明粢，乃粢之不糯者。”稻，今水田所种粳米。粱，似粟而大，有青、黄、白三种。以上四品，俱拣择圆好，滚汤泡沸成饭。形盐，《周礼》：“盐人掌形盐、散盐。”注谓：“形盐，刻为虎形之类。”鼈鱼，《周礼》：“鮓(yú)人为鼈(xiān)、鼈。注谓：“鼈，生鱼；鼈，乾鱼。”今制，用鲜鱼薄腌乾之，临用温水洗，酒浸片时。枣，栗，榛，俱陆果。菱，芡，俱水果。菱，即今菱角；芡，即今鸡头。以上水陆诸果，皆拣洁净圆好者。韭菹，《周礼》七菹，谓“腌菜为之”。菹，今制裁去本末，取中三寸淡用。醢醢，醢，肉酱也，醢醢之多汁者。今制皆细切猪脊肉，拌油、盐、葱椒、苜蓿、茴香为之。菁菹，菁，蔓菁、菜头，似萝卜②色微青。今制用汤淪过，作长段，淡用。鹿脯，《周礼》

“腊人掌乾肉脯。”即肉之乾者。今制切鹿肉作块，酒腌炙乾用之。鹿醢切鹿肉作小块，用油、盐、葱、椒、茷萝、茴香，拌匀为醢。兔醢，制法同上。芹苳，芹，水菜也。如治菁苳法。笋，乾笋。今制法：煮熟拣净，切作长段用。鱼醢，如造鹿醢法。白饼，用小麦面造。黑饼，用荞麦面造。以上俱用砂糖为馅，印作圆饼子。糗饼，用粳米捣粉，梔子水浸之，蒸熟，印作饼子。粉糝，用糯米捣粉蒸熟，杵成糝为大方块，待冷切作小块用。飧食，用糯米饭，以和羊膏及蜜同熬。糝食，用白粳米饭，细切牛、羊、豕肉同熬。帛，官制，每段各长一丈八尺，旁织“礼神制帛”四字，礼为量帛，请量度其长短为之制也。

陈设 文庙正殿：制帛一端，白色，白磁爵三，牛一，羊一，豕一，登一，刚二，簠二，簋二，筮十，豆十，酒尊一，香烛。

四配：每位制帛一端，白色，白磁爵三，羊一，豕一，刚一，簠二，簋二，筮八，豆八，酒尊，香烛。

东哲：五案。又升配有子一案。制帛一端，白色，白磁爵各一，豕一，刚各一，簠各一，簋各一，筮各四，豆各四，豕首一，香烛。

西哲：与东哲同，五案。

东庑：制帛一端白色，铜爵各一，豕三，每案簠一，簋一，筮四，豆四，香烛。

西庑：与东庑同。

崇圣王祠：五案，制帛五端白色，白磁爵各三，羊各一，豕各一，刚各一，簠各二，簋各二，筮各八，豆各八，酒尊各一。香烛。四配：每位一案。制帛二端，白色，豕首一，铜爵各三，簠

一，簋一，笾四，豆四，豕肉一方，香烛。两庑：制帛二端，白色，铜爵各三，簋一，簋一，笾四，豆四，豕肉一方，香烛。

设酒尊所、盥洗所于丹墀之东南，尊实酒，施幂；盥置水，施帨。各有司之者。设埋瘞所于庙之西北。丹墀东西及露台上各设炬，两庑长廊各设灯。

凡祭文庙，必先崇圣祠。夜四鼓，与祭毕集祠中，鼓一通，陈设备具，各官具蟒袍补服。鼓再通，庭燎毕举。鼓三通，引赞各引献官至。通赞唱：“执事者各司其事。”唱：“分献官就位。”唱：“正献官就位。”唱：“瘞毛血。”执事捧毛血出，正祀由中门，配祀由边门。通赞唱：“迎神。”引赞赞：“跪，叩首，献官行二跪六叩礼，兴，平身。”通赞唱：“捧帛。”捧帛者正祀由中门入，配祀由边门入，诣各神位之左。唱：“奠帛，行初献礼。”引赞赞：“诣盥洗所。”献官盥手毕。唱：“诣酒尊所，司尊者举幂酌酒。”执事者注酒于爵。捧爵者在献官前行，正祀由中门入，配祀由边门入，诣各神位前。

引赞导献官进殿左门，赞：“跪，献官行一跪一叩礼，兴，平身。”唱：“奠帛。”献官接帛，拱举，立。献毕，执事跪接帛，进于神前案上。司爵者进爵于献官。引赞赞：“献爵。”献官接爵，拱举，立。献毕，执事跪接爵，进于神前案上。引赞赞：“跪，献官行一跪一叩礼，兴，平身。”

引赞赞：“诣裕圣王神位前。”赞：“跪。”如前仪。赞：“诣治(yì)圣王神位前。”赞：“跪。”如前仪。赞：“诣昌圣王神位前。”赞：“跪。”如前仪。赞：“诣启圣王神位前。”赞：“跪。”如前

仪。赞：“诣读祝位。”献官至香案前。唱“跪。”通赞唱：“众官皆跪。”唱“读祝文。”读祝者取祝版跪读。祝曰：“维某年岁次某干支<sub>八</sub>月干支，朔越某日某干支，某官某名敢昭告于肇圣王、裕圣王、诒圣王、昌圣王、启圣王孔氏之神曰：惟王奕叶鍾祥，光开圣绪，盛德之后，积久弥昌。凡声教所覃敷，率循源而溯本，宜肃明禋之典，用申守土之忧。兹屈伸<sub>春秋</sub>，聿修祀事，以先贤颜氏、先贤曾氏、先贤孔氏、先贤孟孙氏配，尚飨。”读毕，捧祝版跪安案上帛盒内。通赞唱：“叩首，献官行三叩礼，兴，平身。”引赞赞：“诣东配先贤颜氏神位前。”赞：“跪。”赞：“奠帛。”赞：“献爵，叩，兴，平身。”如仪。赞：“诣西配先贤曾氏神位前。”赞：“跪。”如仪。赞：“诣东配先贤孔氏神位前。”赞：“跪。”如仪。赞：“诣西配先贤孟孙氏神位前。”赞：“跪。”如仪。赞：“复位。”引献官从西角门出，至原位朝上立。通赞唱：“行分献礼。”引赞引分献官至盥洗所，盥洗毕，赞：“诣先儒周氏神位前。”赞：“跪。”赞：“奠帛，献爵，叩，兴，平身。”如仪。赞：“诣先儒张氏神位前。”赞：“跪。”如仪。赞：“诣先儒程氏神位前。”赞：“跪。”如仪。赞：“诣先儒蔡氏神位前。”赞：“跪。”如仪。赞：“复位。”引分献官从西角门出，至原位朝上立。通赞唱：“行亚献礼。”引赞引献官从东角门入不用诣盥洗所。赞：“诣酒尊所，司尊者举爵酌酒。”先诣肇圣王，次裕圣王，次诒圣王，次昌圣王，次启圣王，次配位。仪同初献，但不奠帛、不读祝。复位。通赞唱：“行终献礼。”仪同亚献。通赞

唱：“饮福受胙。”引赞赞：“诣饮福受胙位。”位在读祝所。进福酒者捧酌，进胙者捧盘，立于读祝案之东；又二执事立于案之西。引赞赞：“跪，饮福酒。”东执事捧福酒，跪进于献官；西执事跪接爵，置于案上。引赞赞：“受胙。”东执事取羊肩置盘上，跪进于献官，献官受胙讫；西执事跪接，由中门捧出。引赞赞：“叩首，兴，平身，复位。”通赞唱：“跪，叩首，献官行二跪六叩礼。”众官皆同。“兴，平身。”通赞唱：“彻饌。”执事者各于神案前，品物略移动。通赞唱：“送神。”引赞赞：“跪，叩首，献官行二跪六叩礼，兴，平身。”通赞唱：“读祝者捧祝，司帛者捧帛，诣瘞所。”执事者捧帛、捧祝。正祀由中门出，配祀由边门出。唱：“诣瘞位。”引赞引献官各诣瘞位，赞：“望瘞，”赞：“焚祝帛。”引赞赞：“复位。”礼毕。

文庙中，鼓初严，殿上两庑诸执事者，各燃烛、焚香；丹墀及露台上，各明炬。各官具朝服。鼓再严，各执事者毕集。鼓三严，执事者荐羹及启牲匣盖，以汤洗牲体，使气上升。各引赞引各献官至戟门下，北面立。通赞唱：“执事者各司其事。”司盥洗者各执盥洗，司瘞毛血者俟瘞毛血，凡有司者各司其事。唱：“陪祭官各就位。各照官衔品级就拜位。康熙四十九年，诏天下武员把总以上，皆得入庙陪祭。分献官各就位，正献官就位，”随引赞就拜位。唱：“瘞毛血。”执事者捧毛血，正祀由中门，四配、东西哲由左右门出两庑，随之瘞于坎。唱：“迎神，跪，叩首。”正献、分献、陪祭俱行三跪九叩礼。“兴，平身。”通赞唱：“捧帛。”执事者各捧帛，正祀由中门进，配哲由左门进，两庑分东西进，诣各神位之左，鞠躬旁立。唱：“行初献

礼。”引赞二人导正献官行。赞：“诣盥洗所。”献官盥手毕。赞：“诣酒尊所，司尊者举幂酌酒。”执事者注酒于爵，捧爵者在献官前行。正祀由中门入，余由左门入，诣各神位前，鞠躬旁立。唱：“行初献礼。”引赞二人导正献官行。赞：“诣盥洗所。”献官盥手毕。赞：“诣酒尊所。司尊者举幂酌酒。”执事者注酒于爵。捧祝者在献官前行，正祀由中门入，余由左门入，诣各神位前，鞠躬旁立。

引赞赞：“诣至圣先师孔子神位前。”献官随引赞由左偏门入，至神位前朝上立。赞：“跪。”赞：“奠帛。”捧帛者西跪进帛，献官拱举，执事者接置神案上。赞：“献爵。”司爵者西跪进爵，献官拱举，执事者接置神案上。赞：“叩首，兴，平身。”赞：“诣读祝位。”献官至香案前。唱：“跪。”通赞唱：“众官皆跪。唱：“读祝文。”读祝者取祝版跪读。祝曰：“维某年岁次某干支，<sup>一</sup>/<sub>八</sub>月某干支，朔越某日某干支，正献官某，分献官某，敢昭告于至圣先师孔子之神曰：惟师德隆千圣，道冠百王，揭日月以常行，自生民所未有，属文教昌明之会，正礼和乐节之时。辟雍钟鼓，咸格荐乎馨香；泮水胶庠，益致严于笾豆。今兹仲<sup>春</sup>秋，祇率彝章，肃展微忱，聿将祀典。以复圣颜子、宗圣曾子、述圣子思子、亚圣孟子配。尚飨！”读毕，读祝者将祝版复置神案上。通赞唱：“叩首。献官行三叩礼，兴，平身。”

引赞赞：“诣复圣颜子神位前。”赞：“跪。”赞：“奠帛。”赞：“献爵。”俱如正祀仪。唱：“叩首，兴，平身。”

赞：“诣宗圣曾子神位前。”赞：“跪。”如前仪。赞：“诣述圣子思子神位前。”赞：“跪。”如前仪。通赞唱：“行分献

礼。”另引赞各引分献官，诣十哲及两庑，俱如正礼仪，今东哲多朱子一案，礼亦如之。

引赞赞：“诣亚圣孟子神位前。”赞：“跪。”如前仪。赞：“复位。”引赞引献官及分献官由西角门出，复于原位朝上立。通赞唱：“行亚献礼。”俱如前仪。惟不盥洗，不奠帛，不读祝文。献毕，唱：“复位。”通赞唱：“行终献礼。”如亚献仪。献毕，唱：“复位。”通赞唱：“饮福，受胙。”引赞赞：“跪，饮福酒。”东执事进爵，献官饮讫；西执事接置神案上。赞：“受胙。”东执事进胙，献官受讫，西执事接胙，由中门出。赞：“叩首，兴，平身，复位。”通赞唱：“跪，叩首，正献、分献、陪祭各官俱行三跪九叩礼，兴，平身。”通赞唱：“彻饌。”彻讫，将神案上品物略移动。通赞唱：“送神。”引赞赞：“跪，叩首。正献、分献、陪祭各官俱行三跪九叩礼，兴，平身。”通赞唱：“读祝者捧祝，司帛者捧帛，各诣瘞所。”正祀由中门，左右配哲由左右门，两庑各随班，俱诣瘞所。唱：“诣望瘞位。”各献官诣瘞位。唱：“望瘞。”唱：“焚祝，帛。”唱：“复位。”通赞、引赞同唱：“礼毕。”

### 正殿陈设之图

文庙正殿	帛	爵爵爵	葵葵葵	和太和	白饼 菱榛 枣形 黍稻	盐 韭 菁芹 笋脾	黑艾 栗鹿 菟稷 梁醢 鹿兔 豚	脯鱼 醢醢 醢醢 醢醢	羊 牛 豕
------	---	-----	-----	-----	----------------------	--------------------	---------------------------------	----------------------	-------------

### 四配陈设之图

四配 每位	帛	爵爵爵	葵	菱榛 枣形 黍稻	盐 韭 菁芹 笋	艾栗 鹿菟 稷梁 醢醢 鹿兔 豚	脯鱼 醢醢 醢醢 醢醢	羊 豕
-------	---	-----	---	----------------	-------------------	---------------------------------	----------------------	--------



## 东西哲陈设之图

					枣	栗		
					盐	鹿脯		
东	哲	五案又升配	每案	爵	黍	豕首	豕	
		有子一案案			稷			
					菁菹	鹿醢		
		西哲同			芹菹	兔醢		

## 两虎陈设之图

					枣	栗		
					盐	鹿脯		
东	虎	三案	每案	帛	黍		豕	
					稷			
					菁菹	鹿醢		
					芹菹	兔醢		
		西虎同						

文庙祭毕，乃祭朱文公祠。用帛一、羊一、豕一、簋一、簋一、笾四、豆四。祝曰：年月具官如式“惟公道宗邹鲁，学继濂洛，注述六经，启发万世。今兹仲<sup>春秋</sup>，谨以牲帛醴齐、粢盛庶品用伸虔登。尚飨！”

次祭名宦祠。次祭乡贤祠。次祭忠义孝弟祠。祝曰：年月具官如式惟灵禀赋贞纯，躬行笃实。忠诚奋发，贯金石而不渝；义问宣昭，表乡闾而共式。祇事懋彝伦之大，性挚莪蒿，克恭念天显

之亲，情殷棣萼。模楷咸推夫懿德，纶恩特阐其幽光。祠宇维隆，岁时式祀，用陈尊簋，来格几筵。尚飨！”

次祭节孝祠。祝曰：年月具官如式“惟灵纯心皎洁，令德柔嘉。矢志完贞，全奎中之亮节；竭诚致敬，彰闾内之芳型。茹冰槩而弥坚，清操自砺；奉盘匱而匪懈，笃孝传徽。丝纶特沛乎殊恩，祠宇昭垂于令典，祇循岁祀，式荐尊醪。尚飨！”

各祠盥瘞、奠献，俱如仪，但只穿补服。迎神、送神，只一跪三叩。

### 附：释菜礼

每月朔旦，行释菜礼。用兔为醢，醢前一日为之。菁为菹；礼乐图谓用菁菹八两。果用枣、栗礼乐图谓各重四斤。香烛随用。

先师：一案，爵三，左右二爵先注酒，中爵行礼时献上。品物四：中二品，左兔醢，右菁菹；东西二品，左栗右枣。四配：东西各一案，陈设与先师同。十一哲：东西各一案，爵三。仪注同上。品物三：中菁菹，左栗右枣。两庑东西各一案。陈设与十一哲同。

通赞唱“排班”。献官以下皆序立丹墀内。班齐唱“闾户”。礼生开殿门。通赞唱：“跪，叩首、叩首、叩首。”献官以下皆跪，叩首；二跪、三跪同。“兴，平身。”皆兴，平身。引赞诣献官前，赞：“诣盥洗所。”献官随引赞至盥洗所，盥手脱巾如仪。赞：“诣酒尊所。”献官随引赞至酒尊所，司尊者举幕酌酒以俟。赞：“诣至圣孔先师神位前。”捧爵者三，各先行：奉先师者由中门入，奉四配者由左偏门入，献官随引赞亦由左偏门入。至神位前向上立。赞：“跪。”赞：

“献爵。”捧爵者由左跪授献官一爵，献官受少举之，转授捧爵者，置神位前。赞：“俯伏，兴，平身。”献官俯伏，兴，平身。赞：“诣复圣颜子神位前，”赞：“跪，”赞：“献爵。”仪同前。唱：“诣宗圣曾子神位前。”仪同前。赞：“诣述圣子思子神位前。”仪同前。赞：“诣亚圣孟子神位前。”仪同前。通赞唱：“行分献礼。”献官行礼，将至亚圣孟子前，通赞乃唱行分献礼。引赞各诣东西哲及两庑分献官前。赞：“诣盥洗所、酒尊所、东哲、西哲、东庑、西庑神位前献爵。”如上仪。赞：“复位。”献官以下各随引赞退原位。通赞唱：“礼毕。”

### 附：大成乐

乐器。金部：大钟，编钟，铸钟、歌钟。石部：特磬、歌磬、编磬。丝部：琴，瑟。竹部：凤箫，洞箫，篪，龙笛，双管。匏部：笙。土部：埙。革部：鼓鼓，悬鼓，楹鼓，足鼓，鞀鼓，搏拊，田鼓，相鼓。木部：祝，敔，本铎。

舞器：旌节，籥，翟。

迎神，奏咸平之曲有乐无舞：“大哉至圣，峻德宏功，敷文衍化，百王是崇。典则有常，昭兹辟雍，有虔簠簋，有严鼓钟。”

初献，奏宁平之曲有乐有舞：“觉我生民，陶铸前圣，巍巍泰山，实予景行。礼备乐和，豆笾惟静，既述六经，爰斟三正。”

亚献，奏安平之曲有乐有舞：“至哉圣师，天授明德，木铎万世，式是群辟。清酒维醕，言观秉翟，太和常流，英才斯植。”

终献，奏景平之曲有乐有舞：“猗欤素王，示予物轨，瞻之

在前，神其宁止。酌彼金罍，惟清且旨，登献既终，弗遐有喜。”

彻饌，奏咸平之曲乐作舞止：“璧水渊渊，崇牙岌岌，既歆宣圣，亦仪十哲。声金振玉，告兹将彻，諝假有成，羹墙靡愒。”

送神，奏咸平之曲乐作舞止：“煌煌学宫，四方来宗，甄陶胄子，暨予微躬。思皇多士，肤奏厥功，佐予永清，三五是隆。”

望蹇乐，曲同送神。有乐无舞。

## 关帝庙

岁凡三祭。五月十三日，前殿照常用帛一、牛一、羊一、豕一、果品五盘；后殿不用牛，余照前殿。其春秋二祭：前殿帛一、牛一、羊一、豕一、筩十、豆十；后殿帛各一，羊各一，豕各一，筩各八，豆各八。

前殿祭日，引赞引承祭官，朝服进左旁门，赞：“诣盥洗所。”盥手帨巾毕，通赞唱：“执事者各司其事。”引赞赞：“就位。”引承祭官就位。通赞唱：“迎神。”司香者捧香盒立香炉左，引赞引承祭官诣香炉前，司香者跪。引赞赞：“上香。”承祭官将炷香接举插炉内，又上块香三次，毕。引赞赞：“复位。”承祭官复位。引赞赞：“跪。”承祭官行三跪九叩礼，兴，平身，通赞唱：“奠帛，行初献礼。”捧帛执爵者将帛爵捧举，各就神位前，引赞赞：“奠帛。”奠帛者跪。献毕，行一跪三叩礼，退。赞：“献爵。”献爵者立，献毕，退。赞：“诣读祝位，”读祝者至祝案前行一跪三叩礼，将祝文捧起，立承祭官之左。引赞赞：“跪。”承祭官及读祝者俱跪，赞：“读祝。”祝

曰：“年月日具官如式敢昭告于忠义神武关圣大帝之神曰：惟帝浩气凌霄，丹心贯日。扶正统而彰信义，威震九州；完大节以笃忠贞，名高三国。神明如在，遍祠宇于寰区；灵应丕昭，荐馨香于历代，屡徵异迹，显佑群生。恭值嘉辰，遵行祀典，筵陈笾豆，几奠牲醪。尚飨！”读毕捧至神位前，安盛帛盒内，行一跪三叩礼，退。引赞赞：“叩。”承祭官行一跪三叩礼，兴，平身。通赞唱：“行亚献礼。”仪同初献，但不奠帛，不读祝。通赞唱：“行终献礼。”仪同亚献通赞唱：“彻饌。”执事者诣神位前，将笾豆等各少举。唱：“送神。”引赞赞：“跪。”承祭官行三跪九叩礼，兴，平身。通赞唱：“读祝者捧祝，进帛者捧帛，司饌者捧饌，恭诣燎位。”引赞引承祭官退至西边立，俟捧祝帛过毕，复位。引赞赞：“指望燎位。”引承祭官至燎炉前，赞：“焚祝帛。”赞：“礼毕。”引承祭官退。

后殿祭日，引赞引承祭官蟒袍补服进中门，赞：“诣盥洗所。”盥毕，通赞唱：“执事者各司其事。”引赞赞：“就位。”引承祭官就位。通赞唱：“迎神。”司香者捧香盒立各香炉左，引赞引承祭官诣光昭公香炉前，司香者跪。引赞赞：“上香。”承祭官将炷香接举插炉内，又上块香三次毕，引赞引承祭官诣裕昌公香炉前，同前上香毕，引赞引承祭官诣成忠公香炉前，同前上香毕，引赞赞：“复位。”承祭官复位。引赞赞：“跪。”承祭官行二跪六叩礼，兴，平身。通赞唱：“奠帛，行初献礼。”捧帛执爵者将帛爵捧举，各就神位前。引赞赞：“奠帛。”赞：“献爵。”仪俱同前殿。先光昭，次裕昌，次成忠。各献毕，赞：“读

祝，诣读祝位。”在光昭公前，仪同前殿。祝文：“年月日具官如式致祭于关帝之曾祖光昭公、祖裕昌公、父成忠公之神曰：惟公世泽贻庥，灵源积庆。德能昌后，笃生神武之英；善则归亲，宜享尊崇之报。列上公之封爵，锡命优隆；合三世以肇禋，典章明备。恭逢渎吉，祇事荐馨，尚飨！”读毕。通赞唱：“行亚献礼。”仪同初献，但不奠帛，不读祝。通赞唱：“行终献礼。”仪同亚献。唱：“彻饌。”仪同前殿。唱：“送神。”引赞赞：“跪。”承祭官行二跪六叩礼，兴，平身。余悉同前殿。

## 天后庙

春秋二仲月择吉致祭。用帛一、羊一、豕一、筴八、豆八。三月二十三日诞辰，有司蟒袍补服，到庙拈香。

祭日清晨，引赞引承祭官，蟒袍补服进中门，赞：“诣盥洗所。”盥毕，通赞唱：“执事者各司其事。”引赞赞：“就位。”引承祭官就位。通赞唱：“迎神。”司香者捧香盒立香炉左，引赞引承祭官诣香炉前，司香者跪。引赞赞：“上香。”承祭官将炷香接举插炉内，又上块香三次毕。引赞赞：“复位。”承祭官复位。引赞赞：“跪。”承祭官行二跪六叩礼，兴，平身。通赞唱：“奠帛，行初献礼。”捧帛执爵者将帛、爵捧举，就神位前。引赞赞：“奠帛。”赞：“献爵。”赞：“读祝。”读祝毕，赞：“行亚献礼。”赞：“行终献礼。”赞：“彻饌。”俱仪同关帝。通赞唱：“送神。”引赞赞：“跪。”承祭官行二跪六叩礼，兴，平身。引赞赞：“诣望燎位。”引承祭官至燎炉

前赞，：“焚帛。奠”焚毕，：“复位。”礼毕。

### 邑厉坛

岁凡三祭：春，清明日；秋，七月十五日；冬，十月初一日。每祭用羊三，豕三，饭，米酒，纸、香、烛随用。先期三日，主祭官斋沐更衣，用补服备香烛酒果，牒告本处城隍。通赞行一跪三叩礼，兴，平身；诣神位前，跪，进爵、献爵、奠爵，俯伏，兴，平身；复位又一跪三叩，兴，平身，焚告文，礼毕。

本日设城隍位于坛上，祭物：羊一，豕一。设无祀鬼神坛于坛下左右。书曰：“本县境内无祀鬼神。”祭物：羊二，豕二，盛置于器，同羹饭等，铺设各鬼神位前，陈设毕，通赞唱：“执事者各就位，陪祭官各就位，主祭官就位，”赞：“行一跪三叩礼，兴，平身。”主祭官诣神位前，跪，三献酒，俯伏，兴，平身；复位，读祭文。读毕，又一跪三叩，焚祭文并纸钱，礼毕。

### 旗纛

每岁霜降前一日，本县汛防官率兵士盛装铠伏迎请旗纛，到教场张幕扎营。至霜降日五鼓，以帛一白色，羊一，豕一，行三献礼。礼毕，放炮扬威，撤幕，束装整位③回汛，归纛于武庙。

### 祭(ying)祭

祝文：“年月具官如式致祭于城门之神曰：诏命临民，职司守土。惟兆人之攸赖，并借神功；冀四序之常调，群蒙福荫。必

使雨暘应候，爰占物阜而民安；庶其寒燠咸宜，共庆时和而岁稔。仰灵枢之默运，聿集嘉祥；襄元化以流形。俾无菑害。尚飨！”

论曰：“昔圣王之制礼也，自朝廷邦国下逮闾巷之间，有治教即有礼仪。况大同之世，车书一统，伦物彰明乎？而旧志所载，阙略不详，义例亦异，岂风教有殊，亦考订之误也④？故备稽而详著之，俾行礼者率循孔易焉。”

### 校注

- ① 析年：应为“祈年”之误。
- ② 萝葡：应作“萝葡”。
- ③ 位：疑为“伍”之误。
- ④ 亦考订之误也；句中“亦”，疑为“抑”之误。

（校注 江中卫）



# 德化县志卷之十

## 武 卫 志

克诘戎兵，慎固封守，所以绥靖我人民也。设险据要，为未雨绸缪之计，诚保障者所有事矣。德化山溪阻阨，而间道达于五州、汀、延、漳、广间，狡焉思逞者，辄走集焉。附载前车，用以示鉴。志武卫。

### 兵 制

宋初，收天下精壮于京师为禁军，留本州镇守者为厢军，禁军就粮各州者仍称禁军。德化属泉州，有澄海、威果、全捷、广节指挥名号，时迭更易营地。分驻各县额军之外，有土兵，亦曰寨兵，巡检领之。大中祥符间，置巡检寨于雲峰里今新化里邱店村。元丰三年，迁额管土兵一百二十五人守之，又籍民为逻警、弓手，随产户雇募。嘉定间，泉州守真德秀请置平卢隘于东西团，以左翼军兵一百人更番屯戍。

元初，调扬州、湖州军戍泉州后，乃设万户府，与土军相参。德化置巡检司四，有巡军，有弓手，并隶巡检司。至元丙子，高平章立伏虎隘于汤泉里，拨军守御。

明制：泉州、永宁二卫，有归附军，有投充军，有谪发军，有改调军，或为正管军，或为带管军，设指挥，千百户统之。入则守城，谓之见操军，以时训练；出则守寨，谓之出海军，按季践更，俱为征操军。又有屯旗军，奉红牌及撩田事例之屯军也。有屯种军，粮出于所种田，而以余粮输官，为不支粮屯军。德化屯种军凡三十二所。详见民赋志

洪武九年，以邑民为垛，籍留守卫二十年。江夏侯周德兴经略海上，刺德化民抽丁充永宁卫<sup>①</sup>，防倭戍守，民逃亡者过半。

洪武二十年，江夏侯周德兴置高镇巡检司，括民丁统于巡检为弓兵。本司额设七十名，往役者复其家。宏治间，以田赋定差役，而民间雇值倍之。嘉靖季，闽中被倭，军门议各司弓兵多逃亡，始减兵数，雇值微赢充饷。高镇巡司弓兵只存十二名。

洪武初，立民兵编成队伍，以时操演，有事用以征战，事平复还。为民有功者，一体升赏。正统十四年，命本地官司率领操演，名曰快手，十年一代。景泰间，议设机兵。天顺元年，命鞍马器械，悉从官给，复其本户丁粮。弘治二年，选取民壮，须年二十以上五十以下精壮之人。州县七八百里者，里二名，五百里者里三名，三百里者里四名，一百里者里五名。德化旧额一千八百有奇，率以下户金充。春、夏、秋，月操二次，至冬操三歇五。六年，令官司私役民壮者，以私役军余例罪之。正德七年，始更其法，以一

县丁粮通融编差，丁六、丁米三十九石编一名。嘉靖三年，又除官吏优免外，丁三、丁米三十九石编一名。后又以米专编驿，人丁专编机兵，皆惯徒揽之。三十六年，改将丁米对编，每名倍追工食银一十四两四钱，内以一半团练，每名给工食银十两八钱，一半防守，每名给工食银七两二钱。剩银充饷。三十八年，改以丁四粮六编，每名给银七两二钱，照旧倍追。四十三年，又以丁米对编，每名工食银十两八钱，内对与自取银七两二钱，余银充饷。四十四年，题派丁四粮八，专备饷银，民兵通免倍追。又添编抽取民兵征银，仍解充饷。嘉靖间，德化额编机兵一百二十名，内一百五名，每名给银十两八钱；一十五名，每名给银七两二钱，余银充饷。频年被倭，军门于其中选为标兵，隶麾下，奏增机兵之直，而减其数，收赢充饷。隆庆以后，复递减扣工食充饷。万历年间，实存机兵八十名。

嘉靖三十七年，都御史王询行令各县添设乡兵，专备城守。万历年裁。按机兵额设工食，选骁勇精壮、惯习捕盗者为之。掌印官提督操演，尽可得其用命。乡兵不给工食，养之无道，教之无素，强令操戈，实滋扰害耳。

按嘉靖之季，倭奴入寇，调到广西向武州等处客兵未尝与贼一交锋，供给赏予，徒糜帑财亿万。及福宁、福清、永宁、崇武所在城池相继失陷，则馈贖免祸之费，又有不可胜计者。府县库藏因之穷竭。迨兴化城陷，始锐意经略，以巡抚谭纶至，而邻省总督胡宗宪遣参将戚继光率所练义乌兵八千人自浙来援。倭寇荡灭，民贼歼除，地方获宁。于是当事者遂以土著之兵为不足

练，卫所军余又多餒弱，故閩中善后预备防御之兵，率岁调于金华，而兵餉之征由此无已。自嘉靖三十六年倍追机兵工食，又有加派均徭之议。至四十四年，都御史汪道昆题将通省丁粮以丁四粮八派追军餉，而倍追机兵，加编均徭，悉议停罢。尚以其不给也，乃留料钞、盐钞、鱼库、屯所诸银；又以其不给也，乃添编抽取民兵，仍征其银充餉；又以其不给也，仍减巡司弓兵，只存十□名、余皆征银充餉；又以其不给也，乃榷坊市酒税，乃抽见存寺税，乃扣各仓折价；犹以其不给也，至减预备仓军，储仓夫斗级，而追其工食以凑餉用。今考嘉靖四十五年以后，所征军餉之数，著其大都，而一时郡县之利害可概睹矣。附万历志载：“德化县解充兵餉项下，丁四米八，银五百二十四两六分四厘；料钞银一百三十八两四钱四分七厘；盐粮银②八十三两一钱二分二厘；扣解机兵银三百七十八两；扣减弓兵银四百二十九两二钱；酒税银三两九钱，寺租银二十两七钱九分三厘；永宁仓本色餉银一千八百一十三两五钱五分八厘；永宁仓折价充餉银七百六十六两三钱七分七厘；仓夫银一十两。”

国朝革明代戍卒之弊，专置绿旗，以重镇守。各县城乡分立汛塘，星罗棋布。陆路提标后营以千把总一员轮防。德化县汛，兼辖岳尾、高洋、溪边、南埕、水口、郭坂、赤水格、美洋等塘，领马步战守兵一百名：内马战兵二名，步战兵二十名，守兵七十八名，分驻各汛塘，一年一换。

康熙五十一年，提督杨琳题设山坪头汛，以千把总一员轮防。本汛兼辖王春、濠头、倚洋、十八格等塘，领马步战守兵一百名：内马战兵二十名，步战兵二十名，守兵六十名，分驻各汛

塘，一年一换。乾隆元年总督郝<sup>③</sup>以山多瘴气，咨准部覆。将弁兵移驻内洋，改山坪头汛为山坪头塘。

国初原编民壮五十名，每名给工食银七两二钱，地方官率领操演，康熙十七年裁，二十二年复设，续奉裁，雍正二年复设，七年派拨厦门海防二十名，安海粮捕六名，俱乾隆二年裁，派拨典史六名，雍正十三年裁。今存二十名，每名给工食银六两，带匀闰银二钱。本县知县调遣训练，又额设马快八名，专司缉捕盗贼。

## 险 要

虎豹关 在县南二十里大剧岭上。极高险，永春州分界<sup>④</sup>。明为剧头隘，知县李元龙易今名。国朝顺治六年，拨兵驻镇，十年罢。先五里，置高洋塘。

苏坑隘 在县南二十里。通永春州界。明时设。

天马格 在县东南二十里。通永春州。

塔岭隘 在县东南十五里。通永春，往仙游。明为介福洋隘，今置溪边塘于其下。

半林格 在县东南清太里，离县治八十里。通仙游。先二十里，置南埕塘。

张地岭 在县东清太里，离县治八十里。通永福。先十里，置水口塘。

蛇岭隘 在县东北梅中里，离县治一百二十里。通永福。

大官岭 在县北梅中里，离县治百里。通尤溪。宋立官井关，明设油竹隘于岭下。先十五里，今置美洋塘。

汤岭隘 在县北梅上里，离县治百里。通尤溪念九都。宋为汤尾关，明重设。

尤床隘 在县西北汤泉里，离县治百里。通大田。明时设。

蕉岭隘 在县西尤中里，离县治百里。通大田。明时设。先三十里，今置十八格塘。又先二十里为双翰乡，山溪险峻，民居稠密。

双峰隘 在尤中里山坪社，离县治百里。道出两峰之间，大田县分界，通五州要路，宋为岩市关。绍定、淳祐间，泉州守真德秀、颜颐仲尝欲置寨，不果。国朝置山坪头汛，以千把总一员带兵轮防。乾隆元年移驻内洋，离山坪头十里，仍置山坪头塘，分兵守之。

长安隘 在黄认团。明时设。后割属大田县。

伏虎隘 在汤泉里，离县治一百二十里。元至元丙子，高平章以地接汀延二郡，置隘，拨军守之。后废，明重设。

赤岭隘 在尤中里，离县治一百一十里。通大田梓溪。明时设。先二十里，今置王春塘；又先三十里，置濑头塘。

上窑格 在县西实丰社，离县治六十里。通永春。先五里，置倚洋塘。

儒山石牌格 在县西上林社，离县治三十里。通永春。再去五里为上濑隘，明时设，今属永春州。

三县寨 在县北新化里邱店村，离县治二十五里。宋大中祥

符间，本路提刑奏请置巡检寨，始议创于永春，后以德化湖岭下五州辐辏，乃建于此。主捍德化、永春、安溪三县要路，明时废。先五里，今置郭坂塘。

石门隘 在县北东西里，离县治四十里。宋为平卢隘。嘉定间，泉州守真德秀申请置寨。略云：“证得本州永春、德化二县、与汀、漳、南剑三州接壤。绍定三年，汀寇<sup>⑤</sup>既破龙岩、长泰，遂由漳径犯永春、德化两县，遭其荼毒，至今疮痍未瘳。某自到任，即据寄居士人陈述利害，谓合于永春县冲要之处，创置一寨，以左翼军兵百余人屯戍，庶可弭患未然。某旋加访问，众口一词，俱称利便，见委官同本县知县陈概相视形势，及牒左翼军统制齐敏预加择选，毕备番戍外，但创造寨屋，发遣官兵，不无费用。本州目今困于宗子俸给，委是无可那融，契勘交承钱内有修城官会四万六千贯文，拟欲权行兑用，兼官兵出戍浦城县等处，其生券钱米，系通判厅于官钱内支給，具申朝廷。札下，从某所申于永春县置寨一所，差左翼官兵一百人，更番出戍，仍于权将拨管收戍官会兑用，别具细数，申乞除豁及札下本通判厅官钱内支給生券钱米，伏乞指挥施行。明重设，亦名平卢关。先五里，今置赤水格塘。

## 汛 塘

德化县汛轮防官：千把总一员，外委火器把总一员。汛兵分驻北镇楼、东城门、南城门、西城门。自北镇楼废，借住城隍庙西畔房廡。乾隆七年，知县鲁鼎梅就上市新街巷马王庙故址，捐建上下两厅四房，左右二间。其各城门俱有营房、敌楼，分驻如旧。岳尾塘在东关外。高洋塘在县南十五里，安兵□名。溪边塘在县东南十五里。安兵□名。南埕塘在

县东六十里。安兵□名。水口塘距南埕十里。安兵□名。郭坂塘在县北二十里。安兵□名。赤水格塘距郭坂十五里。安兵□名。美洋塘距赤水格五十里。轮防外委把总一员，安兵□名。

内洋汛轮防官：千把总一员，外委火器把总一员。乾隆元年，咨准自山坪头移驻于此。山坪头塘在县西百里大田分界。安兵□名。王春塘在县西九十里。安兵□名。濠头塘在县西六十里。安兵□名。倚洋塘在县西五十里。安兵□名。十八格塘在县西北七十里。轮防外委把总一员，安兵□名。

## 教 场

宋教场在县治东，后废。明洪武九年建为分司行署。今图南书院<sup>⑥</sup>地。正德末，因防西寇，暂借社稷坛致斋所为之。在县西嘉靖九年，知县许仁请于巡按御史施山、管屯佥事姜仪，允复县东旧教场，地竟未复。今仍在社稷坛之西。

## 盗 贼 附

宋绍定三年，汀、邵盗晏彪等分党破龙岩、长泰，遂由漳境径犯德化及永春。招捕使陈耕遣偏师擒其酋归，所掳掠人有更生之喜。建祠泉州行春门外，与真西山并祀。

明正统十四年，沙寇邓茂七<sup>⑦</sup>遣贼将陈敬德<sup>⑧</sup>攻陷县城，毁县治，结寨山谷。出寇永春，复分寇诸县，远近望风降附。将至郡



城，知府熊尚初请调卫军未下，自提民兵与晋江典史孟常，阴阳正术杨仕洪拒战于城南古陵坡，被执，皆死之。

宏治五年，漳平盗温文进<sup>①</sup>攻陷安溪县，分掠德化，泉郡骚动。副使司马璽（yìn）督官民兵讨平之。

正德元年，广东盗入闽，寇漳州。盗不满九十，自南靖流掠长泰，所过俘质男女，索金帛，官兵不能御。遂至安溪、永春、德化，剽掠而去。

九年，汀漳盗流入永春、德化，肆掠而去。

嘉靖元年秋，广东、汀漳盗流掠南安、安溪、德化、遂入永春。二年元日癸卯，贼至，自德化掠永春<sup>②</sup>，官兵邀之花石岭。戊申，覆鼎乡兵设伏以待，贼突围去。他贼闻覆鼎有备，奔安溪，官兵亦以是日败之于加胡隔。辛亥，泉兵与贼战于高坪，泉州卫经历葛彦被掳；乙酉，漳泉合兵复战于霞村，漳州通判施福被掳，俱赎回。贼仅九十三人，狡而狠。六月贼复至，七月入兴化，杀掠甚惨<sup>③</sup>兴泉合兵数千攻之。一交锋，辄败。相持数日，我兵不能获其一矢，饱欲而去。三年，冬十月寇永春；初四日，知县柴鑑败之于高坪。十一日，战于小姑，御史简霄檄按察司、金事聂拱督诸县兵击之。二十二日，知县南安颜容端、德化梅春、安溪龚颖、同安周惟会、永春柴鑑之兵，迫至鸡母岫；龙溪知县黎艮亦以所部兵来会。是日，贼自鸡母岫<sup>④</sup>奔入邑之小尤中团。二十四日，官兵追及，贼穷，奔入里民黄舜大家，遂围之。邑义士涂洪三度其当夜遁，独持短兵伺于要路，截杀无遗。旧志载：是时杨梅中，张永成督义勇剿杀有功，附记之。

四十年五月，汀漳盗自永春崎安流入德化小尤中而去。是年，程乡河坝汀漳诸贼首苏阿普、廖铤、赖宗藩等连续出没，无有宁日。一月抄掠四五次，庐舍焚毁一空，民死不可胜计。田地荒芜，每米四升，银钱一，盐三斤，银钱一。

永春叛民吕尚四<sup>③</sup>纠林文焕、张时陆等党羽三万余人，将攻永春，警闻，永春绅士各捐金募兵四百余，日操夜守，贼避之。五月二日，从间道寇南安，于是永春各都民兵一千五百余人皆来应典史侯爵调度，密约德化克日捣巢。适知县林万春到任，性怯，力主招抚，立散民兵。贼闻，悉党乘虚攻之，以十七日黎明陷永春城，掳林万春，燔典史廨，大杀市民而去。是年夏，贼褚铎攻南安城弗克，千户王道成招抚之不听，执道成去。尚四与铎合，所过地方杀掠备惨，遂由仙游入德化石杰，以五月二十二日攻县城，至二十七日，贼党大至，分布城外，焚毁民庐，连营数十处。知县张大纲出战，斩贼数百。次日，贼造牛皮车、竹筏、竹梯、缘城蚁附。复以火铳、毒矢破之。戒壁严垒，乘机出战，屡有斩获。六月三日，乘胜直捣贼巢，尚四弃妻子，率亲党二十余人投倭，为人所杀，褚铎亦为永春人所擒。南安探花黄养蒙记：“德化泉之属邑也。依山为固，旧未有城，先令邓君景武始议筑之。然经始之初，草创未备，规制失于低薄，民守病其旷阔，居于中者，凡遇警报则危惧之甚。己未冬，简坡张侯来莅兹邑，作兴人文，惠爱百姓，尤以城郭为重，从而改筑焉。客岁辛酉春，余将命南行，道经其邑，见其造月城，营敌楼，崇堞浚濠，视向益坚。年来倭夷匪茹，六邑咸受其毒，而德化独幸安堵者，以侯恩威素著与其城坚而守完也。迨夏五月，永春蓬壶吕尚四等

乘倭倡乱，邻比之民胁从者不可胜纪，遂劫质其县新尹及泉卫王千户，假以就抚为辞，而款我师，蚁附日众，声势益张，行略都鄙，私相部署。是月癸丑，遣贼鹿乔辈率众数千攻我南安新城，战于九日山，贼败，夜遁复保。尚四以二十七日丙辰，悉众入围德化，维时张侯饬守备，振兵威，分命教谕李君焯严于巡守，而自统兵出击。西战金城寨，斩首百余级；东战窑头山，斩首三百余级。次日，贼以竹筏、雲梯、天车、四面攻城，侯以火铳、毒矢击之。贼又取草数千束，谋为火攻。夜则缒人于城外，一炬焚之。仍遣兵夺其所据桥，断其饷道，俘斩贼数百。复出兵东西合战，城上鼓噪，贼众奔溃。其党尤万化等百余人弃戈就缚，祈不死以报效。时六月庚申也。侯料贼必退保蓬壶，将乘胜追剿，又以二质在贼中，恐为不利，乃募壮士夜取，以出释尤万化，归为内应。翌日，身先士卒，直捣贼巢，歼主画王渠腾、吕尚四辈二百余人，坐致党魁赵天麟、张时睦等百余人，其余胁从者并释归田。完师凯旋，则是日壬戌也。方尚四倡逆，叛者响应，其心非止于一方计，塞金鸡之水，截洛阳之流，断山海米谷，以坐毙泉州，又虑德化之蹶其后也，故先率所部徇南安，而身图德化。于时郡邑震惊，莫知所措。以一德化居民不满三百，官兵不满六百，欲求外援，则比邑之令与握兵之帅，既已被执，当道者意在招抚，专城者图在自保，向非侯之决策破灭攻焚巢穴，则贼势蔓延，竟莫谁何，非侯之威望素隆，人心思奋，又安能以小为坚，以弱为强耶？是逆寇之平，非特一方之幸，实七邑之大幸！侯之平寇，匪直昭于德邑，实七邑永赖之奇功！自是永福、上杭群盗才至其境，即遣兵剿捕，靡不闻风逃窜。而四郊之民依城为乐土者，又悉区处官地以止居，此抚字之仁与干城之勇，侯之所以并著而见称也。德之乡先生陈君石、林君榕、李君景春等以士民荷保障之恩，而思所以章侯于不朽，乃备述其伟绩，请记于余。余既稔侯之贤，又嘉其功，而幸吾泉之並受其休也，不敢以不文辞，而叙录之云。侯讳大纲，字立卿，

号衢坡，广之龙川人，由乡贡进士为今官。新任典史胡君文章碑亭工力，重有赖焉。因并书之。”

四十二年十月，倭寇千余入德化<sup>④</sup>，至下涌攻寨，半月余弗克，倭乃扶伤出郭坂。时方筑寨，基高四五尺，乡民集其上，负竹筏屋门以御矢石，竟日不避，倭亦重伤归营，民乃下拾战具。次早，倭见之，辄去，过邑西门，往攻仙游五十余日，总兵戚继光援至，倭遂溃。

崇祯十五年，郡城宦幹收租虐民，南安民聚众革斗柁，贼因以起。魁林良顺率党五千余由永春入德化英山、后格等处焚劫。时承平久，闻贼皆惊窜，无敢御者。知县李元龙遣署捕督兵战于后格，失二人。贼益张，入屯草吉垆，有黄举和尚、老张六合等贼应之。游击黄日升提兵追捕，杀黄举和尚、老张六合于小尤上格。良顺复出，陷山湖寨，攻火焰寨。

仙游贼林隆复起掠永春湖洋，流入大地等乡。时南埕乡民有勾通者，势宦索之急，遂拒捕。宦逼知县自督兵剿之，竟剿一寨，邑民皆汹惧，总兵郑□为抚谕之，乃安。

国朝顺治四年二月，尤溪贼王继忠夜袭县城，各官俱逃匿民家一日夜，援兵始至，继忠搜掠奔回。

九月，南安寇庄廷书、张益率众万余围县城，毁文庙，焚冲霄塔、雲龙桥，割禾为粮，沿乡派饷，城中食罄茹草。时七邑皆有啸聚，援兵难行，守将弃城遁，知县黄琮遂遇害。群寇入城掳掠，廨署、民庐焚毁靡遗。邑逾年无官，贼亦自相屠杀，各乡皆练乡勇以自保。五年冬，提督马得功统兵恢复，张益、庄廷书等

相继授首。

有林忠<sup>⑤</sup>据双坑寨，攻之不下。六年，遣副将王□、满□、韩□，筑围困之，夜突围走，复据南埕洞，屡出劫掠。十一年，派饷于各里社，十二月令其党陷县城。十二年秋，议投诚，置人于通衢，强抽货税。寻复叛，千总王世爵与战于螺坑，死之。十四年，始归顺，出其魁党百余人，或授官，或归农，邑乃靖。

十五年，叛民许于敬本富家儿，见有以招抚得官者欲效之。时有贼魁李高啸聚于大田、尤溪、永春各县山谷间，于敬阴与交通，遂劫东厝寨，结巢吉岭大尖山。知县何之旭请提镇遣副总王□督兵捕之。敬奔，从李高于永春之四五都。明年正月，何之旭自率乡兵攻之，复奔入德化。追之益急，遂迎战，杀伤相当。逼之反为所乘，失数十人，复遁于十八灶。乡兵日夜尾之，投诚。总兵林忠遣人诱令由永春赴泉州投降，县白提镇杀之。

康熙十三年三月十五日，靖南王耿精忠反，传檄至泉。十九夜，提督王进功焚崇阳楼，搜掠郡城二日。二十三日，德化防守千总李雲龙劫掣知县何际美，挟取库银数百，将大掠。会檄至安民，乃止。

六月，海伪招讨将军郑经兵据漳、泉，分遣伪总兵康熊、伪知县林惟荣入据德化。八月，邱岩、涂坂、蕉溪等处乡民合兵，号为“义武”，分五营，屯驻心慈岭拒贼。时有伪官三十余人，带札入汤泉里募兵，双翰乡民杀之。十二月初八日，伪总兵黄雲率贼攻义武营，民兵与战，败绩。贼乘胜从塔仔崎追至佛岭格，民兵死伤甚众。贼沿途抄毁邱岩、石山等处，民屋无存。初九

日，黄雲率贼三千攻涂坂寨，尽毁寨外民屋，发棺弃尸。寨内不满五十家，练总李寅球等固守，炮无虚发，贼多死伤。攻二十日不下，各乡十一寨合兵来援，贼迫之，奔溃，寅球等乃纳款。二十日，伪知县林惟荣病回，以葉丽生为伪知县。十四年，海贼派各邑富户助饷，刑拷惨毒，议遣伪饷官入德，人心惶惑。武举李公培密纠各乡兵，图恢复，闻者雲集。培分设部伍，密约城中居民为内应。十月初四夜，率五千余人行至半途，旧病暴发死。次早，余兵至城下，城中有备，溃去。于是公培九族株累，不堪言矣！十五年五月，伪知县葉丽生病回，以辜锬为伪知县。十六年二月，大兵克复泉州。十一日，伪知县辜锬逃归海上。十七年六月，伪都督刘国轩陷海澄，贼势复张。攻泉州，预设伪官，分据七邑，有白头贼①数千遥应之。攻安溪月余不克，分党掠德邑。邑遭水灾②之后，城内空虚，知县王之纪与千总马虎往仙游，将乞师于省。七月十四日，刘国轩遣伪将葉明、伪知县唐用率兵二千余至德化，白头贼由十八格分掠大田。九月，巡抚吴□将军喇□，分道大援泉州。巡抚吴□至永春白鸽岭，遂分遣仙游知县领乡兵，同王之纪恢复德邑。葉明等闻国轩退走，夜弃城奔清太里，劫高濂寨，不克，遂沿途抄掠，由小径达漳归海。而白头贼寇大田者，亦被乡兵擒杀殆尽，郡邑告平。

四十九年，岁潦饥，十一月，漳平盗陈五显③聚众二千余入德化，劫赤水格街，攻陈吴寨，掳人勒赎。官兵追索数十日，至尤中里漂头洋与贼遇，总统戴□驰据高阜发炮，贼亦发炮，我兵有大松数十为蔽。知县王调元率乡兵合战，贼多死伤。涂家寨正

临其右，连发百子铳数门击之，遂奔溃，遁入安溪之天湖岩，势穷就抚，械送京师伏法。

六十年五月，台匪朱一贵倡乱，有奸民陈洛、郑坚等闻警窃发，啸聚于永春石鼓岩，遂流掠德化近山诸村落。知县熊良辅请官兵捕之，复亲率乡兵穷追，贼势遂蹙。俄而台湾告平，贼党旋散，执获贼首解赴泉州府臬示。自是德邑永宁。

论曰：“德化封疆四暨，蹊径旁达各处，逃民间作不靖，每潜踪于崇山邃谷中，故防卫视他邑为尤重。宋时五路戍守，明设四关一十三隘，亦云备矣。

本朝威武奋扬，汛塘联络，严讪察而遏乱萌。比年萑苻息警，犹且衣柳日戒，按志而稽久安长治之道，昭于遐壤矣。”

## 校注

① 永宁卫：明洪武初以泉州郡治建泉州卫，“旁列五所，已乃城水湾建永宁卫。”（据万历《泉州府志》）

② 盐粮银：民国志作“盐钞银”。

③ 总督郝：应为郝玉麟。

④ 永春州分界：应为永、德分界。（见民国志）

⑤ 汀寇：指汀州晏彪等。晏彪（绰号晏头陀），是汀州府宁化县 的农民军首领。宋绍定二年（1229年）十二月起义，以该县南乡潭飞濂为根据地。农民军个个截发，作头陀装束，晏彪“缁服髻首”，象个僧侣，号称头陀军。其声势浩大，破龙岩、长泰，越漳州而进攻永春、德化。绍定三年十一月，潭飞濂被“福建招捕使”陈崧攻拔，晏彪弃寨潜逃。次年二月在邵武解甲投降，终其生而失败。（见朱维干《福建史稿》上册福建“南

宋末期的农民起义”)

⑥ 图书书院：即后来的“考棚”地，在今县体育场西边。

⑦ 邓茂七：(? — 1449年)江西省建昌(今南城)人。因杀死地主，逃至福建沙县，做梅列乡罗姓地主的佃农。明英宗正统十三年(1448年)一月间与其弟邓茂八等人，号召附近各乡佃农拒送“冬牲”(即以鸡鸭等作为副租)和拒绝送租而起义，杀县官及巡检等。在短期内队伍迅速发展至数万人。除围攻延平府(今南平市)外，还连续攻下全省二十余州县，力量达三十余县。正统十四年(1449年)，在攻延平时受伤牺牲。(参见《明史·丁丑传》)

⑧ 陈敬德：万历《泉州府志》载：己巳(1449年)江西建昌府人陈敬德曾由德化攻入永春。永春苏里人郭荣六(少习兵法，智勇绝伦)教尤麟儿大姓百余人以攻刺之法，“引精兵逆战”，大败陈敬德。荣六中流矢。

⑨ 温文进：万历《泉州府志》载：漳平温文进起，熊景二(知府熊尚初子)守白芒坑(在永春达埔乡与安溪交界处)，温文进“不犯境”。明武宗正德初年(公元1506年以后)，温军经永春上畚，被景二截击撤退。而后入德化。

⑩ (九十三人)自德化掠永春：他们经过地点实为由永春入德化，再由德化入永春。(见民国志)

⑪ 搃：应为“惨”之误。

⑫ 鸡母岫：在德化县盖德乡五华山鸡髻崎。

⑬ 吕尚四：永春蓬壶人，农民出身。嘉靖四十年(1561年)夏率众起义。初，吕被招募前往晋江抗倭，二月二十七日，吕部在石菌战死五百余人，千户王道成委罪于他。吕怒，遂率兵众回永春。时值永春大饥，聚众至万，“邑诸良家子弟，归者十九。”后来队伍激增至三万余人。是年闰五月廿二日，吕率众围攻德化县城，连营数十处，被知县张大纲用计击



溃后回师永春时，又被内奸徐行恺引豪绅焚烧营寨，吕战至力尽，便率亲党二十余人外逃，被害。（据1986年《永春县志》初稿）

⑭ 倭寇千余人是由闽清入德化。（据民国志）

⑮ 林忠：俗叫“纸三”。据杨英《先王实录》载：“藩（指郑成功）遣义师林忠袭破永福县，守将、县官俱杀死。”郑成功封林忠为平定伯。《浙闽总督李率泰揭帖》（见《明清史料甲编》第五本）称：惟泉州府德化县巨魁如林忠者盘踞于万山叠岭之中。路通五府，梗化十年，与海逆相为表里。”该揭帖又称：顺治十四年（公元1657年8月），林忠兵败，率众六千余人降清。

⑯ 邑遭水灾：实为“邑遭兵水两灾。”（据民国志）

⑰ 白头贼：首领蔡寅。据《泉州方輿辑要·大清一统志》载：蔡寅聚众围安溪，李光地方居父丧，募乡勇绝其粮道，遂溃去，旋入德化。

⑱ 陈五显：“清康熙五十年五月乙酉二十一日谕大学士等”云：“陈五显各处贴揭帖，揭帖内称……‘若各处富户，不将屯积米石柴卖，我等必抢夺’等语。‘……伊等原非盗贼，因年岁歉收乏食，不得已行之耳。若即官兵征剿，未免又生一事。朕意遣部院大臣侍卫径行招安，即可平服。’”（《清圣祖实录》卷246，转摘自中华书局《康雍乾时期城乡人民反抗斗争资料》）

又据故宫博物院明清档案《朱批奏折》：“康熙五十年十月二十七日闽浙总督范时崇等奏：‘窃思永春、德化匪类聚众扰民，虽经解散，尚有陈五显惧罪潜逃，伏处深山，未能即获……陈五显见臣等牌内，皆乞其代请饶命，始肯来归……已于十月二十六日据差去各员，将陈五显等二十一人一并押解到省。’”（转摘自《康雍乾时期城乡人民反抗斗争资料》P601—602）

⑲ 朱一贵：《台湾大事纪要》载：福建漳州人、台湾罗汉门（今高雄

---

市)农民领袖朱一贵率数万农民起义,攻下台湾府城(今台南),占领全岛(除淡水外)。

(校注 江中卫)

# 德化县志卷之十一

## 秩官志

自古在昔设官分职，要以亲民有吏，可为国家宣□□①猷也。为忆庭柏棠阴来也叹暮，去也系思，风徽尚矣。德邑纪官自宋始，兵燹屡经，纪载多阙。然其名氏可考者，炳炳烺烺，未可略而弗登也。夫雷封百里，天下之大计系焉。长佐之官，文武之职，诎虚设哉？为稽其更替，次厥后先，志秩官。

### 文 职

唐分天下县为赤、畿、望、紧、上、中、下七等。

宋除赤、畿外，有望、紧、上、中、下。德化为下县，设知县事一员，丞、主簿、尉各一员，巡检一员。《宋史·职官志》云：“县令掌总治民政，检水旱灾侵以分数蠲免，奖孝弟行义以励风俗。丞、簿、尉皆佐。巡检阅习武艺以防盗贼。”

元定江淮以南三万户之上者为上县，一万户之上者为中县，

一万户之下者为下县。德化为中县，设达鲁花赤一员，县尹、县丞、主簿、县尉、典史各一员，儒学教谕一员，东西团、清泰里、小尤、杨梅团四巡检司巡检各一员。元史《百官志》云：“县设达鲁花赤并监县事、劝农。尹为司判正官，亦掌县事。”

明设知县一员，县丞、主簿各一员（永乐间裁），典史一员，儒学教谕、训导各一员，高镇巡检司巡检一员（万历间裁），阴阳学、医学、僧道司各一员。《百官志》云：“知县以下职掌大略同古。”

国朝知县一员，典史一员，儒学教谕一员（康熙四年裁，十七年复），训导一员（生员廩膳二十名，增广二十名，附学无定员），阴阳学，医学②。

## 宋知县事

刘文敏建隆九年任。

吴仁辨开宝五年任。

王 愈天圣元年任。

赵 称天圣元年任。

陈从愿天圣八年任。

李 检明道二年任。

黄 蟠景祐三年任。

李思刚景祐四年任。

鲍安上宝元二年任。

李昭用庆历间任。

温宗质皇祐元年任。

刘 诚皇祐五年任。

吴知章至和三年任。

常宗仁嘉祐三年任。

鲍朝儒嘉祐五年任。

吴仲谟<sup>③</sup>嘉祐七年任。

张 翱治平元年任。

陈居方<sup>④</sup>熙宁元年任。

徐伯璠熙宁四年任。

杨处愿熙宁七年任。

吴居倚熙宁十年任。

萧 愕熙宁间任。

邱 司<sup>⑤</sup>元丰三年任。

李处道元丰四年任。

李 颢元丰七年任。

祖谨修元祐三年任。

周 纯元祐间任。

陆如冈绍圣三年任。

方安道元符三年任。

林天若元符三年任。

王 恂崇宁元年任。

吕 深崇宁三年任。

曹三锡崇宁间任。

- 吴 铨崇宁五年任。  
陈与京⑥大观三年任。  
王 交政和元年任。  
刘 正宣和三年任。  
陈 熊宣和七年任。  
胡 禹建炎三年任。  
柯若禔⑦建炎四年任。  
高 预绍兴四年任。  
马 陞绍兴七年任。  
段彦质绍兴十年任。  
吴崇年绍兴十二年⑧任。  
葉 琰绍兴十八年任。  
杨 烝绍兴二十五年任。  
李 则绍兴二十一年任。  
林 及绍兴二十年任。  
蒋 鹜绍兴间任。  
李 嵩绍兴三十一年任。  
赵不琢乾道元年任。  
陈彭夫乾道二年任。  
陆 汝乾道六年任。  
谢之佐⑨乾道九年任。  
陈 阜淳熙元年任。  
林叔度淳熙三年任。

- 刘 隆淳熙五年任。  
颜敏德淳熙七年任。  
郑旦之淳熙十一年任。  
梁 京淳熙十四年任。  
季元才绍熙元年任。  
吴汝舟绍熙四年任。  
赵彦逵绍熙五年任。  
林 寅庆元三年任。  
叶 益庆元六年任。  
赵彦濂<sup>⑩</sup>嘉泰四年任。  
江 应  
季大器  
李端谊嘉定六年任。  
林季孙  
陈 概  
卓 然  
林应龙<sup>⑪</sup>  
杨震孙  
谢 适  
赵汝珩  
林 倚绍定间任。  
黄之望绍定间任。  
叶彦琰<sup>⑫</sup>

胡应梅俱端平间任。

赵崇佖

黄忠叟淳祐四年任。

康 渊淳祐六年任。

吴一鸣淳祐九年任。

### 宋主簿

宋 谭天圣七年任兼尉。

苏 环天圣七年任兼尉。

陈迪简建中靖国元年任。

蔡 觉政和四年任。

胡义问绍兴二十一年任。

马文仲隆兴元年任。

李献绍乾道七年任。

赵师震淳熙二年任。

郑 辉淳熙三年任。

陈元通淳熙五年任。

黄 宸

柯谦宗

萧 骆

陈 玉

林 尉

舒德彰



葉 莫

卢 琳

沈 焯

薛复之嘉定五年任。

林伯顺

林子贵

林彦章俱嘉定间任。

林 洙宝庆元年任。

麦国用

杨 冲

赵汝彰

黄伯酥

王梦有

赵粹卿

柳德骥嘉熙四年任。

黄廷瑞

### 宋县尉

陈 靖开宝中任县尉，参议军事，有平贼功，后再知泉州。祀名宦。

杜 公景祐四年任。

高缔之

徐 膺建中靖国元年任。

刘 陞政和四年任。

曾 贲绍兴间任。

上官敦实绍兴二十一年任。

郭 桂隆兴元年任。

陈 登淳熙三年任。

方寿曾淳熙五年任。

黄 钟

留 仪

黄 麟

黄 俨

张致中

陈光祖

蔡朝端

赵公箴

赵汝暨

赵师徵

邱 闻

郑 勋

郑 瀛

李 修嘉定六年任。

曾梦传嘉定七年任。

吴利见

阮享谦

周武孙

黄 万

潘 逵俱嘉定间任。

赵崇伤宝庆元年任。

王 震绍定三年任。

赵彦咏

赵押夫

朱 珪

陈子昂

孙应凤俱淳祐间任。

洪 格

傅梦澄咸淳间任。

宋时重邑宰，间以京朝官知县事，丞、簿、尉多进士为之。三百余年间，《通志》、《府志》所载邑宰凡八十四人，籍贯不具，年代互讹，而簿、尉皆阙。其以宦迹著名祠祀者，惟陈尉靖一人耳。纪载失传，可胜惜哉！今考旧志补入，簿凡三十二人，尉凡三十八人。

### 元达鲁花赤

合 只

千 奴

八 扎

万家奴

回 回俱至元间任。

乌马儿大德间任。

火底任至大间任<sup>⑬</sup>。

僧家奴

亦不刺金俱延祐间任。

伯 颜

撒都鲁丁

阿 撒<sup>⑭</sup>俱泰定间任。

塔 出

迭里迷失俱天历年任。

阿里思兰<sup>⑮</sup>

咱法儿沙<sup>⑯</sup>俱后至元间任。

忙古歹

刺马舟<sup>⑰</sup>俱至正间任。

## 元 县 尹

张世英至元三年任。

翟 彬至元三十三年任。

刘喜嘉<sup>⑱</sup>

卜 弼

王 輓

沈思蕴<sup>⑲</sup>

王 茂

徐耕孙

郑世英至治间任。

朱 沂天历初任。

雷 杭<sup>②</sup>

李宗仁俱至正间任。

陈 寿至正末任<sup>②</sup>。

### 元主簿

黄 鉴

朱 彰俱至元间任。

李德仁<sup>②</sup>至元二十三年任。

郑 宜将仕郎。

潘麟趾

朱 箕大德四年任<sup>②</sup>。

沙 的大德间任<sup>②</sup>。

胡汝楫至大间任<sup>②</sup>。

杨 椿延祐间任<sup>②</sup>。

方卜脱至治间任<sup>②</sup>。

王 佐

林 楚<sup>②</sup>

林孔硕

王 珪

宋 鉴

何 楫<sup>②</sup>

赵焕文

方忙桓

## 元县尉

夏 昭

王 祐

李知本

王良质

余伯颜

王 佐

张安仁

李子良

## 元教谕

林天资至元四年任<sup>⑤</sup>。

元时职官姓名莫译，绩效无闻，故《府志》概置弗录。今考《通志》参旧志，得达鲁花赤十八人，尹十二人，簿十八人，尉八人。补入教谕一人。

## 明知县

王 巽洪武六年任。祀名宦。

王 贞洪武九年任。传见《宦迹》。

刘德善洪武十九年任。

石德让洪武二十二年任。

冯 冀洪武二十六年任。祀名宦。

应履平洪武三十一年任。祀名宦。

孙应辰永乐三年任。

李 勉永乐七年任。

刘 濬<sup>⑩</sup>永乐十一年任。

孔宗嗣永乐十七年任。

毛道信永乐间任。

何 复宣德元年任。传见《宦迹》。

陈宗全宣德十年任。传见《宦迹》。

陈 昱宣德间任。

王志安<sup>⑪</sup>正统间任。

李 青天顺六年任。传见《宦迹》。

王 形成化元年任。

曾 昌成化四年任。

邱 恭成化十五年任。

狄 锺<sup>⑫</sup>成化十六年署建学官之仪门及学门。

萧 鏞成化十六年任。

戴元修成化二十三年任。

许 或弘治元年任。

郑 浩弘治三年任。

王 冀遂溪人，弘治四年任。

黎 献广东人，弘治五年任。

- 杨澄弘治九年任。
- 任顺弘治十四年任。传见《宦迹》。
- 胡潜弘治十七年任。传见《宦迹》。
- 王裕直隶人。正德二年任。
- 伦彝南海人。正德四年任。
- 周寰湖州人。正德八年任。
- 张绂琼山人。正德九年任④。
- 时行彭泽人。正德十四年任。
- 胡呈章新会人。正德十六年任。
- 梅春仁和人。嘉靖二年任。
- 何士凤嘉靖五年任。
- 许仁嘉靖七年任。传见《宦迹》。
- 刘裘吉安人。嘉靖十年任。
- 刘晃龙州人。嘉靖十二年任。
- 何瑛⑤博罗人。举人。嘉靖十三年任。
- 熊尧丰城人。举人。嘉靖十七年任。
- 谭文采永兴人。选贡。嘉靖二十三年任。
- 绪东山嘉靖二十六年任。传见《宦迹》。
- 胡惟立嘉靖三十二年任。祀名宦。
- 黄釜余姚人。举人。嘉靖三十五年任⑥。
- 邓景武嘉靖三十六年任。传见《宦迹》。
- 张大纲嘉靖三十八年任。传见《宦迹》。
- 何谦东莞人。举人。嘉靖四十三年任。



黄 经隆庆二年任。

秦 霭隆庆六年任。传见《宦迹》。

曹汝衷贵池人。举人。万历三年任⑦。

黄承讚万历八年任。传见《宦迹》。

郑同寅香山人。举人。万历十年任。

周 洵临海人。举人。万历十二年任。

施 汀乌程人。举人。万历十四年任。

丁永祚万历十八年任。传见《宦迹》。

钱光字东菟人。举人。万历二十年任。

锺梦寅泰和人。贡士。万历二十二年任。

范 乾鄞县人。选贡。万历二十四年任。

吴一麟宾州人。举人。万历二十五年任。

周 祐南城人。选贡。万历二十八年任。

俞思冲仁和人。进士。万历三十三年任。

徐时用奉新人。贡士。万历三十五年任。

毛 翀贺县人。举人。万历三十九年任。

赖良佐进士。

杨文正南昌人。举人。

闻人宗望⑧万历间由泉州通判调署。

林大俊万历间任。传见《宦迹》。

桂振字天启五年任。传见《宦迹》。

史 管凤阳人。贡士。崇祯间任。

王立準⑨贡士。

程思稷贡士。

徐日乾衢州人。贡士。俱崇祯间任。

姚 迟崇祯六年任。传见《宦迹》。

杨虞官秀水人。举人。

李元龙崇祯间任。传见《宦迹》。

金丽泽崇祯十七年任。传见《宦迹》。

陈元清苏州人。贡士。

## 明县丞

王用名<sup>⑩</sup>

刘 宗

袁伏泾<sup>⑪</sup>俱洪武间任。

余 表洪武三十一年任。祀名宦。

周 楸永乐间任。

## 明主簿

尹子文

刘 宗<sup>⑫</sup>

戴景宗俱洪武间任。

古彦辉洪武三十年任。祀名宦。

袁 礼

## 明典史

蓝洲礼<sup>④</sup> 洪武三十年任。

陈灵威

梁区堡俱永乐间任。

李 昌

张 岩俱宣德间任。

王志安正统间任。

方 祖

李 贵天顺元年任。

李 信

汤 淳成化间任。

吕 信

李 胜

陈 宁俱成化间任。

费 玮

张 岩

刘 谔

赵 信

林 文

赵 泰

邓 通

锺 道俱弘治间任。

张 卓

涂 玺<sup>④</sup>

蔡 蟠俱正德间任。

钟 锦

万元达

詹 权

叶 范

郭文英

周 森

蒋世遇

周 熏

芮 济

关一德

王 綵

胡文章

梁用贤俱嘉靖间任。

邓辅明隆庆二年任。

杨 访万历元年任。

方一义万历五年任。

苏廷榜万历十二年任。

徐大经

潘可大

李梦龙

麦联登

程世良

刘忠位万历三十年任。

林得暉万历三十三年任。

宋名臣万历三十六年任。

张文奎万历三十九年任。

罗宏宗

张秉贤

盛显爵

乔宏道

陶际恩

刘永允<sup>④</sup>

孙承宪

杨如雲

赵文铎

周梦龙

余思遇

陈凤鸣

郎一元

### 明教谕

吴仲贤甲戌进士。初为新城令，坐事谪岳州。拔教谕，洪武三十二年任。

潘 同开化人。洪武三十三年任。

谢 源

龙 澄化州人。

潘 吉宜兴人。俱洪武间任。

范宗道会稽人。

赵 琬武进人。俱永乐间任。

刘 伟

姚 玉

朱希亮余姚人。俱宣德间任。

董 许温州人。正统二年任。

陈 恺临川人。

王 福俱弘治间任。

郭 琥弘治十五年任。

季 聪临江人。弘治十八年任。

饶自成正德二年任。传见《宦迹》。

陈 骥顺德人。正德九年任。

梁 京龙泉人。嘉靖间任。

唐 卿嘉靖三年任。

葉 相

黄 輿<sup>⑥</sup>南海人。嘉靖九年任。

秦 璿<sup>⑦</sup>桂林人。举人。

许 信阳江人。贡士。

王渠通安福人。贡士。俱嘉靖间任。

梁 水<sup>⑧</sup>新会人。贡士。嘉靖二十七年任。

- 胡 兆安福人。嘉靖三十年任。
- 张仕文归善人。贡士。嘉靖三十一年任。
- 李 富泷水人。嘉靖三十九年任。
- 曹杰然<sup>④</sup>全州人。举人。嘉靖四十四年任。
- 张 介分宜人。贡士。
- 林雲兴莆田人。贡士。俱隆庆间任。
- 林良策福清人。万历三年任。
- 吴一贯南靖人。贡士。万历六年任。
- 陈 湖<sup>⑤</sup>莆田人。贡士。万历八年任。
- 黄 孚广州人。贡士。万历十年任。
- 刘文芳漳浦人。举人。万历十一年任。
- 龙希简望江人。贡士。万历十六年任。
- 魏雲潢莆田人。举人。万历二十年任。
- 张 潮万历二十四年任<sup>⑥</sup>。传见《宦迹》。
- 杨 炫<sup>⑦</sup>归化人。贡士。万历二十九年任。
- 华 嶽诸暨人。贡士。万历三十一年任。
- 吴光祖罗源人。贡士。万历三十二年任。
- 袁 络宜春人。万历三十四年任。
- 温德基清流人。贡士。万历三十七年任。
- 欧阳谊顺德人。举人。
- 陈学海连江人。贡士。
- 郭淡水龙溪人。贡士。万历三十九年任。
- 袁文绍建阳人。举人。

王大觉<sup>②</sup>字愚公。宁县人。举人。

林茂春传见《宦迹》。

范文学青田人。贡士。

王元顺贡士。

宋尧天福州人。贡士。

黄炜祯传见《宦迹》。

郭 巖福州人。贡士。

张应期福州人。贡士。

## 明训导

董 许<sup>④</sup>

郑士良南安人。俱洪武间任。

童 添西安人。

程 颖俱永乐间任。

余宗衍奉化人。宣德七年任。

涂 亨

包 溥

潘 嵩俱成化间任。

李 弦弘治间任。

包 麟弘治十四年任。

陆 惠弘治十七年任。

漆希贤湖广人。正德五年任。

潘 祥南海人。正德十年任。



- 罗俊嘉靖三年任。
- 李辅嘉靖三年任。
- 张泮<sup>⑤</sup>嘉靖十三年任。传见《宦迹》。
- 康集顺德人。
- 方继睿平阳人。
- 华钥海宁人。
- 范承思秀水人。
- 杨守沂江华人。
- 林昊番禺人。俱嘉靖间任。
- 皇甫震衢州人。
- 旷效忠南安人。俱隆庆间任。
- 朱骥延平人。万历二年任。
- 车彩<sup>⑤</sup>博罗人。万历五年任。
- 李藩长汀人。万历十一年任。
- 李培永康人。万历十三年任。
- 梁藻顺德人。万历十四年任。
- 陈瑞麟莆田人。贡士。万历二十一年任。
- 沈孟作永定人。贡士。万历二十七年任。
- 许愿学南靖人。贡士。万历三十二年任。
- 邓继尹宣化人。贡士。万历三十七年任。
- 欧世康<sup>⑤</sup>顺德人。贡士。
- 季永传兴宁人。贡士。
- 王国楨传见《宦迹》。

曹 缙山西蒲县人。贡士。

林绍宗福州人。贡士。

尹幡然漳州人。贡士。

甘天毓广东人。贡士。

戴秉谐漳州人。贡士。

明县令，通志载七十四人。考旧志补入何士凤、许仁、黄经三人，丞五人，簿五人。通志、府志俱载典史，通志载二十九人，据府志补入十八人，据旧志补入十六人，凡六十三人。教谕五十五人，据旧志补入王元顺一人。训导四十一人，通志、府志俱载。

### 国朝知县 署县附

黄 琮江宁人。拔贡。顺治三年任。

王 榜宝应人。进士。顺治五年任。

孙白孙河南人。通判。顺治八年署。

王宠受顺治八年任。传见《宦迹》

傅嘉谟浙江人。贡士。顺治□□年署。

崔 越顺治十二年任。传见《宦迹》。

朱世昌<sup>②</sup>理问署。

何之旭蕲水人。拔贡。顺治十五年任。

王泽洪康熙五年署。传见《宦迹》。

赵希仲泉州经历。□□□□署。

和盐鼎康熙六年任。传见《宦迹》。

- 张嘉善北直人。进士。布政使司都事署。
- 何际美河南人。进士。康熙十二年任。
- 郑天伦辽阳人。康熙十六年三月署。
- 王之纪康熙十六年任。传见《宦迹》。
- 姜立广<sup>⑤</sup>康熙二十二年署。传见《宦迹》。
- 刘永苍晋江县丞署。
- 傅以履聊城人。贡士。康熙二十二年任。
- 撒启明<sup>⑥</sup>由莆田县丞署。传见《宦迹》。
- 范正轱康熙二十五年任。传见《宦迹》。
- 佟世清兴化通判。康熙三十三年署。
- 严居敬上元人。供奉。康熙三十四年任。
- 佟世男惠安知县。康熙三十九年署。
- 王延庆兴化同知。康熙四十年署。
- 王一导康熙四十年任。传见《宦迹》。
- 王延庆康熙四十二年再署。
- 朱瑞图仁和人。康熙四十三年任。
- 康兆元泉州通判。康熙四十三年署。
- 赵文彬吴县人。贡生。康熙四十四年任。
- 辜文麟安溪知县。康熙四十八年署。
- 王调元康熙四十八年任。传见《宦迹》。
- 韦一杉晋江县丞。康熙五十年署。
- 殷式训成都人。举人。康熙五十一年任。
- 张宏祚兴化通判。康熙五十七年署。

熊良辅康熙五十七年任。传见《宦迹》。

邱镇安溪知县。雍正元年署。

王肅大兴人。癸卯进士。雍正二年任。

于翰翮永春知县。雍正四年署。

宋镗黄冈人。岁贡。雍正四年任。

苏石麟朝邑人。进士。雍正五年十二月署。

金鼎锡雍正六年正月任。传见《宦迹》。

缪灿宛平人。丁未进士。雍正六年六月署。

刘靖新郑人。副榜。雍正六年十二月署。

齐宗望江夏人。举人。雍正七年二月任。

李调元南安县丞。雍正七年七月署。

稽岳延德清人。生员。雍正七年八月署。

齐宗望雍正九年正月回任。

黄南春雍正九年十月署。

林兴泗孝感人。监生。雍正十年署。

黄南春雍正十一年回任。传见《宦迹》。

许齐卓合肥人。拔贡。乾隆三年署。

黄南春乾隆四年回任。

景璠雲梦人。举人。乾隆七年署。

梁明德五台人。癸丑进士。乾隆七年十月任。

岑尧臣大兴人。监生。乾隆七年十二月署。

鲁鼎梅江西新城人。壬戌进士。乾隆八年任。

## 国朝典史

郎一元

李潜鳞

梁允巍

王 选

马 霖俱顺治间任。

颜志美康熙间任。

蒙光猷康熙十八年任。

周之英直隶人。康熙四十年任⑥。

孙日升莒州人。康熙二十九年任。

张允达山阴人。康熙四十年任。

李 简通州人。康熙四十八年任。

周凤朝房山人。康熙五十二年任。

田有槐长清人。康熙五十五年任。

王怀仁会稽人。雍正二年任。

姚兆熊宛平人。雍正七年任。

鲁如岳宛平人。雍正十三年任。

陆兆龙秀水人。乾隆六年任。

王 佐宛平人。乾隆九年任。

## 国朝教谕

方日章浙江人。

卢敏政漳州人。举人。

林润芝传见《宦迹》。

李日升汀州人。贡生。俱顺治间任。

李光骏康熙十七年，总督委任。

王钦祖康熙十八年任。传见《宦迹》。

郑默建安人。贡生。康熙二十年任。

陈表闽县人。举人。康熙二十八年任。

薛允浩康熙三十五年任。传见《宦迹》。

程雲鹏康熙四十五年任。传见《宦迹》。

陈文海永安人。贡生。康熙四十九年任。

力子侗康熙五十四年任。传见《宦迹》。

祖士燧瓯宁人。拔贡。雍正三年任。

林允猷闽县人。副榜。雍正五年任。

卓如松莆田人。副榜。雍正十三年任。

石澄龙岩人。拔贡。雍正十三年任。

林中梅晋江人。恩贡。乾隆七年任。

林厚载侯官人。副榜。乾隆十年任。

鲁晋<sup>②</sup>邵武人。举人。壬戌会试明通榜。乾隆十一年任。

## 国朝训导

胡其臣岁贡。

郑梓福州人。岁贡。

陈儒鼎<sup>③</sup>仙游人。岁贡。

李正标传见《宦迹》。俱顺治间任。

李如兰寿宁人。康熙间任。

林甲继福州人。康熙九年任。

吴元升大田人。康熙十八年任。

李蚤春建阳人。康熙二十一年任。

方祚隆古田人。康熙二十四年任。

陈长周永福人。岁贡。康熙三十九年任。

郑绍绅福清人。康熙五十四年任。

余明玠龙溪人。康熙五十七年任。

张侃政和人。岁贡。雍正四年任。

张龙御寿宁人。岁贡。雍正五年任。

王方英长汀人。雍正七年任。

谢坦南平人。岁贡。雍正十一年任。

林梦龙古田人。岁贡。雍正十三年任。

郑土豪寿宁人。岁贡。乾隆四年任。

萧国琦惠安人。举人。乾隆十一年任。

## 武 职

宋初置土兵，巡检领之。又籍民为逻警、弓手。

元至元间，设巡军、弓手，并隶巡检司。

明洪武初，立民兵。正统十四年，命本地官司率领操练。洪武二十年，江夏侯置高镇巡检司，括民丁统于巡检。景泰间，设

机兵。弘治二年，又选民壮充之。嘉靖三十七年，都御使王询行令添设乡兵万历间革，俱掌印官提督操演。

国朝专设绿旗陆路提标，以后营千把总一员轮防德化县城，兼辖高阳、赤水、郭坂、溪边、南埕、水口、美湖等塘汛。

康熙十五年以前册籍无存。志自十五年始。

康熙五十一年，提督杨题请山坪头添设千把总一员防守，乾隆元年，总督郝玉麟咨准部覆，将弁兵移驻内洋，兼辖山坪头、倚洋、濠头、王春、十八格等塘汛。

### 德化县汛千总 俱康熙十五年以后，一年一换。

马 虎 陕西宁夏<sup>④</sup>人。将材。

刘养性 陕西长安人。行伍。

吴 斌 同安人。行伍。

李 煜 籍贯失详。

陈 金 漳浦人。行伍。

王起凤 晋江人。行伍。

黄得胜 浙江人。行伍。

林嘉谟 广东人。行伍。

纪廷璟 福州人。行伍。

张文灿 江西人。行伍。

陈 信 广西人。行伍。

朱之杰 湖广荆州人。功加。

李 良 泉州人。行伍。



孙 荣 闽县人。行伍。

胡元海 晋江人。行伍。

萧永吉 诏安人。行伍。乾隆十年任。

把总张国柱 晋江人。行伍。乾隆十二年任。

德化县汛把总 俱康熙十五年以后，一年一换。

王家才 宛平人。行伍。

任可致 广东广州人。行伍。

李枝华 山西利民堡人。行伍。

闻玉龙 河南汝宁人。行伍。

何演荣 广东顺德人。行伍。

王起凤 籍贯同前。

王得凤 泉州人。行伍。

丁文韬 晋江人。将材。

江 虎 宣府人。行伍。

王耀麒 陕西人。行伍。

陈国佐 山东人。行伍。

杨世明 籍贯失详。

林 炳 南安人。行伍。

王得升 泉州人。行伍。

赵成才 陕西人。行伍。

陈 良 闽县人。行伍。

沈兆龙 杭州人。行伍。

- 张 发浙江人。行伍。  
 林 义漳州人。行伍。  
 刘元龙江宁人。行伍。  
 陈 奇泉州人。行伍。  
 郭 华泉州人。行伍。  
 陈孔荣福清人。行伍。  
 陈 胜漳浦人。行伍。  
 薛万均泉州人。行伍。  
 林 联龙溪人。功加。  
 龚 喜晋江人。行伍。  
 林士太晋江人。行伍。  
 柴维栋北直赤城人。行伍。  
 洪 信晋江人。行伍。乾隆十一年任。

**山坪头汛千总** 俱康熙五十一年以后，一年一换。

- 陈 信籍贯见前。  
 李 秀晋江人。行伍。

**山坪头汛把总** 俱康熙五十一年以后，一年一换。

- 张 发籍贯见前。  
 陈 良籍贯见前。  
 刘元龙籍贯见前。  
 林 义籍贯见前。

陈 奇籍贯见前。

郭 华籍贯见前。

张进生泉州人。行伍。

黄 秀本姓李。籍贯见前。

陈三英福清人。行伍。

陈 胜籍贯见前。

张 渊泉州人。行伍。

薛万均籍贯见前。

林 达晋江人。行伍。

林 联籍贯见前。

内洋汛千总 俱乾隆元年以后，一年一换。

邬廷瑞浙江镇海人。辛卯科武举。

戴 胜晋江人。行伍。

林士太籍贯见前。

内洋汛把总 俱乾隆元年以后，一年一换。

戴 胜籍贯见前。

薛万均籍贯见前。

林 联籍贯见前。

王 功晋江人。行伍。

论曰：“名，所以核实也。秩官仅志名欤？邑之人披牍而议

之，以为某也鞠我育我，某也虐我仇我。后之论今，亦犹今之论昔也。愿与列是篇者，敬与爱俱，法与戒集。”

### 校 注

- ① 宣猷：民国志作“宣化敷猷”。
- ② 医学：后边应有“各一员”字样。
- ③ 仲谟：康熙志作“仲谟”。
- ④ 陈居方：民国志载：“康熙志作‘居仁’，误。”康熙志抄本作“居平”。
- ⑤ 邱司：康熙志作“邱同”。
- ⑥ 陈与京：康熙志作“与凉”。
- ⑦ 柯若禔：康熙志作“君禔”。
- ⑧ 绍兴十二年：康熙志作“十三年”。
- ⑨ 谢之佐：康熙志作“之仁”。
- ⑩ 赵彦濂：康熙志作“彦谦”。
- ⑪ 林应龙：民国志载：“端平乙未进士。（据《永春州志》，传见宦迹，今补入。）”
- ⑫ 叶彦琰：本志缺，据民国志补。
- ⑬ 火底任，至大间任：嘉靖志作“至大三年任进义校尉”；康熙志作“底任”。
- ⑭ 阿撒：康熙志作“阿散”。
- ⑮ 阿里思兰：“至元五年任”，据民国志补。
- ⑯ 咱法儿沙：康熙志作“哨法儿沙，至元六年任”。
- ⑰ 刺马舟：嘉靖志、康熙志、民国志均作“刺马丹”。
- ⑱ 刘喜嘉：康熙志作“嘉嘉”。

- ①⑨ 沈思蘊：康熙志作“思温”。
- ②⑩ 雷杭：“至正四年任”。据嘉靖志补。
- ③⑪ 陈寿：本志失载，据民国志补。
- ④⑫ 李德仁：康熙志作“李德”。
- ⑤⑬ 朱箕，大德四年任；嘉靖志、康熙志俱作“大德六年任”。
- ⑥⑭ 沙的，大德间任；嘉靖志作“大德十年任”。
- ⑦⑮ 胡汝楫，至大间任；嘉靖志作“至大四年任”。
- ⑧⑯ 杨椿，延祐间任；嘉靖志作“延祐四年任”。
- ⑰⑱ 方卜脱，至治间任；嘉靖志作“方一脱罕，至治二年任”。
- ⑲⑳ 林楚：嘉靖志作“林从”。
- ㉑㉒ 何揖：嘉靖志作“何揖”。
- ㉓㉔ 教谕林天资：据民国志补。
- ㉕㉖ 刘谧：康熙志作“刘谧”。
- ㉗㉘ 王志安，正统间任；嘉靖志作“正统二年任”。
- ㉙㉚ 狄鍾：据民国志补。
- ㉛㉜ 张纮，正德九年任；康熙志作“正德十年任”。
- ㉝㉞ 何腆：康熙志作“何腆”。
- ㉟㊱ 黄釜，嘉靖三十五年任；康熙志作“三十三年任”。
- ㊲㊳ 曹汝衷，万历三年任；康熙志作“四年”任。
- ㊴㊵ 闻人宗望：本志失载，据民国志补。
- ㊶㊷ 王立準：康熙志作“立隼”。
- ㊸㊹ 王用名：康熙志列袁伏泾、刘宗后。
- ㊺㊻ 袁伏泾：康熙志作“伏轻”，列刘宗、王用名前。
- ㊼㊽ 刘宗：康熙志列袁伏泾后，王用名前。
- ㊾㊿ 蓝渊礼：康熙志作“礼渊”。

- ④ 涂玺：康熙志“涂”作“塗”。
- ⑤ 刘永允：原为“永胤”，因避清世宗胤禛讳而改“胤”为“允”。
- ⑥ 黄舆：康熙志作“黄兴”。
- ⑦ 秦澹：康熙志作“秦澹”。
- ⑧ 梁水：康熙志、民国志俱作“梁木”。
- ⑨ 曹杰然：康熙志列张介后。
- ⑩ 陈湖：康熙志作“陈瑚”，列黄孚后。
- ⑪ 张潮：万历二十四年任，民国志作“二十三年任”。
- ⑫ 杨炫：疑为“揭炫”之误。（见康熙志与民国志）
- ⑬ 王大觉：应为闽县人。（据民国志）
- ⑭ 董许：康熙志作“董仲”。
- ⑮ 张泮：康熙志列方继睿后。
- ⑯ 车彩：康熙志作“卓彩”。
- ⑰ 欧世康：康熙志作“区世康”。
- ⑱ 朱世昌：“理问署”前为“以布政司”。据民国志补。
- ⑲ 姜立广：康熙二十二年后“署”字原脱漏，据民国志添上。
- ⑳ 撤启明：“由莆田县丞署”原缺，据民国志添上。
- ㉑ 周之英，康熙四十年任；与下二任张尹达同时，疑有误，应为“康熙二十六年任”。（据民国志）
- ㉒ 鲁晋：民国志作“曾晋”。
- ㉓ 陈儒鼎：民国志载：“据仙游县志补入”。
- ㉔ 陕西、宁夏：应作“甘肃、宁夏”。

（校注 江中卫）

# 德化县志卷之十二

## 科目志

取士之法，首重科名，然搜罗不广，沧海叹遗珠焉。春秋两闱，文武并录，厥典皇哉！而明经则登成均，荐辟以征独行，途何广也！德邑山川灵淑，毓为人文，自宋迄明，科名日盛。

国家声教覃敷，虽岩栖涧处，弦诵不辍。宜乘时献酬者，后先踵起也。循览题名，应深踊跃。志科目。

### 甲 科

隋建进士科，唐因之。

宋制礼部贡举，设进士及九经、五经、三史、三礼诸科，皆秋取解。明春礼部考试合格者，列名放榜于尚书省，上亲策于廷，唱名赐第，有升有黜。至开宝，举进士诸科不中，阅贡籍曾经十五举以上终场者，试论一道，皆赐本科出身，谓之“特奏名”。景祐以后，其法渐恕，进士三举诸科，五举虽试文不合

格，亦与出身。又熙宁三舍法：士由外舍升内舍，内舍升上舍，县升州，州升辟雍，辟雍升太学。司成率其属，稽其籍，考其成，升其尤者，命之官。三年大比，饬以黜世之务，别其等差，唱第释褐而任使之。

明洪武三年五月，诏各行省乡试，福建解额四十人。洪熙元年，增为四十五人。正统六年增为六十人。景泰四年增三十人，为九十人。乡试中式者送礼部会试。又中式则进之殿廷，上临轩策之，第其高下为三甲，传胪赐宴。

国朝顺治二年丙戌诏行乡会试，如明制。

明制武举惟取武弁一途。正德初，刘忠宣大夏始疏广其选，凡乡试武场俱准，文场以十月行之。乡举必历中三科，方得听用。会举则高第者，即授都司、守备、把总，余皆授所镇抚以次，遇缺推用。

国朝顺治五年，乡试武试举罢，历中三科之例，中式则赴京会试。

宋元符二年，令诸州推行三舍法，州许上舍一人，内舍二人，岁贡入之京师，其上舍即附太学补外舍，试中补内舍生。通上试不升舍者，遣还其州，其内舍免试，至则补为外舍生。崇宁元年，蔡京请天下皆置学，州学生每三年贡入太学，为太学生。学校贡士自此始。

明洪武十六年十二月初，令天下府、州、县学岁贡生员每一人。二十一年，令府学一岁、州学二岁、县学三岁各贡一人。厥后制令迭更。正统六年，定州学三岁二人，县学二岁一人，府学



仍旧。其恩选则为不时之遭。

国朝因之，选拔定十二年一次举行。雍正元年，改为六年一次，府学二人，州县学一人，宁缺毋滥。乾隆八年，复以十二年一次为例。德化贡，宋、元无可考，志自明始。

### 宋进士

林扬休重和元年戊戌科。

苏 钦宣和六年甲辰科。祀乡贤。

陈廷杰淳熙五年戊戌科。

苏 权淳熙十一年甲辰科。通志阙。

林 洽淳熙十四年丁未科。传见《治行》。

林 瀛洽弟。庆元二年丙辰科。传见《治行》。

黄龟朋圭侄。嘉泰二年壬戌科。传见《文学》。

郑 轮嘉泰二年壬戌科。祀乡贤。

黄霆发①嘉定七年甲戌科。

徐雷闻宝庆二年丙戌科。

苏国兰宝庆二年丙戌科。

陈霆震绍定二年己丑科。

林汝作淳祐七年丁未科。内舍，乳源簿。

### 特奏名

苏 祥政和二年壬辰科。

郭 体绍兴十二年壬戌科。

- 林 格绍兴十二年壬戌科。
- 章 竑绍兴十二年庚辰科。
- 吴 钦若淳熙二年乙未科。通志阙。
- 蒋 励淳熙八年辛丑科。
- 杨 要庆元二年丙辰科。
- 黄 圭庆元五年己未科第二人。海丰簿。
- 林 鸾嘉定元年戊辰科。
- 陈 言宝庆二年丙戌科。通志阙。
- 陈雷焕绍定二年己丑科。府志载安溪人。
- 吴 桂端平二年乙未科。
- 林 棐嘉熙二年丁酉科。
- 郑 轸轮弟。淳祐四年甲辰科。

### 释褐

- 吴 异绍兴二十七年丁丑科。
- 苏总龟钦侄。绍兴三十二年壬午登极，恩上舍释褐。传见《文学》。
- 童子举旧志载二人，年代讹舛，姑存其名以俟考。
- 张可封
- 蒋明纪旧志载，七岁能诵诗说经，操大衍数，工五七言诗。
- 右②宋进士一十三人，特奏名一十四人，释褐二人。

### 明进士

- 凌 辉永乐十年壬辰科。江西副使。祀乡贤。

丁启藩万历二十年壬辰科。太仆寺卿。晋江籍。

郑沛万历二十六年戊戌科。户部主事。祀乡贤。

庄尹辰天启五年乙丑科。晋江籍。知府。

赖核崇禎元年戊辰科。由平湖令召对称旨，擢检讨，转右春坊。传见《治行》

### 举人

凌辉永乐三年乙酉科。见进士。

蒋应永乐十二年甲午科。传见《隐逸》。

曾灏永乐十八年庚子科。

余英宣德四年己酉科第五人。传见《文学》。

杨澄成化十三年丁酉科。通判。

林润成化十六年庚子科。通志阙。

林真弘治五年壬子科。

邹绚嘉靖四十三年甲子科。四会知县。祀乡贤。

纪廷誉万历十年壬午科。

丁启藩万历十六年戊子科。见进士。

林际春万历十九年辛卯科。德庆知州。传见《文学》。

郑沛万历二十二年甲午科顺天榜。见进士。

洪启哲万历二十五年丁酉科。

李雲阶万历二十五年丁酉科顺天榜。吉安同知。传见《治行》。

郭维翰万历二十八年庚子科。扬州同知。传见《治行》。

张鹏翹万历三十四年丙午科。

庄尹辰万历四十六年戊午科。见进士。

赖 垓天启七年丁卯科顺天榜。见进士。

张 穰天启七年丁卯科。以训导登河南榜。

邓孕槐崇祯三年庚午科。御史。传见《治行》。

涂绍泰崇祯六年癸酉科。

黄中炅崇祯六年癸酉科。

赖天与崇祯十五年壬午科顺天榜。

林鹏搏崇祯十五年壬午科。武定知州。传见《孝友》。

## 武举

李乘龙崇祯九年丙子科。

郭玉侗崇祯九年丙子科。

## 恩贡

单 辅隆庆间。平乐通判。祀乡贤。

郑 沛万历间。见进士。

李雲阶万历间。见举人。

赖 垓天启间。见进士。

## 拔贡

林 榕嘉靖间。缙云训导。传见《治行》。

赖天与崇祯间。见举人。

岁贡

陈 荣洪武间。卫知事。

蒋德高锦衣卫仓官。

郑 庆教谕。

郑环庆知县。

庄 进卫经历。

郑 肃卫经历。

刘德进

陈 敞按察司检校。

刘公孙

蒋 雲

郑 缘

陈 福俱洪武间。

李 兹永乐间。

林 翥主簿。

郑 昭主簿。

陈公春<sup>③</sup>主簿。

张 才

李 荫主簿。

陈伯昌

蒋伯起县丞。

张 恂

蒋 迪

林 盛

李 桢主簿。

欧阳仲俱永乐间。

梁 义宣德间。

陈 敬县丞。

赖 福南昌通判。

张 善府照磨。

张 源俱宣德间。

林 茂正统间儒、吉二州知州。祀乡贤。

林 锡高州⑩府照磨。

赴 琼知县。

李廷宪知县。

刘宗青

张 隆

范 杰教谕。

张 懋教谕。

林 泉州判。

蒋文保卫经历。

陈 善俱正统间。

李遇春景泰间。武定⑤州同知。

连 成新建主簿。

萧 绍俱景泰间。

- 颜 真天顺间。鸿胪序班。
- 赖 兴鲁城⑥主簿。
- 连 碧博罗主簿。
- 陈 治星子主簿。俱天顺间。
- 林 敬成化间。广州照磨。
- 陈 旭
- 张 绚
- 林 洪新城知县。
- 留 醮
- 李 胜浙江⑦按察司照磨。
- 林 新
- 陈 佐德庆州同。
- 留 成曲江知县。
- 张 崇
- 陈 灏从化训导。传见《治行》。
- 黄廷魁吉丰训导。
- 张 亮弘治间。西淮运司经历。
- 陈 瑀
- 林 俊
- 涂 福勳阳⑧训导。
- 范克仁剑州吏目。
- 陈 文江西教谕。
- 刘 鸿阳春训导，署县篆。

陈 轩靖州训导。

张石麟

鲁 瑞<sup>②</sup>

张进纪仁和主簿。俱弘治间。

林 文正德间。

黄 球训导。

林 援

林 清浹江教谕。

范克智

郑介石

庄 宪

黄天锡会同训导。

杨澄玉训导。俱正德间。

鲁 光嘉靖间。教谕。

陈中立仙居训导。

连 良

林 贤训导。

王甫政训导。

庄如愚晋江籍。知县。

涂允宽蜀府纪善。传见《治行》。

郭 麟庆远教授。

陈衍恭

庄守愚晋江籍。



陈天彝

陈伯容南丰知县。传见《治行》。

黄 保训导。

林景春县丞。

陈 石电白训导。传见《治行》。

王 策教谕。

林 济

邹 经王府教授。

李宜居章邱教谕。

林 球增城教谕。

庄启愚教授。

吴天祐程乡训导。

蔡克熙晋江籍。教授。

纪京华晋江籍。

黄自勉永福训导。

陈廷表晋江籍。训导。俱嘉靖间。

林 珀隆庆间。州学正。传见《文学》。

周普观从化训导。

陈洪谟教谕。俱隆庆间。

林宗胜万历间。教谕。

徐思可

叶光中晋江籍。州同知。

张文诰通判。筑凤翥峰。

林 栋乐会知县。传见《治行》。

周 榛石城训导。

林 枢南陵知县。传见《治行》。

赖孔教全椒训导。祀乡贤。

赖 光琼州教授。传见《义行》。

王 雍<sub>和</sub>知县。传见《治行》。

郭以玗漳浦教谕。

梁可宏

章时学教谕。传见《治行》。

董子芳晋江籍。训导。

陈王道崇安教谕。

周 桐永定教谕。

陈一桂

柯应凤连江训导。传见《治行》。

黄龙御教谕。传见《文学》。

易象炳平乐教谕。

欧阳炜

朱光山训导。

纪廷举

林 燝东安知县。传见《治行》。

陈叔揆训导。

张 穰河南训导。见举人。

张辅鼎俱万历间。

黄拱参天启间。

黄懋耿

赖 极俱天启间。

张九垓崇祯间。建阳训导。

赖 燿四会知县。见《封典》。祀乡贤。

周 鼎松溪训导。

周 擗

李大秀漳浦教谕。

林 檠传见《文学》。

郑 湜贵溪知县。传见《文学》。

邓 濂见《封典》。传见《义行》

徐图南福清训导。

周日崇

林沧升

欧阳浚集贤馆。贡士。

以上明进士五人，举人二十四人，武举二人，恩贡四人，拔贡二人，岁贡百五十一人。

### 宋太学生

林扬休见进士。

苏总龟绍兴十六年上舍优等一人。见释褐。

林 瀛

陈文叔上舍优等。传见《文学》。

郑起东传见《文学》。

## 明太学生

张 绅按蔡司照磨，升县丞。

赖 琛恩授训导。

张士宾涿州州同。

黄天球临高县丞。

凌雲彩

陈 标巴州州同。

林 焮廉例。传见《文学》。

苏 僖

李乔霖上林苑丞。

曾 经

林 焮廉例。县丞。

刘五伦廉例。通判。传见《文学》。

郑克明

周 任

陈天彝

李景春

欧阳成廉例。州判。

赖 鏞

周 獬

冯维楨

## 涂峻登

### 俊秀例纳

林实卿海盐主簿，升卫经历。

郑耀奉化主簿，升卫经历。

以上宋太学生可考者五人，明太学生二十一人，俊秀二人。

## 国朝进士

李道泰顺治十八年辛丑会试第六十一人。殿试三甲第 | 三六八人。开化知府。传见《治行》。

林模康熙十二年癸丑会试第六十三人。殿试三甲第四人。普宁知县。传见《治行》。

邓启元雍正五年丁未会试第九人。殿试一甲第二人。翰林院编修。传见《文学》。

王必昌乾隆十年乙丑会试第二百四十九人。殿试二甲第十二人。

## 举人

邓焮夏铸，孕槐子。顺治五年戊子科。传见《文学》。

李道泰菴思。治《易》。顺治八年辛卯科第一百一人。见进士。

林汪远涵苍。治《诗》。康熙五年丙午科第二十九人。南部知县。传见《治行》。

林模靖若。治《诗》。康熙五年丙午科第二十五人。见进士。

甘重熙治《诗》。康熙十一年壬子科第二十四人。

谢青锺斐草。治《易》。康熙十一年壬子科第三十六人。瑞安知县。  
传见《治行》。

徐其璘康熙二十年辛酉科。漳州教授。

萧宏梁穆亭<sup>⑩</sup>。治《易》。康熙二十六年丁卯科第一人。传见《文学》。

王维斗蓼思。治《易》。康熙二十六年丁卯科第二十六人。临漳知县。传见《治行》。

张志学康熙二十六年丁卯科第三人<sup>⑪</sup>。丹阳知县。

陈应奎璧东。治《诗》。康熙三十五年丙子科第四十八人。南乐知县。传见《治行》。

陈元捷兼三。治《易》。康熙三十八年己卯科第三十一人。

颜天球象岩。治《礼记》。康熙三十八年己卯科第□十人。兴宁知县。传见《治行》。

曾清漪景河。治《诗》。康熙五十二年癸巳恩科第□十□人。

王继美貽亭。治《易》。康熙五十二年癸巳恩科第四十人。枣阳知县。

黄士招孝贲。治《易》。雍正二年甲辰科。

邓启元幼季。治《易》。雍正二年甲辰科顺天榜第二十一人。见进士。

林应祖孟简。治《诗》。雍正四年丙午科第四十九人。

林 昱容村。模子。治《诗》。雍正七年己酉科第六十二人。

王必昌后山。五经。雍正十年壬子科第十三人。见进士。

颜 瑛绳俚。五经。乾隆元年丙辰科第二十七人。

温廷选万侯。治《易》。乾隆元年丙辰科第四十二人。丁巳会试明通榜。古田教谕。

曾重登其岸。治《春秋》。乾隆元年丙辰科第五十三人。壬戌会试明通榜。武平教谕。

李志昱就亭。五经。乾隆三年戊午科第八人。

曾西元尚轩。治《春秋》。乾隆三年戊午科第八十二人。壬戌会试明通榜。建宁教谕。

## 武举

王斌全康熙五年丙午科第二十八人。

李公培康熙八年己酉科。传见《义行》。

邓士垓康熙二十六年丁卯科。

邓士坡康熙二十六年丁卯科。

林大丰康熙四十一年壬午科第二十六人。

许应曜雍正二年甲辰科第二十九人。

徐天攀雍正十三年乙卯科第四十九人。

许宝三乾隆元年丙辰科第二人。

## 副榜

黄翼蕙康熙十一年壬子科。

李云文康熙三十八年己卯科。

郭宏猷康熙四十一年壬午科。

李淑度康熙四十七年戊子科。赵州州判。传见《治行》。

林听耀康熙五十二年癸巳恩科。晋州州判。

吴超英康熙五十三年甲午科。泸州州判。

赖源康熙五十六年丁酉科。传见《孝友》。

郑熊诏乾隆九年丙辰科。

蔡文渝乾隆元年丙辰科。

徐高明乾隆三年戊午科。万承州州同。传见《治行》。

### 恩贡

赖钺顺治间。通判。传见《义行》。

林岱康熙间。

陈锡华康熙间。

李献馥康熙间。传见《文学》。

朱遵选雍正间。

王致远雍正十三年乙卯科。

### 拔贡

林次瑛康熙间。知县。

郭宏猷康熙己卯科。见副榜。

邓启元雍正元年癸卯科。见进士。

李宸铿乾隆五年庚申科。传见《文学》。

### 岁贡

陈素蕴顺治间。通判。传见《文学》。



徐燮鼎漳州教授。

曾为履知县。

丁 楷<sup>②</sup>兴化教授。

方今泰传见《文学》。

郭孕巖州判。

李其缵

林凤翀

张·佺

甘九畴古田训导。

李乔锺传见《孝友》。

王为都

邓孕楷

丁 炜湖广按察使。俱顺治间。

温舜华康熙间崇安教谕。传见《治行》。

黄中燮

黄翼峦

郑振世传见《文学》。

林 勃

林 岳

吕筠奏

丁士鳌

曾楚材

丁 举

张 岩

郑生洲

陈 澍康熙丙子科。传见《文学》。

曾 耀

李 翔

邓国对

张其羽

李苏成

连登瀛康熙丁亥科。

陈 枳康熙己丑科。

郑应骥康熙辛卯科。传见《文学》。

黄绪昌康熙癸巳科。

林 曷康熙乙未科传见《义行》。

吕士铨康熙丁酉科。

赖 铨康熙己亥科。永安训导。

陈 檠康熙辛丑科。

丁奇崑雍正癸卯科。

邓际美<sup>⑩</sup>雍正乙巳科。

郑 暹雍正丁未科。传见《文学》。

颜严良雍正己酉科。

刘元鐸雍正辛亥科。传见《文学》。

苏 灏雍正癸丑科。

温玉斗雍正乙卯科。

林志栋乾隆丁巳科。

赖德宣乾隆己未科。

连如璋乾隆己未科。

徐 灏乾隆辛酉科。传见《文学》。

郑惠琇乾隆癸亥科。

陈开材乾隆乙丑科。

论曰：“士之服儒服，诵儒言者，遍邦域矣！书升论秀，其得与于选造之数者，可按籍稽也。登斯版者，固足庆，其遇之通，亦将求其实之副也。宜何如自勉欤！”

## 荐 辟

### 明

陈仁山湖岳二州鱼课提举司。传见《文学》。

蒋伯起以孝廉举新喻县丞。

李宗厚以明经举丽水县丞。

赖以仁以明经举沂水县丞。

黄 震以明经举新喻知县。

张 贤以人材举登迈⑭知县。

涂宗仁以人材举平乐知县。

论曰：“明代专重甲科，而荐辟非常行。盖上以实求，下以名应，不疑于私，则失于蔽。举人者与举于人者两受其责，故难之，而辄废之。然其法固古乡举、里选之遗也。德邑膺荐者七

人，表之以见明初取人之典。”

## 掾 吏

李天叙嘉兴典史。

凌 高卫经历。

王国范彭城卫仓大使。

李熙卿威远卫经历。

周 行江西大庾典史。

李 茂加纳知事。

王问臣赣县丞。

周 嵩宁波卫经历。

凌雲彬县丞。

凌 永主簿。

李茂春邹县典史。

凌 袞主簿。

陈 高吏目。

李日英如皋典史。

苏 宝典史。

李 蕙青神典史。

张 鸾南昌典史。

陈 机巫山主簿。

苏 鸾巡检。

林大标崇善典史。

陈文卿金堂典史、巡检。

周可久单县主簿。

林继盛清溪巡检。翁源县丞。

郭应文梅头巡检。

刘五经徽州府经历。

连云冲平定州吏目。

周 玺四川经历。

刘五雲临淮典史。

论曰：“有明入仕之路广矣，而铨衡资格牢不可破。邑之以掾吏仕者，秩皆弗显，绩亦无闻，岂安小就者画地而趋耶？抑官人者预为之畛域，虽有长才，末由表见欤？”

## 封 典

宋

林 程以字扬休贵，赠朝请郎。祀乡贤。

明

凌天德以子辉任监察御史，赠文林郎。传见《孝友》。

郑 扬以子沛任户部主事，封承德郎。

郭 琛以子维翰贵，封文林郎、临江府推官。祀乡贤。

李 繁以子云阶贵，赠奉政大夫。传见《孝友》。

赖 燦以子垓贵，封翰林院检讨。祀乡贤。

## 国朝

邓 濂以子孕槐贵，封监察御史。传见《孝友》。

李廷佐以子道泰任开化知府，赠中宪大夫。

林朝荐以子汪远任雲和<sup>⑩</sup>知县，赠文林郎。传见《文学》。

王嘉宾以子维斗任临漳知县，赠文林郎。

陈文灼以子应奎任南乐知县，赠文林郎。传见《孝友》。

邓 焯以子启元贵，封翰林院编修。传见《隐逸》。

赖 异以子铨任永安训导。赠修职佐郎。传见《孝友》。

陈高策以子义焯任宣城主簿，赠登仕郎。传见《孝友》。

## 任 子

### 宋

苏 洸以父钦荫知州。传见《射行》。

### 明

丁 樾以父启濬荫都察院照磨。

丁 渠以父启濬荫入太学。

论曰：“尚考《汉书》，封典无闻，惟传大尉张龠之父，自

田里诣京邸，郡僚奉觞上寿而已。萧育、冯野、王席以父荫垂称。唐李德裕亦由任子起家。自宋迄明，典制昭焉。我朝覃恩屢沛，比曩代加隆，光前绪而庇后嗣，畴敢不勉图报称哉？”

### 校注

- ① 黄震发：通志（民国二十七年八月修纂）作“震发”。
- ② 右：应改为“以上”。
- ③ 陈公春：民国志引“《永春县志》作公寿”。
- ④ “高州”：据民国志补。
- ⑤ “武定”：据民国志补。
- ⑥ 鲁城：应为“增城”之误。（据民国志）
- ⑦ 浙江两字，据民国志补。
- ⑧ 勋阳：应为“郟阳”之误。（据民国志）
- ⑨ 鲁瑞：康熙志、民国志俱作“曾光”。
- ⑩ 穆亨：民国志作“穆京”。
- ⑪ “第三人”，据民国志补。
- ⑫ 丁楷：民国志引省志列入“拔贡”。
- ⑬ 际美：民国志作“济美”。
- ⑭ 登迈（县）：应作“澄迈”，属广东省。
- ⑮ “画地而”三字，原脱漏，据民国志补。
- ⑯ 雲和（清代县名。在今浙江省龙泉县东）：民国志作“南部”（在四川省阆中县南）；通志作“汪远知雲和县，改南部知县。”

（校注 江中卫）

# 德化县志卷之十三

## 人物志(上)

山川不改，疆域依然。而能使过其地者仰焉慕焉，依徊不能去焉，必其中大有人在也。德邑流峙鍾奇，代产人物，景芳躅，溯遗风，民献老成，光幽德潜，其事其文，可以彪炳册书而鼓舞后起者，枚举不一。谨光昭厥美，类而分之，得十有一帙。志人物。

### 名宦

#### 宋

陈靖 莆田人。开宝中，与黄观请兵于漕版，授泉州德化县尉，参议军事。贼平，以前资官例赴阙，补许州阳翟县主簿，再知泉州，累迁江南转运使。江南有李氏横赋于民，凡十七事，号曰“沿纳”。靖极论之，诏罢，其尤者数事。历事三朝，以秘书监致仕。著有《经国集》十卷、《劝农奏议》三卷。熙宁元



年，谏官以《劝农奏议》上下篇奏闻，诏藏中书，后复索《经国集》进呈，特赠左仆射。《宋史》、《郡志》俱载。

## 明

王 翼 洪武六年知县。时当兵革后，公私凋敝，规制草创。翼至，慨然以兴举废堕为任。葺学宫，修县署，建坛壝，役民不劳，资财不伤。三年间，政平俗化，论者谓：大统初集，极得安静画一之体。

冯 翼 山东德平人。洪武二十六年知县。倜傥平易，留心民隐。先是，邑以抽军，故民尽逃移，死绝者过半。田荒，而粮额仍悬，百姓赔累不堪。翼莅官廉得其详，叹曰：“疮痍不瘳，何以施梁肉哉！”掾白以军餉无所给，恐获罪，不听。即以状奏闻。特诏蠲税额，至今民受其惠。

古彦辉 广东长乐人。洪武三十年为邑主簿。性敏决，精吏事，识大体，尽心劝课，不尚苛察，凡有令出，民咸欢趋。三十一年溪涨，民居荡圮，公抚之，民忘其灾。视黄官廨署规制湫隘，相地鳩工，广而新之。桥梁道路，莫不缮理。九年秩满，民将赴阙奏留，会监司保任，擢监察御史。

应履平 浙江奉化人。洪武三十一年知县，廉谨平恕。时邑文运未开，履平劝奖士类，有向学者辄优礼之。自是邑之人士，多登科第考最。迁吏部郎中，历官按察使。

余 表 广东化州人。洪武三十一年县丞。奉职廉慎，抚字有方，役均讼简，民咸戴之。卒于官，郡守胡器遣祭，以旌其廉。

胡惟立 江西高安人。举人，嘉靖三十二年知县。廉介自持，常赋外不取加耗，勤慎莅事，案无留牍，门隶久惯者去之；刁健屡讼者惩之。均赋役，恤困穷，邑人怀德。卒于官，士民共请入祀。

论曰：“令者，民之司命也。遗爱在民，去尚攀辕，歿宁不奉祀欤？五代以来官此者，若令丞，若簿尉，宦迹所载盛矣，而祀仅七人，何其少耶夫！时当清晏，君子固无所树奇功。自嘉靖后，兵荒洊至，缮城池，立学校，兴利除弊。捍患御灾，功可不谓伟欤？而概未举祀，毋亦表章者寡也。尚论往古，洵有俯仰兴怀，不能自己者矣。

## 乡 贤

### 唐

颜仁郁 字文杰。为归德场长，号颜长官。时政荒民散，郁抚之，一年襁负至，二年田莱辟，三年民用足。有诗百篇，传于民间，至今邑人歌之。立祠于石杰乡，岁俎豆，水旱，疾疫必祷焉。

### 宋

林程 杨梅人。慷慨尚义，广收图史，延宿儒，合族子弟

禀而海之。旧传邑治有“水流丁，罗簪纓”之谶，程捐家资，买邑前濒溪之田数十百亩，具畚鍤(cha)开浚。一夕，天大雷雨，溪岸洋溢，决流丁方。子扬休，重和元年成进士，赠程为朝请郎。休子兴宗为钱塘令，宗子洽、瀛皆登第。洽子延赏，瀛子士英，相继贵显。四世簪纓，一时称盛。

苏 钦 字伯承，善均里人。第宣和甲辰进士，除江西帅属，值贛卒判，为帅漕画策平之，擢守巴州。高宗谕之曰：“巴去朝廷甚远，卿务镇静存抚百姓。”钦对曰：“臣当宣布朝廷宽大之恩。”上首肯之。州旧例有脚乘钱三十缗，钦曰：“未能补公家，岂敢费私帑？”悉封还，代民输赋。改知閩州，首陈利病六事，复却例钱、互送钱，诸司以治最，荐得旨再任。未几，除利州路转运判官。时吴玠屯重兵于兴元，深加敬爱，餽遗甚厚。又条时政五事上之。卒于成都。所著有《两汉提要》十卷。庆元间，修《高宗实录》，索其行状，家集奏疏并御笔进之。子洸，孙权、国澜，从侄总龟、熹，孙禀，相继登第，五世簪纓。

郑 轮 字景行，湖顺侯昭祖裔孙也。第嘉泰二年进士。尉保昌时，获强盗不肯论赏，曰：“人命可易官乎？”迁龙南令，邑上乡邻山峒民旧不输租，一日，数十攀以长枪挈钱而至。吏惊怪诘之，曰：“闻有好长官愿，为王民。”秩终，民爱之，遮送塞道。再知南城县，会盗发，诸邑扰动，轮悉意捐循，无一附贼者。甫代去，而邑被兵，人谓行善之报。历广东运司主管文字。辟知循州，卒。

## 明

凌 辉 字邦辉。幼颖悟过人。永乐壬辰进士。任广东道监察御史。寻以风采，改河南道。端谨持宪。擢江西按察副使，黻官邪，明法度，振飭风纪，民安俗正。屢从文皇帝征伐，与修《大明一统志》，两膺诰勒，复纂修《德化县志》。明代邑之登第者自辉始。

林 茂 字盛之，坊隅彭坑人。正统八年，由岁荐知广东儋州，民爱戴若父母，为之颂曰：“茂林无虎豹，儋海有凤鸾。”丁内艰服阙，补广西吉州知州。值己巳之变，蒙难输边，死于王事。

邹 绚 嘉靖甲子举人。广东四会县知县。人称丁溪先生。

单 辅 号岩泉，高洋乡人。少力学，从李文节游，由恩贡授广东合浦知县，清介自矢，执法不阿。履任六年，不取合浦一珠。升平乐通判。解绶家居无藏获，妻自炊，客至，使子传茶饭。李文节高之，为举乡贤。其在合浦也，奉文丈量多代田，豪家餽金数千，请半文，不听，悉丈之。朝廷按盗珠事下县核，祈免者入珠盈斗，不受，以实报，竟诛其党。其志节可概见矣。

郭 琛 字世深，号奇园，在坊驷高桥人。多财好施。尝出游，获遗金，待其人验实还之，如是者二。造龙津桥，旋燬于火，复倾囊再建。道路有倾圯者砌筑之。以子维翰为临江府推官，膺封典。年九十，无疾而逝。

郑沛字原甫，号涓初。聪敏沉潜，垂髫游泮，即愿选入都。万历甲午魁麟经，戊戌成进士，选计曹，给归省亲，见邑先辈及同学，谦冲敦挚，绝无新贵容。初任管崇文税课，兼四门诸差，茹冰檠，惠商民，清德著闻，与当时立名者称天下六君子焉。嗣督昌平粮储及客主兵饷，护陵寝，供汤沐。时诟，极苦心经营，志操弥厉。年三十二卒于官，朝野惜之。太常李凤岳，志其才通敏而心甚虚，气冲粹而骨甚正。官庶黄九石述其胸罗象纬，而无上人之心；貌若处女，而有担当之勇。在朝则竭诚体国，毙而后已；在野则敦本励节，殁而愈光，皆实录也。八学特举祀郡乡贤。

赖孔教 汤泉人。事亲言色无忤，与兄合爨不忍析。以岁荐司训全椒，爱士若子。诸生新进有贫者反贖资之，丧不能成礼者，割俸助之。殁于官。易簣时，囑以宦资公子姓。椁归，号送者二百余人。

赖燿 号四表，孔教子。年少笃学，性至孝。随父任全椒，父卒于官，扶椁而归，瓣踊哀毁，行道为之堕泪。食贫，教授不倦。由岁荐司训尤溪，迁四会知县，出五冤狱，不避权贵。以子官春坊，遂解绶归。

论曰：“乡贤之有祠祀，亦隆矣哉！生于斯，长于斯，受尸祝于斯，非有功德在人，能膺祀典于勿替乎？邑自颜公以下十二人，居乡则典型桑梓，登仕则霖雨苍生，厚德丰功，寿诸彝鼎，光于俎豆。称曰：‘乡先生’，宁有愧欤？”

## 宦迹

### 知县

#### 明

王贞 浙江永嘉人。洪武九年任。谨身正己，一清如水，莅民如抚婴孺，待士如接宾客，一时风化淳穆。好娱情山水，公余援琴赋诗，悠然自得。人谓有子贱遗风。

何复 河南柘县人。宣德元年，任邑之令簿。自应古后代匪其人。百凡废堕，复循序经理之，规制焕然一新，民不知劳。政尚简易，廉平正大，为当道所推重。

陈宗全 广东□□人，宣德十年任。明恕廉介，为政有方。立纲纪，崇教化，士民信服。未期年，境内大治。

李青 广东石城人。天顺六年任。敷政平恕，人目为李佛子。公余，袜履巡行郊野，有不勤农事者，召而谕之。朔望入学官为诸生讲论，终日无惰容。莅任九年，百废具兴。民修其业，士修其学，邑以大治。秩满当去，士民丐留三年。

任顺南 直隶常熟人。弘治十四年任。性果断，多才能，每编赋税徭役，令下，民辄称便。有曾姓者好告讦，号雕儿，素为民患，顺化之以德，久不悛，乃置之罪，惻然遣之，曰：“尔何不为嘉禾而为稂莠乎？”自是，德教蒸被，狴狱空虚。

胡潜 字孔昭，江西绩溪人。弘治十七年任。居官三年，

廉洁自持。水利、桥梁、廨署当修葺者，恒割俸以助。民力讼者，常劝化之使自省。鞭扑不施老幼，囚系不加贫苦。以奔丧去，民相吊，如失父母。

许仁 字元夫，号竹厓，浙江仁和人。嘉靖七年任。毁淫祠，创社学，设学租，筑射圃，复教场，甃坛墀，浚丁溪，修春波楼，缮廨署，建名宦乡贤祠，置漏泽园。养济院，善政累累不胜书。详见《建置》、《学校》诸志。嘉靖十年，改调同安县。

绪东山 号三南，广西马平人。嘉靖二十六年，以举人来任。嗜学，工诗文，讼清政简，公庭无事，日与诸生讲论。建丁溪书院，俾习业其中，置学田贍之。构驾雲亭，复古义社。邑士民祠于龙浚山之麓。

邓景武 号文斋，江西德安人。嘉靖三十六年，由贡监生来任。邑旧无城，比年寇警，民遭屠戮，群结寨于县后大龙、黄龙二山。武乃度地营城，正南临溪，东自龙浚山麓以上环山，而北包大洋山，西抵大旗之巅，下达于溪，雄视列邑。未几，吕尚四乱，后令张大纲凭城为固，赖以破之。

张大纲 字立卿，号衢坡，广东龙川人。嘉靖三十八年来任。前令张景武筑城新就，虑其低薄辽阔，即改缩增高。适永春贼吕尚四合徒万余，流劫攻城。纲身亲督战，擒斩无遗。自是上杭、永福诸盗，不敢犯境，详见黄侍郎记。尤惠爱百姓，作兴人文，创建书院于龙浚山之麓。

秦霁 苏州崑山人。隆庆六年，以举人来任。经画区理，洞悉大计。以学官卑陋，遂独断迁于城外大洋山之阳，费不烦而

事集，庙貌巍焕，人文以起，诸生德之，为立去思碑。与绪令并祠。

黄承讚 浙江义乌人。万历丁丑进士。先任武进，抗忤权势，为所中伤，调德邑。勤修职业。以文风未盛，集诸生，朔望会课，面评高下，行赏有差，一时士类振起。后武进事白，升南京刑部主事。

丁永祚 江西南昌人。年十九领乡荐，英韶警敏，洞悉物情。至则豁盐税，绝关提，抑豪强，邑民尚气，涵濡渐化之。不怒而威，民俗以淳。见人才寥落，慨然曰：“邑无南门故也。南为离方，文明之位，奈何阙焉”？。捐俸筑之，建楼其上，以祀文昌。改调福清，尤不忘德之士民。后令钱某县试滥收冒籍，庠士赴督学鸣其事。钱令文致申详，众惧不测。祚闻知，即以实驰告，督学皆直之。钱令因论去。冒籍彻清，人文蔚起。后历知州府，官至湖广宪副使。德与福清并祠之。

林大儂 号惺非，广西隆安人。万历辛卯亚魁。简易宽厚，洁己勤公，隆礼待士。建冲霄塔于邑之巽方，以象文明。浚丁溪故道，以符古谶。兼署永安二篆，所至课士，口授耳提，甄拔名流，时誉翕然归之。子光第，英年发解，人谓礼士之报。

桂振宇 号苕我，江南石埭人。以明经来任。慈惠和易，劝民艺麦而给以种，教民医疗而济以药。鼎建祝圣寺，修学宫，凿泮池创寅宾馆，筑春台，置纠察、遗爱二祠，葺城隍，甃龙津、鸣凤二桥，成巽方塔，综理有条，百废具举。复厘剔侵没学田以资膏火。庠士王乘乾贫不能婚，资金代聘；杨经临贡而殒，贫无以



殄，为棺衾而葬之。旌孝友，崇节义，禁炫服，戒侈靡，仿男女别途之礼，令士民习官音，捐金给老人，使朝夕振铎于路，唱明六训。凡所设施善政，不可胜纪。寻挂冠去，士民攀轭不获，立祠尸祝之。

姚 迟 号若麓，浙江秀水人。崇祯癸酉，由举人来任。风节棱棱，胸怀坦白，待士民如同体。时泉宦势炽，泉屯之在德者，屯丁贫困悉兑，势宦收租酷剥，民不堪命。绘图叩阍，事下抚藩，臬府按验，迟力为民剖析冤状，反覆数四，痛哭流涕，当道感动上其事，旨下严禁。岁省德民额外横索万余金，遂中忌者以去。百姓立祠祀之。颂曰“姚天”。

李元龙 江西玉山人。由举人来任。坦易真诚，不饰边幅。工诗，善行草。偶寓僧寺，道衣系缘，巡廊庑间，人莫知其为县令也。恂恂然与物无忤，民咸乐其慈祥。

金丽泽 字石可，江南武进人。崇祯十七年，以拔贡授邑篆。精神炯炯，顾盼凜然，下笔如飞，片言洞人肺腑。初邑有疑狱，甫至即牒城隍神决之，豪家屏息。适京师告变，大纲解纽，阖郡势豪横恣，猾民跳梁，德晏如也。擢漳州同知，旋升知府，躬亲抚剿，盗贼望风归化。晋阶宪副指挥，所及秉钧握符者莫敢与争。时有郑势金石之谣。明年十月，大兵克漳。死之。

## 国朝

王宠受 号濯陆，北直宁晋人。顺治己丑进士。事母至孝。八年来任，节俭慈爱而有威，举止进退有仪，寡言笑。邑遭兵燹

之余，流离未定城市丘墟。受下车抚凋敝，询疾苦。会土寇充斥，设法联络山寨，亲为训练乡勇，捐俸犒士，悉力御之。常举行乡饮酒礼，远近翕然，十年，以忧去。

崔越字肃逸，号秋涛，山东平度人。以岁贡授县职。俊伟豁达，不露圭角，廉静慈和，不事峻绝。听讼曲直无遁情，而不喜鞭杖。时征剿海寇，征檄纷驰，常匹马入郡，计画事办而费省。及大兵克复泉州，邑之巨寇归顺，犹置人于通衢，私抽货税，越力捕置之法。寻复判战于螺坑，王千总遇害，亲督乡兵御之。严禁交通，贼党惧，始决意投诚。竟以忧劳致疾，实授命下，已捐馆矣。贫无以殓，适兄布政司经历崔起遣子来候，因经纪其丧，道路闻之，皆为流涕。

王泽洪北直人。泉州通判来署邑篆。时遭寇乱后，城治萧条，洪按户籍，令民移市入城架屋，严为之期，而稍听其自限。悉力经营，人烟辏集。去任犹施余泽，为邑民雪冤。

和盐鼎字岩夫，湖广城固人。顺治丙戌举人。宽宏蕩吉；承前令猛酷之余，故族士类皆荡产倾家，喘息重足。鼎痛革弊政，尝与绅士参酌利病，竟日无情容。比听断必反覆辩论，务得情实，不肯轻置之法，贵贱咸得欢心。升大理寺评事，去之日，遮送百里，莫不涕零。旋擢北城御史，溯遗爱者至今啧啧焉。

王之纪沈阳人。由笔帖式随征入闽。康熙十六年，委知德邑。耿逆初平，泉郡新复，疮痍未起。纪简静镇抚，不事纷更。平讼狱，省兴作，民甚便之。二十二年，擢行人司行人，去之

日，士民攀轭泣留如和令云。

姜立广 泉州通判。康熙二十二年署邑篆。明敏练达，物无遁情。莅事未数月，民咸思之。

撤启明 山阳人。以莆田丞署邑篆。公正明决。下车奉文编审丁苗，悯赋役偏枯，不避嫌怨，详请均摊。由是富者不得诡避差徭，贫者不至重派苦累，八里称平。

范正格 字载瞻，浙江鄞县人。丙午举人。康熙二十五年任。禁溺女，劝种植，举乡饮，建义学，设常平仓，葺宾阳、北镇二楼，缮堂庑，置寅宾馆，筑桥梁，刊邑乘，类有可纪。卒于官。

王一导 号惕斋，湖广黄冈人。康熙丁丑进士，四十年任，慈惠廉明。邑旧例有节礼银八百两，为上官交际之资，里甲轮供，多至荡产。又有屯田硃价银，每甲一两。导惻然曰：“竭小民之膏脂，供一己之周旋，为民父母，顾如是乎？”即出示除之。听断平允，案无留牍。履任一年，以内艰去。

王调元 字燮公，辽阳义州人。正白旗监生。康熙四十八年任。果毅正直，不避权势。明伦堂久废，鼎建之。适外郡奸匪陈五显抄略乡村，飞报收捕。境赖以宁。

熊良辅 四川苍溪人。康熙己卯举人。五十七年任。和易慈祥，待士以礼，抚民以恩。外邑奸民陈谋啸聚山谷，急请会擒，亲督乡兵，进山协捕，民得不扰。捐俸建棖星门，造照墙。又倡建雲龙桥，工将就绪，适以事去。

金鼎锡 号卜庵，浙江仁和人。康熙癸巳进士。雍正六年，

自寿宁调任德邑，洞悉民情，廉平不苟，催科折狱，有古循吏风。方葺治雲龙桥，会宪委往外买谷，旋以能员调南靖县。

黄南春 字砚石，号生庵，广东镇平人。监生。雍正九年，由古田调署德邑。十一年，引见得实授，以屯粮纳户散拆征输两难，详请归社各造的名推收，如民粮例，民甚便之。倡修文庙及东岳庙，造凤桥。又继前令筑雲龙桥，宏整壮丽。乾隆三年，委护永春州，四年回任。移建关帝庙，鼎建朱子祠，再造鸣凤桥。详见《学校》、《祠宇》诸志。前后莅任九年，告终养归。

## 教 官

### 明

饶自成 广昌人。由贡士司训升邑谕。方正清俭。日温经史，月立课程，提海诸生，奖优恤贫。复捐俸修理祭器，当道重之。

张 泮 东莞人。由岁贡司训。持身廉谨，课士有方。学宫圯坏，捐俸葺之。详载吴从龙记中。

张 潮 罗源人。以岁荐司训泉州，升邑谕。勤课督，精品题，所取士多掇科第，时推冰鉴。胸襟洒落，沐陶淑者，如坐春风焉。

王国祯 字锦榕，闽县人。以恩贡选司训。到高，手不释卷。明于干济，不露锋颖。当道器重，列荐刺，升为粤西桂平尹。

林茂春 浙江青田人。由台州司训来掌邑教。气概豪迈。分斋曹缙自山西蒲县来，官甫三月而卒。囊橐如洗，子女继歿，春为殡葬于薛萝山，设租以供祭扫。复请于当路，护其眷属使归。真古道也。

黄伟祯 字若木。莆田举人，学富才高，气节自命。教谕德邑，诸生励志力学者爱慕有加。絜袴膏粱，不稍假以颜色。风裁严峻，学校肃然，士习以端。

## 国朝

林润芝 延平人。顺治间以举人署教职。闲雅博物，尤工诗律，善书法。风度彬雅，士林重之。

李正标 顺昌人。顺治间以岁荐司训。淡泊宁静，风度蔼然，喜愠不形。至有关学校公论者，则义形于色，侃侃秉正。寻铎龙岩，多士矜式，不能忘云。

王钦祖 闽县人。康熙十八年，由例贡司邑教。慷慨好义。在庠寒士，多所推解。捐俸百余金，修文庙，重建龙津桥，造梅上里道中亭。士论高之。

薛允浩 闽县人。康熙三十五年，由贡士任教谕。倡修学宫，焕然一新。

程雲鵬 莆田人。拔贡生。康熙四十五年任教谕。师范端方，接见诸生虽盛暑必衣冠。淹博著名，尤善行楷。论文讲学，矻矻(wēi)不倦，为所拔者多联蜚去。卒于官。

方子侗 号知庵，侯官人。康熙五十四年，由贡士司铎德

邑。见学官两庑剥落，捐俸倡修。黜淫辉煌。置祭器。手辑《圣庙祀典》四卷，复刊《课士录》，鼓励生徒。榜眼邓启元、进士王必昌、举人林应祖，皆其所培成也。才识练达，凡有关学校者毅然肩之。雍正元年，改授兖州巖阳县丞。

论曰：“宦以名称，从其绩也。无绩可纪，将等诸旷官，又何名之！有邑自五代置县，秩官姓氏，且阙弗可考，固无遑问绩矣。宋时官斯土者，志若列眉，而三百四十年中，名宦仅传县尉陈靖一人，斯其缺略可胜道哉！夫盘根错节，所以别利器也。德固岩邑，自明迄国初，几经兵燹，继以水旱疾疫，非赖有冯、邓诸人，生聚教训于其先，崔、和诸人，维持调护于其后欤？予翻阅旧志，因博访故老，按其政绩之卓卓者，得若而人。或以慈祥称，或以廉平著，或以才干显，或以文学彰。要皆大有造于斯土者，以云名宦，庶无愧矣。纪录之余，心焉仪之，犹想见当年卓、鲁<sup>①</sup>诸君子也。”

## 忠 烈

### 五代·唐

郑昭祖 硕杰人，继颜仁郁为归德场长官。迁郡司马，力劝闾王归顺。宋兴封为翊顺侯。知县事陈居方为之记。配祀颜长官祠。

## 宋

苏十万 善均里人。钦之裔孙。宋亡，破家募义兵拒元，屯驻天平城、罗城诸山，后战败于水府。被刺挺立不仆，血渍石上，朱殷不灭。邑人建水府庙祀之。降乱题云：“不负心，顶天做去，大丈夫，一呼十万，何妨称兵、称贼、称霸、称王？”邑进士李道泰为对云：“肯回首，立地便成，好男子，百炼千回，自是可鬼、可人、可仙、可佛！”邑令鲁鼎梅吊以诗云：“十万横磨剑气吞，英雄成败未须论。一拳石染生前血，几笔乱游死后魂”。

陈蔚 清泰龙山人。统军与元兵战，败于永春龟龙桥。既被害，犹奋身马上驰归，至南关堕其首，过东关，身滚马下兀立。邑人即其地各立庙祀之。

## 国朝

黄琮 江南江宁人。顺治三年，由拔贡来任知县。明年九月，南寇庄廷书、张益率众万余围困县城。焚冲霄塔、云龙桥，撤学宫。城中食罄茹草，守将弃城遁。琮不屈，死之。

王世爵 榆林人。提标后营千总。顺治十四年三月，与后投诚总兵林忠，战于螺坑，力尽死之。葬南关外接官亭上员山。邑令鲁鼎梅修其墓。

论曰：“为臣克忠，分也，诿以死生论哉？而见危授命，士之大节立焉。邑之以忠烈著者，或劝逆效顺，或尚义勤王。生而为英，死而为灵，宜其庙食勿替也。若黄令君节比睢阳，王千总

尸裹马革，其身虽死，其气犹生。表而章之，与日月争光矣。”

## 治 行

### 宋

林 洽 字济叔。事亲尽孝，有文名。淳熙丁未第进士。知福州闽县，政尚廉勤。通判镇江府，未至卒。

林 瀛 字广叔，洽之弟。庆元丙辰，以明经第进士。初知莞州东莞县，政绩最诸邑。以荐召除监左藏库，迁国子监簿，知汀州，卒。

苏 洸 善均里人。以父钦荫补官，为赵汝愚、张栻所重。历知雷州。百姓欢迎，歌曰：“苏使君，来何晚？使我夜不寐，朝不饭”。秩满，寻移封州。首请减放丁米及经制无额之征。改辰州致仕。

### 明

陈 灏 字达州，邑尤中陈吴人。成化二十二年，由岁贡司训曹州，丁艰服阙，补从化县训。肃学校，定课程，所取士多登第。志行廉洁，致仕归，囊橐肃然。长子中立，学问渊奥，尝从蔡虚斋讲《易》。膺嘉靖三年岁荐，授仙居训导。师范端严，人称“乔梓儒宗”。

涂允宽 字畏吾，小铭人。由拔贡授江西武宁训导，寻升巴东教谕，课士有声。擢四川夔州府教授，署大宁知县两载。爱民



如子，宦橐风清。斋厨供给外，惟左右图书而已。升王府长史，卒于官。

陈伯容 字仁卿，尤中里人。嘉靖岁贡入南都，授潮州府训。以课士最绩，迁江西南丰教谕。捐俸葺学宫，造祭器，列宪嘉之，升南丰县令。冰槩自矢，年老解绶归，足不履公庭。以寿终。

陈石 字阳东，大卿乡人。以岁贡司训电白。练达精敏，有匡济才。邑旧无城，屡经寇乱，民遭荼毒。石请于邑令邓景武，筑城保之。培科荣、凤翥二文峰，劝教乡族读书，自是邑多文雅。

林榕 瑶台乡人。以拔贡授缙云训导。性廉介，乐周人急。时庠士樊应科，童年贫困，榕赏识厚待之。后樊巡按本省，往候之，著苧衣公服，门不为通。榕俟其出，呼之曰：“樊斗山！”樊惊喜，下舆迎入父事之，赠遗俱不受。有殒人者餽五千金关节榕，叱之曰：“杀人坐偿，律也，能为女免乎？”樊为表其坊曰“高雅儒宗”。

林栋 字隆甫，邑中夏林人。天性笃孝，父济领岁荐，入北雍，归，卒于邳州。栋方童稚，匍匐号突，迎丧归葬。载(qióng)苦读书，就试屡冠多士。邑令延而宾之，不私干请，以明经得选令，时相欲为营好地，笑而谢之，竟得乐会县。值粤寇猖獗，抗守孤城，设奇布伏，巨魁歼焉。当道妄杀要功，栋严捍御，手释平民千余命，全境获安。竟以抗忤被逮，得白，钦赐金五两，升荆府审理正，不赴。归，囊橐萧然。闭户著书，

怀樽接客林下二十余年，寿八十。

林 枢 字中星，栋胞弟。少有气节，多才艺。岁荐入都，相国王锡爵、申时行、许国见而奇之，咸延教子弟，有事咨焉。授南陵令，置驿传，建桥梁，却例金，恩威并著，上重而下爱之。有《骊歌集》。致政归，杜门课子，与亲朋吟咏，有《一睫》②篇。子七人，燦、焮最知名。

王 雍 字在雲，清泰绍卿人。受业李文节，甚重之。以明经宰浙之雲和，清慎自矢。五载，调富沙，所首取士悉登第，时服得人。归田里二十余年，为乡祭酒。邑有利病，辄亲别白于令。复自置义租数千斤，以供宗祀。

李雲阶 字太堂，繁之子也。生阶晚，爱之，戒勿苦读。阶密置灯幕中，终夜不辍。又不欲令离膝下，竟密负笈从王都昌学。继师李文节，成名士。万历丙申，应明经。丁酉登顺天榜。始宰华容，至则捐俸建刘忠宣祠，恤黎公淳后，各为置祀田若干顷。出冤狱，按巨憨，侃侃不挠。历四荐主，爵已署部，竟以多口量转吉安。同知邹兰皋、郭青螺极器重之。署府摄邑篆者凡九，皆大著声绩，尽却例金，又出宦俸为民偿逋。及代湖关使者，复却例金五千余。台司交荐，以忤时不乐仕。归，课子立社会文，评论不倦，有书十种行于世。子乔揖，英山知县；次子乔霖，上林苑丞；六子乔钟，最知名，庚子岁贡。

章时学 字尔行。万历丁酉明经，任绍兴府训导。端士习，正文体，寻升雷州徐闻县教谕。课徐犹课绍兴也。道宪称其德量汪涵。曾署徐闻县事，有白以用机智者，正色曰：“国家以无事

为福，机智何为？”后升教授，辞不就职。赋诗见志。

郭维翰 字屏叔，号钟西，万历庚子举人。初任临江府推官，署四县篆，所至皆有声。秩满课最，升广西庆远府同知，寻补扬州府同知，廉节端谨。升岷府左长史，晋阶。解绶林下，缔友赋诗。怀宗登极，诏天下，为魏不仕者超迁三级，翰与焉。当事趣其行，恳辞。风疾不起，寿七十有三。

柯应凤 汤泉人。赋性恬淡，笃志攻苦。与人交，浑然不露圭角。以岁荐任连江司训。课士衡文，群推冰鉴，事上接下，咸有矩法。诸司道亟称之。卒于官。

林 燦 字伯基，枢之长子。敏达宽厚，德量汪涵。试辄冠军，以明经授长洲司训。长洲故名士渊藪，燦所甄别，舆论翕然。文震孟称为天下长者。升东安令，矢志中立，不阿权贵，大著风采。罢归杜门，不与外事。年七十七卒。有《茂苑杂记》、《都荔山房诗集》。

赖 垓 字宇肩。天性孝友。九岁能文，淹贯经史。由恩选捷北闱，第南宫，以才名为天下重。初任浙之平湖县，矢志冰檠。新学宫甄拔寒畯，却湖税溢额银，节省海塘滥费，汰冗役五十名，峙义廩十四所。复修梁庄，创储困，置义冢，以革火化陋习。厘剔私馘四十万，核清军产百余亩，纾民贍士。吏治文学，独冠两浙。召对称旨，擢翰林院简讨，转右春坊，命侍东宫讲学。给假省亲，得册藩之役，晋阶宗伯学士。未及还朝，值鼎革。遂结庐琼溪，徜徉诗酒。当事交聘，坚以疾辞，因自联山楼以见志云：“皎月高悬萝薜夜，苍天长放蕨薇春”。有文集若干卷。

子二：钐、钺。

## 国朝

邓孕槐 号台生。前明庚午举人。年二十五，熙朝定鼎，授京李，治狱明慎，多平反，慈惠廉直，有古人风。擢御史，按江南上江，利病纤悉皆上言，辄得俞旨。按畿南督屯田，时真定等十四州县，兵乱之后，逋逃者多，丁产貽累，乃上痛哭一疏，得旨蠲免，民获更生，以“龙图”称之。内艰归。年甫服官而卒，世咸惜之。

李道泰 字子交，号藿思，县东沙堤人。博学善古诗文。下笔千言立就，皆出人意表。第顺治辛丑进士，授建昌令。奖孝行，振寒素，革陋规，蒲鞭示儆，而民化之。康熙甲寅，军政倥偬，建昌水陆冲途，联船过马，备极劳勩。吴逆倡乱，啸聚迫附。泰身率兵壮，设法驱逐，城赖以完。量移郡丞，冷署冰厅，家人团笑如寒士，因辟地结茅于紫霄峰，颜曰“白厓”。时论方之“白李草堂”。尝赉俸过鄱阳，逆浪折舵。胥役鼓小艇请避，却之，曰：“同舟共济，岂吾独安耶？”竟不动。及擢滇之开化，下车即除供应，捐金砌路，为夷民建义学。时边徼新拓，镇营火伴及里中养卒多湖南孩童掠卖者，泰惻然，详请报册放归，仍量给以资斧。楚人至今尸祝之。卒于官。所著有《纓溪文集》，又集古十八卷，曰《箴书》。诗有《饗草剩园》、《四草南州》、《耳鸣集》、《滇行草》诸篇。

温舜华 字启姚，科荣人。学博行修，由岁贡司训罗源。署

永福学，升崇安学教谕。首葺自甘，殫心课士，贫乏者矜之，所至群沐其德教。年七十九。著有《蓬莱亭集》。

林汪远 字希士，号涵苍，桂阳人。与堂弟模同登康熙丙午乡榜。嗜学绩文，力追古雅，尤工声律。国朝诗选，多登其作。宰浙之雲和，政简刑清，每与诸生课艺赋诗。尝绘《文庙植桧重荣图》，序而颂之，道鬱高古。丁内艰，服阙补四川南部知县。慈惠明允，以老致仕。著有《大学儿说》、《燕回》、《闲史》、《诗删》各集。

林模 字靖若，号周木。年二十一举于乡，二十八成进士。归，值耿逆倡乱，贼党横行掠杀。模集乡族，谕以大义，筑寨据险，约束戒严，里社以安。选授湖广兴宁县，精勤廉敏，力为百姓造福，以忧归。士民勒石讴思。服阙补广之普宁。庚午乡闹分校，所获皆知名士，群贺得人。模曰：“艺文末事耳！吾儒实用贵泽被苍生也”。在任规画，大小必亲。逾年以劳瘁致疾，卒于官，年四十六。性聪颖，工诸书，尤精画事。片鳞寸羽，人悉珍之。著有《四书讲章》、《诗、书、易、解义》。

谢青锺 字字东，号斐草，邑东侯池人。少颖悟，博览群籍，下笔如有神，尤善草书。康熙壬子举于乡，授浙江瑞安知县。革加耗，省徭役，却苞苴，一以清白自持。六载，卒于官，宦囊萧然，士民哀慕，立祠祀之。著有《越山十掣》、《怪斋吏误》，诗、词、文集。

王维斗 字枢生，号蓼思，东西团人。康熙丁卯，领乡荐，任河南临漳令，苞苴悉绝，狱讼持平。凡有利于民者力请行之，

加惠孤寡，尝代赎难女数十人。捐俸拓学官基，恢其旧制，科名振起，列宪嘉之考最，遂解组归。杜门却扫，风节清高。

陈应奎 字娄先，号壁东，高卿墨园人。工藻翰，精岐黄。登康熙丙子乡榜，任直隶之南乐。邑例有填宅并果蔬银盈千，奎至却之，悉以鼎新学官。复革滥派，所有奉公采买，使民自供，丝毫不染。寒者衣之，病者药之，捐俸置漏泽园数十亩。岁乙未亢旱，请宪缓征者再；明年又苦蝗，斋素以祷，蝗乃缘秆尽毙，民得有秋。尝运米通州赈济，力争高概大斛，事闻，宪黜之，命如议发账，实惠广沾。莅任七年无死狱，士民绘像以祠。课最内升，投簪终老，年七十八。著有《清音文集》、《武夷纪游》等编。

颜天球 字嗣图，号象岩，瑶市人。康熙乙卯举人。忠诚淳慤（què）。授湖广兴宁知县。瑶、苗杂处，素梗化，球以诚抚之。首革重耗，苗民率服。旱魃为虐，露宿以祷，甘霖立沛。解任之日，士庶遮道扳辕。

李淑度 字延策，东濠人。康熙戊子副榜，授直隶赵州判。公余与诸生论文赋诗，陶然自得。州多盗，奉署州篆，弭之有方，民赖以宁。卒于官，年五十八。

徐高明 字恒总，号克之，儒山人。乾隆戊午副榜，授广西万承州同。甫至，除九甲滥派，禁敝俗。男女答歌者以和奸论，亲死焚尸及鼓乐者以不孝论。夷民向风知义。奉委款安南贡，私献悉谢绝。卒于官。

论曰：“士当居穷草茅，坐诵书史，恒恨不见用。一行作

吏，率碌碌无所表见，岂尽言易而行难？大都以官为家，而不留心民瘼也。邑之学古入官者，敦古处，尚廉介，自立朝廷外任，风节治绩，翼翼隆隆。呜呼，可谓不负所学矣！”

## 孝 友

### 宋

张兴渭 杨梅上蒲泽人。性至孝，母杨氏病笃，百药弗治，乃吁天割股杂粥以进，病立愈。淳祐六年，里人状其事于县，立旌孝坊表之。祀忠孝祠。

郑师孟 字醇冲。操履端庄，事亲教子，睦族矜邻，成为乡人法。三世同居，不求闻达。

### 明

王三聘 清泰绍坑人。家素贫，对亲必怡颜温语。母吴氏病症，医久罔效，乃焚香祝天，割股一脔和粥进之。母怪其味，聘跪劝使尽，母疾顿愈。后行微跛，人方知其故。金请于县，旌之曰“孝敬能格”。祀忠孝祠。

凌天德 杨梅上团人。敦孝友，乡称长者。洪熙元年，以子辉贵赠监察御史。

涂应昌 字肖吾，邑庠生。四岁失恃，随父夔州长史允宽，历任江西、湖广、四川十余年。父卒于官。继母许氏，巴东女也，怀娠三月，有以途遥惑之者。昌泣慰曰：“天祚母德必生

弟，绕膝有双儿矣。”竟与母千里扶椽归。色养五十余年，弟歿，视侄犹儿，胞叔乏嗣，以父事之。训子重光，孙有洛、有泮，皆游庠。万历二十三年，邑令锺梦寅、教谕张潮请加冠带。赠扁曰“望重龙浔”。

周大烈 邑庠生。天性孝友，色养父母，老而弥笃。嘉靖间，胞叔檀被寇擄，秘计出之。训子孙成名。享年九十有二。

李繁 在坊英山人。性仁厚，富而能施，析箸时让肥居瘠，友于著称乡里。待以举火者百数十人，有叩门余粟者，繁方食，投箸而起，子弟请俟食毕，曰：“人犹待粟而炊，吾独忍饱乎？”嘉靖间，绿林窃发，繁被获，礼而归之。好善不倦，独淡视功名。李文节尝目为羲皇上人，为作《李公传》。以子雲阶贵，两膺锡命。孙九人，彬彬文学。寿九十。

林谔 字泰心，梅上桂阳人。风度恬如，笃志好学。食饱后，八子皆令读书，不屑治生产。尚义乐施，节用所余多推恤。家近千指，雍穆藹吉无间言，子孙群列庠序。每诫之曰：“若辈后贵，慎无多收童仆。”第五子鹏搏膺乡荐，孙汪远、模，同登国朝丙午榜。模举制科。模子昱，亦登科。

## 国朝

徐瑾 字觐甫，在坊儒山人。有声庠序。母林氏病笃，割股调羹以进，病立愈。永春令骆起明，以“孝友流芳”褒之。知县王宠受请于宪，奖为“奇孝可风。”祀忠孝祠。

邓濂 号济寰，新化涂坂人。少英敏。移居入郡就学，每



试冠军。事继母，抚诸弟，以孝让闻；交友然诺不苟，郡邑以德行推之。次子孕梓患疫，设饌以祭，夜中恍惚若有所见者，寻闻声曰：“公厚德，次君无恙也。”其行谊信于鬼神如此。岁荐后，即杜门。以子孕槐贵，赠监察御史。年七十卒。

林鵬搏 字潜卿。敦友于，兄弟皆为庠士，搏独代营家政。壮年乃励志读书，入泮大著文名，屡试第一。掇科后，益懋行谊，和易谦冲，人号为“菩萨”。丁亥戊子之乱<sup>③</sup>，盗贼不犯其乡，闾里赖以安。熙朝授武定州，以水灾去任，宦囊萧然，不能为归计，青、齐缙绅争客之。数年，霍宪副来闽，始携之归。晚工诗，精于理数，以客游棋酒为适。年七十，自撰行实，高吟五言律一章而逝。

李乔锺 字彭又。幼颖悟。父雲阶，尝集庠士与子弟校艺，文完即送入闕。锺时方七八岁，默记其文与评点，出以示人，闻者叹异！成童入泮，就试学使，三压其偶。丁戊之乱，贼屯琼山，夜取其父柩质金，锺中宵挺身就贼，以死求赎，贼义之，护其柩令归。一时郡邑名士，皆乐与游，后多贵者，锺处之如素。诗文行谊，有古人风。膺岁荐第一，年甫五十而卒，人皆惜之。

谢犹龙 字颺儒。少贫辍读，治陶、猗业，致素封。旋感愤复学，博涉群书，补弟子员。天性孝友，经纪所得，与兄弟共之。知县金丽泽扁其堂曰“克敦天显”。二兄歿，抚诸侄，子姓数百指不析箸。仲兄子掳于贼，拷饷惨虐，龙入营泣求身代，贼义之，得释。知县王宠受嘉其行谊，将请诸学宪，拔其子入泮。龙曰：“有伯氏长子在。”竟以与侄。好施济，顺治末，迁民流

高，倾资以赈，多所全活。太史赖垓、武定守林鹏搏，诗酒相过，甚重之。卒年七十七。子青锺举于乡。

林朝陞 字俞卿，谥第八子。孝友无间，学博。甘天毓扁其居曰“孝友堂”。性仁厚，持躬接物，恂恂恬退。临大事，辄义形于色。□□□□□□□□□□□□□□□□□□□□鼎革时，劫掠者过其乡，相戒曰：“此仁人里也，毋惊犯。”适都督蔡调羹来邑镇抚，民多观望畏缩。陞毅然登堂，侃侃言论，羹为动容加礼，于是远近望风归服。甲寅耿变，陞以大义晓里族；立条约，无一人入伪党者。文学渊博，尝辑元墨三十余卷。教子模成进士。著有《〈四书〉、〈诗经〉蒙述编》，老嗜《易》，兼通《内典》及《星历》诸书云。

刘 钰 字式侯，尤中里上格人。顺治己未海氛起，随父自明侨居田邑。父为贼所掳，禁于西山头寨。钰倾家集乡勇三百余人，将攻贼，有以无济止之者。钰曰：“吾父命悬贼手，不济即以身殉耳”。遂于七月初七夜乘贼聚饮攻之，竟出其父于贼禁中。人咸称其孝。

黄家焜 字慎斋，清泰湖山人。年十二，父廩生遂权应试三山，母林氏病，焜焚香叩祷，衣不解带者三阅月。一夕，母病急几死，焜泣抱号天，母顿甦曰：“适有一女人，教以当归、附、芎可治。”遂知方服之，果愈。迨父母歿，售产以办丧事，每风雨辄号哭于墓。邑令和盐鼎赠扁曰“山谷遗风。”

连城珺 字玉葆，甲头人。翘枝子，出继于其叔翘柱。事嗣母郑，色养终身，居丧绝荤哀毁。寿七十七。

徐士万 字咸甫，儒山人。康熙甲寅，海寇④据永春派恫，以千计者，徐姓七人，万叔侄居其四。乃独往，拷掠无完肤。伪知县郑诱之曰：“呼尔叔出，吾免尔。”万佯诺，而密令诸叔远遁。越日，郑怪其不至，万厉声曰：“某已在网中，安可令诸叔同入死地乎？某但以身死耳。”郑叹其义，释之。

陈文灼 字贞甫，高卿墨园人。父素蕴，口不言阿堵物。每省试及北上，灼计所费分厘铢两，大小包裹，以供携取。父病，侍汤药，衣不解带者经旬。母老丧明，日含药舐之，复能视。生平居心宽恕，而嫉恶甚严，里有不善者，常恐灼闻之。人谓其有太邱风。年八十四，无疾而逝。以子应奎贵，赠文林郎。

赖源 字绳其，翰林院右春坊垓之孙也。动必以礼，性尤孝，谨事母黄氏，朝夕必问安，凡膳饮躬治之，不假手家人。出告反面、虽溽暑必盛饰。父墓近道旁，过之辄登拜，不因风雨懈也。以康熙丁酉副榜应顺天试，卒于京，闻者感叹。

邱孔威 邑南关人。家贫服贾孝养。父歿，日夜哀毁。母陈氏，老沾蛊胀，卧床十载、百药弗效。威椎心泣血，计无所之，密与室李氏持香祝天，割股调羹以进，胀旋愈。复享寿十余年，乃卒。诚孝所格，蛊亦不能为害。邑人至今称之。

赖巽 字同人。父暑，被寇掳，挺身请代。贼始欲并囚之，感其孝放回，乃厚予贼金赎父归。济人窘迫，无所吝惜，以子铨，赠修职郎。

郑由吾 字展英，石杰人。邑廩生。少失恃，父鍾爱之。善事继母。长兄早逝，抚孤侄及异母弟，爱养有加。尝以厚资付次

兄外贾，本蚀尽无问焉。雍正丙午赴乡闹，梦家悬灵座，痛哭，即欲驰回，同人固止之。出闹，父凶信至，星夜奔归，号恸血下。居丧断荤，不入卧内者三年，竟以哀毁骨立，数载而终。

陈南金 新化里人。笃友于，弟夭，弟妇继亡，抚三岁侄如己子。比长，令援例入雍，割腴产与之，自居其瘠。又充丁银，以广祀田。邑令黄南春延为乡宾。寿七十九。

章文燧 字延明，尤中路口人。天性纯孝，盘匱必躬奉。亲殁，哀毁逾节，葬祭竭诚。墓近道侧，往来则具衣冠泣拜。孺慕独挚，事死如生，里人魁之。

陈高策 字夙苞。邑庠生。少失恃，事继母郑，终身孺慕。与异母弟太学生开楚，式好怡怡。温陵按察使陈高翔尝与游，甚重之。卒年五十一。以子义炽，封登仕郎。

论曰：“孝悌之道，根于至性，发为至情，即孩提能之，固庸德也。极其至，则通神明，光四海，虽尧舜亦不外是，诚为仁之本哉。邑乘所纪，居常则菜衣姜被，和顺蔼然；有故则泣血椎心，致死奔救。所遇不齐，其孝友一也。书之于册，足以见孝子悌弟之用情矣。若夫割股之行，圣人弗尚；然怜其愚，原其志，传其事，亦足以愧夫自私其身，而不顾父母之养者。”

## 义 行

明

张观盛 字虚谷，汤岭头人。少游庠，不窥城市者三十余

年。有江右书客宿其家，遗金二十七两，张于晒床时拾之，不启封，藏之。后二年客复来，询其逾年不至之故，以失金告。按其封数与所拾同，悉还之，不受谢。客泣拜而去。历举乡宾辞不就，至九十有五岁始应之。寿九十七。

林宗源 在坊瑶台人。幼失怙恃，姊长娘承父命抚之，遂不字终其身。源事姊如母，慷慨好义。邑雲龙桥圯，人苦病涉，捐金二百两倡建。详载《雲龙桥记》。又助建永春东关桥，远近咸嘉其义。子球，以明经司训曾城。

涂洪三 龙中实丰人。勇略迈众。嘉靖初，汀、漳盗流劫各县，到处杀掠，贼仅九十三人，猖獗莫御。三年冬，各县督兵会剿，贼奔邑之小尤中团。兵官追及，贼遁入民黄舜大家。洪三度其当夜走，独持短兵伺于要路，尽歼之。知县梅春以状闻，授职指挥。洪三卒，贼崇小尤，乡人迎其柩，葬以镇之，崇遂灭。今岁时享祀焉。

欧阳发新 邑治人。宅在北门之外。知县张大纲移城时，新父监生成请于官，厚犒其工，弯拱回抱。后秦令霁欲以其宅为学官，成犹不忍，请于上台。成卒，发新以田地十二亩余并输学官。今春秋颁胙其家，复以旧泮池改田一丘，畀欧耕佃，示优恤焉。

赖光 字□□，孔教从侄。以岁荐司宣城训，迁仙游教谕。寻升琼州府教授，署儋州府篆九月，不携一钱，所至有声<sup>⑤</sup>。其在琼也，有府官为宪斥去不能归，将鬻妾，光出俸金二十两助之。家居三十余年，明修炼，释《黄庭》，刊《感应篇》。寿八十，无疾而终。

郑扬 硕杰人。昭祖裔孙。敦孝友，励志节。子沛登第之后，益矜名义，不肯私荫亲族以累乡里，人多德之，为立生祠。封户部主事。年八十终。

陈一经 字仰溪，彭溪社人。励志节，尚名义。时赋役繁重，里民多逋欠，经倾资支撑，乡闾以安。邑令桂振宇稔其事，以“奉公勤王”扁奖之。

曾汇 字鲲海。早岁游庠，慷慨有远识。邑民半佃屯以耕，时泉郡豪干收租肆虐，百姓流离，有革斗姥之说。南安乡民，聚众以争。汇闻之曰：“是将邻于乱，不如诉以上闻。”捐资助佃民周龙珪、寇十六等叩阍，事下抚按审奏，患由是息。各佃岁省浮费数千石，乃买地寿明旨于碑，建府县生祠，计汇前后费千金矣。未几，南安民果不靖，邑以冤伸，安堵如故，人咸称其革弊之功，尤服其有止乱之智。

周龙珪 邑苏洋乡人。与霞寮人寇十六气义相高。会郡城宦干收屯租，额外酷剥，曾汇议诉于朝，当得白，众莫敢往者，惟龙珪与十六奋身赴京，绘图叩阍，极陈肆虐、流亡之惨。朝廷为之感动，下其事于抚按。由是屯法一清，民害以息。当二人之同赴京也，关津万里，潜身微行，惟恐怀谋截杀，众冤仍沉。迨事理，龙珪几死仅免，而寇十六竟遭害，尸首无存。于今受屯而耕者，犹感泣二氏之功云。

## 国朝

王业煥 字韬光。天崇中<sup>⑥</sup>，海氛肆起。自同安高浦所弃家

产入德，囊携千金，有告贷者悉予之。清泰、泱口诸乡，咸称长者。高阳义士章毓材见而奇之，妻以女。鼎革初，邑令某廉其殷实，勒充库吏。是时县官诸日用费皆取给于库，若钱粮起运不敷，辄借解不必尽偿。居三日，遽呼算账，煇叩曰：“库无一钱可算，吏止现银百，债券千，尽则请配徒耳”。令颌之，即日放归。煇持券焚于云龙桥之塔岸，祝曰：“非能市义，但祈免祸”。后有来偿者却弗受。缘是落魄，好施不倦。贼陷县城，东门磨石岭尸相枕藉。煇密荷畚往埋数日。尸腐难近，减食募邻同往。有告贼使收煇者。煇笑曰：“死者有灵，吾知免矣。”邻不敢与俱，煇仍独往，贼亦不之罪。

赖 铖 字□□。道义自凜，足迹罕至公庭。由恩贡授别驾。董葺学宫，焕然一新。乙卯邑遭寇乱，族众濒危，铖捐资营救，室庐坟墓，得以无恙焉。

郑振郁 字崇斐，在坊石杰人。仗义轻财。甲寅<sup>⑦</sup>之乱，山海啸聚，破资集乡勇，捍卫村井，远近数社，悉赖以安。时率义勇，防护邑城，有刘姓者，为仇人所缚乘乱将杀之。郁闻挺身往谕，不解，自持百金以赎。又有泉郡人见掳于贼，闻郁好施，诡称有银寄郁家。贼令往取，值郁外出，郁妻陈如数与之，得不死。比郁归，知其伪也，则曰：“救人不妨勿问。”既清晏，邑令启当道，欲叙以官，辞不赴。秉性孝友，父母安厝后，日必省扫坟墓。与兄文学振声、弟明经振世笃爱，所置产悉均分，无入私囊。晚年，邑令高其行，请赵宾筵。寿八十三。

周士极 小铭人。顺治戊子，绿林蜂起，躬率义兵剿杀，乡

閩以靖。蔡、韩两镇以恢复县城，极与有力，款宴之。当王、傅<sup>②</sup>二令时，邑有许姓者，负重罪，赍千金求救，极为营解获脱，却弗受谢，人称其义。

许雲祥 字奕唐，高卿人。太学生。慷慨好义。江南提学邵嘉允兄弟微时曾泊其家，厚款半载。康熙甲寅海伪镇攻涂坂寨，四顾无援，祥赴伪为质，周旋输餉，寨赖以完。邑令和盐鼎擢大理寺去，值閩变<sup>③</sup>道梗，内眷留邑四载，祥常供馈刍米。丙辰邑遭水患，募埋溺尸二百余，义举足称，邑人能道其详。

李寅球 涂坂人。有勇略。康熙甲寅，海伪镇黄雲率众二千余，攻涂坂寨。时寨内不满五十家，各寨来援者又多观望。球力守孤城，炮无虚发。雲兵死伤二百余人，攻二十日不下。后以各寨援兵溃，乃纳款以安乡间。

连宏揆 字时叙，上林甲头人。沉机善应。值閩变，山海交讧。揆连络十一寨，指挥有方，贼不敢侵，诸寨倚之。海伪镇逆派迫逼，揆挺身赴贼营请缓，贼为改容施礼。尊美有寡妇欠餉，贼将梟以威众，揆怜而赎之，不问谁氏。其义气如此。

李公培 字望子，县东沙堤人。康熙己酉武举。仗义任侠，不矜曲谨。乙卯岁，海寇索餉，遣伪官重刑追呼，民不堪命。培毅然奋臂，大集各乡义兵，分设部伍，密约城中居民为内应。行至半途，旧病暴发而卒。论者惜之。

李 绿 字储奎，蓝田人。康熙初，与族人游邵武，遂家焉。寅卯之乱<sup>④</sup>，邵武县令某为贼所胁，绿力护之，致刍米贖其家。总兵乐灿招安，有万年寨坚拒，焚之，逃出二百七十余人，



灿恐复叛，将尽歼焉。绿与灿有瓜葛，闻知奔救得免。又尝救其临斩部将二员，兵丁一人。有持金谢者，悉却之。后挈家归，行李萧然。

陈继贤 字复敬，尤中人。甲寅<sup>①</sup>耿变，集乡勇拒之。大田有林姓者，请为援。偶值演炮，殒其丁壮。林惧，以金五十自贖。贤正色曰：“死生命也，可取财乎？”却之，惟令备棺衾以殮。人咸服其公正。

赖 暑 字俞佩，桂林人。邑庠生。好施济。涌岭、鍾山之间，道路崎岖，捐金筑砌。康熙寅卯<sup>②</sup>，山寇高成才肆虐，掳蒋志廷等十数人，暑与焉。暑啗寇以利，且出，义不忍独归，乃代蒋等纳金于贼，皆得释。人高其谊。

徐其勋 儒山人。邑庠生。布德好义。康熙庚申米贵，食客到门，勋礼款四月余无倦意。尝过南洋，见饿仆者，给棺殓之。又尝出仲春村粟三百石，以周乡邻之无告者。

徐为邺 字秉书，上林儒山人。太学生，拣选州同。积厚而能施，乡间待以举火者数十家。康熙丁丑，岁饥，饿莩载道，邑令施粥以赈，邺捐米谷，继其不足累月。岭边及溪头林羊肠崎岖，邺开砌之，易险为平，至今往来称便。

张隆腾 字丽珍，高卿上岩人。邑庠生。康熙丁丑，邑多饥人，煮粥赈之。丁溪桥水圯无常，屡修之，筑砌道路，以便行人。族叔伶丁，为之婚娶。他如施棺焚券，义行甚多。

林 曷 字焕文。邑明经。慷慨好推解，有告乏者辄助之。子、丑<sup>③</sup>荐饥，乡人多菜色。曷赆然曰：“人饥而吾独饱，桑梓

安在？”力赍恤之。至不能支，复转贷以济，全活甚众，乡人德之。卒年五十有五。

赖鼎浚 字幼瞻。邑廩生。好施与，贫乏无告者，入其门皆济之。修理桥道，施棺木，未尝少靳；排难解纷，人皆允服。乡评重之。

陈洪图 字若龙。郡庠生。康熙辛卯，漳盗陈五显率党三千，剽掠乡庐、乡民逃窜，有二人被贼所获，图倾资赎归。贼拥攻永镇寨六昼夜，设奇防御，杀贼甚多。及贼溃散，邑令王调元详咨咨部给银一百二十两，旌其功。

陈洪琏 字若琪，尤中里陈吴乡人。敬礼师儒，矜贫乏，施棺衾，无吝惜意。和乐溪险，出镵筑桥以济。又砌石构亭于太保岭，往来称便焉。寿七十有五，无疾而逝。

连士僚 字隆师，上林甲头人。邑庠生。邑修文庙，建云龙桥，当途每委重焉。僚尽心董理，罔辞劳瘁。不足者捐资补之。闾里贫乏，多所周给。寿七十七。

论曰：“罄囊利物，轻生济人，游侠之道也。苟行之而当，则有无相通，患难相济，太平亲睦之风于是焉，系古道也。侠云乎哉？邑之尚义者，不乏其人，或挥千金而不惜，或出死力而不辞，高义雅怀，桑梓赖焉；若夫拾遗而还，焚券而却，则又矫矫乎廉让君子也。缓急人所时有，传其慷慨之行，足矜鄙吝之俗云”。

## 校 注

①卓鲁：卓茂、鲁恭。均为东汉时循吏。《后汉书》有传。

②噉：系“噉”之误笔。

③丁亥戊子之乱：指顺治四年五年，尤溪王继忠袭县城，九月南安庄廷书、张益又率众万余围县城事。（见民国版《德化县志·武卫盗警》）。

④海寇：指康熙甲寅（1674）年郑经入永春至德化县事。（见同上）

⑤声：乾隆刻本为□，民国版补“声”字。

⑥天崇中：即天聪、崇德年间（1627—1643）为清太宗年号。

⑦甲寅之乱：指康熙十三年甲寅（1674）耿精忠响应吴三桂，据福建结郑锦、郑经为授事。（见《中华二千年史》卷五中第一分册“康熙之统一”）

⑧王、傅二令：指县令王宠受与傅嘉谟。（见民国版《德化县志·职官、文》卷十二）

⑨闽变：见“⑦”注。

⑩ ⑫：均见“⑦”注。

⑬子、丑荐饥：据民国版《德化县志·祥异》卷十八载，康熙三十五、三十六年（即丙子、丁丑）大饥，知县严居敬煮粥以赈。

（校注 李明志）

# 德化县志卷之十四

## 人物志(下)

### 文 学

#### 宋

苏总龟 字待问，钦从侄。绍兴十六年，太学试中上舍优等第一。三十二年，孝宗登极，恩赐释褐，授衡州教授，累迁参淮东议幕，历广东提举，归再奉祠。有《论语解》及《大学儒行篇》、诗文杂著，衍道南正派，与黄勉斋、陈北溪齐名。

黄龟朋 字益甫，清泰承泽人。嘉泰壬戌进士。除广西朝阳县簿，历梧州推官、廉州教授。所著有《周易解》若干卷。

张元德 精于《易》。以六十四卦再重为《易》书。繇、象、大小象、爻辞、系辞、说卦、杂卦，皆其自作筮法。以土作地盘，匏为天体，中刻木，八面画八卦。初撼得之为下卦，再撼为上卦，视其爻辞以断吉凶，悉验。

陈文叔 字元彬，清泰里人。博物洽闻，文词丰贍，名冠太

学，中上舍优等，后学宗师之。未禄而卒。著有《西笑遗笔》。

张应辰 字绍卿。通经史，负笈从学者，不远数百里。一时名流黄霆发、徐雷闻、林汝作、郑起东，皆受业焉。有《礼记解》、杂著若干篇。

郑起东 字子震，入太学明经。乡校师范肃然，时论高之。

## 明

陈仁山 杨梅中人。洪武壬子，由荐举任湖、岳二州鱼课，提举司，寻致政归。恬淡潇洒，咏歌寄兴，人称其有赵子昂之风。著《湖山野牧》行于世。

余英 灵化里人。幼聪颖，日记千言，辄通大意。年十二，补邑弟子员，督学奇之，难以经史，随叩立应。领宣德己酉乡荐第五人。典试者赏其词锋若凤构，谓必老成之作。及赴鹿鸣宴，见之方总角耳，众咸叹异。邑先达凌侍御期以大就，庚戌公车，劝缓其行。未几，歿于家，闻者惜之！

林珀 字伯器，新化尊美人。幼辄嗜学。隆庆中岁贡，初任连江训导。庠士吴文华试屡蹶，珀首拔之，士论哗然。吴家贫，复赙之。竟捷南官。官至兵部尚书，人咸服其藻鉴。升龙川教谕，寻授罗定州学正，署州篆，致仕归。巡抚孙琮奖其性资诚笃，行检清修。年八十二卒。二子<sup>①</sup>游庠有声。

林俊 字仲谟，枢次子。容仪修伟，顾盼炯然，气节豪迈，广交游。以廩例入南雍就试，祭酒温体仁首拔之，名噪一时。应选州佐，弃不就，归。著有《南再草》、《松鳞草》、

### 《吹映草》诸诗。

黄龙御 字道孝，号新阳，邑西关后场人。食贫攻苦，励志下帷。有《左》癖，善书法，工声律，旷逸清高。以岁荐授寿宁训导，升教谕。所著诗若干篇传于世。

林际春 字宇穉，清泰朱紫人。砥行端庄，赋性恬退，口不道人过短。学有渊源，善对偶之文，尤精行楷。万历辛卯，登贤书，名震都下。授崇义令，升德庆知州。置祀田数千斤，以公子姓，族人德之。

刘五伦 字炳日，尤中科山人。沉潜笃学，甫成童，《通鉴纲目》皆成诵。弱冠，补弟子员，旋食饩。好古文词，尝与太史赖垓、武定知州林鹏搏诗酒往还。以恩选入太学，历试优等，授州判。年五十五卒。

林 榘 字观甫，栋之从弟。早岁为诸生，笃志力学，不喜嬉游。气度闲雅，虽匆卒无迫遽容。不事家人生产。万历以后，士子多背传注，《易》义尤荒。榘精思十余年，著《易经正解》，折衷本义，阐明精蕴，有功后学。明经岁荐廷试，贫不能赴。年八十余卒。

郑 湜 字宇澄，沛从弟。以明经司训汀州，署永定。所至多造就，学者咸宗仰之。升贵溪令，以内艰归。际鼎革，家居三十余年不入城市，屡推宾筵，不得已而应之。老益康矍，日读性理，尝语子侄曰：“圣人暮犹学《易》，况吾侪乎！”年九十一卒。

## 国朝

邓 燥 字夏铸，孕槐子。幼聪颖，弱冠入泮。顺治戊子登贤书，为闽泉开运首举。折节嗜学，无贵介气。好苦吟，寒暑不辍，性灵尽②，卒以不寿。人谓有长吉之癖云。

陈素蕴 字思泰，号旻熙，高脚墨园人。博学强识，寒暑手不停披，遇试辄居首。社草试牍，传诵海内。性廉洁，不谈阿堵物。奖诱后进，有片善赞扬不去口，一时名士林鹏搏、谢青锺皆出其门。首领熙朝恩荐，考授通判，退老不仕，年七十五卒。孙应奎，康熙丙午③登贤书。

林朝荐 字受卿，谡之六子也。垂髫就试，邑令林大儁拔冠德军游庠。敦孝友，与兄鹏搏论文考义，互相师资。喜引掖后进，执经问字者经百里而来，自是深山僻壤皆知读书。复与弟朝陛结庐潜山，著潜山楼诗文行世。年甫三十六，相传得异人授以丹，预知死期，无疾而逝。妻庄氏，矢志抚孤。次子汪远，康熙丙午举于乡。

方金泰 字士亨，螺坑人。潜心学古。弱冠饫于庠，试每前茅。善行楷，喜吟咏，所过名胜皆留题，有《仿洛草》若干篇。膺岁荐部檄铨选，辞不就。寅卯之乱，巨寇啸聚南埕，远近震慑（shè）。泰素有誉望，恒见礼焉。乡民被掠拷饷，有赖其周全者。

郭振世 字崇猷，石杰人。有文名，在庠两举德行，物望归之。领岁荐，署令张嘉善表为理学儒宗。

李 肅 字梅子。幼负别肠。肆力于古，博极群书。补弟子员，屡次夺茅，恩选入监。肄业三载，学益进。不就职。归每探奇选胜，辄拈韵挥毫，玄意渺旨，大有晋人风致。著《廬松编》、《燕吴游草》、《匡庐近草》集、诗话若干卷行世。才华品概，时论推之。

萧宏梁 字允瞻，号穆亭，英山霞卿人。幼而颖慧，弱冠入泮压其偶。制艺力追王、唐，岁科屡冠全军，庠中推为领袖。康熙丁卯，发解闽省，庚辰会试首荐，房考俞长城不欲令居第二，竟遭抑，为梓其文传播犂下。生平著述极富，尤精青乌家言，姻历学。未第而卒，士论惜之。

陈 澍 字霖甫，在坊大卿人。博涉群书，工制义。康熙乙亥选明经。课子楨、杕，俱膺岁荐。家学渊源，时人每以三苏目之。

郑应骥 字延劝，振世子。垂髫有文名，奇于数。逾壮始游庠，试五压偶。康熙辛卯，膺岁荐。手辑《宗祠祭礼》。善草书，老而不厌，临笔精神炯炯。寿九十。

李献馥 字嗣升，英山蓝田人。善属文，学使汪棣园极赏之。康熙癸巳，领恩荐。行谊端方，乡推祭酒。

郑 暹 字展咸，振世孙。幼慧，博涉强记，过目辄不忘。才赡而敏，每拈一题，立就数稿不加点，试皆前席。诗、古文、辞，自成一家言。岁荐明经，晚精堪輿、星历、医方，著有《醒(chéng)集》。

刘元颺 字幼立，小尤中人。读书过目成诵。耽载籍，遇异



本辄倒囊弃亩以购之。文规先正，见赏于汪棣园。丁酉乡闈已入彀，因原卷不获，置之，竟以明经老。署令少府康兆元扁其斋曰“业绍青藜”。以早失怙，故每诵“哀哀劬劳”之言，因自号曰“慕莪”。

邓启元 字幼季，邑西涂坂人。慧根夙赋，丰仪秀伟，安溪李文贞公见而奇之，曰：“此子眉如韩元少，当大魁天下。”年十四游庠。家学渊源，沉酣古典，涉笔渊博奥衍，不可绳覆④。雍正癸卯，举明经入京，圣主诣雍劝学，献赋，钦定第二人。甲辰，顺天乡闈填榜唱名，宗伯蔡文勤公喜谓同考曰：“此吾闽佳士，九岁即能背诵十三经者，今日入彀，锥囊颖脱矣。”丁未以南官第九人应殿试，钦赐榜眼及第，授翰林院编修，武英殿纂修。奉职维谨。壬子典试湖北，通经学古之士，咸走相庆。闈中落卷数千，逐加评点，晓夜忘疲，竟成血疾。榜发，群贺得人。还朝，值将纂辑“三礼”，刻志编摩，秘书阁中一灯荧荧，视寒窗困学，犹将过之。卒年才三十有四。都门巨公皆哭吊焉！

黄宪文 字简亭，清太湖山人。少孤力学，师事仙游举人彭帝。时弱冠，府试冠军，督学汪棣园拔入邑庠。经史淹博，勤于著述，工诗、善书。所遗有《西山小草》、《省斋外编》、选历科墨萃、“闽海元灯”、“元明诗隽”；又著《家训十则》。膺荐退老，居乡恂恂，非公不至。历任邑令每过访焉。

徐 灏 字秉造，儒山人。领乾隆辛酉岁荐，律躬以道，绩学能文。著有《诸子片玉》、《四书备考》、《玉川诗》⑤。寿八十。

李宸鏗 字元音，号和亭，英山人。美丰度，工诗文，整暇雍容，澄心镂刻，只字未安，中夜数起。垂髫游庠，与科荣曾志沂相友善。沂能对客挥毫，鏗常闭门觅句。每岁科互夺前席，时称联璧。乾隆庚申，鏗举明经，充内监，堂课俱一等。宗伯李穆亭、御史李伟园延为西席，太史官石溪尤器重之。邮言寿其母，券以大就⑦。壬戌，沂卒于家；癸亥，鏗卒于京，人并惜之。鏗有《历试草》、《京行草》、《栖霞偶吟》，沂亦有《历试草》。

林德龙 字龙伯，桂阳人。少攻举子业，出语戛戛去陈。其父汪远钟爱之，期以大成。援例入国雍，学益笃。博览载籍，叩以疑难，其应如响。工书，尤长于词赋，所著若干首，风韵不减晋唐。年六十八卒。

林 易 字羲文，桂阳人。弱冠食饩，名噪庠序，每一艺出，人多传诵。康熙辛卯乡试，几得而复失，遂淡视功名，键户著述。年三十五，昼梦有招游蓬岛者，遂无疾而逝。既殁，颜色如生。

连霁阶 字玉微，甲头人。天资醇笃，嗜学好古，六经、诸史皆通习之。师事邑廩生甘可怡，青蓝济美。下帷岱德山房，著《参汉集》。子天然，髫年食饩，试屡冠军。

李志易 字及崇，蓝田人。生有异禀，自知力学。以幼童见取于李芝麓学使，收入群庠。手写五经，尤笃于《易》。尝自言曰：“天人性命之学，后世罕有知者。”其志大如此。年三十五卒。

郑大夏 字星御，石杰人。八岁能雒(luò)诵五经，稍长，构艺磊落英多，挥毫立就。屡以五经义入试，夺前茅。诗、辞、律赋，尤多见赏。书法神似张确庵。惜不永年，以禀汽终。

论曰：“文学至西汉，作者林立。其时如石渠、天禄诸英，校辑经传，词学鸿博，作为文章，其书满家。故理学于宋为多，而儒林莫盛于汉。丁溪、龙浔，秀淑所鍾，文人学士霞蔚而起，访藏书于名山，考宿儒于故里，学问渊源，老而益明，久而愈光。约举其人，已见一斑矣。”

## 隐 逸

### 宋

黄公懋 灵化里人。三舍法行，升名于州，以不喜王氏三经、《字说》，退隐教授。所著有《和泰隐君》诗百篇。不娶，食于从弟。自知死日，届期盥栉盛服，遣仆谢其从弟而逝。

苏绍成 委业于泉州天庆观（今元妙观），后隐于北山。朱文公重其有德，尝造其庐，书“廉静”二字与之，且铭其琴曰：“养君中和之正性，禁尔忿欲之邪心。乾坤无言物有则，我独与子钩其深。”载宋郡志。

陈有仁 字有德。尝为湖北帅机。后隐于邑西鹏都，黄冠遗遥，深明修炼。歿而有灵，乡人名其冢(zhǒng)曰“真人冢”。

## 明

蒋应东 西团人。登永乐甲午乡榜。与御史凌辉友善，屡劝之仕，不应。隐于传卿乡教授，穷约终其身。

林 彝 号歌起，新化里人。笃实谨恪，不炫文华，不嗜财利，故老相传为高士云。

涂允昭 字士达。少聪颖，遍览群书。万历间，补弟子员，试每前列，执经请业者甚夥。应陪贡，督学勉之曰：“子当以甲科显。”及充正贡，辞不赴，与其兄三峰、逸山，偕隐于南阳别墅。左史颜廷桷题其小照云：“少小悦诗书，逾壮耽泉石，潇洒无俗尘，一见如曾识。”

## 国朝

涂汉登 汤泉里铭山人。嗜古力学，经子词赋，星历医卜，皆通习之；尤喜谈《易》。教授乡里，耄而不辍。举人林汪远、进士林模曾受业焉。

邓 焯 字夏明，号伏公，新化里涂坂人。沉毅好学，幼即诵《诗》、《书》、《易》三经。十岁，授《左氏春秋》，复业三礼，为文陶铸经传，杼轴予怀。年三十五，以科试游庠，学使汪棣园评其卷曰：“似此文品，吾再过冀北，始解芟衣，有愧伯乐矣！”徙居安溪之湖头，弟在涂坂，每岁时辄来言欢，累月乃去。常曰：“轩冕之荣，孰与提挈襟裾之乐？”由是宾兴不与，终老山林。年七十余，犹孜孜日课儿孙，阅寒暑无废。三子启元，

以诵十三经举明经。雍正丁未，榜眼及第，膺封典。次子其鸛，壬子举于乡。

毛一夔 字日舞，清泰里人。和易公正，里有不平事请质之，咸慰解使去。淡于荣利，隐处林泉中，风晨月夕，朗吟高吟，骚坛独擅。所著《半吟集》、《一草亭》，编《梅花百咏》，脍炙人口。纂述尤富，有《名文观止》、《艺苑汇观》、《诗学朝宗》各若干卷。字恩盛，字湛若，游庠食饩。岁科试，联冠邑军者三。工诗善酒，有《醉月轩诗集》。

徐光世 字恒高，儒山人。邑明经。嗜书喜酒，尝剖竹构亭，颜曰“御风”，吟啸其中，每陶然独醉。翰林李光燠、进士徐霞彩时与游，甚重之。

论曰：“古称逸民若夷齐者，千古莫及矣。至如羊裘老子，五柳先生，希夷之白雲野心，和靖之妻梅子鹤，又岂多乎哉！邑之隐士，若苏、蒋诸人，其不求闻达，亦可谓翛(xiao)然远俗；抑余尝闻琼山之上，有秦、汉隐君子，惜考其轶行而终不可得也。呜呼！所谓隐君子者，伊何人，伊何人哉！”

## 耆 寿

### 明

周 瓚 汤泉里铭山人。状貌魁伟，睦族恤邻，谦恭好客，族党称之。寿九十有九，今呼其宅里为百岁翁云。

涂有源 寿八十有八。

连思庆 字可禄，在坊里甲头人。性宽厚，每以货贷人不计息，或尽负之不与校。寿百岁，郡守孙朝让、邑令姚迟各赠匾额。

## 国朝

张岳荣 清泰里西山人。朴诚端谨，里族矜式。百有二岁时，目犹能辨蝇头小字。知县殷式训详请具题，奉旨赐金三十两，建“昇平人瑞”坊旌之。大学士李文贞公延访旧闻，赠以匾额。寿百有五。

陈宗煊 字允望，高洋人。邑庠生。嗜学好义，砥行洁修，口不道人过短。老而弥康，常携抱其元孙登山舒啸，寿九十有二。

郭静生 名载溢，泗高桥人。慷慨尚义。国初时，邑苦寇，尝集乡勇请于县追击之。甲寅闽变，里族赖以无恙，推为祭酒。寿八十有二。

涂禹闢 字于思，小铭社人。性谨厚，绝迹公庭，隐处南阳，颜所居曰“存耕堂”，取“但存方寸地，留与子孙耕”意也。知县殷式训赠以匾额。寿九十有三。

林锻九 桂阳人。寿九十有五。

林鏞五 桂阳人。寿九十有五。

郑廷麟 字延立，石杰人。邑庠生。孝爱雍和。早丧母，抚教幼弟有成；佐父为保练，趋义急公。寿八十有五。

王廷俨 字欣望，号雅文，邑城西人。家贫嗜书，见异本辄市以课子。年七十，襁其十岁儿应试泉郡，果成名。人谓苦志之报。寿八十有一。

郑廷理 名于燮，石杰人。乡饮宾。行谊淳谨，毫而能勤。寿九十。

童伟登 新化里上洋人。质直滄慤（què），乡论所推。寿九十有七。

林起文 上林社人。乐善好施。恩赐八品冠带。寿八十有六。

郑秋卿 石杰人。恩赐八品冠带。寿八十有三。

卢为升 名垓，鹏都人。勤谨朴实。寿八十有九。

陈元齐 彭溪社人。寿九十有四。

陈缙五 彭溪社人。寿九十有三。

叶为裕 寿九十有二。

涂克修 寿九十有一。

吴日仰 寿九十有三。

吴邦亘 寿九十有四。

陈圭兹 乐陶乡人。寿八十有九。

郭尔薇 名孕台，咽高桥人。寿九十有四。

林子远 桂阳人。寿九十有三。

林子雍 桂阳人。寿九十有三。

林子颯 寿九十有二。

涂圣积 寿八十有八。

陈介玉 名应琰，高卿墨园人。恩赐八品冠带。天资淳朴，未尝一至公庭。寿九十有八。自知死日，含笑而逝。

刘 泗 字鲁侯，尤中里上格乡人。寿九十有八。

刘 潜 字晋侯，泗胞弟。寿九十有三。

曾寓嵩<sup>⑩</sup> 名焄，科荣人。恩赐八品冠带。寿八十有九。

陈珍誉 新化里人。性孝友，谨恣端方，重然诺。寿八十有四。

黄华璋 寿八十有四。

郭復馨 静生子。温和坦直，为乡祭酒，有父风。寿八十有一。

连隆祚 甲头人。儒修端笃，乡推祭酒。寿九十有五。

陈玉珩 李山社人。邑痒生。今年九十有五。

连隆普 甲头人。今年九十有二。<sup>⑪</sup>

李雲从 字世见。涂坂人。邑痒生。性至孝，能色养。亲歿，哀毁逾节，断荤不除，要经<sup>⑫</sup>者三年，掘土筑坟，指甲每见血。笃爱二弟，式好无间，教授髻髻(chèn)不少懈。今年八十有九。弟麒，今年八十有七；麟，今年八十有五。

郭復华 名孕棣，驷高桥人。今年八十有六。

论曰：“德北山高雲深，处其间者，酣泉石而饱烟霞，得静机焉，其多寿考宜也。我朝重引年之典，冠带有赐，帛肉数颁，垂白之叟，优游化日，以乐天年矣。”



## 列 女

## 宋

蒋氏名九娘，耆民三庆之女。年十八，归刘惟义。越六年，惟义死，家贫甚。蒋忍饥寒，日夜纺织，奉养舅姑，抚二幼儿成立。舅姑歿，丧葬如礼。勤苦三十九年。始终一节。祀节孝祠。

## 明

张氏名珠娘，曾阿原妻。年二十一，生子仪仅数月而夫歿，家素饶，族人之强者利其嫁而图之。张抱仪泣，誓曰：“天不坠尔宗，使尔得长大。我之志不坚，天地鬼神实鉴临之。”后仪为邑诸生，年二十四又歿。张乃以夫侄恕为嗣，抚若己出，竟以节终。祀节孝祠。

李氏桂阳人，林兑一妻。归未期而夫卒，年才十九，矢志守节。遗腹生男，抚之成立。孝养舅姑，经营家计，备极劳勩(yì)。寿八十有一。乡人钦之，祀节孝祠。

林氏夏林人，庠生易象广妻。年二十六而寡，鞠养三孤，食贫茹檠(bò)。舅姑早歿，侍舅妾乐氏，爱敬有加。父母既亡，弟幼赖其抚育。年六十六卒，三日颜色如生，众咸叹异。邑令以“贞烈足风”奖之。祀节孝祠。

邱氏 大田人，归铭山周位。年二十一夫歿，号槲誓以身殉，濒死者屢。父谕以抚孤存宗祀，复取白绫与之，曰：“是不可湔洗也。”答曰：“无能玷污。”跪受之。遗孤寻殇，哀痛服毒，数次不死；水浆不入口者九日，又不死。远近闻之，皆为涕零。族长以服侄濂为之嗣，濂克尽孝养。年六十余卒。孙曾蕃衍，文学彬彬，殆天以报苦节也。祀节孝祠。

郭氏 庠生郭载伊女，适庠生林寅坼(chè)，年十八而寅坼歿，遗腹又生女。父母舅姑使人探其意，答曰：“叔生子，妇子之，则夫犹有后也，无异言矣。”年三十六卒。通庠呈举节孝。按院批云：“松筠直操，冰檠为心，十有八而丧所天，忍死以待承嗣之子；三十六而从所志，捐生以随物化之魂。仰县立祠旌表。”祠在县东门内，今废。江南省元桂仲题其门曰：“节孝无双品，春秋足万年。”祀节孝祠。

林长娘 在坊耆民德茂女也。贞淑孝友，天性卓越。早失母。父死时，有弟宗源甫八岁，而长娘年十七矣，临尽谓之曰：“汝能不字，为我抚而弟使成立乎？”长娘泣誓，愿守父命。父既歿，长娘抚宗源成克家子，竟不字终其身。寿八十有一，犹然处子也。宗源倡建邑之化龙桥，长娘尝出储金二百两，又尝舍金助建永春东关桥。

国朝康熙十五年，邑遭洪水，林族濒溪以居，祠宇淹没，长娘木主独存案上，流挂壁间，卓立不仆，可以表其真正之气矣。祀节孝祠。

林氏 名金娘，涂鹏搏<sup>⑧</sup>妻。年十九而夫歿，家贫守志，

茶苦备尝，教子成立，事舅姑以孝称。卒年七十有四。长孙孟昆妻余氏，年二十七亦寡，课其二子有成，善事舅姑，卒年七十有三，人谓“冰玉联徵”云。

刘氏 湖岭人。周舜钦妻。年二十八，钦歿，督二子成立。孙曾有声簪序。寿八十六。邑令奖为“节坚烈日”，里人称以“女中丈夫”。

徐氏 许忠字妻。能执妇道，年二十五而寡。事舅姑以孝，课孤子以严，贞操自守三十五年。寿六十。

苏氏 铭山人。周琬妻。年二十九夫歿，族人讽令改适。答曰：“吾弃二孤而去，是弃所天也，不如死之久矣。”完节六十余年！寿九十。孙曾彬济，多文学焉。

陈氏 章时阶妻。年二十，夫病痘歿。遗腹生男，冰寒自矢。老舅在堂，克尽孝养。年七十卒。

方氏 名三娘，贡生令泰妹。年十八，归高洋陈持兹。越三年，老舅病笃，每夜持香吁天，愿减己算救之。不愈，乃割左股和粥以进，舅病果痊。里族状其事于县，制匾旌焉。

任氏 夏林人。林燦妻，二十八岁夫歿，家徒四壁。子玺(xì)堂皆幼，舅姑在疾。耕锄纺织，抚育二子，安葬三柩。县详宪允题旌，未上，值鼎革。二子事之，以孝闻。享寿八十有四，咸人谓节母宜食其报云。

涂氏 吉岭乡人，庠生许瑞岳妻。年十九归瑞岳，才一岁而孀守。舅姑矜其志，以夫亲侄嗣之。值寇乱，家橐萧条。冰玉自持三十余年，虽家宴不肯与。妯娌问故，曰：“吾未亡人也，

何心酒食？”年五十六卒。

严氏 尤溪人，桂林赖普祐妻。年二十四守节，卒年八十。

张氏 杨梅人，桂林赖克致妻。年二十五守节，卒年九十

三。

凌氏 田地人，桂林赖碧峰妻。年二十四守节，卒年六十一。

#### 以上节孝

### 宋

黄氏 名桃娘，清泰里人。姿颜淑媛。年十六适陈得琛。期年，琛以服役卒于外，讫至桷绝，誓无独生。尸既归葬，母怜其年少无子，异归，冀改图之。桃娘度不能免。一日，托以浣(huàn)衣出门，指溪水叹曰：“吾心莹彻，亦如是水，岂可为泥淖所溷？今得死所矣。”遂投之。乡人皆为流涕，祀贞烈祠。

### 明

黄氏 陈曙(xuǎn)九妻。嘉靖辛酉八月，流贼突至，与曙九抱周岁儿逃匿山中，为贼所获。贼见其姿美，乃免其夫，而欲辱其身，强不可。刃其儿。黄抚儿恸哭，骂贼甚厉，遂被害。年二十有五。祀贞烈祠。

陈氏 耆民辉一之女，郑仲妻。归仲两月而仲病，事仲半

载而仲亡。哀恸七朝，慷慨就义死。邑令制匾奖之。祀贞烈祠。

以上贞烈

### 国朝

陈氏 邑治龙池人，王起初妻。年二十二孀守，贞操无玷，以耆寿终。邑绅士为之赞曰：“比桃则年，比松则列，纺教所闻，净于冰雪。”祀节孝祠。

林氏 上林社人。适涂坂李文修。逾年，文修歿，遗腹生男。孀居慎饬，乳姑尽孝。葬舅之日，躬怀木主，跋涉险巖(yān)，哀声震野。顺治九年，闾学举呈知县王宠受申请，按院朱必简给匾旌之。

陈氏 甲头乡连时质妻，年二十二而寡，抚二孤。当海寇据邑，派餉逼迫，陈捐己资，以缓里族之征。父被掳，尽脱簪珥赎归。舅老患脚疾，亲奉汤药二十余载，艰辛万状，始终不渝。寿六十七。雍正六年，旌表入节孝祠。

陈氏 甲头乡连宏籍妻。年二十二夫歿，遗孤一，遗腹五月。孤子继亡，遗腹生男又殇。陈终以立后存祀为志，坚守二十余年，始得继嗣，宗祧(tiāo)赖以不坠。卒年六十七。雍正六年，旌表入节孝祠。

潘氏 高卿社陈天桂妻。年二十四夫亡，忍死抚孤，截发自誓。值寇乱，百凡艰难，励志弥坚，事姑不懈。姑歿，丧殓尽礼，训子成名。寿七十有六。雍正七年，旌表入节孝祠。

苏氏 卓地乡陈存若妻。年二十四夫病，苏静夜露香致

祷，求以身代。及夫歿，誓以身殉，老姑慰諭之，遂饮泣吞声，忍死奉姑，茹荼鞠子。卒年六十有五。雍正十三年，旌表入节孝祠。

赖氏 名兑娘，涂天经妻。年二十七孀居，遗孤二，长甫三岁，次未逾月。矢志苦守，勤纺织以养舅姑。训督二子不少宽贷。寿七十有六。孙曾济济。

林氏 郭坂葉殿履妻。年二十六，夫亡孤幼，遗腹匝月。家贫，躬自负薪，敬事舅姑，奉养无缺，善教二子，式好无间。食指既繁，不忍分异。寿八十五卒。孙至仁亦娶于林。年二十八，至仁歿，矢志抚孤，年五十有四。

郑氏 高卿社陈应瑛（pián）妻。年二十九夫歿，励志守节。尝检箧，中有质券，召其人还之，曰：“幼孤儿不可使责偿敛怨也。”后值兵荒，率二子耕锄力作，孝养舅姑，朝夕罔懈。卒年七十有九。

辛氏 名莲官，庠生伯颖女，归郭载淇。年二十七，载淇卒。守志抚其三子成立。卒年六十有六。

王氏 名七娘，儒山人，庠生徐应聘妻。康熙甲寅闽变<sup>①</sup>，聘出练乡团，为乱兵所害。王闻讣，昏绝数四。以姑老，抑哀守节，勤纺织。丙夜督令三孤端立读书，虽盛暑严寒，不使少休。长勋，次琳，俱为邑诸生。寿九十。

连岳娘 甲头乡人。许配洋中乡林振雍。未及于归，而姑颜氏病笃，恐不起，使人请于连，欲见之。连父母携岳娘往，俄而，姑痊愈，携回以俟成礼。阅月而振雍死，讣至，岳娘裹服奔

丧，入门号恸，将与同死。林族惊异，慰以立后，岳娘许诺，夫堂兄即取周岁子嗣之。岳娘孝事舅姑终其身，衣被帙帐皆用素，寝房自以白纸密裱，虽侍婢不敢辄入。卒年五十有一。

许氏名纯娘，铭山周昭甫妻。居宅依山，康熙丙辰，暴雨山崩，举家压歿，许抱四岁儿伏户间，得不死。遂矢志抚孤以延一线，宗祀因之不绝。苦守五十六年。寿八十三。

陈氏名玉舍，南乐知县应奎女。归石杰邑诸生郑异，事舅姑与大舅备得欢心。年二十七，姑与夫俱病，卧床经年，陈侍汤药，衣不解带，每夜露香致祷，愿捐己寿以救，竟不起。遂誓断晚餐，抚三岁孤惠琇，丙夜纺织，惟啜杯水。事继姑尤孝谨，每节腊辄呜咽不饮食，卒以劳鬱而歿。琇，乾隆癸亥举明经。

周氏庠生苏彝妻。年二十三，夫歿，将以身殉，脱金珥咽下，俄而呕出。家人见之大愕，因密防之，得不死。及遗腹生男，乃矢志抚育克成名。卒年八十有三。

徐氏名传娘，温于御妻。年二十六孀守，孝事舅姑，抚教二子，寿七十四终。孙廷选，乾隆丙辰登贤书。

陈氏名丽娘，永春人。归霞坑萧森英，事舅姑及大舅姑，咸称其孝。夫歿，号恸濒死者再。遗腹生女，乃以夫弟次男正选为嗣，苦节不渝。卒年六十四。

施氏名章娘，蓝田李髦士妻。年二十五，夫歿，遗孤五岁，誓死不二。久之，其父令归，将图改适。即步回见诸姑，潸然涕出。嫂氏怪之，搜其袖，则途中所采断肠草也。因力慰谕，护使还家以完节。终年五十有五。家故赤贫，事姑鞠子，皆取给

于纺织云。

郑氏 永春仙溪人。归邑东门谢帝美，蚤寡无子。夫弟宠侯妻死，一子甫三岁，郑抱之哭曰：“吾夫无儿，奈何幼侄复无母也！”遂辛勤鞠养，历二十余年，得孙为继。知县熊良辅、教谕力子伺制匾奖之。寿八十有八。

郑氏 甲头乡连隆鼎妻。事继姑克孝。蚤寡无子，以夫侄玉恬为嗣。娶林氏，恬又夭，无子。复以侄孙为嗣。姑媳孀居，两世立继，宗祀竟赖以延。郑年七十七卒。

林氏 章元岷妻。夫歿，遗孤一，抚之。比长，娶涂氏，育二子。孤复歿。姑嫂以冰檠相励，筠节同坚。林年六十八卒。

方氏 名冬官，螺坑人。归凤阳监生曾浩漪，蚤寡。翁姑在堂，二子方襁褓。辛勤百务，妇道母教藉藉里党。子殿选、殿荣，俱克成立。卒年六十五。

严氏 桂阳人，林德馨妻。德馨死，无子。严年二十二，恸哭毁容。以舅姑在堂，勉为色养。寂守空闺，未尝逾阈。经十余年，以夫弟监生德龙之子为嗣，旋夭。又十年，德龙复以幼子仕家继之，苦志课督。孀守五十余年无笑容，至得孙乃稍开颜。卒年七十有五。

张氏 名七娘，螺坑方为班妻。年二十七守节。卒年九十。

黄氏 名亥娘，英山寇兴龙妻。年二十三守节。卒年六十三。

林氏 名亥娘，儒山徐实甫妻。年二十五守节。卒年八十



## 二。

郭氏 章应广妻。年二十四守节。卒年八十九。

蔡氏 黄天添妻。年二十六守节。卒年六十。

林氏 名末娘，涂御伯妻。年二十四守节。卒年八十三。

林氏 名五娘，上翰社许惠迪妻。年二十二守节。卒年七十。

## 十。

刘氏 郭旭在妻。年二十四守节。卒年五十四。

曾氏 登龙社陈光受妻。年二十三守节。卒年六十九。

谢氏 周子培妻。年二十二守节。卒年六十。

易氏 李山社陈元式妻。年二十七守节。卒年五十七。

郑氏 张伦妻。年二十三守节。卒年七十二。

邓氏 名勤娘，下寮寇紫科妻。年二十七守节。卒年五十

## 五。

林氏 名端使，郑舜慕妻。年二十七守节。卒年六十。

陈氏 郭坂葉霞腾妻。年二十五守节。卒年七十二。

赖氏 田地人，凌德涵妻。年二十二守节。卒年五十二。

许氏 郭坂葉嶷妻。年二十五守节。卒年六十。

林氏 清太<sup>⑩</sup>承泽乡黄元玉妻。年二十二守节。卒年五十

## 四。

陈氏 登龙社江元敬妻。年二十二守节。卒年六十三。

谢氏 下市人，邱伯通妻。年二十守节。卒年四十七。

卢氏 英山社董瑞猷妻。年二十三守节。卒年五十。

林氏 葛坑社监生陈朝标妻。年二十五守节。抚二孤，事

翁姑，克尽妇道。卒年五十五。长子谦为邑诸生，复夭。妇苏氏，年二十四无子，立嗣孀守，事姑甚谨。今年六十三。

黄氏 名坤娘，南埕社毛咸若妻。孀居念夫兄乏嗣，以长子继之。次际泰，甫四岁，勤谨守志，抚训成名，乡人钦其德操。今年八十有四。

涂氏 瑶市社黄天景妻。年二十三寡。一子岳，甫五岁。哀毁骨立，誓不独生。姑谕之曰：“吾老矣，若勿以呱呱累我也。”涂受命孀守，勤织纴供姑，恒不足，则减己食食之。训子有成。孙必捷，弱冠游庠著声。今年八十一。

余氏 高卿张寅举妻。夫歿，姑老家贫，日负孤儿耕锄樵采，以供朝夕。苦节五十余载。今年八十。

陈氏 许德溥妻。年二十一守节。今年七十七。

林氏 葛坑社黄朴有妻。年二十八守节。今年七十七。

赖氏 李仲滋妻。年二十七守节。今年七十四。

吕氏 英山社人，郑世取妻。年二十七守节。今年七十三。

赖氏 下涌郭子阳妻。年二十五守节，今年七十二。

郑氏 赖斯权妻。年二十六守节。今年六十九。

林氏 名缎娘，瑶市苏茂日妻。年二十八守节。今年六十九。

林氏 许茂士妻。年二十四守节。今年六十八。

林氏 郭兆愈妻。年二十四守节。今年六十七。

陈氏 苏启东妻。年二十九守节。今年六十六。

庄氏 李山社陈荣略妻。年二十二守节。今年六十五。

徐氏 名意娘，郑业文妻。年二十四守节。今年六十三。

范氏 郭坂葉达仁妻。年二十三夫歿，茕茕一孤。性孝谨，舅姑爱之，复以堂叔子益其嗣。每朔望，斋素祷祝延舅姑寿。今年六十二。

郭氏 刘泓来妻。年二十一夫歿。祖姑在堂，孤儿甫乳，奉养鞠育，备极劳瘁。今年六十二。

曾氏 名催官，良太徐季耳妻。年二十五守节。今年六十二。

陈氏 郭坂葉守仁妻。年二十七守节。今年六十二。

章氏 名正娘，涂文良妻。年二十四守节。今年六十二。

周氏 邑东门人，谢天岑妻。年二十四守节。今年六十一。

康氏 名新娘，儒山徐春权妻。年二十六守节。今年六十一。

曾氏 名孙娘，石杰郑起鳧(yán)妻。年二十守节。今年六十一。

郑氏 名明娘，永春盖福洋人，归良泰谢祈如。祈如应童子试，三冠邑军，不获入泮，忿鬱而歿。郑年二十三，遗腹七月。家徒四壁，借织为活。生男天申，抚训之，有声庠序。今年六十。

林氏 名玉娘，茅岐⑩李延礼妻。年十八于归，甫五月而寡。夫弟以男嗣之，抚育有成。今年六十⑪。

刘氏 山坪社庠生郭之屏妻。年二十三，夫应试歿于泉州，氏痛其不侍汤药也，一恸而绝。家人救苏，默以蕤孤在抱，当抚之使绍书香。乃励志贞守。子观光，饬于庠。

林氏 章亦恕妻。年二十六守节。今年六十。

王氏 新化陈珍恺妻。年二十八守节。今年六十。

林氏 李山社人，陈光博妻。年二十五守节。今年五十八。

王氏 高卿张天志妻。年二十五守节。今年五十七。

周氏 陈钊妻。年二十四守节。今年五十二。

冯氏 名丽官，良泰陈一基妻。年二十四守节。今年五十一。

#### 以上节孝

易氏 汤头人，张锺毅妻。顺治丁亥，与锺毅避贼山寨。贼入寨，易匿锺毅于仓中，而自以身当之。贼将系以出，乃给贼入室，具饮食。遂投缯死。贼大骇而去。锺毅竟免于祸。知县和盐鼎表其庐。祀贞烈祠。

黄氏 尤中科山人，庠生刘六龙妻。顺治甲午，贼陷县城，分党派饷，入科山寨。男子皆走避，黄恐见辱，遂自经死。贼入室，义之，为解其绳，以厚纸覆其尸，取木片插于尸前，大书“贞妇”二字而去。

章氏 科山人，庠生刘奘妻。贼入其乡，掳掠派饷。章走匿山中，见贼登山遍索，恐不免，遂投身绝崖死。大田知县张鸣珂经其地，吊以诗，有“百尺崖头悲碎玉，千秋阃内见纯金”之句。

陈秀娘 新化东厝乡人。年及笄，许族姑子郑涵。委禽有期而涵死。诔至，秀娘泪涔涔下，请于父母欲奔丧，父母止之，遂自彻<sup>⑩</sup>簪珥不饮食。家人知其不欲生也，防之密。久之，有冰人诣舍议再姻。秀娘谓家人曰：“吾身已许郑矣！生许之，而死背之乎？”家人不之顾，具酒食款冰议者。秀娘默然，回身入房。迨冰议者将即席，而家人报秀娘雉经死矣。解系，颜色如生。

章墀娘 庠生秉谦妹。年十八，许配大田张姓。婚期伊迳。一日蚤起，告其祖母曰：“吾夜梦张病。”俄而，病信至。越数日，又梦张死，果死。诔至，遂易服欲奔丧，父母力阻之，竟绝粒死。闻者叹异。盖其从一之志。通于神明矣。

林氏 名寅娘，倚洋人，陈昌妻。年二十七，夫歿。家贫，殓葬之费皆出借贷。兄谋夺志，寅娘尽取衣饰卖以还债毕，娶者方至门，寅娘投水死。

以上贞烈

论曰：“从容就义，慷慨赴死，自昔魁之。予观古来孝女、贞妇，或撒环珥而不嫁，或缕飞燕以盟恩，以至剪金封发，海可填，石可化，盖志之所至，气亦至焉。邑之节烈，自宋、明迄国朝，凡若而人，皆卓卓可表者。若邱氏之受白绫，长娘之守父命，岳娘之闻诔奔丧，墀娘之符梦绝粒，其尤炳炳形管者欤！是足以范闺闾而光星岳矣！故悉表之，用以维风化，且备輶轩之采焉。”

## 侨 寓

### 明

林文俊 字汝英，莆田人。来游德化，值雪，夜投宿尤中里梁散轩家，梁款留之，以教其二子。越两载归。举正德丁卯乡试第一，辛未成进士，官至南京礼部侍郎，转吏部，卒。

俞大猷 泉州卫百户。少为诸生，工《易》学，乃习武经。嘉靖乙未，举京闹第五人，擢正千户；以将才荐破海寇，擢广东都司签书。时邑岁贡林珀，任广之罗定州学正，署州事，与相友善。后以平倭屡著奇勋，为闽中名将第一。历官南京右军都督金书，改福建总兵。尝偕其子过访林珀于尊美社，因馆焉。珀侄构亭，为额之曰：“花然”，并为之序。

詹仰庇 字汝钦，安溪人。嘉靖乙丑进士。授南海令，以卓异征入为御史。穆宗初，仰庇官台中。八阅月而疏四上，多指斥中贵，为中贵所龋龕（yī hé），廷杖黜为民。神宗登极，复起为广东参议，抵任阅月，乞疾归。徜徉林壑十有三年，布衣笋舆，流连德化山溪间。后迁刑部右侍郎，甫数月，引疾乞休。得请家居，与二三同志重访旧游邑之名胜，多留题。晋接恂恂，僮仆慎饬，儿童走卒皆羨颂焉。

黄克晦 字孔昭，惠安人。少从父客永春，善画。后发愤学诗，遂以诗名。爱德化山水奇胜，蜡屐数经。尝薄暮乘兴，与邑

令张大纲、左史颜廷渠，往游戴雲，夜二鼓方至。邑人传为佳话。

李廷机 字尔张，号九我，晋江人。微时游学至高洋乡，单(shàn)辅礼款之，相得甚欢。复至英山，李繁命子雲阶从之游。后以礼部尚书拜东阁大学士。致仕家居，闻单辅令合浦归，不携合浦一珠，亟来访之，见其清苦逾常，遂荐之入祀乡贤。又尝为繁作传。

何乔远 子稚孝，晋江人。垂髫即工古文词。万历丙戌成进士。选比部转仪部郎<sup>②</sup>，以疏救言，官降广西藩幕。假归，家居幾三十年。尝至德化览胜，过小铭访邑庠生周文台，促膝谈文，久之始去。光宗即位，甫八日，命典试山西，历户部侍郎。告归后，陪推南少司空，特旨起用。未幾，引年致仕。学者称为镜山先生。

## 国朝

邵光允<sup>②</sup> 浙江绍兴人。顺治丙戌，偕弟嘉允、友人董其音来闽，至德化。值寇乱道梗，寓监生许雲祥家。复入汤岭夏甸乡，病困，里人王熙时款之，留两载归。壬辰同登进士第。光胤知古息县，擢知府；其音知府；嘉胤以兵部主事，任江南学道。

论曰：“寓者，偶也。偶尔停驻，卜邻浮家，似无足纪。然古今流寓而名湮灭者，不可胜数，唯倜傥非常之人称焉。秦公绪万松研石，朱晦翁一览题洲，名流遗迹，地以人传，往往然也。

德化山陬僻处，侨寓者稀。而屈指数之，某地某人之所栖托，某水某邱，某人之所经游。余韵流风，犹可挹也。旧志②置弗录，毋乃缺乎？”

## 方 技

### 宋

陈 朗 字子彝，杨梅中人。遇仙②授以草履，受而著之，行疾如飞，百里立至。精察地理，择其家之当发积②者，为之造葬，辄验。邑中称为陈朗仙。今葛坑山石上，有陈仙迹。

### 明

连惟深 坊隅人。白眉皓齿。尝遇异人授以青乌书，遂精阴阳地理之术。

### 国朝

李兴禹 字简轩，蓝田人。少孤力学。以二亲未葬，往游江西习地理，得杨、廖之传，归遂善相冢。

郑 琪 字君璜。以画名。山水、人物皆一笔书，而神致栩栩，气色老苍。所写大士影、《达摩折芦渡江图》，人多宝之。

毛 熹 字晦若。一夔子。隐处清泰之嵩山，以山水为娱。每作画，泼墨淋漓，了无痕迹，备得烟雲鬣鬣之趣，雅自珍惜，不轻与人。诗亦潇然脱俗。



涂霖琳 字程若，铭山人。喜作画，竹石花卉，皆有真意，芦雁尤神似。性修洁，衣履不惹纤(xian)尘，一时称为雅人深致。

陈洪畴 字若锡，尤中陈吴乡人。工医术，急于济人。虽寒风晦雨，有以病来告者，辄往治焉。乡人德之。

王致远 字震毅，邑治人。举止庄惮，笑言不苟。善奕，而不自蓄奕，邀之则奕，不较高下与迭胜负，俱一二子不过五，莫能穷其技。邑令某尝与对局，未终，适有公事，远告退。越月，令偶言彼时当有妙著，以不终局为怅，远取子覆布之，不差，令大叹服。又善酒，斗食如主人之量强之，自饮则否。或卜夜更代对酌以困之，终不醉。雍正乙卯，以明经膺恩荐。卒年八十有三。

陈原 字振有，陈吴乡人。善绘山水禽鱼，尤工小照，有颊上添毫之技。自号“墨颊”。

陈雷 字汝殷，高卿墨园人。少聪颖，绩学明医，奇症异疾，治之悉效。凤洋乡曾某患谵(zhan)语，暮霁间辄自言曰：“渠要话。”喉中汨汨然，咏讴酬答，论古谈禅，皆其生平所不习者。已复如常，覆问之，则不复记忆。如是者半载余，延雷视之。雷伺其谵语时，与谈药性，随叩随应。及举雷丸龙荟之方，病者忽云：“渠不敢对矣。”遂取其方治之，立瘳。一日谓其子曰：“吾当为永春后埔境主，以某日行。”境主者，邑俗祈报之神也。至期果卒。

林扬进 良太前苏人。善图绘。凡山水、翎毛、鳞介、竹

树、花卉，点染绰有神气，写照传真，尤臻工妙。子良鳌，能世其业。

论曰：“古人一艺，专家遂名。当时传后代，非苟而已也。庄生云：‘用志不分，乃疑<sup>②</sup>于神。僚之丸，秋之奕，养由基之射，梓人削木，轮扁斫轮。神而明之，存乎其人。’小道可观，于斯益信。”

## 释 道

### 唐

无 比 姓邹氏，沙县人。来居九仙山。尝佣力牧牛、艺圃。开元丙辰，与其徒普惠创灵鹭岩，欲悉以石为之。普惠曰：“是使后人无功。”乃石其半，修真于天然室。其右有石洞，中一石，貌果老，群仙日夜<sup>②</sup>奏广乐，厌其聒耳，改雕弥勒，仙乐遂息。后坐化于灵鹭山巅。普惠见之，亦示寂岩中。今并祀焉。

袒膊和尚 名知亮。始居泉州开元寺东律巷。冬夏常袒一膊，行乞于市。后与其师慈感<sup>或云袒膊为正觉、智广法门弟。</sup>来结庐于戴云山。

累月不火食，堆趺而坐。有虎驯伏其侧，人叩之雨旸，辄验。陈叔几，旧名则梦，亮谓之曰：“子改名研，籍永春，当贵显。”陈如其言，果登第。再至泉州，适郡守祈雨，亮谓：“当无雨。”守怒，暴之烈日中。乃啮指以呼其师，忽黑云起自西北，雨随

至。大中十二年，跌逝于开元之院居。其徒泥肉身载归戴髻。慧感亦化去，泥其身，与并祀。邑人祷雨多奇应。

无晦 姓陆氏，蜀人。咸通间，炼真于五华山，结庵与虎同居，号虎蹲岩。凿井数仞得泉，语人曰：“吾化后，每岁端午日，井水当溢至栏。”已而果然。塑像中藏偈(jì)云：“当午①学道白云边，这点灵光彻后先。五朵花开金布地，一源泉涌日中天。遗像岩头神自远，全真石上虎知禅。古今荒老乾坤在，薪火相传无晦然。”

行端 陈姓。修真薛萝峰下，每于石上坐禅。天祐间，化身于山后井上。邑人程国知舍田建寺，像而祀之。六月十五日乃其诞辰，每岁是日，必有霖霖沾雨洒街②，人谓“洗市雨”。宋绍兴十一年，赠太师，赐号慧慈，复加真济。淳祐丙午夏，霖雨，溪水涨，桥坏，几荡民庐。县尉孙应凤东向遥拜，僧持瓣香祷告，忽见座东逝轮香几，跃出数步。俄而寺后山坍，积土于空，寺宇无恙。少顷，雨霁水退。

国朝康熙元年，大松仆压，龛座俱碎，塑像无损。

## 宋

了他 号智雲，俗姓许，葛陂人。祝发香林寺。三十二年不澡浴，人嗤之。答曰：“形骸外物。”元丰间，年九十七，跌坐寺前龙潭磐石上，噉生猪首几尽而逝，肉身不坏。三十③年后，爪发复长，可四寸许，或刺其臂，出血三日。今其徒奉之，犹如生云。

道徽号慧海，梓溪人。郑氏子，了他法门弟也。尝遍历东南诸名山，有神人告之曰：“你福地在钟山下蔡岩。”遂还。自雕木像置岩中，后跌逝于此。其姑觅之不获，于岭上往来哀号，今为姑栖岭。逾旬得之，神色不变。乃昇归香林寺<sup>⑧</sup>，真身犹存。

张自观 闽清人。炼性于蕉溪山石鼓岩<sup>⑨</sup>。见石牛山夜火晶荧，知有魑魅，因往其处。魅方于人家迎妇，輿徒甚盛。观出手掌，令人从指缝窥之，魅悉现形。乃幻为女妆，坐輿中，群魅异之入石壶洞。与之斗，悬崖上下，趾踵入石，辗转数十处，发尻鞭剑之迹如刻画。竟夺其洞，坐化镇之，至今英灵如生。魅常眩匿游人衣物，告于神，则立出。山顶有剑插石上，可摇不可拔。又有铁杖长四尺许，不假锤炼，以手摄成，指痕可数。

妙慈 姓陈，李山人。生时香雾濛山。淳熙己酉，示寂于狮子岩，其身不坏。遗命六十年一更塑，迄今肉躯自如。

国朝康熙间，岩顶有巨石将坠，授梦僧人，令先扶像出，俄而石坠。

僧圆通 俗姓黄。嘉定间，与僧证圣<sup>俗姓徐</sup>顿悟<sup>俗姓郑</sup>，同跌逝于太白岩，有虎卫之。明嘉靖三年，汀、漳贼九十三人，流劫郡邑，官兵不能御。十月二十三日，夜宿岩中，秘袭其像。授梦义士涂洪三持短兵伺于要路。二十四日，贼夜走，尽歼之。

自超 姓林氏<sup>旧志作张道源，又名克勤。</sup>遇异人于九窠溪，使负之渡，

乃曰：“我泰山佛，传汝心印。”自是灵通。尝夜梦异人，导往

泰湖山，见古木流泉，迥非凡境。乃登山创龙湖寺居焉。时绍定庚寅岁也。后示寂。

雲 济 姓史氏，晋江人。经领荐弃之，祝发为僧，结庵纓溪。后涅槃于苻菜岩，嘱其徒曰：“我大劫未尽，可悬我骸于椿树杪，须六十年，乃永安于此。”至期，椿杪放光。因取其骸，饰像祀之。明嘉靖间，邑令绪东山迎以驱蝗，有应。

普 明 詹氏子。童时牧牛金鸡山，每令同牧诸童，瞑目随之入城观剧。以竹梢画界，牛不越逸。多累小石为塔仔，风雨不仆，迄今礧礧。倒插竹梢辄成林，本小末大。尝手刻小像纳樟木蠹孔中，后茶毘于金鸡岩，乡人取樟雕像，闻木言<sup>②</sup>高下长短，如其言取之，雕至腋下而小像露。今犹存。

李 泗 濠头人。法力奇幻。延平府旱，召巫祈祷。泗至，衣衫褴褛，群巫慢之。泗乃鸣角，角著壁，摇之不动。群巫大惊，白郡守。命祷雨。泗取水盥洗毕，掀水洒空，遂成雨。

## 元

徐友山<sup>③</sup> 名权行，号广应，儒山人。生时异香满室。比长，自持戒行，父为纳室不受。一日瞌睡，遽呼曰：“偶失足，延寿桥圯矣！”俄而桥坏，人咸异之。与吴济川同结庐于金钟山之黄村，修真证道二十八载。至正丙午正月，别济川至金液洞磐石上跌逝。济川欲与俱，友山曰：“子有五男二女，□□毕也。”后果如其言。

吴济川<sup>④</sup> 九濠人，与徐友山相友善。友山既逝，乃自隐金液

洞中。蓬首垢面，炼液养真，日惟饮水一盂。洪武癸丑十月，沐浴端坐而逝。其徒将饰像，患无匠。经数十日，肌体如生。神往莆田见塑匠，曰：“我德化金液洞徐友山也。请塑真人<sup>⑤</sup>像。汝第先行，吾亦随至。”匠来，其徒问曰：“谁相召？”匠以其名告，众大惊异。今真身犹存。驱蝗、逐疫，其应如响。所至降灵，必有风雨随之。弟隐山亦坐化。长子景阳寂于紫雲洞；五子凯阳受符镇魅，陷于鬼窟。

## 明

陈甫一 尤中人。生不茹荤，能于木杪鼾睡。家贫，负馱过永春锦斗乡，值造石桥，取巨石，数十人不能致者，独力运之。将寂，告远近积薪，跣坐自焚，火焰中闻号（hào）佛声不绝。乡人收其骨，塑像祀之。时崇祯十五年也。

## 国朝

江士元 清泰长基乡人。幼学吴济川道法。济川降神其家，授以符箓<sup>⑥</sup>，能召役鬼神，治妖捉怪。康熙丙子夏旱，邑令严居敬命祷雨，元取大礪<sup>⑦</sup>贮水插柳，烧铁淬之。须臾，疾雷轰炮，黑雲四合，甘霖大沛。

论曰：“化色五苍，修习四禅，类多遨游方外，曾何补于世哉？若其梅子熟后，黄粱梦回，遂能以入神出化之功，利济人间<sup>⑧</sup>，斯足多耳。邑之山水奇奥，仙释栖灵，若慈感之祷雨，济川之驱蝗，其为功于邑民者，赫赫耳目间。记曰：‘能御大灾、’

捍大患，则祀之。’岁时崇报宜矣。”

### 校注

- ① 二子：民国志作“三子”。
- ② 性灵尽：民国志作“性灵索尽”。
- ③ 丙午：应为丙子。乾隆志陈应奎传：“登康熙丙子乡榜。”民国志陈素蕴传与陈应奎传均作“丙子”举人。
- ④ 绳覆：民国志作“绳羁”。
- ⑤ 玉川诗下漏“集”字。（见民国志）
- ⑥ 元音：民国志作“元习”。
- ⑦ 大就：民国志作“大义”。
- ⑧ 吟：民国志作“咏”。
- ⑨ 李文贞公：即李光地，安溪湖头人。
- ⑩ 寓嵩：民国志作“寅嵩”。
- ⑪ 九十有二：民国志作“九十有五”。
- ⑫ 要经：应作“要经”，为古丧服，束于腰间的麻带。
- ⑬ 鹏搏：民国志作“鹏抟”。
- ⑭ 咸人：疑为“人咸”的颠倒。
- ⑮ 甲寅闽变：指康熙十三年（1674年）耿精忠据闽反清的事变。
- ⑯ 清太：即清泰里。
- ⑰ 茅岐：民国志作“文兴”。
- ⑱ 今年六十（指修乾志时）：卒年为七十五。（据民国志）
- ⑲ 彻：应作“撤”。
- ⑳ 即：民国志作“郎”。
- ㉑ 允（光允与嘉允）：本为“胤”，因避清世宗胤禛讳改作“允”。

⑳旧志：指康熙本《德化县志》。

㉑民国志“遇仙”前加“宋末”。

㉒发积：疑为“发迹”误。

㉓疑：系“凝”之误。

㉔日夜：民国志作“月夜”。

㉕午：系“年”之误。

㉖沾雨洒街：民国志作“沾洒街衢”。

㉗三十（年）：民国志作“二十（年）”。

㉘民国志在“香林寺”下加“泥塑焉”。

㉙张自观炼性于蕉溪山石鼓岩；时间在宋室南渡之后。（据民国志）

㉚“木言”两字原脱漏，据民国志补。

㉛徐友山：“洪武癸丑（公元1373年）正月九日飞升”，系死在吴济川之后。民国志记载：“吴徐先后倒置，今据济川蜕化时，县尹陈寿之《金液洞记》正之。”

㉜吴济川：据民国志载：“元末至正二十五年乙巳（1365年）结庐于金钟山修真一年，丙午（1366年）十月九日蜕化。友山为塑像，构金液洞以安焉。”又据嘉靖志载：吴济川于“洪武戊申（1368年）沐浴端坐而逝。”（与民国志所记相差两年）。可见吴、徐两人去世时间先后倒置。

㉝真人：指吴济川。

㉞以符：原脱漏，据民国志补。

㉟罍：疑为“缸”之误。

㊱人间：原脱漏，据民国志补。

（校注 江中卫）



# 德化县志卷之十五

## 艺文志(上)

文以载道，言为心声。古今文人，其得之心而笔于书者，美则爱，爱则传。虽历千百年而不坏，韩文公所谓“李、杜文章在，光焰万丈长”也！夫不朽有三，立言其一。德邑词人，自昔称盛，清词丽句，已散见山川、古迹诸志，复择其辞之工而有关名教者登之。志艺文。

### 诗

唐

闲居 归德场长颜仁郁

柏树浓阴护竹斋，罢烧药灶纵高怀。世间多少闲中景，  
云绕青松绿满阶。

## 谕 农 颜仁郁

夜半呼儿趁晓耕，羸牛无力渐艰行。时人不识农家苦，将谓田中谷自生。

## 戴雲山二首 僧知亮

戴雲山顶白雲齐，透顶方知世界低。异草奇花人不识，一池分作九条溪。

人间漫说上天梯，万转千回总是迷；曾似老人岩上坐，清风明月与心齐。

## 望九仙山 僧无晦

拄杖寻芝术，西来眺九山。颇知闲岁月，雲水共开颜。

宋

## 九 仙 山 主簿陈元通

九仙曾住九山头，仙去山空岁月幽。为爱遍寻方外侣，乘闲便向洞前游。苍苔断处踪犹在，玉局残来子未收。换骨丹砂应几转，吾生结得此缘不？

## 九仙瀑布泉

主簿柳德骥

白雲深处是仙乡，石涧飞流瀑布长。天插一泉声漱玉，地高六月夜凝霜；烟霞极目浮孤屿，萝薜牵衣出上方。明发阴晴谁借问？虚名终愧梦黄梁。

## 蕉溪温泉

贡士颜克宗

阴阳炭今天地炉，融液好景人间无。木酸火炎两不用，清流自沸跳明珠。何当扬波激沧溟，大块不许氛翳生；何当翻波瀚酷吏，群黎坐使心眼明。尧舜君民均一视，匹夫匹妇皆使被。洗除烦苛不择地，奚止一泓而已矣！

## 汤岭温泉

柳德骥

化工何事起炎凉？偏使山中泉作汤。地气燔燔(chóng)烧石乳，水香鬱鬱喷硫黄。暄波常涌无冬夏，热溜长淅历雪霜。闻道骊山有温谷，岂惟神女为秦皇？

## 五日登五华岩

陈元通

来此逢端午，山间薇蕨肥。盈亏看井脉，消息验元机。饥办胡麻饭，寒供薜荔衣。俗缘今觉尽，才到已忘归。

## 端午泉

柳德骥

有个灵泉在翠微，我来问讯水方肥。盈虚嘿顺阴阳气，消长先知天地机。金井祥开波有馥，银床冷迫石生衣。浮名不值一杯水，满酌罍瓶拂袖归。

## 游登山

县尉黄麟

直上登高眼界宽，蜜陀僧舍富琅玕。天雄峻塔凌穹漠，泽泻巍阶护铁栏。虎脑已回仙枕梦，鸡头宁愧国香兰？登高岂止黄花日，川练常随夜月寒。

## 虎岩纪游

县尉孙应凤

月出山越高，雲行月益忙。树影遍空白，疏星避月光。总非往者见，不从意内量。聪明此一进，境界因文忘。深坐庭露淹，山僧促回廊。鼓钟奏天乐，经行重山堂。暮戢动朝梵、初日升屋梁。佛心光见日，林晖洞八方。细雨霏日中，飞烟青逐黄。出门绕山径，两道夹修篁。茗根千百个，却于山隈藏。径深见奇巖，雲与戴雲望。因之曳竹杖，集伴凌高冈。他年记此际，风花带天香。

## 宿仪林寺

邑特奏主簿黄圭

探幽适兴访仪林，休听春蛙说雨深。翠竹黄花新般若，青山

绿水旧知音。禅盟苏缙情相契，酒恋渊明醉且斟。此去雪峰应不远，肯容杖履漫相寻。

明

### 戴雲山

知县李青

缥缈戴雲第一峰，玊璠削出白芙蓉。极天砥柱烟霄外，满地山河砺带重。海内乾坤非缩小，眼中宇宙更从容。清虚一气还开辟，漫向神州说岱宗。

### 登驾雲亭三首

知县绪东山

几为宪檄启行旌，漫向雲亭一振纓。山色还连春色好，溪声争似鸟声清。望中烟树千村晓，吟外松楸万古情。得到上头须着意，要知满眼是苍生。

昨夜城头雨浥尘，烟雲好似画图真。溪山自有天成险，花木何须鸟报春？题不尽诗因境丽，耕无遗地为民贫。武城从古多豪俊，管取弦歌次第新。

树林楼台墙角雲，溪山城郭不须分。桥拖虹影中流见，烟带钟声隔岭闻；万迭峰峦成保障，一川花柳自回文。春光到处人知惜，野老扶藜到夕曛。

## 写雲亭和韵三首

训导方继馨

喜向岩城建一旌，雲亭胜日会簪纓。山妆春色晴偏好，风递松声晓更清。展履逍遥灵运兴，江湖怅望仲淹情。登临每嘱樵和牧，亭外休伤梧楸生。

楼台高起净无尘，望里雲山今觉真。虹影低垂跨二水，花枝长发斗三春。酿泉满酌能同乐，元草盈箱未信贫。此日四郊传盛事，文明气象喜生新！

新作危亭号驾雲，天光野色欲平分。春来铺绣千山映，夜静鸣钟万壑闻。远眺岚烟连海角，仰攀霞彩动星文。不妨公暇时登览，几度游人醉夕曛。

## 宿永安岩

知县张大纲

闻说仙人不可招，空余佛室结层霄。半山微雨侵衣冷，绝壑行雲挂树饶。秋色到门花冉冉，涛声绕涧竹萧萧。脚根犹喜能攀蹶，呼取村醪醉一宵。

## 九仙山

知县黄承谏

符悬半竹闲栖息，一眺高山石径仄。琪树名花曳我衣，入天双眼芙蓉逼。指点千村缥缈间，桑麻畝亩负山职。何时饵术与餐霞？白日山中生羽翼。

### 游妙峰庵

知县施 汀

清明好个养花天，手挽藤萝拂石眠。竹叶无多偏美影，松梢虽小解藏烟。雀雏久立听僧偈，蜂队重来结佛缘。独向山头一长啸，恍疑鸡犬尽升仙。

### 登九仙山

知县俞思冲

九仙侵碧落，一水引涟漪。坐看清宵月，行倾浊酒卮。岩将萝薛幔，檐傍斗星移。猿鹤空相忆，餐霞未有期。

### 游九仙岩

知县毛 钟

因公初出郭，便向此中游。云散千峰午，凉生五月秋。坐来心地净，踏破石门幽。胜境何辽隔，应嫌与俗俦。

### 将游九仙先过永安岩

知县杨文正

九仙山外客星来，喜傍岩亭紫气开。日满苍林移凤影，泉澄碧涧映莲台。行题立石云生砚，坐对孤峰露湿杯。境寂僧闲思止止，元风应与梦先回。

### 九仙览胜

杨文正

选胜历层山，探秘窥仙室。石盘苍岭巖，峰隐翠微鬱。突兀

伴烟霞，荒凉捐蓬笋。琪花晚故鲜，玉液光抱日。谷暗飞锡来，山回布金密。茆台会野僧，梵呗分藜乙。佛照图林间，元风入属律。因赓招隐诗，差快壮游佚。吸水蒸雲涟，看山夙魔出。以予牛马走，极目凤凰屋。洞邃南北开，岩危今古一。五丁邈矣徂，二酉难为述。莓苔坐世贤，篮舆转童跣。自分菟裘临，亦参大阮秘。流景惊韶光，凡情等崖蜜。欲问元珠藏，宁须婚嫁毕。山游白雲封，傲吏销魂啞。牛斗不全孤，躔息还自觅。

### 过龙湖寺

知县李元龙

登山云是旧龙湖，僧去千秋雲水孤。三代纷然空过鸟，一官淡若从飞凫。经花色色欢同寂，禅意深深有若无。即向九仙峰顶去，只悬片念湛冰壶。

### 小春梅信

课士日  
示诸生

知县金丽泽

岫老雲荒翠色沉，一枝聊复见天心。非贪日午烘晴煖，翻爱霜严表节深。东阁诗家将有兴，孤山处士欲微吟。莫言春色尚迟我，看取清香次第寻。

### 戴雲山

会元  
祭酒田一儻 大田人

天下无山高戴雲，低吟犹恐九天闻。烟霄此去不盈尺，尘世



看来总绝群。七邑扶舆钟地脉，千年苞孕阐人文。丹梯认得登天路，月窟平林桂子芬。

### 宿永安岩

田一僊

岩据蓬莱胜，地兼竹树幽。雲衣青霭合，山色满烟浮。僧老无机械，楼闲可酢酬。游踪原不定，一宿故人留。

### 游香林

田一僊

性僻耽幽寂，闲行兴独乘。青崖一以眺，紫气若为层。树暗晴阴散，烟含夕照凝。浮生无住着，一笑别山僧。

### 宿永安岩

侍郎詹仰庇安溪人

拄杖山将夕，祇林晚暂扳。门关青竹里，犬吠绿萝间。入榻泉声冷，凭栏客意闲。空庭月自照，僧向小铭还。

### 游九仙

詹仰庇

漫道神仙不可求，且来宝地一探幽。洞从混沌何年辟？人共逍遥出世游。翠壁摩空迟日月，苍松盘石老春秋。群公逸兴相招引，雲自无心任去留。

## 登龙湖寺

詹仰庇

万壑天风足下生，绿崖攀磴一僧迎。金峰历历皆秋色，碧水淙淙是处声。雲外香台留佛骨，湖边青草得龙名。山灵不负十年约，五岳今方属尚平。

## 游苕菜岩

即永安岩

太常卿李开藻永春人

危峰百折访僧伽，流水淙淙石径斜。苕菜参差香自远，松杉幂历影还遮。空楼一榻闻斋磬，五夜何人演法车？不是同声能载酒，胜游应隔十年赊。

## 游九仙

左长史颜廷集永春人

九峰矗立九仙名，何代开山作化城？浮出玉莲人不识，飞来金粟道初成。白雲岩际留僧影，清夜空中听梵声。明发相将缘觉路，龙池风雨不须惊。

## 游龙湖三首

颜廷集

不慕僧真爱道真，金峰碧水映千春。龙宫高起三天界，华盖遥临八座人。河近斗牛悬几席，境幽萝薜挂衣巾。共言汗漫游方处，莫笑年来老大身。

金碧峰头青草湖，龙眠水底月明孤。真仙为塔千花累，曼叟耽山一杖扶。白日凌空天共远，清宵对榻梦应无。妙香不断青莲净，倒浸星辰在玉壶。

我从方外结闲缘，迢递寻游已老年。福地布金惟长者，高情何意得诸贤。看来好共香厨饌，酒至如添玉井泉。兴尽下山回首望，白云片片水潺潺。

### 宿永安岩二绝

黄孔昭 惠安人

岩前相对谁？竹冷裳衣湿。人自戴云来，又向云头立。  
山山翠露重，树树黄鸟语。问僧何处归？夜宿山下雨。

### 游琼山二首

大学士李廷机 晋江人

今日往琼山，山朋过我扳。朝来犹厌浥，水去自潺湲。伐木丁丁响，悬崖转转湾。只缘山有约，故爱野藤攀。

亦既至琼山，凭移为榻巧。园芋僧始蒸，堂粥人皆饱。此地耸然高，诸山环更皎。胡为细雨来？只使我心搅。

### 金液洞

李廷机

牟尼归去久，蜕骨在空中。锡杖风尘表，炉烟疑似间。无人将旧钵，有客扣玄关。但解此中意，忘机心自闲。

## 过永安岩

进士王际逵晋江人

隐约山光接马啼，九峰矗立万峰低。雲横野径人谁扫？日静空庭鸟自啼。境寂恍疑身上世，岩虚真觉佛同栖。探奇未尽登临兴，莫是仙源去路迷。

## 戴雲山

邑进士  
御史凌辉

凌霄直上矗层峦，放眼乾坤一掌看。壑吼春雷晴亦雨，洞留顽雪暑犹寒。虬枝倒挂苍龙僵，仙室高悬玄鹤搏。我欲乘风登绝顶，雲关何事阻飞翰？

## 永安岩

封主事郑扬

共道仙山好，秋高天更清。跻攀山是主，缥缈客为星。树古披雲鬱，泉幽出涧鸣。几将高隐事，畅此傲游情。

## 九仙览胜

邑举人  
知州林际春

迢遥百里问仙踪，步入幽岩胜九重。僧向空中飞锡鹤，人从天外蹑芙蓉。丹崖不记何年凿，石井犹余勺水淙。到此同期生羽翰，可容咫尺白雲封。

## 西郊游集押“薇”字

林际春

宿病孤村初解帷，言寻晓翠湿春衣。浮游双眼韶光转，俯仰百年心事违。径入重门开绿野，床横短檠集元晖。何当迢递陪吟客，分面玉郎笑紫薇。

## 游九仙岩

邑进士  
主事郑 沛

寻幽良未暇，雲壑偶相过。山静宁须月，池平不作波。岩扉依树隐，石磴着苔多，肯负山灵好，他年扞薜萝。

## 游龙湖寺二首

邑举人  
同知李雲阶

万仞峰头有洞天，丹崖蜕骨几千年。望来回合芙蓉落，踏遍巉岩荔薜牵。鸣磬犹悬山外日，披衣曾挂竹梢烟。招游半是神仙侣，一任清宵共醉眠。

化城幽傍碧湖开，喜拉高人杖屦来。绣佛长斋偏送酒，友生合趣更浮杯。夜阑梵语空中落，兴剧新诗雲外裁。借令瀛洲堪共老，宁辞拼醉恣徘徊。

## 宿紫雲洞

李雲阶

清宵月色满空山，篷里梅花点点斑。孤刹一钟天际落，两生

半榻梦中闲。疑从桃水通渔入，应有缙山跨鹤还。会得此时真觉路，飞升秘诀总堪删。

### 龙浔山小春烟景

邑举人  
同知郭维翰

独向青山问岁华，小春有脚到天涯。闲看烟渚苍茫色，睇望雲峦掩映斜。碧绿寒轻仍放蕊，李桃叶瘦又开花。平原何事拼余醉，盏底流光迅似车。

### 驾雲亭宴集

郭维翰

亭子高高宿晓雲，客来空翠落纷纷。溪光掩映人烟接，虹影低横浦树分。暂借伴闲看变局，共拼一醉对斜曛。搔头莫问惊人句，谢眺当年已不群。

### 李膺平邀陪俞明府游济山庵

郭维翰

爱客龙门眼自青，飞来兔鷄集郊坰。花承委珮银鱼绂，竹引清风绿玉亭。喜伴江州能作赋，恍如天竺共谈经。名流并是奎娄侣，太史无劳奏聚星。

### 重九游灵鷲岩

邑岁贡  
知县林 枢

尘世声名不可求，丹崖尽处一岩幽。欲超情识繁华境，好作

湖山汗漫游。僧老坐忘重九日，松苍犹自阅千秋。同来俱是逍遥  
侣，野鹤何曾问去留。

### 游龙湖步韵

林 枢

冉冉雲光绕足生，祇园深处数峰迎。山因秋霁连天碧，泉为  
风高作雨声。百尺龙湖惟有月，千年佛骨亦虚名！共游拼得香山  
老，依永犹然纪太平。

### 西郊游集押“薇”字

林 枢

江南春半蕨芽肥，连袂西郊问野薇。树古苍髯遮别邨，人闲  
白发对斜晖。微吟同就风生席，一醉初醒月上衣。踏遍溪桥归路  
杳，数声元鸟逐花飞。

### 灵鹫岩晚眺

邑岁贡  
教授赖 光

石磴盘空路转邪，招登眺远夕阳斜。岩头树色含烟古，洞口  
花香待月华。几片雲光流眼底，数声钟韵出天涯。仍余杯酒多游  
兴，无那啼猿作暮笳。

### 游灵鹫岩

邑岁贡  
知县王 雍

采药逍遥六十秋，风尘撇尽此瀛洲。莲峰涌出诸天合，灵鹫

飞来万壑收。极目蜃光摇竹杖，问津桃水映渔舟。阿弥应笑相逢晚，为我披襟暗点头。

### 步和扬明府九仙览胜 王 雍

古人纪名山，崧高有太室，谁数闽中区，仙山更举鬱。回忆十年时，挂冠归蓬筦。寻山直穿雲，鸣鸡见海日。笙鹤闲往来，雲物倏疏密。盘石虚烂柯，龙池浸太乙。未须雕虫吟，风壑自成律。振衣上上头，飘然忘遗佚。君侯自公余，单骑城西出。省耕念方殷，岂遑探幽屋。举目惊华嵩，宇宙间非一。忽起览胜心，长篇难具述。飞旌出层巔，招摇青鸾跂。偃佺若会逢，梅溪隐真秘。却笑尘中人，腹刀口如蜜。山灵喜侯来，三祝犹未毕。名借侯愈高，侯亦差微啜。诗成藏此中，千古任相觅。

### 西郊游集押“薇”字 王 雍

青青草色半晴霏，婀娜春风曳客衣。龙幹参天鳞甲动，凤冈鸣日羽毛辉。园当星聚开吟胜，杯为花深返照微。出处雲霄怜白发，伊谁共采北山薇？

### 苻菜岩 邑岁贡 教 諭 周 桐

九仙南麓半，古刹隐松筠。法水牵青苻，玄关翥白雲。阴庭



崖树合，野色洞霞分。自古嵯岩下，偏宜养豹文。

灵鹫岩

邑岁贡  
教谕黄龙御

陟上幽岩款白雲，还看峭壁半曾分。葛萝垂绿牵风转，松柏生秋绝壑闻，禅鸟不知鸣欲散，祇林何事畏同群，清游细与山灵约，学士银鱼早已焚。

西郊游集押“薇”字

黄龙御

春事如何半已违，西郊缭绕启园扉。行游不厌同寻乐，坐啸无妨便息机。山放晴光遥入座，日多暖气薄留衣。东风自是长为主，次第开花到紫薇。

登大戴小戴

邑岁贡朱光山

芙蓉削出两峰来，缥缈雲山两半开。故步剧登天可尺，凝眸低望水并回。苍郊冥漠烟浮树，古刹清虚月映台。静对上方尘世隔，闲将猿鹤共徘徊。

九仙岩二首

朱光山

万叠峰峦耸，招遥结胜游。轻烟笼古树，凉月映深秋。怪石

天成巧，崇山客探幽。飘然身世外，兀坐与僧俦。

古寺风尘隔，烟霞绕翠微。静看诸凡了，转觉百年非。洞峭岚侵席。苔深露点衣。登临同有兴，搔首未言归。

登九仙绝顶有怀 邑岁贡  
知县 林 燝

峻峭绝巘倚天开，百转藤萝石径裁。风撼洞门山鬼啸，日蒸雲气海蜃来。人夸八座星辰近，客赋《三都》杖屦回。极目芳林凝暮靄，却怜猿鹿卧苍苔。

夜登金碧岭 林 燝

昏黑上丹邱，迢迢怜旧游。龙从巨壑隐，湖傍银河流。树外诸天近，空中一洞幽。攀跻山欲尽，呵笑在雲头。

游化台 龙湖寺 林 燝

晨起问灵异，缘崖披薜萝。传言留佛骨，空此听樵歌。兴尽山中日，归忘手上柯。一尘今未了，回首白雲多。

九仙岩 邑监生  
县丞 张 绅

磊砢岩高敞北山，琪花瑶草异人间。野猿夜啸凡尘隔，灵鹭

西来佛日闲。石伴棋残雲半护，洞穿树古雨留斑。久欲闾苑迟迟步，欲拾烟霞满袖还。

### 和林柏子天下无山高戴雲歌 邑贡监 张士宾

天下无山高戴雲，无桥高龙门。古人有语谁能述？我在山中今始闻。龙门万丈比天高，足迹平生未肯遭。石桥捶碎悬崖嘴，奔流声带风雷起。巖岩突出戴雲尊，三岛十洲相匹伦。时有真人捧海日，骑鹤往来烟雾窟。身挟嵯峨下碧天，口餐松木漱流泉。壮年我到空门去，犹记山头九溪处。洞天福地迴难周，尺咫蓬莱应可遇。吴越风波棹不停，岱恒车马日纵铎。两都嶻嶭并雲霄，紫气西山看独饶。居庸雁门雄华夏，一统凭陵天设者。桃源谬作秦人家，武夷不独闽中夸。野性惟耽山水游，屐齿踰阯经几秋。尘氛相逐鬓发稀，稍厌驱驰昨已非。脱巾拽屣山中来，雲戴山头朝暮开。傍有九山仙作名，钟鼓猿猴晦朔鸣。予家其下隔春水，时有杖藜伴我行。龙湖狮子列东南，雲子萧条禅可参。石牛金鸡邱壑存，五华金液林木繁。环峙龙浚丁水涓，老少农桑知四时。风俗但传好纸笔，登山涉水携琴瑟。偃佺子晋何须求？玉壶美酒是丹邱。戴雲高兮龙门长，听君歌兮意飞扬。山深百岁无炎热，可以供吾之相羊。

### 宿灵鹫

张士宾

一鹫飞来翠壁间，烟霞色色故留攀。千年雲锁初平石，五月

寒生支遁山。客意但随芳径转，禅心净与碧莲闲。归游已觉今朝是，醉我空门衣露斑。

### 半 闲 亭

张士宾

巖岩高处半雲封，作意寻仙到几峰。绝巘风生喧野鹤，浮空春暗乱芙蓉。虚亭坐石烹新茗，斜磴沿池信短筇。老衲俱闲谈胜果，喃喃天际抚孤松。

### 宿永安岩和韵

张士宾

初地犹闻水苻香，可堪供客醉壶觞。相过翠竹雲光绕，应接青山雨色凉。秋揽松梢天籁动，泉敲石齿野弦长。耽游未毕尚平事，觉路还期裹宿粮。

### 步和杨明府九仙览胜

张士宾

靠鬼度神器，青鸾攒仙室。勺水绕崑潺，平林穿径鬱。沧桑变古今，萝藦封圭筭。山固以仙灵，人或探雲日。鸟声竽籁幽，天光罅窅密。顾盼自君侯，峥嵘联太乙。云有探奇魔，蒙吹黍谷律。察眉裹隐忧，纵目聊舒佚。百里凤毛翔，一游鳧舄出。褰帷绿水前，飞袂青山屋。乐只古人双，治平今世一。花木芙蓉徽，麴麴惊题述。夜宿列寒扃，田更疑驻蹕。轩车既暂巾，琴书同有

秘。风薰单父弦，惠流楚萍蜜。自别烟霞群，思为忠孝毕。阳春雪调工，华袞山灵啜。千古琅璈音，时从霄汉觅。

永安岩 邑监生林煊

寻香临法水，独坐听潺湲。暗谷非因暮，慈雲不在山。风根随石出，竹意与僧闲。何事禅扉掩，苍龙自闭关。

步和杨明府九仙览胜 林煊

采风出郊原，探奇登石室。烟霞畅蔚蒸，林薄穿窈鬱。紫气射牛墟，辉光落圭筭。瑶草动春风，标枝承化日。周遭石砢砢，拱负山冥密。林垌有雉驯，山岳①无虎乙。刹清单及②琴，谷暖邹生律。讼简谢劬勩，公余聊暇佚。句敲天际落，峰破雲中出。洞口长仙芝，藤萝衍幽屋。宝篆异开三，君侯信得一。碧汉飞虹霓，灵岩藏著述。童叟争览舆，林臬讶呼跽。野枝覆层层，丰穰垂密密。擎柱舞乔兔，凤鸾降寿蜜。倚马赋逾扬，然薪谈似毕。苕芹随野供，冰槩惯自啜。只恐山灵妒，黄金紫泥觅。

游苕菜岩 邑监生周任

岩扉常不厌，载酒共临风。苕菜僧厨净，莲华世界空。山移雲片白，树挂日轮红。归兴沿修竹，君庐尺咫中。

## 九仙山晚眺

邑贡生  
知县李乔撰

岩峽绝顶属仙家，卓锡飞教步晚霞。淡荡平铺林是宝，参差如戟石抽芽。径从壁断雲光转，洞设梯危鸟道斜。远近疏林千叶坠，老僧遥指已归鸦。

## 宿灵鹫

邑庠生林 栲

峰头盘结古丹邱，揽胜风前作壮游。宝相重开今佛日，山灵曾订旧名流。池中碧水涵清影，天外明霞落素秋。听偈夜分知妙诀，何来金粟事他求？

## 九仙纪游

邑庠生林 焜

忆余丁未年，夷则月初度。拉社两三三，寻仙凭蹇步。信宿至山中，鸟花如道故。鼠屐陟层巅，峰涧历相顾。梵宫栋宇新，缙流餐霞素。珠树珊瑚姿，五尺未云暮。似盖偃泉石，阴阴长不露。莲花向午开，疑从玉井遇。洞响石罅音，噌吰绰余趣。风烟翳古木，枝枝盘交互。截若箕筲夷，郁如龙蛇怒。巧哉天然奇，人工宁齿数。四望万象空，平楚莫辨树。石隐畸人踪，崖鏤骚客赋。禽鱼草木珍，雨雪晴阴雾。种种景堪评，搔首惭武库。所之只会心，会心弥滄虑。经今十载余，炯炯眸中布。蓬瀛已雲遥，岛洲不可渡。所以福地间，宜发禅心悟。

### 灵鹫岩即景

邑岁贡 知县 赖 廉

灵鹫来何日？香烟带夕曛。上方惟有月，下界尽如云。钟和泉声远，莲传风味芬。岩头舒一啸，应动九天闻。

### 九仙山晚眺

邑岁贡 林 榘

缥缈丹邱何处寻？翠微洞古乱云深。天门高峙金茎晓，石壁斜飞绀殿阴。水底淙泓龙气跃，林丛青霭曙光沉。持杯一笑闲今古，浪说尚平五岳心。

### 灵鹫岩步韵

邑廩生 林 谔

石室曾闻仙子来，天风习习冷高台。何年丹鼎余珠树，几处玄宗破绿苔？山抱烟泉通一径，檐窥星斗挂三台。花香鸟语非凡境，题壁兼多白雪才。

### 灵鹫岩

邑庠生 张志菝

何年凿碧岑？兹山号灵鹫。潇潇涧竹风，叫叫巢岩狖。仙去迹犹存，客来门可扣。白莲忆远公，疑是匡庐窦。

### 九仙岩

邑庠生 周 榘

地高不受暑，峭壁半凌空。林午云犹合，山深日未红。泉流

石骨冷，谷暗雨花蒙。相对如无语，伴僧出岫东。

### 游 九 仙

邑庠生林朝藩

山椒有兰若，胜日偶同寻。鸟语低幽涧，松风袭远林。雲穿行客榻，钟押比邱音。法水淙淙滴，还堪涤凡心。

### 宿永安岩

庠生张 助永春人

史公蜕骨护香雲，钵水涓流尚可闻。蠹筒投来青是竹，苕丝香□翠如芹。岩头豹雾仙峰隐，天外莺花客路分。笑倚楼栏敲短句，夜窗灯火映星文。

### 憩九仙岩

里人周绍熹

灵境名传旧，丛岩半接天。水光时映壁，岚气自含烟。古树珠为蕊，奇花玉作莲。吾生惭偃蹇，欲学醉中仙。

### 灵 鹫 岩

里人陈应鸾

选胜灵山到上方，皈依自爱礼空王。雲封石室经年冷，池浸天花入午香。竹树千峰来爽气，风烟满池动秋光。披襟霄汉逢僧话，闲我浮生白日长。

### 宿永安岩

里人李 嵩

暮入禅关径渺茫，潺湲碧涧苕流香。幽岩已在青雲半，觉路



犹悬北斗旁。万壑秋涛喧宿客，一灯寒衲礼空王。西来祖意从前会，航海三周慧命长。

重游九仙山 时遁奉  
旨趣还朝供职 邑进士  
右春坊 赖 垓

芙蓉削就貌原尊，嵩岱恒华总第昆，出岫雲霞踪独幻，通天呼吸气难扪。龙池青色翔风雨，石洞苍斑啸鹤猿。徙倚危巖胸政荡，可堪书剑动衡门。

登石壺洞二首 赖 垓

削成绝壁辟鸿濛，界画河山指顾雄。林壑岚光浮岫白，海门雲气上衣红。位尊肺柱天倪闕，洞走龙蛇佛子宫。箫鼓忽从危石度，恍疑钧乐奏崆峒。

孤亭壺峒势巉玩，壁立东南一柱看。地俯群峰惟隐雾，天高九月顿生寒。万年洞壑藏灵怪，八部风雲护石坛。登眺幸同名胜侶，欲从千翼竞飞翰。

飞 仙 山 赖 垓

旁午明岚杂紫烟，寻幽客醉唱雲眠。千岩影纳凌霄阁，百道泉飞驾电鞭。杰峙何年悬绝磴？远游今日挟飞仙。流连壁上情还剧，回首斜阳又一天。

## 雲 龙 桥

泉州府张 濂  
知 府

动天届远见文明，可是遐方乐太平？万树协韶雲表奏，四山  
酿水地中行。蛟龙待雨飞腾渐，乌鹊怜星驾落成。谁是殷勤题柱  
笔？不妨驷马使人惊。

## 国朝

## 嘉 禾

知县范正轺

叨膺简命莅龙浔，忧乐家风抚字心。百里漫歌三异政，一官  
惟畏四知金。愁无柏节凌霜翠，喜有棠阴带雨深。但愿尔民频献  
瑞，嘉禾岁岁纪如林。

## 九日游程田寺

训导陈长周

蒹葭庵里富轩筒，不用攒眉忆远公。佳节正当酬酹酌，胜游  
未可薄衰痿。客中词赋三秋径，物外风烟六代官。乘兴不知天欲  
暮，策筇还过小桥东。

## 龙浔八景

知县殷式训

雲亭峻耸出城隅，风景凭睇四望殊。登临最是三春好，到处  
花开似锦铺。雲亭春望

谁画双流将字名？凭高一望甚分明；微波荡漾新晴日，阵阵熏风送水声。字水晴波

鱼案千松绿未齐，月光影里淡烟迷。此中风景宜遥望，半夜清樽好对携。双鱼月色

嵬然凤翥倚苍冥，麓拥烟岚展素屏。好是横铺遮欲尽，惟余天际一峰青。凤翥朝岚

程田松老绕丛林，龙幹虬枝几十寻。钟磬无心禅定处，长闻空外起潮音。程田松涛

宇内闻声说建窑，坚姿素质似瓊瑶。乘闲每上峰头望，几道青烟向暮飘。瑶台陶炬

锦屏端拱北城头，远树含烟翠欲流。有路竞趋求利客，几人解向景中游？绣屏积翠

蕉溪桥下石间泉，疑是地中有火然。一泓清澈长温水，聊寄濯缨与世传。蕉溪温泉

### 写雲亭晓望

教谕力子侗

天外孤亭曙气氲，荡胸高处俯层轩。霞明列嶂红千迭，雾带长溪白一痕。隔树草烟飞夜火，傍城林鸟散晨村。牧樵满眼雲间思，欲访渔郎问太玄。

### 长歌示义学诸生

知县鲁鼎梅

龙得精舍山之麓，临溪小构书连屋。印床花落讼庭闲，时过

斋头课士读。斋头多士自鱼鱼，几席丹铅日与俱，屈指三年勤切劘，新机可比旧何如？我闻昔人欣类聚，四时饶有读书趣，九十春光绿满窗，莫将风雨等闲度。有时薰风自南来，昼永帘垂静悟开，一曲瑶琴初入弄，清歌怀抱思悠哉。西堂蟋蟀吟四壁，趁此读书更有益，圣教无隐木樨香，滴露如珠堪点《易》。况复文史足三冬，梅花数点影重重，雪案分题标好句，寒窗剪烛煥词锋。秋月春光非孟浪，满前飞跃相荡漾，到得忘言更清参，何时可使鸡犬放？文章经济事茫茫，谩闻动众等虚筐，放眼百年三不朽，置身须立千仞冈。古来志士嗟离索，济济一堂破寂寞，善劝过规蛾术时，行见山山皆攻错。只今珊网已宏施，珠贝琳琅耀陆离，但使良工不示璞，会看珍聘龙得涸。

### 琼山吟

鲁鼎梅

琼山傲兀接云天，上有碧霞锁涧泉。幽咽猿猱啾啾泣，古洞扞荅自年年。昔有隐者爱其静，结茅人号道德仙。仙人避秦不知汉，石菴菴兮山之半。至今岭上白云多，谁欤隐者无从按。当年入山别有由，功业姓名甘云散。谷城石，商山芝，老人缙李尚可知，君不见琼山雨雨风风历年久，只余秦汉君子碑。

### 游白岩

翰林李光燠安溪人

蓬壶潦倒故人杯，为访名岩冒雨来。山鸟畏人飞复聚，树鸡当路落还开。阴阴犬吠知篱隔，霭霭烟光觉寺嵬。半世浮名犹未

了，羞将白发照花台。

### 游石壺

举人彭帝时仙游人

才向天台问渡初，闻闻见见果真欤？花迎游屐如相识，雲补崩崖不觉虚。幽涧径深魑魅迹，苍岩苔点薜萝书。八闽风雨千山外，翘首苍穹尺五余。

### 游龙湖

邑进士  
知府李道泰

结梦皆湖峤，前身应是僧。思深春色绿，渴忆石流冰。雲寺舟藏谷，香厨酒若澗。笑余贪笔墨，未解作经幢。

### 狮子岩

李道泰

石室何年启？归雲此洞休。俯栏看鸟下，续竹引泉流。十里盘飞径，千峰视一邱。微寒霜气薄，踏月似深秋。

### 虎贲岩

李道泰

石栈峦深古洞边，桃花谷口漾春烟。鹤飞甚处消游眼，一锁寒雲不记年。

### 道中逢友招游虎贲岩

李道泰

秋兴在山不事招，相逢共策马蹄遥。多因石巧行思缓，半为林深谈舌饶。篁影疏将孤寺出，野容淡把数峰描。拟同剪烛欢宵

永，不放空山尚寂寥。

### 秋游石壺二首

李道泰

壺里寻秋色，天风拂幔亭。藤条绿断壁，石级上青冥。海浪浮初日，烟光起远坳。洞门委宛处，剑气落寒生。

风篁清冷绝，身更出层云。门导龙穿迹，洞摩雷篆文。扳枝飞鼠技，过壁饮猿群。却笑莲峰上，昌黎待醉醺。

### 登龙得山

教谕曾晋

山城带交流，环嶂境初拓。中有鬱鬱观，佳气冲孤毒。相看每心玩，假日展乃托。凌虚一纵目，洞豁荡心魄。霞石触层巘，丛木下诸壑。吁嗟气候移，光景无淹薄。长啸隐苏门，岷山凄挥落。纷吾登览意，远离重寥索。日暮望关山，抚襟殊错愕。归径映萝月，孤琴鸣虚阁。

### 宿法林寺

曾晋

朝日戒车徒，雪飞山径路。向夕栖禅林，明月照高树。岩壑何豁险，仙钟鸣已住。法侣期雏来，朔风吹屡度。伊余远行迈，讨探灵栖趣。澹虚观我身，山水有余慕。独立眺九峰，空花夜深雨。

### 九日集西华室

曾晋

佳节朋徒会，清樽共解颜。邈然山水里，乘兴叩禅关。岭峴

霜初重，寒英绕径斑。恰能招醉客，笑掇一枝还。

### 九日西华室和韵

训导萧国琦

衰鬓经秋短，簪萸慰老颜。酬诗来菊径，载酒入松关。山以凝烟紫，树因结露斑。登高开笑口，落帽许同还。

### 沪溪即景

典史王佐

一带清流绕郭门，公余缓步听潺湲。烟拖陶柳芳洲霭，风送潘花锦浪翻。雷雨开来符古讖，雲龙裹(zhī)出见真源。波间鸥鹭闲如许，踏向沙头共负暄。

### 蕉溪春行

邑岁贡方今泰

寻春春暮更留情，杖履沿溪不计程。夹岸群花如解语，团沙浴鸟自呼名。温泉小憩宜童冠，北岭重临愧老成。何处牧樵偏适趣？轻讴唤出翠微声。

### 冒雪游雪山

邑廩生王夏声

雪山积雪景尤加，拨兴寻僧岂厌遐？收拾冻松添旅草，扶持行李度梅花。寒崖暂没霜前句，香积偏饶雨后茶。三宿重缘真不负，上方碧月问天賒！

## 戴雲山

王夏声

住山不见山真面，镇日留雲頂上遮。最是春来花事好，满头珠翠笼乌纱。

## 初伏过程田寺

邑岁贡李乔鍾

无端琐琐伏蒸焯，为爱清阴过法林。问道去来皆不碍，参禅梦觉总无心。莺迁告我栖枝早，龙变羞人伏枥吟。喜得幽凉闲半日，暮蝉别调振疏襟。

## 飞仙山

邑廩生黄遂权

为访灵岩结伴行，阴阴山径鸟交鸣。双尖插汉笼雲白，万仞飞泉挂练青。阁倚悬崖临一切，石容坐客话三生。夜来触景联长句，皎月当空斗柄横。

## 浔堤夜坐望驾雲峰

邑举人  
知县林汪远

高峰天际出，抱月照清池。酒酌于其上，诗成在此时。平郊烟火静，过岸钟声迟。秋色莹如镜，愿持赠所思。

## 游戴雲

林汪远

古佛何人成铁汉？千层峭壁立晴霄。山因奇骨多雲气，草不



知名半药苗。珠滴松花龙正睡，岚归瀑布岭初潮。敲诗倚遍栏前竹，细听溪声度小桥。

### 湖山大士阁 邑进士 知县林 模

一榻遥将翠黛收，别开望眼足清游。怒涛时绕松风梦，密树翻惊野径秋。宝阁危因贪石势，镜湖阔欲并雲流。山中缥缈吹灵气，十岛应还更有洲。

### 登金城山六绝句 乙卯乱 中作 邑举人 知县谢青镗

便与人寰隔，居然境非秦。方知真榴洞，原属信脚人。  
登高好问天，恨无惊人句。学得阮公哭，也应扫雲雾。  
古石耀灵气，至宝秘其中。谁为叩玉户，呼出白猿公？  
天低如屋覆，日月是吾鞶。愿借此长光，照灼千山径。  
山城夜柝静，千家余照红。看出人烟火，始觉境崆峒。  
高阳古酒徒，生平高山仰。今日醉此乡，更在高阳上。山下有  
高阳乡

### 和范明府咏嘉禾 邑解元萧宏梁

闲来山水可幽寻，频忆当途父母心。三异政成夸止火，十茎秀满庆垂金。琴堂色笑和风发，花县讴吟香露深。卓吏方来褒德颯，行看策马入琼林。

## 和范明府咏嘉禾

邑岁贡 陈锡华

汉臣从昔歌来暮，先后还同抚字心。丁岸花疏争献瑞，浔阳禾黍尽铺金。政夸三异祥风遍，化溢双歧沛泽深。自是春风嘘暖谷，应看桃李满琼林。

## 自鼎谷移竹种义学

邑举人  
知县 陈应奎

昔人曾有言，惟俗不可医。何以医此俗？读书为最宜。又闻昔人言，无竹令人俗，欲存此两说，读书兼种竹。奈何读书人，胸中万斛尘，会须先脱俗，读书方有神，会须先种竹，方不与俗亲。我家远城市，茅舍绝四邻，与竹结素友，莫逆二十春。比者多契阔，舍旧图其新，面目非本来，步趋亦逡巡。俨然称先生，垢汗满衣巾，呼僮告此君，今日是良辰，移来列后圃，相对得所因。徙石坐啜晤，萧萧谢俗宾。何处招王子，造门与细论？

## 游九仙山

陈应奎

蹑屐穿雲兴正豪，问天把首几回搔。山僧扶杖开荒径，野客扳藤系短袍。珠树古盘苍颉字，石峰巧削鲁班刀。探奇直上嵬峨地，俯瞰山腰雾似涛。

## 瓮谷观大小龙湫

邑监生 李 翥

入山看雲水看瀑，山水有意寻荒宿。村叟指拂瓮口烟，赠我

红兰供野簌。相引沿流几曲中，扳藤绝壁不可馱。溪阴无径作横桥，树深午气变霖霖。忽然破溜凿空来，吹浪怒鳞难注目。五色蜿蜒势莫停，冷雾侵人神森肃。老蛟迅飞潜鱼鳖，奔腾远际动林木。往往望霓乞水灵，风云倏然相驰逐。大湫险绝小湫奇，凌空环抱皆石矗。洞底昏黑雷轰轰，过鸟惊栖孤猿哭。从来空想盘谷幽，何以龙湫泉万斛。请君领取满瓮罍，卧听长松声谡谡。

### 金液洞 邑岁贡 陈 澍

灵风遍九州，胜地匹丹邱。云气空庭出，钟声碧汉浮。清泉聊可酌，金液此长流。欲问升仙诀，骖鸾出世游。

### 驾雲亭怀古 里人 毛一夔

胜迹青山在，凭高豁所思。春秋惟草记，兴废有雲知。烟水全城画，松风满径诗。前贤何处问？细读夕阳碑。

### 宿石壺岩 毛一夔

清秋风景快游扳，胜友相期兴不慳。一世烦心消夜磬，百年老眼愧名山。寻诗喜拾松边句，聚话聊添石上闲。烂煮蟹汤僧见爱，幔亭隐似武夷间。

### 登石壺次韵 毛一夔

我已登无上，君还步肯齐。诸山皆景仰，何树敢辞低？雲裏

三三曲，洞天六六迷。石牙惊虎豹，剑气落虹霓。海日先岩曙，秋禽散野啼。松阴随客转，花榻傍僧栖。选胜同搜句，摩崖不记题。高风断叶急，归兴夕阳西。

### 宿程田寺

邑岁贡郑 暹

出郭过丛林，悠然晚趣深。云归方竹径，月上万松阴。佛默非嫌酒，诗迟自苦吟。疏钟频点落，消尽世尘心。

### 游石壺

邑廩生毛恩盛

寻幽远叩白雲关，石径纡回落叶斑。沧海秋清常浴日，碧烟天阔不归山。风涛有韵茶先引，野鹤无心鹭与闲。五尺痴童虽懒事，投诗携得一囊还。

### 攀龙桥初曙

邑监生林德龙

龙湫澄晓镜，凤岫霭春明。入眼睛光转，侵衣宿露轻。林开知鶉喜，酒熟报莺鸣。提屐寻芳去，潘花望满城。

### 游石壺

邑贡生黄宪文

欲遂探幽志，来寻绝境游。秋林光似练，细水碧于油。海日朝霞灿，江雲入眼收。出山全未忍，去去仍淹留。

## 秋日游飞凤亭二首 黄宪文

凉风天半过亭栏，点点霜华满石坛。胜地雲山秋觉好，仙家玄秘话来难。自从神女乘鸾去，几度松花落径寒。隔断红尘应已远，钟声传出珮珊珊。

极目天空雁字南，一亭幽景静中探。女萝影动新秋月，杜若香来旧石龛。露滴长楸疑作雨，流从远涧自成潭。此时此境生遐想，徙倚更深不觉三。

## 戴雲山顶观九溪分派而下 邑监生陈天宠

闻说黄河星宿源，滹泓沮洳始涓涓。万里奔流入塞来，波涛汹涌真奇哉！我从戴雲绝顶游，此地毋乃星宿俦？池光荡漾雲光碧，上与天河通潮汐。九条分派号九溪，或泻东兮或泻西；或为清涟激湍势，或如瀑布溅空际。谁排长剑劈青山？惊走白虹出雲关。雲中垂下水晶帘，倒注银甌玉楼檐。呜呼九河神禹迹，代远沧桑淤泥塞。独此九溪终古分，却讶住山人不识。

## 岱德岩读书 邑岁贡连如璋

为思肄业到名山，岱德岩开松竹闲。群赴参禅峰错错，环归入定水湾湾。钟敲梦境同圆枕，烟锁尘缘胜闭关。一自青灯陪佛火，昙花时散笔花间。

## 登雪山岩

邑岁贡郑惠琇

绝顶年来足鲜经，芒鞋初试访山灵。难通石径疑无路，直到雲端更有亭。上刹烟霞连碧落，下方风雨走雷霆。漫言面壁僧家事，入眼诸峰早送青。

## 石壺步韵二首

邑举人林显

芙蓉削出自尖岫，仰面飞腾别样看。巖石雲封难识径，清秋月冷觉生寒。谁驱山崇开名地，俨象方隅筑紫坛。精气不磨游者众，愿留一座列新翰。

石骨峻嶒列顶岫，神人往迹至今看。雲留雨意千峰暗，洞老苔阴六月寒。幽咽泉流鸣绝壑，光芒剑气烛巍坛。诗豪前此标佳句，下里和来愧弄翰。

## 暮春游戴雲寺

邑廩生连雲阶

春老筇犹健，招携出翠微。峰高雲作盖，寺隐岭如帏。清籁和泉响，晴岚拥树霏。静来参太古，猿狄亦忘机。

## 驾雲亭晚眺

邑庠生谢祈出

驾雲亭上漫留题，回首残阳挂树西。郭外牧童随犊返，林间鸟鹊带烟栖。晚炊缕缕全城动，野色苍苍二水迷。几阵凉风衣袂冷，一声长啸下雲梯。

雲亭春望应课 邑庠生林敏

雲亭绝顶插天隅，百里春光入望殊。最是河阳花事早，成蹊桃李已平铺。

秋日登飞仙亭 邑监生黄守仁

蹶屐登仙岛，清秋景致嘉。悬流千丈直，飞阁一层斜。烟老苔妆石，山深鸟语花。敲诗还踏月，老衲点龙芽。

宿飞凤亭 黄守仁

金风吹月出层峦，玉露流酥点石坛。胜景原来秋更好，仙家清处夜微寒。犹闻素女歌霓羽，疑有飞琼乘彩鸾。徙倚亭前忘漏永，梵钟隐隐碧雲端。

登雪山值雨 邑拔贡李宸铨

为爱春光兴未休，笑携双屐上岩邱。雲封曲径藤萝暗，雨洗微芽祇树浮。清磬遥闻何处响？天花飞散一峰收。山僧有社奚须结，杯茗盘桓即胜游。

清明游火烽山二首 李宸铨

春气当三月，和风入袖盈。穿畦忘径曲，扳磴觉身轻。古冢何人泣，新烟几处生？狂歌犹未歇，林外正啼莺。

乘兴踏青去，家山望几层。天围城阙小，地涌岭峰增。禽鸟机相狎，儿童乐欲仍。咏归虽未得，聊亦记吾曾。

### 游石壺洞

邑举人  
教諭 温廷选

远上危巖古洞间，呼僧引屐入餐关。三门径曲丹梯老，一洞泉淅玉乳闲。此日人谈林壑美，当年鬼泣雨风蛮。夜来刻烛同拈韵，是处松涛籁满山。

### 游金液洞

邑廩生 郑大夏

紫府清高天际看，漫山秋气逼人寒。石泉通处丹流液，古洞开来斗作坛。枫落好峰雲外簇，霞明远峤望中攒。神游恍惚仙灵集，谢尽尘缘未觉难。

### 龙浚绝胜

邑进士 王必昌

闽邦开土宇，宋室盛斯文。申画成天险，丁流辨地垠。半山环雉堞，三市傍溪湮。社以层峦隔，村因绝壑分。衣冠崇简素，草木吐清芬。岚鬱晴疑雨，嶂高暮带曛。石泉资灌溉，岩阜藉耕耘。有路惟过鸟，无峰不说雲。洞幽佛藏蜕，林窈鹿为群。沕穆风犹古，确磔力尚勤。百年声教洽，八里咏歌闻。龙凤传名胜，簪毫纪瑞氛。



## 龙浔山回文

王必昌

鍾灵地角抹云山，胜览频来同侣扳。封磴古苔滋翠点，拂岚晴岫拥青环。峰攒怪石危亭倚，郭缭长虹双水潺。钟外花城春鹭鹭，龙浔起色瑞穹寰。

## 龙浔春晓

邑庠生陈凤鸣

山城风物趁春明，曙色苍茫景倍清。柳为眠雲慵未起，花因吸露醉方醒。一溪烟染双桥彩，万壑岚薰四野晴。听得邻翁呼载酒，日高相约看流莺。

## 观东郊迎春

邑庠生蔡文泮

仗旗簇簇向东回，迓得春光次第来。雪眼渐开青展柳，霜威欲尽白留梅。暖风敲转茶边句，淑气行催阁上杯。花信促题笺百幅，西斋甘自费松煤。

## 无 题

邑名媛谢凤姝

帘外东风渐转移，海棠褪尽少春枝。眉间有翠山难鬥，心内含愁镜独知。梦弱不堪莺唤早，门深空念燕归迟。晚霞长布南天锦，僭作回文寄我思。

### 芙蓉水蘸笔写美人 谢凤姝

芙蓉出浦秀临风，一点胭脂竟不同。水照奇花花照面，春山淡远最难工。

### 纂修邑乘告成效柏梁体

征文征献集群贤<sup>知县鲁鼎梅</sup>，百里欢声动远天<sup>教谕曾晋</sup>。马扬班范相  
 后先<sup>训导萧国琦</sup>，诗礼韬铃並敷宣<sup>驻防把总洪信</sup>。讼庭寂静分必弦<sup>典史王佐</sup>，乙夜  
 辛勤汇鸿篇<sup>浦城举人李青震</sup>。半壁池头藜火燃<sup>原任泸州判官吴超英</sup>，满门桃李春門  
 妍<sup>原任永安训导赖铨</sup>。花间捧出五雲笺<sup>原任宣城主簿陈义焯</sup>，翰墨香流丁水涟<sup>进士王必昌</sup>。  
 学海文汇汇众川<sup>举人林应祖</sup>，眼箕心发笔如椽<sup>举人林昱</sup>。纲罗百氏任贯穿<sup>举人</sup>  
 顾<sup>原任武平教谕举人曾重登</sup>，疑与阙兮信斯传<sup>举人李昱</sup>。义例分明次第詮<sup>举人李昱</sup>，准今  
 鉴古破拘牵<sup>举人许应曜</sup>。综来八百十四年<sup>举人许宝三</sup>，细目宏纲总秩然<sup>举人徐天</sup>  
 攀。拓开生面万峰巔<sup>副榜贡生蔡文瀚</sup>，雷封绣错绘裘廷<sup>副榜贡生郑熊詔</sup>。宠锡循  
 良降日边<sup>岁贡生温玉斗</sup>，艺林鼓舞沐陶甄<sup>岁贡生连如璋</sup>。倬汉为章奎壁联<sup>岁贡生郑</sup>  
 惠琇，桑梓光荣繚瑞烟<sup>岁贡生陈开材</sup>。阳和霭霭被桑田<sup>贡生连国器</sup>，士女讴吟度

陌阡<sup>贡生毛际泰</sup>。式于仁让习俗<sup>贡生陈时夏</sup>，月旦衡评绝陂偏<sup>贡生林焕彩</sup>。芳  
 闾冰玉纪金钿<sup>贡生方鹏奋</sup>，胜迹灵栖访偃佺<sup>贡生郑文煌</sup>。雲山满幅供流连  
 监生黄守仁，蹶展摺笈句似仙<sup>监生叶乘龙</sup>。生花老眼愧丹铅<sup>九十五岁生员陈玉珩</sup>，拮  
 据旧闻效埃涓<sup>八十九岁生员李雲从</sup>。残碑蠹简费钻研<sup>七十三岁生员苏廷望</sup>，订补图经  
 握蕙荃<sup>七十岁生员乡次宾陈凤阳</sup>。广搜遗稿选青钱<sup>虞生张应宿</sup>，探得骊珠出重渊<sup>生员</sup>  
 谢析出。腹笥籍记尚便便<sup>生员陈元斌</sup>，遍采刍蕘不弃捐<sup>生员张天溱</sup>，澄心商榷  
 共勉旃<sup>生员陈拱璧</sup>，毫端垂露思涌泉<sup>虞生周维新</sup>。精华朗射牛斗躔<sup>生员赖法腾</sup>，  
 隻字千金国门悬<sup>生员陈其遇</sup>。言言世教发蒙颯<sup>虞生涂廷颯</sup>，寿之永久金石  
 铸<sup>虞生刘世廣</sup>。银管题成锦轴鲜<sup>生员许应暄</sup>，缥緜振彩凤冈前<sup>生员陈媚</sup>。愿藉翰  
 轩播八埏<sup>虞生郭观光</sup>，皇猷润色属青编<sup>生员曾鹏程</sup>。

## 赋

### 国朝

### 圣主诣雍劝学赋

臣邓启元

惟元后之亶聰兮，作君而兼乎作师。有此媵修以帅天下兮，

教顺时而正规。骊玉虬以视学兮，隐符访道乎崆峒之涓。溯太学所由立兮，五帝肇号曰成均。成以成人为义兮，均以调而为言。曰东序，曰右学，曰东胶，同实而殊名兮，义著尚质与尚文。既远望灵台之岷嶰兮，又近环璧水之清沦。我皇之德，包三涵五以立极兮，厥教本乎《五典》与《三坟》。黄帝颀颀之道，敬怠判于毫芒兮，唐虞绍之以执中，尧放勋而舜重华兮，亦揆序而典从。及乎文命，九德是庸，教曹之语，宽栗直温。愿恭扰毅，至道所存。

三圣伊而祇敬兮，汤又申之以表正。文翼翼而缉熙兮，武皇皇而执竞。绵绵千载，至于素王，麟书既出，赤绂呈祥；祖述宪章，旷世独崇。天生我后，道统斯在。尼山续徽，泗水正派。尊师重道，褒封五代。夫惟先后圣之同揆，故能锡类而不隘。

曰道可公兮而不可私，咨尔俊民兮，登高以自下为基。望宫墙之轮奂兮，将释菜而光乎肅肅，既卜禘而游志兮，当其可之为时。于焉鳩工庀材，丹雘刻劂，斫楮砻椽，锥卮刮楔。安窟斐臺兮，丹雘朱闕。庙貌重新兮，虔诚以揭。惟日在胃兮，昏中七星，律中姑洗兮，辰为上丁。命卜日于宗伯，戒习舞乎司成，遂乃拚除射官，涤溉瞽宗。残纂陈兮郊东，梳棋具兮上庠。乐人宿悬兮，阼西异方。笙颂两磬兮其南钟，大听鼓征兮夜未央。鹵簿前辟兮，庭燎有光。载日月兮旌虎熊，骖骖衰兮驾苍龙。麾盖蹀躞兮，和鸾锵锵。天子舍奠兮，有饎其香。执鬯输诚兮，珪璋邛邛。笄荐苹蘩兮，靡不瞻夫穆皇。大胥掌版以致诸子兮，纷羽舞与族春。已而应棘（他东切音通）备举，相雅声喤，祭筵既毕，

天子乃讲道于彝伦之堂。毡案论道兮，讲幄徐褰。泮藻风舒兮，  
 圆桥日昃。琅函启兮师道尊，罕譬而喻兮瑶编展。披大学兮  
 敝词，遵雅言兮重谟典。溯正心诚意之渊源兮，合治平以归  
 于至善。本精一以立政兮，惟危微之必辨。

丝纶既降兮，其义博衍。丹书启秘兮，绍道乃緌。尔乃三公  
 九卿，大夫群后，阐幽微显；以至胄子，国之俊选。来若风行，  
 聚若雲填。捧瑶笈兮记所闻，簪彩笔兮集成卷。或有操缦之俊，  
 博依之子，徐徐于于，来求听语。聆经义之琅琅兮，若迷行而得  
 归所。于是乘輿下钧天之座，彻纛席之黼。乃奏王夏，返旌回  
 羽。顾瞻誉髦兮何乐胥，命有司兮锡燕醕。席位象三辰五星兮，  
 清庙既歌而合语。言父子君臣长幼之道兮，合德音之为主。有司  
 告乐阙兮，史臣秉简纪事，以光于万古。先圣之厚德兮，播金声  
 而播为悼史，其时观者如市，环者似堵。或德进而言扬兮，虽郊  
 人亦取上尊以相旅。是知临雍之典，其来旧也欤！

今天子绍百王千圣之统，大宝初登，鸿庥是凝；披彼成宪，  
 案乎史乘。力田是举，孝弟同升。亲郊以严配，耕藉而敬兴。既  
 渐仁而摩义，亦风流而令行。犹以化民成俗，必由于学。观时木  
 之蛾子，琢玉而雕璞。以董戒为曲成兮，庀良材而不遗乎硃砾。  
 覆育多士，如伏鹄鹑④。吉士将挺生兮，翩翩飞而相颺（biao同  
 飏）盖作人配乎菁莪，典胄追乎韶箭。赫赫乎，泱泱乎，盛德大  
 业至矣哉！

其于永平横经，贞观造士，犹泰山之视乎岵（Kuây）壤  
 耳。敢作颂曰：皇帝践祚，天地合德，寿考作人，藏修游息。蔚

之樵(yōu)之，取材朴棫。建国君民，典重庠黉。学礼读书，四术是崇。春诵夏弦，诏之警宗。于乐辟雍，天子来临，旆旆神旗，嘒嘒鸾音。大哉王言，一哉王心。多士盍簪，甬甬雲从。亲炙圣德，为龙为光。臣拜稽首，寿考不忘。

## 龙 浔 赋 鲁鼎梅

繫永州之首邑，属泉群之旧区。接三山⑤之雲海，征一统之车书；抚雷封之乐土，舒清啸于公余。

粤自仁郁⑥立，德化集；闽王归，封疆入；星野分，形胜岌。鸿宅既鳩，龙浔以邑。仙游东襟，大田西弼，永春南连，尤溪北昵。虽沿革之递更，亘古今而不失。则有障堞环闾，隘汛列垠，廨舍若锦，闾闾如鳞。庙坛肃兮人鬼享，礼乐彬兮士女亲。三十九社⑦民风，浑浑近古；七十二候时序，蔼蔼如春。兵燹昔惊兮，嗟村圩之寂寂；唐虞德洽兮，庆户口之溱溱。顾乃物产茁，民气驯，正供纳，则壤均。麦浪兮吹秀，稼雲兮成困。天不爱道，泽自媚珍，山鸡吐锦，畚谷荐新。歌社酒兮，家家扶醉；击土鼓兮，处处吹豳(bīn)。覩太平之有象，与流峙而方臻。

盖其碧水丹山，神工鬼斧。龙浔千里龙来，凤翥⑧九苞凤舞。戴雲雲髻梳霞，如插天花；卓笔⑨笔锋指碧，疑书太古。产水⑩百川波澜，丁溪一夜雷雨⑪。龙门飞浪兮崖轰，虎涧吼空兮涛怒。石穴幽兮古崆峒，澄潭黑兮窟蛟龙。纷千岩与万壑，羌浪卷而雲封。览山川之奇秀，想灵异之毓鍾。

忆夫川效珍，岳职贡，民献生，福星动。花县春深，琴堂风送。冯、姚⑫甦既困之疮痍，和、撒起更生于疾痛⑬；熊、王若军中之范、韩⑭、张、邓真王国之梁栋⑮。为霖多人，保赤皆中。莫不称佛称神，如鸾如凤。寇藉当年，碑留有众。使君来兮桃李栽，文学振兮科名开。育英才于有用，厉风俗而加培。

爰有天上书记，人间仙才，跌宕文史，啸吟岩隈。思异水兮泉涌，笔非秋兮露来。发大业于名山，驰清誉于仙班。歌鹿鸣而鹤起，登雁塔而龙攀。既文章之炳炳，亦经济之斑斑。

即如政清两浙⑯，官庶才豪⑰，节标千载⑱，御史⑲风高。林隆甫⑳保守孤城，千人豁免；邓台生㉑痛哭一奏，万姓呼号。真好长官兮，龙南有颂㉒；以死勤事兮，儋州忘劳㉓。

至若统军救宋㉔，十万勤王，血殷顽石，魂毅故乡㉕。或赎父棺于贼寨㉖，或脱叔命于剑铓㉗；或吁君门以甦屯困㉘，或散家资以靖寇强㉙。还遗金⑳兮风何古，赈私橐㉑兮德弥芳。洵孝友之独挚，叹忠义兮难量。

至若女中丈夫㉒，闺内处子㉓，人称未亡㉔，志惟自矢。名初问兮币初陈㉕，秀娘经兮㉖擗娘死㉗；刘妇身陨绝崖㉘，桃娘魂随流水㉙。宁甘贼锋，不受奸滓㉚，緬彼松筠㉛，砺人廉耻㉜。此皆冰玉之精英，要与河岳相终始。

别有一邑之英，百年之皓，表以人瑞之坊㉝，宾为天朝之老。山似终南兮，水若辋川；白雲礧礧兮，碧涧清涟。谁其居此？中有人焉。少微朗，处士坚，志尚高，情孤騫。依稀五柳，彷彿七贤。更有六如了悟，九转功圆。疑神疑鬼，成佛成仙。亦

自稟夫清淑，爰得洞其空玄。错举人物之蒸蔚，想见扶輿之蜿蜒。固宜韵士高贤，望奥区而栖托；骚人迁客，景芳躅以流连也。

若乃探幽访佚，怀古兴思。琳宫缥缈，梵宇参差。塔翬霄兮山之麓，桥鸣凤兮水之湄。春波楼外波潏潏，雲龙桥下龙委蛇。紫雲雊雊，金液离离④；九仙烟碧，五华月迟⑤。寻仙女之飞凤⑥，读隐士之残碑。王龟龄龙池⑦，波涛自昔，真西山古迹⑧，霖雨犹滋。井逢端午而独溢⑨；树老百年以长枝。⑩汤泉滚滚兮，沸如温谷⑪；瑞莲亭亭兮，香满泮池。斯固龙得之声名文物，诂云岩邑为僻陋荒夷？爰略敷其梗概，而重缀以歌诗。

歌曰：水汤汤兮山峨峨，选胜概兮有且多；灵而杰兮大非夸，千秋万世今天宝物华！

## 序

明

### 《戴雲山志》序

知县杨文正

《礼·职方》土者，境内山川，例当虔祀典明，有攸属所司也。德化戴雲山，亘峙西北隅，高岑巖峽，众山望莫能齐，斯固一方巨胜矣。然泉南七治，独德化在万山中，石径阻隘，溪沙浅勒，以故驰驱泛棹皆非适，而冠盖时流览胜好游之迹，亦不数数



过。如食土之民，鹿居豕游，凿环犁块，犷犷榛榛，有古风味。是山全灵隐镇，历溯自唐开刹至今，永歟一方。而德化由来，社稷之与治民并称郑重厥有以也。

间尝考府县志，又知是山。西南行逶迤至清源，作泉郡祖龙，东北自天马山起势入莆仙、永福、长乐四地。今几郡人文斌斌，甲宇内就人物思山灵之重，其苞孕闽南，发祥宏远，关系岂小？又云度处德化，望镇奠雄，创刹肇唐，祖膊所以永归德之场，壮荒城之色，又其亚也。

斯志首绘山图，以著延袤包原固疆之广；次标题咏，以表高人墨士讚叹之奇；殿以名公巨卿贤达序记，诂小书说细哉？所由储精散彩，橐籥灵秀，征表文物者，将于是乎在。

若夫纂辑成书，留镇山门，增辉法界，则山僧圆朗之功也矣。

## 《九仙山志》序

杨文正

山以仙灵，自昔记之，岂凡块然者是必标胜自神仙，岂凡至人者是必以灵秀融结为窟宅哉？而似不尽尔也。

环闽固多山，尤多奇山，徒以其岿突闻，大块中一顽质耳！就间峭峭削削，怪石碌砢，插柱罅洞，超距罗布。窍大小鸣而不得其际，岩高下见而莫状其奇。或步武可容数仞，旋隐曲不可攀，或彭彭出石罅中，渊泓照泻，又不可得上。溶溶之自是山现出诸状貌，人亦就其近似可称者，名之石室、丹灶、丹鼎、龙

池、烂柯处、弥勒洞。于是山之奇特有加，称仙之异实愈显著矣。斯九仙之大概乎！说者又谓山何以九仙，非八也？无以雷轰、龙瀑、黄鸡、茶潭屹然，仙游九鲤胜事具在，德化邻之，则山名九仙，何必颛彼而疑乎此？即谓之九仙，似不必穷所以也。

夫九鲤卓哉，闽中胜异，而黄梁受枕，梦点机械，致走四方英杰趋若赴，何无泥辙日耶？独德化九仙山藏灵于万谷间，得静体，朴中露奇，喧中处寂，与雲霞为朝夕，同日月生光辉。得静机，有谓惜其僻在一方，不集高士之车，招道游之侣，与九鲤等观，系此政九仙之所以为山，具天地大观，灵愈敬愈，日永固而不蹶也。

乙卯冬，余来宰兹土，俨然企慕之。丁巳春，甫哀粮重茧，探奇山间，觉有乘雲御风想，不揣于笔舌间纪游，愧鄙俚矣，忽一日，四门张君纂所为《九仙志》，强余言，余言不文，何以远？恃有诸君子缙绅大作在，又恃有九仙之摩雲，鷲岭诸胜概在。余亦素有烟霞企慕，与张君悠悠泉石，心有同然也，聊为发之。且嘉张君胪列是书，一阅案头载籍，不待蹶踞峰巅，遍游雾岫，然后识所谓山灵也者。是山固具一化工，而张君之志，尤化工妙于点缀手矣。

## 《九仙山志》序 张士宾

吾闽固多山，而奇峰绝巘，具福地之一体者，即区内亦指不多屈，况吾邑乎！邑遶北三十里许，有山戟立棋置，不知其几千

万状，名曰九仙者，是为最著。邑乘云：昔有九仙人经游其处，今石室、石井、石鼎、石灶、石池、石盆、石棋子，宛然俱存。岩，故名九仙，创自唐始开元间，沙人无比师，藏修其上，道成鼎建，易为灵鹫岩，所雕石大士、弥勒世尊在焉。至元末明初，兵燹稍荒。嘉靖末，萑苻蜂起，田没室毁，几成乌有。尝闻一村中人某者，年每施箬笠，盖如来而已。

万历中，僧智空食力兴废，实山灵使之。兹者梵宫宝相，逾昔布金，幽壑元亭，尤今聚鹑。朝日旭而暮云飞，松风吟而禽鸟乐。廓然大观矣。惜夫僻致一隅，轩盖罕至，奖借寥寥，知有九仙者，不过十之五。

予于泉石有癖焉，自倦游以来，每入里社，即迟伫其境，欲敷断家事，学禽尚游，未皇也。然神未尝不俱往。若夫春风习习，秋月迟迟，泉涓涓，石粼粼，烟霞变幻，猿鹿杂出，山间朝夕，人境两忘，当不在天台、岫嵎、幔亭下矣。故邑称兹山最著，乌可泯然无一志也？或曰，志非才谓，名位兼有之。人任之鲜，不见嫉于山灵。予乃辑名胜题咏，别为一集，藏诸石洞中，以俟博采君子。时万历丁巳端午日。

明

赠县尉晴寰林君迁乌山巡宰叙 郭维翰

国家张官置吏，以子惠元元，如大匠之用材然。巨者充梁栋，细者备榱桷，以至竹头、木屑，靡不各尽其所长，而各适于

用，盖铨选之精也。三载大计，则又拔其优俊者而晋陟之，或循资，或异等，诏禄惟功，叙功以劳，抑何简擢之不虚耶！郡国大寮，自监司、牧守外，惟令于民最亲，大者百里，次方六七十里。夫以百里与方六七十里之众，人人望泽于令，令綦繁且重矣。穷陬邃谷，辙迹难遍，则令拙于省方；舟车杂遄，水陆交驰，则令罢于酬应；簿书山积，钱谷猬集，则令纷于裁决，不得不设尉以分理之。吾未见尉之事非令事也，奈何易视尉？

德化在万山中，土瘠而民淳，事简易治，前后以令与尉来者，多厌薄之。会虎林俞公，以名进士量移兹土，喜与斯民休息，日出坐堂皇，帘静琴清，公事毕，即肩舆出玩山水，民欣欣然，若登春台。未几，林君尉德化，尤善体其意，而赞其理。凡俞公所欲为，林君代为之也；俞公所急欲为，林君先为之也。去岁入覲，俞公以才优调海澄，而江右徐公至，林君之佐徐公，犹其佐俞公也。即其有当于徐公，犹其有当于俞公也。今年春，俞公征入为廷尉，而林君迁乌山巡宰，则朝廷用人之公，而酬功之当，巨细靡遗者也。说者曰：俞公之擢固异数哉，然十载为郎，疑于淹矣。林君宜于尉，尉虽澹，不犹愈于抱关乎！何遽易此而就彼也？予曰：否，否！方今宇内宁谧久，即有瑕衅，疆圉为先，况通商讥旅，御暴察奸，任匪细也。且不闻钧天之乐乎？律吕相宣，有时而停节，又不见万斛之蠡乎？扬帆纵棹，虽可以一日千里，而不越程途，缓急有序，固非寻常所能测度耳。

林君，瑞安名家子，优于幹办，气温而度雅，不类椽史中人，所至无不遇合，其自乌山起欤？盖林君向尝效力于哲初丁天

部之门，哲初公器赏之。夫裴楷清通，山涛识量，雅俗所归，有自来矣，推毂当无虚士。予所谓林君以乌山起者，此也。

### 《岩游纪咏》序

郭维翰

盖余庚子秋，与友人黄道孝为九仙之游。憩泉林三日，亦三日清福，而三日见道士身云，因各留题以去，纪未遑也。

嗣而山益辟，胜益著闻，岩花、虬木竞献其巧，以媚游人。而骚人墨客，探奇穴而扞幽洞者，趾相错。颜左史公有诗名在，海内所至，匡庐、点苍、天目之灵，争置一笔，以待题咏。谓九仙居里闾中，不百里而近可无废和以酬山灵耶？于是孝廉李膺平实挟济胜具与偕，取道龙湖。龙湖故名刹，景不能当九仙之半，而二公已欣赏之，题遍藤萝月，宜其至九仙而奚囊为满也。

膺平归，而次《岩游纪咏》将付梓，问序于余。余尝谓山有显晦，如人遇合，五岳在都会之间，故其名最著，附青雲而声施后世者也。彼僻壤榛莽之区，蹉然不睹名贤之足，即欲以其阒幽之胜，争比数于中原，孰左袒之？然蓬莱三名山，皆海外夔绝，人迹不到之处，而古今诧为神灵，又何说也？毋亦好诞之士托以信其谬悠恢诡之谈，抑有名相有眼界者，世见也，无名相无眼界者，道见也？道则元同，吾乌乎知泰山之加于毫末，五岳之抗于培塿，又乌乎知匡庐、点苍、天目之胜于九仙？环堵而千里，闭关而八极，是之谓天游。道孝曰：“辩矣！子之论游也，然以吾九仙而埒于匡庐、点苍、天目也，实左史公、膺平之以

也。”遂书之以付制尉氏。

## 国朝

### 修城隍庙序

王宠受

邑城隍与令匹治，令听于明，神视于晦，又能以冥漠视听，赞令行径直不回之事，故朝廷邑一令，即庙一神，令治处百里称侯，神爵司百里为伯，比于读嶽相视五等班次，称公、称侯、称子、称男之例，故贤侯称神，言令与神合也。

龙浚庙宇，昔因宋旧址而新之，至绍定，庙灾，复改于治东。宣德岁，迁返旧址。至嘉靖而寝殿廊庑始完。今寒燠久更，渐就倾圯，当草昧之初，革陈鼎新，予朔望告祷，见两庑倾欹，司曹像坠，乃捐俸新之。

夫丁亥兵燹，阖城焦土，惟此与关壮缪二庙岿然灵光，亦可谓民敬贼畏矣。昔制立庙如公署，几座笔研，无不毕具，俨与令同，神顾不可畏耶？有能醮金共焕新者，敬神也，亦爱吾令也夫。

### 倡修学宫叙

和盐鼎

学宫之设，其来旧矣。自宋迄明，代有修举。我朝奠鼎，首重师儒，特遣官致祭先师！敕谕天下，春秋飨祀不忒，盖以敦崇

文教也。修废举坠，则尤有司之责矣。

丁未仲春，叨命莅德。德为泉属，夙号名邦，所有学宫，宜乎振飭。予入晋謁，仅见圣殿巍然，其余门庑暨诸規制无一有。官垣圯倾，鼓钟俎豆之场变为牧垆，愀然者久之，能忍而不问乎？有复于予曰：“昔也庙在城中，后乃卜筑于此，壮丽甲郡。邑兵燹之后，绅士竭蹶营构，惜有志未逮也。”而予年来日事钱谷，不遑宁处。今秋适自帘归，益廛创建之思。虽簿书鞅掌，物料工资维艰，惟兹绅士有志，慷慨任事，必无不可成之功。今进士李公，明经赖公暨诸庠士，合成其议。原有前功留存之数，而林学师捐金率先，予不敏，敬捐薄俸佐之，其可与虑始矣，亦思所以垂成也。夫虑始难，图终更难，得原始要终能任其事之人尤难。且事匪一手足之烈，惟望戮力同心，矢公矢慎，好义乐输，各随愿力，共成盛事，使庙貌焕然改观，则予与诸君子庶可仰副朝廷崇儒之意于万一乎！异日文运丕振，事业有光，又岂曰小补哉？是不可不亟为图之。

## 重建儒学公署序

和盐鼎

朝廷因胜国之礼而损益之，凡所以化民成俗之方，兴治设教之具，一本乎前典而德意有加。是故五经取士，则圣道彰明，黉序育才，而庙貌巍焕，俎豆春秋，弦诵朝夕，彬彬乎质有其文。教化兴于上，而风俗成于下，此唐虞三代之治，将可复见于今世者也。而董率提命之功，则师儒之职为隆，是故左右陪侍有所，

进退周旋有地，函丈著乎礼经，而北面尊其瞻视，以考古今，以肄礼乐，而要期于淑其子弟，则学斋公署之堂，诚讲明义理之地，而尤风俗教化之所从出也。

予承乏兹邑，甫至谒庙，见一殿仅成，四顾瓦砾，朔塑造请先生之庐，则僦居民舍，霏尘湫隘。询其故居，知前朝有署联在县堂右近，遗基犹在，而茂草荆榛，莫之顾惜，良用悯然。第以庙貌尚有阙略，未遑及也。

今修治数年矣，门庀已竣，垣楹粗立，丁祭礼毕之后，有诸生金呈以复建学署为请，屈指兵燹之后，则已廿七年。予惻然曰：教化不可一日坠，弦诵不可一日弛，此风俗礼义之本，而废坠一若斯之久，独何哉？然吾闻圣人之道，与天地日月同其悠久，而时运有否塞，亦如晦明薄食，不能无及其更也。则开霁昌明，昭回爽朗，使人心思耳目倍为豁然。故圣道时，小替则有大兴，此亦气数之常也。况兹榱桷几席、土木、器用之具，人力之所为，能保其无必废？但废则复兴，兴则溢美于前，盖亦存乎其人耳！

予读县志，知龙浔有书舍，丁溪有书院，各乡有社学，当其时，比户诵声，诗书之泽，藹如也，此非贤令长之为欤？今其废址遗基，犹使过者低徊踟躇，顾瞻而不能去。况学斋公署绛帐之所施，而朝廷德意之所先乎？且予昔在诸生，朝夕执经师长之侧，岂以一行作吏，此事便废，视诸生之落落晨星而无所聚首忍乎哉？兴建之事，固予之责也夫，固予之责也夫！抑诗有之，曰：“经之营之。”经营云者，筹度拮据，一厥心力之谓也。今



先生既毅然竭其俸修以首厥工，而佐助必有人，董役必有人，奖劝必有人。尔诸生毋曰吾安受其成，岂絜诸生，即尔后生小子之有志，与若耆旧硕德，慷慨好义之民，乐其子姓兄弟之薰陶于美俗也者，皆可以有志于是举矣。仁，人心也；义，人路也。此仁义之门，而人心之所同然也。予也将聆弦歌之声，以自解于莞尔之笑矣！

### 南郊憩亭序

李道泰

距郭而南里许，旧有亭台倚树，浮屠插椒，不特稍具游眺之美，憩芟之阴，而葱吹竹骑，柳折梅逢，多望阳馆凉榭，以为至止。

自兵燹以来，一炬无遗，断碑犹在。明府和公，德星初路，车雨新田，虽百废未兴，而一望心动，犹念时非三日，费几中人。予笑而言曰：“此地乃欧柳白桧之思，今日犹存者，况得水何？幸谷丝不鬻新，疮痍有起色，吾辈不可不釀金经营之，使后人见蔽芾兴歌也。”明府亦笑而许之。

### 修鸣凤龙津二桥序

陈应奎

佛家以桥梁居八福田之一。而王政首务，必使民无病涉者也。邑治旧有四桥，兵燹之后，继以阳侯为灾。负郭居民，晨星

落落，不能率彼故迹。而在南门者为鸣凤桥，由永达郡孔道，南北必经之地；在西门为龙津桥，则西北一带所归往者也。二桥均不可废，历任贤牧随时修治，行道称便。

夫一水之阻，望若蓬瀛，虽有方筏，需时待济，呼吸缓急之间，难登彼岸。若长虹亘空，往来如意，不待济而已无弗济。今夏霖水，溪流涨急，二桥波臣攫夺，山潦时出，略约难施，往来阻绝，咫尺千里。原任严父母简翁<sup>②</sup>惻然念之。幸逢王二太公祖视篆兹邑，下车询疾苦，见民方病涉，爰捐廉俸与严父母召某商度，倡募以兴复之。某以告同人及邑父老曰：“凡济人者与求自济者，孰缓孰急？今王公祖之莅吾邑也未久，德之欲留公祖以抚我民也以期月计，若严父母方挂冠赋归，飘然事外，信宿之藏<sup>③</sup>，且不及挽矣。而谋济我民也，不啻其急于自济；吾辈求自济者也，顾反缓之乎？”

夫力虽不齐，愿不可啬，苟人人且勿作济人想，只作自济想，曰：“吾非此弗济，则随力所至，哀寡为多，锱铢之与钧镒，均之不落虚空，又何患二桥之难成？若当道大人、四方仁人君子悯众之难济，见王太公祖与严父母欲济我德人之切且急也，行且发大愿，力倾貲施舍。吾知天汉虽遥，不须乌鹊；而长江纵远，无藉鼉鼉也。独是桥云尔哉！”至若取材于山，程工于匠，力役几何，资费几何，则必有父老谙练者出而董之。将俾福田之种，预是事者，皆有其应，尤予之所眷望矣。

## 重募建雲龙桥序

知县金鼎锡

雲龙桥，踞东郭之要津，而德邑形胜之锁钥也。倾圯历有年所，前令熊君<sup>①</sup>谋重建。尔日绅士里民偕四方之乐善者，欣然题捐，功将半，而熊适以事去。后六年来，正署五易席，皆弗暖，罔暇经营，工匠星散，凡木石之购于山，工力之施于河者渐次尽矣。岁戊申正月，余调是邑，都人士即以是为请，余与首事诸君子往复商定，并集核前所捐簿，知聚腋可以成裘，而诸君子秉公勩理，固无虑巨工之难集也。

近奉天子明诏，凡津梁、孔道倾圯而便于民者，许所在官司详请缔造。余不敏，倘违都人士请，勿急与落成，恐历久而弥艰，不独上负明诏，将创始之熊君与首事诸君子暨乐输之绅士里民，一片利济雅怀，不重于余有憾乎？爰是召匠兴工，先桥墩，次桥梁，次桥宇，时以渐而功必底于成。凡昔日捐题人士，闻斯役也，应亦欣然慨然与余有同志焉。其有昔日未捐，今此欲同善举者，此固不可强而亦固所愿也，用以告。

## 劝助故县令梁公贖仪序

州太尊刘 墀

闻之国侨之歿，家不克葬，国人哀之。丈夫捐玦珮，妇人投珠玉以贖之，侨之仁而洁也，郑民之义而善也，千古无二焉。余郑人，亲其流风余韵，常以此意望天下。今见故德化令晋阳梁

公，以南官名士捧檄走万里，莅任未匝月而歿。笥乏一缗，篋无纤纩，乃郎孝廉君拮据以殓，逾于侨矣！顾流离德邸，旅榭无归，此非梁公之畏垒也。谁效溱洧遗玦玉者？

余适牧永春，德化为属邑。抵任时，梁公已捐馆月余矣，未及一面；而但闻其要离难返，藐诸告饥，及接其郎君，虽能厉原涉王戎之节，究难枵腹负骸，茕茕莫诉。悲夫！余所为怆怀倡首，更望襄于本地之绅衿耆庶也。

忆余早岁曾摄德篆，知士庶彬彬雅，好善乐施，今犹昔也。则南阳之贖，凉州之贈，必不诿诸异人任矣。夫縗经叩门，资以举粮四十万，三丧浅土，付以麦舟五百斛。古今义慨，传诵不衰。今梁公首邱未遂，遗孤飘零，哀亡悼存，谅必引手。《诗》云：“凡民有丧，匍匐救之。”而况本地父母官乎？而况斯文共一气乎？遥知捐珮不让古人，资麦岂输曩哲？或敛浮靡之费，可饱若敖；或动声气之馨，共襄资斧。俾之辄还故土，旅托行粮，则义举可风，不辜余望。余将偕德令尹岑君同过而崇奖焉。倘谓乌巾拦椁，据地膝行，纵孝廉能如陈烈，亦本地方之薄，余亦内惭而闭阁思过矣。知诸绅衿父老必不出此也。爰濡笔而为之引。

## 图南课艺序

州太尊刘毓珍

连城之璧，毓彩荆山；夜光之珠，潜辉鬱浦。玉无翼而飞，珠无胫而走。扬声于章华之台，炫耀于罗绮之堂者，盖遇托有

人，而相得益彰也。士君子通经学古，抉圣贤之精蕴，而发为文章，譬若美玉精金，良工巧冶砥而铸之，而后知其为吴钩，辨其为和宝焉。乙丑夏，余奉命莅桃源，稔德化素称才藪，后因公抵其地，邑长夔堂公出其图南课士艺，请序于余。

予阅其文，有理极大醇，气极磅礴，思沉鬱而词藻采者，知都人士之厚自砥砺，而夔堂公之振兴有方也。

夫钟山之玉，泗滨之石，累圭璧不为之盈，采浮磬不为之索。德邑诸生，通经学古者，固难更仆数。而质以文，美实由华见，惟夔堂公勤于劝课，故瑶篇锦句，触目琳琅，亦惟彬彬向风，望经品题者众，故贤父母乐得而鼓舞之也。夫制义特士人之羔雁耳，其润身华国，传久行远者，又当进而求之。

余观德邑水秀山奇，生其间者，更深入淬砺，将价重连城，烛倍夜光，以有体有用之学，而相得益彰。此夔堂公之所深愿，亦予之所厚望也夫！

## 图南课艺序

鲁鼎梅

天地有大文章焉，怪怪奇奇不一名状，环眺山川，忽而雲吐，忽而雾垂；忽而浮青凝碧，忽而披霞走练。当前形色，簇簇生新，文心何莫不然？

德化称人才渊藪，余初拜篆，课士图南书院中，阅其文，光怪陆离，知其有德有造者多也。因董以宿儒，月再课之，奖其佳

者，比三年矣。课者不以久而弛，作者愈因久而熟。鞅掌之暇，取新旧文衰而录之，得若干首，有真者、醇者、大者、超者，古若彝鼎，雅若仙珮，淡若秋水，英若春花，簇簇生新，与山水争秀丽焉。爰评而锲之。盖深喜都人士之绩学有得，以庶几不负余望也。抑余又有进焉，帖括，末也；经济，本也。诸生于通经学古之余，进而求之身为体焉，当有不止于是者。锲版成，为弁数言以告之。

### 《响草》叙

李道泰

樵儿牧竖，山深不厌，磴绝无人，箕松蹲石，啸歌自得。上应吟猿，下闻流水，声发谷和，而相唱酢，岂必青讴雲遏，郊弹铁跃哉？然登然空音，则匿声罢响者，按拍征调，未免葫芦也。

余少好曼歌，夏作冰语，蚓窃蛄名，笔墨不言，受尘染耳。使有从旁耳目余者，复掩口矣，敢谓世尽空山哉！夫半岭鸾啸，岩下方闻，山水移情，海上抚弄，是编不可以方；或手集囊携，杖履深山，苔同颜厚，洞可身容，芳树叶下，深涧花流，开囊翻帙，高呼疾唱，飞鸟徘徊，必无耳目予者，当令众山皆响。

### 《剩园四草》序

李道泰

凡吟家笔数语，则必梨而布之，划数语，则必叙而弁之。弁之以序，则非缙绅荣达者不传。不洁于面，而华于冠，人亦艳

之，予则不敢。予既自序《响草》，已与梨仇，而不敢华吾冠，况此《四草》又歌哭之余，兔麋之剩，必焚必投，尚焉用叙？世人歌吟，欲以序存，余歌吟欲使人见，叙知不欲存，不欲存而时于拭案未火，拾蹴未水，复笔而成帙，如垢面人常思握镜，人嗤吾丑，吾亦自嗤吾丑。镜内见吾丑，镜外亦知吾丑，吾丑自知，吾丑莫易，吾丑必存，使唾者、呕者、嗔者、骂者、笑者、厌者、逐者、掩面者、揶揄者，其动人奔走，几与果投车拥，看杀想杀等曰拈草；如樵牧山行，撚指皆是。卯童坐门，信手无嫌，曰咄草；如石卫尉携粥，虽欺王公，童奚知为陈宿，如厌人物，见必叱咤，曰讷草；如村火头强下转语，口结舌僵，曰块草。则声泪之穷，笔以代哭者，此岂可存？此岂可叙？不可存，自不可叙，虽叙亦不存，此《四草》意也。庚子秋中，书于饮光堂灯次。

### 《麈松诗话》叙

李 鼎

余小筑濯缨溪上<sup>⑤</sup>，逍遥沧浪歌中，环岸老松数二十八，支离伛偻，具汉代衣冠，须眉，都非近今俗调。其高与峰争，偃随涧曲，瘦比石坚，幽画潭影，龙蛇竞攀，烟霞固宅，阿耨尘坩，无从着脚焉。余谓孤山人妻梅耶，雪骨冰姿，未免一字之辱。若媒芙蓉，而姬香草，又恐淹入铅华队中，不无丈夫气短。余顾呼之以叟，亲之为朋，似香山洛阳老老各别，觉与子猷、绿玉君同争一日知见也。以故髻挽春鬟，涤我毫素，花飞晓露，飏以茶烟。

秋涛在空，乃咽落梅，皓魄当头，斯写绿绮。以至午照筛金，坐隐消其寂，峰岚曳翠，支颐澄其神。此盖匪朝伊夕矣。由是讽咏之余，错综简册，首三百篇，旁及稗官野史，百家诸集，触绪陶情，断章取义，增删分合，以规圆矩方，而诗以话显，话以诗传。箴可书，掌股可画，积日累帙，遂成卷轴。虽曰掇拾糟粕，为岭云自怡，然意会所发，未始不较丰歉之玉谷，如《楞严》二十五，圆通随其趣向，各入悟门。又如月印万川，不因见少，不因境多，见地既超，渣滓可化。知击竹破篾，担夫舞剑，觊面当机，芥针自合。就中一字一句，有历劫赞扬所不能尽者，勿作囫囵吞果，依样葫芦，何容此篇尚踏陈迹？夫曰节、曰性，为能存天地之气，而争日月之光也；曰才，与题咏则毓河岳之精英，列商周之彝鼎者也；曰旷逸，与雅者泥轩冕而浣胃尘；曰评，与讥者举正变、论中晚以寓美刺也。纪与证云者，乃窃源崑崙，而考谬亥豕；赠与知与称云者，乃慰江雲梁月之思怀，倾盖倒屣之风耳。若色若情，则是兰蕙生芳，鸳鸯谱牒；若感若悼，则问天哭世，无恨牢骚，薤上枣下，曼声清引矣。

至若仙释鬼神，亦函三为一之旨，屈伸昼夜之机乎？癖者，品其异也；狂者，裁其归也；命者，定其天也；音者，审其暖谷响山也；句者，图其江枫塘草也。至由梦而悟，则黄粱熟后，幻同芭蕉，形色俱泯，得无碍智矣。斯固一禽半斑，自貽大嚼广猎之讥，倘推之芥纳椰藏，岂为过量耶？为分其区类，亦等苍官之目，供艾纳于几席，投轻钁于砚右。将折枝竖义，时使谾谾落帘并垂声韵于三万六千场，时有大白下物，不滞枕中卧听矣。



## 《半吟集》序

郑凤超莆田人

曰舞毛丈为吾郑馆甥，阔达渊塞，实诸毛之白眉，而世隐磨峰，阻修二百余里，无由握叙也。壬子冬，乃祖锦囊先生，以啸园稿命书，始晤曰舞于仙邑。兼葭白水，恍如一夜吹来，天阙云龙，顿觉半朝胥合，岂其神仙缩地乎？乃出其《半吟草》就质，独挈冰霜，屏开罅罅，口中之珠屑能凝，腕下之疥核自泯。读其《随征》、《旅思》、《秋怀》、《守岁》诸作，绝无躁进轻出之心；《秋园》、《田家》、《课竖》、《种菁》诸作，别有移茆深入之致。

夫山水怡情，轩裳拘束，故善恶真妄，痛痒苦乐之事，虽衾帷鼾息中不免也；独于一二达人，登高搔首，内不见有其身，外不见有其人，一啸收之，此禅学耳。夫一啸收之，独不可以半吟继之乎？昔谿先善笑，为隐逸之鬚眉；而贾岛敲推，亦诗家之领袖。啸也，吟也，鼻祖耳孙，聚沙成雨，岂非于青蓝世界，现出百道毫光哉！

余卧游已深，胜具犹健，何日携双不借上九座之蛇盘，叩石牛之鬼谷，撒手嵩山，寻林子敬伯与曰舞，共作三笑客也？书此以俟。

## 校 注

① 岵：字书无此字，而有“𡵓”（jù）字，疑误。

② 及：疑为“父”之误。

③ 狄：疑为“狄”之误。

④ 鸪：字书无此字，疑为“鸪”之误。

⑤ 三山：德化县戴云山，有大戴峰与小戴峰之分。小戴峰的“三山耸秀”，是戴云山十六景之一。（见民国版《德化县志·山川》）

⑥ 仁郁：姓颜，字文杰。唐贞元中，析永泰县归义乡为归德场。仁郁为场长。

⑦ 三十九社：德化全县原分为八里四十八社。康熙十八年以后，裁并为三十九社。

⑧ 龙浔、凤翥：德化县山名，均在城关。（见民国版《德化县志·山川》）

⑨ 卓笔：山名，在德化县林地村。（见民国版《德化县志·山川》）

⑩ 浚水：浚水即浚溪，流经德化县城的主要溪流。（见民国版《德化县志·山川》）

⑪ 丁溪一夜雷雨：宋时，林程捐家资买县治前面濒溪田近百亩，开浚灌田。一夜雷雨，决流成“丁”字，故名。（见民国版《德化县志·山川》）

⑫ 冯、姚：即冯翼和姚迟。冯翼，山东省德平县人。明洪武二十六年任德化县令。姚迟，浙江省秀山人。明崇祯癸酉年任德化县令。（见民国版《德化县志·宦绩》）。

⑬ 和撒：即和盐鼎与撒启明。和盐鼎，字岩夫，陕西省城固人。康熙丁未年任德化县知县。撒启明，山阳人。以莆田县丞来任德化县令。（见

民国版《德化县志·宦绩》)

⑭熊王：即熊良辅与王调元。熊良辅，四川省，苍溪人。康熙己亥年任德化县知县。王调元，字夔公，辽阳义州人。康熙己丑年任德化县知县。（见民国版《德化县志·宦绩》） 范、韩：谓宋臣韩琦与范仲淹。

⑮张邓：即邓景武和张大纲。邓景武，号文斋，江西省德安县人。明嘉靖三十六年由贡监生来任邑令。张大纲，字立卿，号衢坡，广东省龙川县人。明嘉靖三十八年任德化县知县。（见民国版《德化县志·宦绩》）

⑯政满两浙：指赖垓任浙江省平湖县知县时，廉洁自持，吏治澄清的事迹。（见民国版《德化县志·人物、治行》）

⑰官庶才豪：指邓启元于雍正丁未年钦点榜眼及第。（见民国版《德化县志·人物、文学》）

⑱节标千载：指赖垓高风亮节，流芳后世事。（见⑯注释）

⑲御史：指明永乐间监察御史凌辉。（见民国版《德化县志·人物、乡贤》）

⑳林隆甫：即林栋。任广东省乐会县令。（见民国版《德化县志·人物、乡贤》）

㉑邓台生：名孕槐，明崇祯庚午举人。清授京师狱官。（见民国版《德化县志·人物、乡贤》）

㉒真好长官兮：这句指南宋嘉泰年间郑轮任江西省龙南县令时，减轻民负的事。（见民国版《德化县志·人物、乡贤》）

㉓以死勤事兮：这句指林茂，明正统八年知广东省儋州勤王的事迹。（见民国版《德化县志·人物、乡贤》）

㉔统军救宋：指南宋末年陈蔚统军保宋抗元的事迹。（见民国版《德化县志·人物、忠烈》）

⑳ 十万勤王：指南宋苏十万募兵抗元战死的事迹。（见民国版《德化县志·人物、忠烈》）

㉑ 指李乔钟于清顺治年间赴贼寨赎父棺的事迹（见民国版《德化县志·人物、孝友》）

㉒ 指清康熙甲午年间，徐士万向海寇求情救叔父的事。（见民国版《德化县志·人物、孝友》）

㉓ 指明末曾汇捐资助佃民周良珪、寇十六，为减泉郡豪斡收屯租，额外酷剥，冒险赴京向朝上訴惨状的事进。（见民国版《德化县志·人物、乡行》）

㉔ 指清初陈端二，屢次助军饷，以靖寇强的事迹。（见民国版《德化县志·人物、乡行》）

㉕ 还遗金：事指①郭琛二次拾遗金，待其人验实还之。②张观盛，汤岭头人。有江右书客宿其家，遗金二十七两，晒床拾之不启封存之。后二年客复来，询其逾年不至，以失金告，盛按原封悉还之，不受谢，客泣拜而去。（见民国版《德化县志·人物、乡贤、乡行》）

㉖ 指明末赖孔教，司训全椒时，爱士若子，解宦资济贫穷事。（见民国版《德化县志·人物、乡贤》）

㉗ 女中丈夫：湖岭周舜钦妻刘氏，年青失夫，养子、孙成名。里人称以“女中丈夫”。（见民国版《德化县志·人物、烈女》）

㉘ 闺内处子，明末林长娘，母早亡，父临死，嘱抚弟成名，已终生不嫁。寿八十有一，犹然处子也。（见民国版《德化县志·人物、烈女》）

㉙ 未亡：吉岭庠生许瑞岳妻涂氏，年青失夫不二嫁。虽家宴不肯与，妯娌问故，曰“吾未亡人也，何心酒食。”（见民国版《德化县志·人物、烈女》）

㉚ 指甲头连氏岳娘，闻未婚夫亡，奔丧过门事舅姑终身，抚嗣子成

人，而终其身。（见民国版《德化县志·人物、烈女》）

③⑥ 秀娘经兮：东厝乡人，陈秀娘，未婚夫死，誓不改嫁，自缢身亡。（见民国版《德化县志·人物、烈女》）

③⑦ 擗娘死：章擗娘，未婚夫亡，欲奔丧，父母阻之，绝食身亡。（见民国版《德化县志·人物、烈女》）

③⑧ 刘妇：科山庠生刘樊妻章氏，不受贼辱，跳崖身亡。（见民国版《德化县志·人物、烈女》）

③⑨ 指清泰里人黄氏桃娘，夫服役死，娘家接回图再嫁，而桃娘投水殉节。（见民国版《德化县志·人物、烈女》）

④⑩ 指明嘉靖辛酉年八月，陈璇九妻黄氏，宁死不受贼辱。（见民国版《德化县志·人物、烈女》）

④⑪ 松筠：林寅拆妻郭氏，年轻守节，抚子成人。按院彰表“松筠”。（见民国版《德化县志·人物、烈女》）

④⑫ 砺人廉耻：朱紫林嘉春妻寇氏，夫歿，遇贼持刀逼污，不从，遇害。（见民国版《德化县志·人物、烈女》）

④⑬ 指西山张岳荣，寿百有五，建昇平人瑞坊旌之。（见民国版《德化县志·人物、耆寿》）

④⑭ 紫雲、金液：寺观名。紫云洞位在德化县三班乡蔡径村；金液洞，位在德化县盖德乡三福村。（见民国版《德化县志·卷九寺宇》）

④⑮ 九仙、五华：名山。（见民国版《德化县志·山川》）

④⑯ 指飞凤山：位在德化县水口乡上湖村。民间传说，有马氏仙女，留恋人间，遂在此化身为飞凤山。（见民国版《德化县志·山川》）

④⑰ 指宋泉州太守王龟龄（名梅溪）在德化县九仙山龙池祈雨事。（见民国版《德化县志·古迹、胜迹》）

④⑱ 指宋泉郡太守真西山（名德秀）曾在德化县左溪龙潭祈雨事。（见

民国版《德化县志·古迹、潭》)

④ 端午：井名。位在德化县五华岩，传说每年端午井水自溢。（见民国版《德化县志·古迹、胜迹》）

⑤ 树老百年以长枝：崇祯九年，县署后垣有大枫合数抱，枯以数年，忽生枝。（见本志卷十七五行·木）

⑥ 汤泉：位于德化县汤岭乡（汤头乡）乡以泉得名。（见民国版《德化县志·山川、水》）

⑦ 严父母简翁：指县令严居敬。（见民国版《德化县志卷十二 职官、文》）

⑧ 藏：以文意疑为“轘”之误。

⑨ 前令熊君：指县令熊良辅。（见民国版《德化县志·职官 宦绩》）

⑩ 纛溪：德化县浚溪之支流。（见《德化县地名录》）

⑪ 仑：系“囡”之误。

（校注 李明志）

# 德化县志卷之十五

## 艺文志(下)

### 记

宋

#### 戴雲山记

泉州知  
军州事 乔维岳

德化距泉最远，丛山萃□①。清源军诸山脉发处，其最高者曰“戴雲”。出县北三十里而遥，皆重冈复岭。戴雲之高□□三十里，陟□巔远望，万山纷错。清源军诸山，如子于母伏在膝前。其广袤则不可里计。左通福州路，右入泉州。旧云“天下无山高戴雲”，不虚哉！

上有双塔侵入雲中，涓泉百□，沸成天池，乃分九派而下注。唐袒膊和尚偈(jì)云“一池分作九□□□□也。有寺居山之中麓，梁开辟②二年造，距山顶趾各十五里。前堂奉大佛，后堂祀慈感、袒膊二肉身。寺下水田畦亩鳞次。寺西山上有石室，曰祖师室，冢曰祖师墓。寺后峙石屏，左右巨石类钟鼓形，又有天柱石、儒冠石、一线泉，皆奇观也。

由山□□望之，寺在雲霄之上。已登顶上塔俯瞰之，前后石

屏诸胜列趾踵下。当夫雲合嵐霏，高低尽失。俄焉日出，半开半含，梵缙若隐若见，其间雪朝雨夜，月色风声，倏忽变幻，不可名状矣。

考州志，但载戴雲山，不及寺。《开化寺志》但记袒膊，不及慈感。袒膊名知亮，居开元寺东律巷，常袒一膊，行乞于市，后去之戴雲，累月不火食，驯虎来服其侧。□□□□人叩之雨旸辄验。每自言曰：“身在紫雲，显在戴雲。”后果化于开元之院居，其徒泥肉身载归戴雲祀之。至传袒膊为慈感法门弟，□□□□。慈感亦化去，泥其身与并祀。今山上有祖师墓，不知为慈感□真藏否？如涅槃也，称肉身何居？岂慈感深于禅寂，并其名与行而混之，抑后之人，神□□□□及其衣钵之师欤？又传袒膊为正觉智广法门弟，岂所谓正觉者，即慈感其人欤？余尝闻朝市山林出处无二道，住世出世无二法，顾富贵功名之场，黄门粉署，开府专城，若莲庐、若传舍，乃宇内之奇。山水往往为禅刹佛子之所据，即其身已化去，而其名与像犹能与此山终古也。是则可感也夫！□撮所见闻并记之。

明

## 大卿宫记

俞思冲

大卿宫不知创自何年，去县治二里而遥。溪山回合，亘以石梁，绍兴中，县令林公及所斲也。

古柏当庭，娑娑可玩，雷火剥蚀，腹已半枯，然参天黛色，溜雨霜皮，彷彿蜀相祠前物，较岱岳五大夫，固当是丈人行。桂



树团团，前后拥屋角，大类陆城羽葆。野老为言：“白藏吐华，芬芳达于城市。”

此宫一邱一壑，依然濠濮。地偏境远，谢屐少临，溯风踣蹻，为之一叹！

### 游九仙山记 林 棹 (cáng)

邑北行三十里有九峰，崇壁怪石，幽雅清致。相传昔有九仙，曾游其处，故名。庚戌冬，会小铭周则森君读书其上，招余游。时雪甚，遂取道小铭，为九仙游。

过石岭，攀砚山石，从斜径盘回而上。云里嵯峨碑兀而耸者，九仙山也。望一石若佛，不能甚别，而神思飘然，恨不即至。旋下□岭，有玉液泉。至护界亭，转数武，大椿森然，万玉潇然，法水流香，闲云绕足，下有宇巍然者，苕菜岩也。余入岩，礼佛毕，适涂君尔熙载酒至，时雪寒甚，饮以巨觥。从岩北而上，可百余折，名松径。有五须松，偃若青盖，鬱若苍虬，烟云相映，境象又新。稍上，垒石层层，屏者，几席，冠者，髻者，緺联、中断，若剑截者，列径两旁。稍上为小石天，大若环堵，可坐息机。而宝林万木争妍，树莢盘翠，覆于石上，虬枝苍幹，直干青霄。葛萝之牵风而舞。春来山茶吐萼，红锦千章，更大奇也。□□□灵鹫，履仙人迹，登魁星洞，历甘泉说法台诸境，盘旋而抵岩址。方沼澄清，孤塔峙前，塔外祥峰拱卫罗列，居然九仙奥区矣！

复抵仙洞，怪石谿谿，若天造然。转入石径，如复道横空而度。盘树交阴，清幽袭人。即进九仙洞，中宽旷可列坐数十人。稍阴，则留雲凝雾，石字浏珠若滴。中有石弥勒像，高可丈余。洞深，屈曲盘纡。穿石罅，西为天然室。跌跏片时，百劫俱空，即无比禅师修行处也。转而西，石壁如崇墉，高数仞。东有石如马、如鼓、如狮子。北垒石巍峻，为飞升台。又直上，奇峭壁立，为蓬莱第一峰。绝顶为大千世界，为“尺五天”④，盖高无际矣。凭高一盼，团嶙迭巘(yǎn)，错若金釜，横若玉轴，近若拖绅，远若烟雾，巍巍乎九仙大观也。

转为耆阁崛山，上有石棋盘子宛然，岂古所谓烂柯者耶？逶迤山脊，尽其巔，复有齐雲、摩雲两洞，俱中虚，可坐十余人。俯瞰万林，苍翠千顷。西一岭势陡若悬。山麓龙池深作蔚蓝色。池生白莲，当午则开，香闻绝壑。畔有彼岸石，壮如卧龙，风雨时作惊人声，则森君就崖畔建嘘雲亭，亦憩息一便也。西为普陀岩，五峰相映如莲花，因名莲花峰。故址俱在。有石大士像，半没泥中。余顾谓则森曰：“此所谓淤泥中生出红莲也。物之兴废固有时哉。”为之怅然。复上一峰，银雲翼翼起踵下，四顾远山千里，如食前豆也。

余两人兴甚，因泚笔分韵，各赋诗若干首。

## 半闲亭记

张士宾

夫山川形势胜，造化中遇与不遇犹人也。崇山怪石，奇崛峩

丛，隐丛薄而无自表见者，往往皆是，岂待兹山乎？山去吾邑不满一由旬，余乡土往来，实有夙契。年来奔逐名缰，至庚戌秋服初衣，取道涌水，登鹭岭，见积翠列华，紺殿白雲，大非灵鹭故吾矣。乘兴坐说法台，飞觴朗咏，薄醉且去。则森君徐曰：“石上可一亭乎？”予曰：“诺。”出数金，命僧构焉。会予归自金陵，乃扁曰“半闲”。风清月白，宛然浮生半日闲，实际也。嗣是山亦稍遇人，人日至而名籍甚，犹夫瓮牖经生出一头角时矣。虽无夙契者，亦收千里裹粮耳。

辛亥春，复履其巅，放歌纵酒，忘乎骇俗。而山灵副以风月，眷眷若与予遇。予慨曰：“山犹人也，惟世态人情实愧于山。度形而衣薜萝，量腹而进松木，吾其为兹山盟矣。”乃选石而记之。

国朝

## 游飞凤山记

黄宪文

飞凤山，邑东北极隅，距吾湖山三十里。四面荒村，孤峰特起。极巅一巨石，峻崿秀削，迫雲霄间。遥望石壺，对飞仙瀑。上盖亭，垣瓦栋梁皆石砌，深广各丈许，高如之。中奉三仙真，旧传仙乘风到此，因以为号，是亦神其事耳。

岁戊戌仲秋既望，风高气爽，商意正佳，发游览之兴，呼犹子偕行。诘旦出门，缓步二十里。日午，少憩茂林之下，遂寻径

登山。遥望巉岿，巍然天末。迤邐一岭约里许，乔松怪石，天然位置。拂石趺坐，淘清泉而饮之，直忘其孤峻也。岭半稍夷，抵山门中一矮屋，草构数椽，紫竹参差，山花满径，风景亦自不俗。沐盥罢，从室西升，盘屈委蛇，凡百十级。由亭后转入亭门，时日色西横，余晖返照，岩花未落，幽草半庭，金飏拂入衣袂，觉飘飘然有神仙气。整衣礼毕，纵览山色溪光，烟村茅屋，碧蓝历落，不觉秋心一片与雲水相忘矣。

道人携蔬樽至，就洞口微酌数杯，则已东山月出，大如斗，凉如冰，光彻于岩洞之上。俯视村墟，犹未得分广寒一照也。予数爱孤光，不忍就枕，徘徊俯仰，形神欲绝。忽闻钟磬音，疑是雲璈之奏天半，回视古枝秋鸟，拍拍欲飞，更阑假寐，渺然清梦，与神往复。觉来佛火犹明，炉烟微縠。灵鸡未断，梵钟蚤催。方欲拥被卧听松涛，犹子报曰：“朝晖见矣。”捉衾起坐，则远空彩霞斜抹，而阳乌一轮滚出海天，如珠如炬，尺五之移，芒射不可睨测，而俯视则犹然昏黑。天上人间之判，大都如是耳。遂索楮走笔，即景记之。觅径松阴，翩然而返。

## 雪 洞 记

邑庠生郭载岷

壬申初夏，暑气渐臻。余邀诸友人，就雲林深处开一雪洞，祀大士于其中。堆怪石，芟丰草，宛然浮屠真际。树阴掩蔓，鸟声上下。斜径纡回，倒屣净红尘之步；幽庭闲静，点头皆瑞叶之芬。乱影却曦阳，疑似六花凉。法苑鬃枝悬玉韵，依稀三白调阳

春。风乎太华玉井，浣尽烟楼；吸夫閼苑冰桃，消残火宅。个中  
 適曲，橐无涯风光；眼底青葱，播大千世界。虽无庾岭嘘芳，恍  
 有甘泉喷冷。凉生襟裾，优游身到武陵；寒带松梢，滴沥露分  
 金液。蝉窥菩提之春，琴鸣野外；雉宣竺提之偈，天韵雲间。四  
 时皆腊况，霜花留映玉茎；万树拂金风，兰台环交翠水。地拟天  
 津，雨洒龙湫窟穴；景开崆峒，风翻鹤羽冷香山。

当是清虚之宇，桂殿齐闲；迥出热闹之场，羲皇共适。岂萤  
 窗咕啐，不厌炎蒸；虽雪案勤渠，无辞清旷。对酒弹棋忘日永，  
 谈元说剑乐窝深。自昔三年面壁，道果成于幽元；况复四座春  
 风，和气飘乎岑寂。惟兹同心，毋为余笑，则洞之成也，庶几与  
 顶雲山并永，不至混于猿林云。

## 碑 文

明

丁公生祠碑

户部 晋江  
 侍郎 何乔远人

泉之七属，惟德化为岩邑；六邑之水，远近汇海，惟德化水  
 西折而入于闽。其岭水泻川壑者，怪石礧礧不可以舟而达于永  
 春。自永春至郡城，则溪可舟矣。是以德化转徙郡城之难也。

先是，郡令德化民上仓于永宁卫。永宁极海，德化极山，  
 相去几何？民无现谷，必挟金入泉市谷，而后可以上永宁，劳困

矣，太仆卿丁公告当事者，请除之。当事曰：“诺。”郡政有积谷，县当领郡金，积谷于其县。而德化谷仅足支，岁持金买谷，无所也。太仆卿丁公告当事者，请除之。当事曰：“诺。”德化道可走尤溪，出而达于上京，大都也。诸缙绅大夫利其便，往往从德化。顾县无邮置，肩任之役，皆捉民于田中，田中之民孰能堪此？皆弃耕逃。太仆卿丁公告当事曰：“上官之行，则不可已，其余请勿应。仍勒石以垂永永。”当事曰：“诺。”于是德化民颂丁公德，醵资为公立祠。其农人下户闻之，曰：“吾亦欲祠丁公。吾侪，小人也，丁公登第三十余年所矣，其扬历，以铨部、以卿贰，官非不尊显，气势非不轩然也，而未尝有一苍头入而声色我，收田之成，即结芒屨去矣。市井有不平事，公未尝不为伸理。吾侪小人亦欲祠公。”其邑人士闻之，曰：“吾亦欲祠丁公。吾辈书生也，处女自命，何所求丁公？顾公以大比科额俭于十人，请学使多之。学使者善公意，而不敢大戾于令甲，则为公增二人焉。苟吾辈能掇科者，即所增之人当之，是公之教也，公之施也。公无念其初亦诸生乎？卿贰矣，而犹念诸生。此他日我辈立朝居乡所宜法式。吾亦欲祠丁公。”则群相谓曰：“吾闻丁公所善，无如镜山老叟何乔远，请即而文之。”则群诣镜山。夫士与民也，仆仆百余里入镜山，而问文至勤矣，德丁公至厚矣。

予延而问之曰：“请问古有如公之人，为予举而实之。”则曰：“夫庚桑也，而人社稷之。夫石奋也，不令内史车里门。王彦方也，乡人为不善不敢使知。杜密也，陈说郡县，笺记括属，

要在拯民荐贤，斯古人之行也。”予曰：“请进之”。则曰：“夫范文正也，与其乡人以绢三百匹，曰：‘是诸里人也，见吾科第则喜，见吾官序日尊则喜，吾敢忘诸？’夫朱文公也，其为乡人立社仓，教小子，所执经而问道者，孰非其乡后辈？斯儒者之行也。”予曰：“请大之”。则曰：“孔子居其乡，恂恂如也，一以为父兄，一以为父母。齐伐鲁也，使子贡门徒斂于鲁，鼓攻焉。孟子居邹，惧邹君妄动以敌楚人，语齐王远讽之，斯圣贤之行也。”予曰：“大止矣，可以颂公矣。”

公名启濬，字亨文，号蓼初，以仁义裸身，以忠厚维家。家晋江海上之族，以数千人遵公教，毋敢一人僭车上。公所至莅官，殚尽心力，知无不为。上三召公为太仆卿，所以用公未艾。余知海内之人为公立祠者，将尽公之所至，不特德化一县已也。

### 郡别驾闻人公署篆德政碑 丁启浚

夫无翼而飞者，声也；无根而固者，情也。然声不假翼，其飞自易，情不待根，其感斯难。况以民仍三代人抱一心，而肯胥志赞扬，使《击壤》之歌步其徽音，乐只之咏嗣其清响，则非以纯赤之心，行之以平易之政，未有遐迩共鬯，声诵交驰，如吾德邑人士之鼓舞。

郡大夫闻公也者，清商激而天籁鸣。其于禹覃仁莩，则牧女宣其中悃至情，斯感出自然已。公以贤能分符，来倅吾郡。其治郡也，申约束，核困羸，一以岂弟行之，期年而郡大治。当道贤

公，以公视德邑寡，公至，乃以其治郡者治德邑，吏习而民安之。种种善政，不能殚述。而其大者，如简讼狱，恤茆困，理冤滞，弭盗贼，以□晋谒诸生立课程，手次其文。而甲乙之人，争濯磨以为得师表，乃狡胥猾吏咋舌缩手，称神明焉。公尤精堪舆家言，以邑巽方为文明之区，议造浮图。遂捐俸倡率，采石兴工，士民欣趋乐助。一时缙绅咸举手相贺，以千年旷事待公而举也。会公以得代行，邑人士扳车卧辙者，相填于道，至涕泣唏嘘而不能忍其去。公来邑可半稔耳，而邑之人心如此，则公之过化存神，所感者深，要不徒以声音笑貌为矣。

昔人曰：葵藿之倾叶，太阳虽不为之回光，而终向之者，诚也。公于邑諒不徂三光之明，而邑争自比于葵藿矣。魏德深之长贵乡也，史称其清静为政，不严而治已耳。迨转馆陶，其民至，诣阙请留，与馆陶相争讼。非根于情，必不能使闾境之民欢呼讴诵，非根于情，必不能使所至两地皆如见其父母。乃优诏特听留，则至情感格，获上得民之征也。公居郡为大父母，所造福于邑易易者，邑人士思之，见有自郡中来者，必问闻使君安乐。或有以讼往府者，必则相慰藉，曰：“闻使君在，必为我辈地。”此其依赖诚深，不徒馆陶之民来就居住，仅仅数百家而已。

汉宣帝精核吏治，如渤海、颍川皆以卓异增秩赐金，故汉世得人，于兹为盛。今圣天子垂拱之初，精颡政理淹废，遐迹不次超擢，海寓颡颡(yóng)饕风。治行如公，行且征入司农九卿。计公是时必且雍容铉鼎，鼓吹休明，以光大公家先玺卿先柱史之烈。予固日冀之矣。乃因林煜、周开年、赖天与、李王襄等之



请，而漫叙列之，以附《击壤》之歌，乐只之咏云。

### 姚侯生祠碑

郭维翰

吾邑令君姚侯之被谣诬归也，父老之攀送沈溪津次者，至四五百人，车为积不得行。侯挥泪慰遣去，而号呼振涯壑之间，斯三百年来所未有也。

归则麀谋肖貌而社稷之。乃以贞珉请于郭子，谓余一廛离琴堂仅咫，侯所治德状，暗记最习，当无溢言，请畀惇史。余乃进诸父老而语之曰：“若曹以规，规之俎豆，足永侯泽乎？抑侯实绥邑辍而横中蜚语以归，无所直于天子之前，将惟是桀公之社，新息之铜，聊以托三代之道于千秋，谓之德志。匪第为翦伐虑芟棠耶？”父老则泣而相告曰：“吾侪小人，非侯无以生，侯非为生我故，则无以去。侯虽去，而圣明终能洞晰其不安厥位之苦，而家起之。是以九仙、五华，为吾侯之汤沐也。不腆数椽，宁敢以淹侯灵宠？侯遥闻必怫然不乐，畴是辜功而为德府也哉？顾吾侪向所式歌且舞者，盖见侯颜如见兹父母焉。今即远我于膝下，而吾聚沙而范之，以诞日拜奏长生之酌，庶几犹未离怀于孔途乎？侯即知之无害耳。愿先生其勿惮操觚。”郭子唯唯受命。

夫景曜过而有余晖也，清流过而有余润也。咸愿长有之而不可得。矧豁幽蔀于中宵，沦醲膏于涸渚者哉？宜其弗能已于思也。思乃祝，祝乃久。今父老辈诚知侯之字若德为不可堙矣，则孰有如为民请命，俾枉席百余年之汤火，而以爵秩殉之者乎？语

云：“事利害而身随之。”侯今日之谓矣。其目蒿神焦，宁拔势直轅，令人目为强项，而不忍为单赤故，稍一绕指以保其一同之禄。奈惊弓犹奋，急兽难潜，至相率扶伏叩阙下，侯知而戒，驶卒追之，不可及已。借令九阍之上而早得览台司所论，亦将旌侯以徇于国，而又无如比谏申覆之，未易以一朝也。于是，考功之洗垢与修隙之含沙，合而斗大，丁溪遂不能久借侯矣。所云事势之流，相激使然，侯业已知之早，第自以上无得罪于天子，下无得罪于百姓，将返啸烟雨之楼，时泛明圣之艇，为意适也。

方侯之初入吾境也，见野无草，室无人，问曰：“是逃军佃而荒抛者也？”细询始末，恻然不堪。既而允士民金控冤状，立条之当道，咸谓德赤子涂炭如斯，胡先兹之默默也？遂酌颁四款，为两利永守之规，而惨澹寥植者，遍穷山僻谷之人，咸欣欣起色相贺曰：“侯实生我者也。”先是邑署后垣有桥枫<sup>⑤</sup>合数抱，倏于侯举事之顷，青茁几茎，荏苒冬春，而森披且荫亩焉。远迹喧集，诧为宇宙间异瑞，是山川草木之有情，为德民庆更生也。诂知民之枯渐沃，而侯之怨弥从乎？斯其故，余亦不敢讼言，惟有天日鉴其苦衷，鬼神昭其枉状而已。他如葺黉铸土，缮堞恤茆，清犴禁汰，虎冠读法，月勤保甲，日核毒草之诚厉，输耗之弊蠲，彬彬芬人齿颊间。然侯非所以去国之因，若邑人所以祀侯之指，故于屯事独详焉。

侯携李巨阙，讳迟，别号若麓，万历戊子举于乡，以甲戌初秋莅吾邑。兹春述职，镌一级调用云。是役也，台司郡邑诸公，金俞士民之请，虑财鳩徒，欢跃胥赴，堂垣榱栋，晔晔耸观，亦

三百年来未有之盛构矣。董役者为乡耆陈至言、林樾若而人。翰不敏，且涓辰集诸绅衿肃奉像设于中，而仍为歌，以旌厥美。曰：丁溪之曲兮石骨稜稜，我侯之概兮与石洁贞。渥我黍苗兮露浥龙得，我民食颺兮春台与登。讴吟起兮耄孺同辞，直道彰兮胥奋渥池。湛吾醑兮膾吾脂，祝侯无穷兮视我几尺之碑。

## 国朝

### 王侯去思碑

赖 垓

王侯治德之逾年，惠化翔洽，百里膏融，蠹政除，及害马倾巢，遍有归禽。而夫探丸揭竿，在在萑蒲刃相期，蠢蠢思动者，无不怀音革心，恐干污赭。即时方有事，海上急催科如捕亡，而民亦征输恐后，忘其追呼之扰。噫！硃膺山城，民乐走险，宦兹者碌碌以奉其官，救过不暇。何侯之游刃引割，恢乎有余地欤？

阖邑士民方翘首祝曰：“侯实生我，未及期，吾侪已欣欣坐衽席中。其庶几及瓜而代，以龙得为桐乡，且俾吾侪得一睹綵袋欢乎？”

盖先是侯实奉太夫人偕来，德民恃侯，因不敢忘侯之恃，亦太山尊配林意也。何期天不祚德，圣善忽捐。侯毁悲号，闻见掩泣。即士民欲援郡县夺情之例，上控当路，侯意不少回，屡牒求去。嗟乎！饮冰载石，空余两袖清风；截蹬留鞭，难挽一庭明月。

宜里长郑世卿等思所以不朽吾侯，而持孝廉李君一言为索予记也。虽然，仁不遗亲，义岂后？君侯少待祥琴，立膺征玺，一旦持斧秉钺，重莅闽邦吾邑，且得托并州之谊，倍深雨露，则侯所以布铠流膏，宁只赤县扬雷？吾民所以濡沫侯泽者，又岂但枯鳞之脱惊川，而哀鸿之集中野哉？故夫淮阳之哭遮，荆州之泣拥，或于此日一稍纾乎？敬勒之石，以表今日卧辙之恋，并为他日使君重来乎左券。

侯讳宠受，号濯陆，顺治己丑进士直隶真定府赵州宁晋县人。

### 崔侯德政碑

赖 垓

汉世故多能吏，然玺书之征，治行之最，先饮醇劝化之人，后鸷悍毛举之士。故三古以来，汉治为先。

吾邑处丛山中，椎鲁称易理。自亥子而更，水飞山啸，窞深菁巢峭壁者皆是。空城榛莽，官道虎狼，绛带紫鬃之人，率佩犊销锄为乐。令是者，间取治乱用重之法，而林深径钜中，鸟警兽鬥，虽牒走于邮，骑躡于藪，终眼鹰而音鸱。幸惠我胶东秋翁崔侯莅是土，侯治潜自太翁金宪公，州守有声，节义文章，久表于世。而珪瑶令名，专城吴兴，借为次膺之理，家声奕著，侯至而神明之誉归焉。夫以赤白纷飞，征派雨急之际，裕兵乎？裕民乎？檄书期期呼应必至之际，谗官乎？谗民乎？王师雲集，巧妇难炊之际，爱身乎？爱民乎？乃侯不谋身，不谋官，请蠲者数上，请缓者数上。民乎于侯何幸，侯乃不等时令所为，轻以身试

哉！乃侯不以彼易此，则有歌雁嗽初回者矣，有歌桁杨菌生者矣，有歌剗疮新肉者矣，有歌南为斯作者矣。侯曰：“吾慰吾心耳，不枯樗吾民；吾甦吾民耳，不茧丝吾官；吾殫吾官耳，不艾银吾身。”于是民则群谋曰：“鏤吾膈、碑吾口，不可百世，吾永诸贞珉山则渊，莓则蚀，吾永诸绢楮。侯乎！黄宫鸟革，雲桥蜿蜒，县花桃李，农兵地水，吾知吾侯。欲使子若孙知吾侯，异日雲山片石犹得与欧柳白桧同为莫莢也，民之志也。”

夫侯讳越，字肃逸，号秋涛，山东莱州府平度州人。

## 范侯德政碑

陈应奎

龙浔为邑，山则北络南剑，水则东泻永阳，多峰涧壁磴，民散巢之。虽里不盈十，粮不溢万，而力勤崇俭，风犹古也。寅卯之交，海啸群飞，劫烧遍地。越丙辰，河伯决城湮宅，民之流离琐尾，几无孑遗。丙寅冬，幸范侯来莅兹土，天固将借手于侯以大造我德欤！

侯甬东华胄，少掇巍科，而鸿才清节，留心于民瘼者已久。甫下车，即疏讲上谕，劝读课耕，士农蒸蒸，咸有起色。至其听断尽本虚公，征课悉捐耗供，禁溺女而掩枯骨，繁种植而弭萑苻，刊邑乘而设常平，举乡饮而兴义塾，他若筑桥梁，葺敌楼，缮堂庑，建宾馆，皆侯于三年中切固本之虑，竭拮据之困，次第举之，不殫民力而毕乃事者也。厥功伟哉！今邑之器者静，劳者康，而绛带者尽犊犁矣。执经者尽珪璧矣，雲亩烟邱者遍绿畴

矣，鼠牙犬吠者鸾翔虎渡矣，尘封苔蚀者梅梁文础矣。夫且雨旸时若，蠓不入境，禾穗三岐矣。噫！侯之为邑者，不遗余力，民将何以报之？夫县花门李，庭柏郊棠，铭于心，碑于口者，未足以垂永久。其纪之贞珉乎？亭亭片石当与戴雲肤寸，画水成丁，同其惠泽云。”

侯讳正格，字载瞻，浙江鄞县人，康熙丙午科举人。

## 杂体文

### 跋

明

#### 《戴雲山志》跋

黄文炤<sup>晋江人</sup>

吾儒动以自私自利归之佛氏，言释子生涯，则曰闭户邻門，肥瘠秦越人也，是大不然。佛自利利他，两念并发。有时为法为人，至割截肢体而不顾，谁谓空门自私自利者？

龙浔垆灶雲屯，山之童者几半矣。若戴雲灵区，三十里旃檀，六七邑龙脉，蠢尔大狙，敢覬臙殖，尅日开鑛，林泉失色。圆朗师闻而悯焉，括衣资，纠徒子，自同安驻锡此山，奋螳臂以当车，为祖师留一圈山，为郡邑培一脉龙。葛藤三载，缔造艰难。使师私利便己，则一邱、一壑、一瓢、一笠，何处非渠袈裟

地？

今乡先生，高师戒行，标题咏者墨迹淋漓，师乃集而成《戴云山志》。是志出，燕雀相贺，山水生辉。于以绍隆佛法未艾也。

余夙慕龙浚诸大祖师应化道场，庚戌冬，偕虚上人作支许，游自普济，历太白岩，览龙湖，九仙、苕菜诸胜，杖履几遍。所至林楚蔚然，禽鸟亲人。一泓放生池，鳞儵游泳，有鸟兽鱼鳖咸若气象。盖叔季而下，助圣世茂对育物之仁者，惟诸丛林。仁者念此龙池鹿苑之恨，庶几有瘳乎？是在国王大姓护法人。鰕生有抵掌赞叹而已。用识法喜数言于简末。

国朝

### 《图南课艺》跋

郑惠琇

玉逢卞而价重，剑遇华而名彰。士君子读书养气，弢光匿采，隐隐跃跃，非得宗工哲匠为之裁成拂拭，则太璞钝置，芒气未腾，终难底于成器，以彪炳宇宙间也。德邑水秀山明，士生其间，类皆厚自砥砺，蕲得表见。

岁癸亥，夔堂鲁老夫子以江右名宿魁南宫，下莅斯土。批却导窾，切中机宜。每公余，辄诣义学集诸生而课之，理稟程朱，法宗化治，胎经孕史，不诡时，不泥古，一以圣谕之雅正清真为榘质焉。嗣而捐俸，更广学舍堂宇。两傍增数十间，俾生徒讲习其中，振兴鼓舞。每月两课，手自丹黄，捐俸奖励。邑人士彬彬

向风，争奉文呈质，冀经品题片言只字，如获异珍。是诚千载一时者也。夫荆山之璞，不没于石；丰城之剑，不掩于尘。邑人士得贤父母，而归之涤染、淘新、黜浇、返醇，行见光芒之气，上灼九天；连城之宝，价增十倍矣。

琇濩落无似，朱墨莫辨，幸濫东郭<sup>⑥</sup>之竽，于兹数载，仰观乐育，亲炙末光，愧不能赞襄高深。今夫子哀所课文，择其尤者，授诸梓人。窃喜诸士附骥而显，而琇亦得与青雲之荣施也。于是赘言。

## 启

国朝

重修文庙启

力子侗

万世为师，千秋崇祀，学宫丕振，文运聿昭。自有宋以来，惟国朝为盛典，由成均而外，暨乡邑以同风。大都庙貌巍峨，抑且礼议明备，轮奂尽甫松徠柏之美，几筵皆夏瑚商琏之珍。宝篆中悬，天子之银钩铁画；龙帷高拥，圣人之玉相金容。朱楹丹槛齐辉，碧砌花砖竞丽。春秋释菜，远迩歌芹。普贤序于两班，遍儒宗于百代。笙簧奏处，鸟鹊潜音；鸞翟飞时，雲霞避影。试问鲁侯作泮，何如此日威仪？即令太史登堂，不数当年规矩。先生俎豆，泽及诗书。



龙浚，闽海僻疆，温陵胜邑。以一隅之风土，当万迭之雲山。水有丁文，争传符讖；居多甲第，不断簪纓。稽学校于初兴，美文明于极盛。戟门耸阁，高联碧汉之光；泮水横桥，长驾彩虹之影。望亭皋而翠飞鳞次，瞻华表而凤起蛟腾。堂室多仪，厅斋备器。慨炎冈于一炬，野火无情；怅泽国于四山，溪涛作怒，我闻在昔数百载，屡变星霜；亦越于今几十年，重开天日。爰思复古，渐次图新。物力维艰，人心未遂，曾鳩金而修殿宇，亦捐俸以设樽罍。庙仪虽已可观，祭器未尝不假。雲封深殿，惟余四壁萧然；风入空廊，只见一庭凜若。嫌于固陋，虑及漂摇。

伺上国观光，名都览胜，与斯文于白社，坐此地之青毡。千里追风，有惭冀北；三台呈象，诎比关西？每行谒庙之仪，私切旷官之惧。欲绍旧制，用补遗规。设几幔以肃观瞻，治庭墀以严奔走。造神龛于两庑，妥侑贤灵；奉列主乎儒先，广明祀事。竹筵、木豆，详登水土之奇；书牖、文窗，不废丹青之旧。得成富有，实费多金。一臂莫胜，或恐负山致笑；众毛堪聚，何难积土成高。因谋之邑侯殷，兼告之同寅郑。既齐声而许可，亦戮力以经营。详请宪台，布知绅士。或文或武，同是官墙；在国在乡，无分畛域。不乏称良子弟，志切登雲；岂无待价英才，情殷观海？山林毓秀，人皆玉桂之伦；姓字生香，簿列金兰之贵。各从所愿，相与有成。重昭日月之观，并志风云之会。先图急务，敢云此外无遗？更问余规，尚冀他时有待。使四方制度，遍在海滨；庶多士文章，弥新岭外。从此鲲鹏九万，皆成礼乐三千。敬载文笺用刊正幅。惟希鼓舞，长庆升平。

## 颂

国朝

### 心慈岭观音颂

李道泰

见山不见佛，慈心因岭起；见山即见佛，慈悲此心是，所以观世音，寻声不以耳。我愿岭中人，见佛尽如此，过去与未来，皆作大欢喜。岭岭发慈心，山山见佛止，此山与此心，终古不坏矣。

## 箴

国朝

### 图南书院劝学箴

有引

郑惠琇

大矣哉七尺形骸，今古主一腔心血。圣贤关士也，念此肩担匪小，程期良遥。人各有心，八里仰弦歌之化；时方聚首，同堂擅鼓篋之休。所宜陶阴自惜，范任共期者也。朱门示箴，漫云啜晤足了；白鹿垂戒，爰仿条教相规？所有胼陈，幸为佩服。

一、五教之目：父子有亲，君臣有义，夫妇有别，长幼有序，朋友有信。

人生两间，作述为大。子孝父慈，相将以爱。委质登朝，靖

共匪懈。黽勉同心，不和（ni）是戒。天显子哀，棣萼和藹。丽泽兰金，交道攸赖。凡此纲常，畴敢自外。

二、为学之序：博学之，审问之，慎思之，明辨之，笃行之。

学先致知，研究经史。蓄疑败谋，最为害事。爱谏爱讷，澄心渺旨。析厥毫厘，去非求是。身体力行，慥慥君子。

三、修身之要：言忠信，行笃敬，惩忿窒欲，迁善改过。

枢机之发，召荣启辱。无贰无虞，千里可告。德之裕修，损益宜勛。淡泊和平，虚焉若谷。徙义去非，式金式玉。

四、处事之要：正其谊不谋其利，明其道不计其功。

义利之界，舜跖攸分。有为无为，判若泥雲。阨（ta）茸猥鄙，终世沉沦。学辨古今，非达是闻。彼君子儒，品所为尊。

五、接物之要：己所不欲，勿施于人；行有不得，反求诸己。

一言惟恕，终身可行。因人镜己，戒满持盈。横逆妄施，自反持平。责己以重，责人以轻。豚鱼可格，端在至诚。

## 告示

国朝

革陋规示

王一导

照得德邑土瘠民贫，本县目击心伤。自莅任以来，日夜焦

劳，饥溺由己，思欲起沟中而衽席之。查往例，有节礼一项，为官斯土者交际之资，虽属尔民急公奉上，究难免剜肉医疮。独不思竭小民之膏脂，供一身之周旋，为民父母顾如是乎？况我皇上子惠元元，至周至悉。各上宪仰体圣意，无不以廉洁持躬率属，断弗介意于区区交接间也。

本县视民犹子，视官如蹠，凡可为民兴除者，方将随觉随行，安忍踵此陋规而坐听其滥供乎？

再有屯田硃价，每甲一两，更骇听闻。相应与节礼银八百两一并永行禁革。

为此，示仰阖属军民人等知悉，嗣后如有指称节礼硃价名色私行敛取者，许尔军民花纳人等即时扭禀，以凭重处。毋违！

## 谕种二麦示

鲁鼎梅

谕百姓人等知悉：今年叨上天福庇，收成甚好。但尔等要知，坐食山空，若不更加力作，将来正恐三餐难继。现在禾稻收成，闲田都可种麦，麦熟便可资食。即有不宜种麦之田，亦可栽种油菜，尽足充用。

本县为尔民父母，时刻以尔等衣食为念，尔等务宜即日栽种，或大麦，或小麦，或油菜，总要地无旷土，将来自然渐渐富足。倘有懒惰之民，并不栽种翻犁，一经本县查出，定行重责三十，断不姑宽。各地保务宜督率众人，限本月内尽行栽种。如该社抛荒熟田，即将该地保一体治罪，毋得玩忽。

又

谕百姓人等知悉：德化山僻小县，田少山多。向来平田只种稻谷一遍，自冬至春半年之久，尽皆闲旷，以致本地所出米谷，不足供本处食用。本县深念尔百姓艰难，旧年曾劝令尔等栽种油菜、二麦。如高卿、瑶市、良太、东西下涌各社收成颇多，甚有利益。至于远乡，仍然栽种稀少，深为可惜。此皆懒惰之人倡言土冷，自甘废业。殊不知北方最寒之地尚广种二麦，赖以足食，况此地温暖，有种自然有收，何妨用力试种一年，可信本县之言不谬。现在将次秋收，各社地保即督率百姓，务于收割之后三日内，即将种稻之田一概翻犁，栽种大麦、小麦、油菜等项，随其所宜。种后加工培植，明年自然丰收。

尔农民要知此一翻收成，朝廷既不加课，田主又不加租，一升一合都归尔自己，何乐不种？本县定于十月内亲自往各社巡查，如有闲田不种，除将惰民重责外，并将该社地保重责，各宜踊跃，毋违。

又

谕百姓人等知悉：德邑山多田少，丰稔之年，每虑民食未足。本县重念食为民天，日夜讲求，是以上年出示晓谕，令尔民于收获之后，即将田土翻犁，栽种大小二麦。间有不能种麦之处，即布种油菜。田不加赋，尽可资生尔民。遵谕栽培者，年来已有成效，若久而久之，自必比户可封，共乐升平。

现在冬成，尔民当各自争先，布种二麦、油菜，务使地无旷

土。各该地保按方巡查，谆切劝谕。倘本县因公下乡，目睹二麦遍野，当必从优奖励。如敢故违，定将游惰之民责傲，并将劝谕不力之地保惩处。本县为民食起见，故不惮烦言，谆谆告诫。各宜踊跃，毋负本县一片诚心。特谕。

## 劝谕十条

鲁鼎梅

照得本县来治兹土一年有余，每念尔等百姓种种无知犯法，忍辱受刑，本县为尔等父母，不胜伤心惨目。但势不能遍历乡村为尔等人人指引，事事讲明。今酌取数条，明白晓示。无非使尔百姓晓得律法森严，凡事可以情恕理遣。尔等通文理的，可讲解与众人知道；识字的，可说与不识字的听着，务期人人尽知悔悟，毋负本县一片婆心，使本县完全做一个好父母官，尔等亦得安享太平，父母妻子欢欣聚首，不枉为人之乐。凜之！

一凡人切不可打架。查律载：“鬥殴杀人者，绞；故杀者，斩；致笃疾者，流；废疾者，徒；若持凶器及聚殴者，充军。”尔等百姓不过因一时气忿，忍耐不住，动手打人，便至后悔无及。要免后悔，却有一法：当气忿时，你就让人一分。他人见你肯让，也就不来打你，从此省了多少的事。若说你让了人，人将来就欺负你，你看那如狼似虎的人，有几个好结果？忠厚的人到底有好日子。尔等百姓要打架时便把本县言语思想一遍，自然心平气和，不去生事。

一不可结人。律载：“敌血订盟者，绞；聚众生事者，斩”。

在尔等百姓，不过思量有事大家相帮，联合会盟，不知已陷大辟。闽省结会成风，一经查拿，往往骈首就戮，带锁披枷，深可怜悯。自后若有不安本分之人来邀尔等结会，便要想此事后来必至丧身破家，万不可去；若从前已经结会者，速自解散，方为良民。

一不可结讼。查律载：“诬告加三等，越诉笞五十。”尔等愚民，不晓法律，往往因口角小忿，动辄架词控告，结讼连年。一经审虚，自己受辱受刑，盘费用尽，卖男卖女，妻离子散，饮恨吞声，便是争讼的结果。即告状之初，就有讼棍包揽经承，原差需索，茶酒饭食，使费不一而足。及至一事完结，花费已不知多少。况且被告之人，做成冤家，反覆告害，又无已时，可胜叹悔。要在起初自己肯吃一分亏，或田山不明，听公正人分割；口角细故，亦听族邻讲解，大家心平气和，事体自然消释。就是让人些子，也比告到官司还更便宜，切不要听人唆哄，害了你自己身家。

一不可霸占他人田产。律载：“盗买盗卖，及侵占他人田宅，一亩一间以下，笞五十，多者杖徒；强占者流；私捏文契者，充军；重复典卖，准窃盗价，俱入官。”乃德邑田产交界，动即互相争占，或越界混争，或假契图占，或重张典卖，种种不法。一经按律问拟，不但田产不可霸占，连自己身家都要破了。况且俗语说得好：“世界若还嫌卖得，子孙依旧买嫌归。”你就百般诡计，占了人的田地，有一日天灾降临，便从你家起手。别人东西如何白占得？自后不但不要做此等事，并不可生此等心。古

人云：“终身让路，不枉百步；终身让畔，不失一段。”又云：“但存方寸地，留与子孙耕。”尔等百姓，静夜思之。

一不可争谋风水。发冢掘棺，人人都晓得罪重。若德邑所云风水，动称斩脑斩足，伤屋伤坟，此皆一种不堪地师播弄唆哄，致人家生事打架，甚至拆屋平坟，深可痛恨。查律载：“术士妄言祸福，杖一百；平墓，杖一百；毁房，准窃盗。”尔等愚民，一时误听唆哄，往往陷于刑辟。不知祸福无门，惟人自召，古人云：“阴地不如心地好。”你就谋得好风水，若自己坏了良心，也子孙灭绝。况且这几个地理师，他若会看风水，他自己早已谋了好的，他早已发迹了，还要来替你看风水换饭吃？尔等思之，便觉可笑。

一不可忤逆父母。朝廷律法最严不孝，言语触撞，就要问绞。若不能奉养，不听教训，得罪父母，便是十恶不赦。尔等百姓要晓得，身子是父母生的，若不是父母艰难养你，你怎得成人？你既成人，就情其四肢，不顾父母，就与兄弟争财争产，伤父母的心，就不做好人，坏父母的名，连累两个老人死不得，活不得，你的心安不安？你纵然不犯官刑，天地也不容你。况不孝不弟之人，没有不犯官事的，那时亏体辱亲，就万死莫赎了。清夜思之，急宜猛省。

一不可卖妻溺女。律载：“典雇妻女，杖八十；娶者及媒妁知情同罪。溺女比故杀子孙，问徒。”德邑恶俗，家稍窘迫，即将发妻典卖，本夫本妇恬然无耻，败坏风俗，莫此为甚。要知夫妇人伦之首，眼前穷急，大家勤俭和好，将来自然有饭吃，断不



至饿死。若结发夫妻尚且忽娶忽卖，则良心已丧，用完了几两银子，依然穷饿而死，岂不可哀？至于生下女儿，俱是自己骨肉，也是人身。乃无良之人，动辄淹死。访闻此风，不但穷人，即生监之家，往往有之。要知禽兽尚不忍食其子，是溺女之人禽兽都不如了。况天生一人，自然有一人的衣食，女儿何尝累着父母？本县望你等培养一点良心，先从家里养起，夫妇相守，父子相亲，渐渐和气致祥，便是尔等百姓之福。

一不可教唆害人，查律载：“教唆词讼与诬告同罪。”德邑讼师，屡经查拿，坐监坐牢，受打受夹，尔等百姓务以此等恶人为戒。凡族邻有事，须要秉公劝解。田土不清，你替他处清；口角不合，你替他和合。大家不避嫌怨，使二比心平气服，地方安静，尔族邻亦不至奔走官司，作中作证，费工失业，岂不受益无穷？

一不可重利作剥。有无相通，乡里常情。德邑浇风，往往加利四五犹为不足。查违禁取利，律有明条。况借债之人，非亲即邻，你有钱在手，乘其穷急多索重利，你自己一旦有急，谁来管你？不但不管，还大家幸灾乐祸，暗处害你，岂不自失便宜？你等稍有余钱的百姓，若遇族邻有急，须要彼此通融，则穷人感你救急之恩，自然守望相助，共乐太平。

一不可习为赌窃。查律载：“聚赌枷杖，再犯者流；窝赌者徒；造卖赌具充军；窃盗、计赃、徒流，三犯者绞。”一有干犯，法难稍宽，辱及父母妻子。尔等百姓，务须父戒子，兄戒弟，尊长戒卑幼，严行禁止，不许赌博，不许窃取他人一丝一

粟。要知财无苟得，赌博的日见流荡，做贼的终受官刑。不要堕落小人，便是向上君子，或勤耕力作为本分之农民，或学习手艺为有用之工商。不要游手好闲，都可成家立计，岂不是好？

以上十条，都就尔等气习不好处对症下药，尔等若能互相讲习，有事时便想律法森严，自然大事化小事，有事化无事，渐渐心平气和，去恶从善。自此安居乐业，食足衣丰，积善余庆，后来便可发迹，子孙也就昌大。

本县望尔等百姓人人为善，人人受福，惟恐负尔百姓父母之称。尔等读此告示，当如听父母之言，切勿违拗，切勿遗忘。遇事即将本县言语思想一遍，遇他人行事不是，便将本县言语告诫一遍，务期善行日多，恶行日少，万勿忽略看过，有负本县惠爱尔百姓一片诚心。本县于尔百姓有厚望焉。

论曰：“封泰山，牒白玉，非文不显，非工不传。古今文章，莫盛于西汉。盖去古未远，奥衍醇茂，居然典谟遗风。即有韵之文，如苏、李十九首，乐府歌行，皆上薄风骚，而江、鲍体裁，燕、许手笔，韩、苏潮海，多迹此成一家言焉。德邑文艺，若郭维翰、李道泰诸人，逸韵鸿章，铿锵鼓舞，其登作者之堂，所谓和其声以鸣盛者非欤？”

## 校注

①从文意看，应为“崮”

②开辟，应为“开平”，是五代梁朱温（太祖）年号。（见《中国历史纪年表》）

③祥：疑为“群”之误。

④尺五天：在德化县九仙山主峰绝顶，今“九仙山气象站”于此建观测台。

⑤桥枫：民国版《德化县志·艺文、碑文》为“枯樟”。

⑥东郭：系“南郭”之误。

（校注 李明志）

# 德化县志卷之十六

## 古迹志

穷岩绝壑，每蕴幽奇，古寺荒台，堪兴凭吊。苟胜迹之尚留，斯地灵其未没。矧夫谢屐、袁筇，触景寄兴，即事成题，尚多好句似仙乎？搜而辑之，亦选胜探幽者所不废。志古迹。

### 楼 亭

春波楼 在县门前。宋宣和间知县事陈熊建。俯浚水，吞丁流，邑旧有“春溪连波，朱紫堪看”之谶，因以名焉。淳熙丁酉火，绍熙间，知县事赵彦逵重建。淳祐丙午，县尉孙应凤作两门翼之。明嘉靖九年，知县许仁捐俸易民地，拓临溪基重建，规制宏敞，后废。国朝岁贡郑惠琇赋：“温陵之属，龙浚之治。郊垌绣错，里巷参差；峰岳崒崒，川泽沦漪。分女牛之余曜，审形胜以正基。爰是画栋起，绣阁开，部署洞辟，阁道纡回。倚南离而标井幹，挹丁波而跻春台。春煦嚙于闾奥，波荡漾其滢洞。诚哉岩疆壮丽之美，弹丸风景之推也。当其运神工削鬼斧，藉罽毼于北绣，临闾闾于南浦，飞檐牙之高啄，幔廊腰而下俯。手摘星辰，耳惊风雨。恍结绮之名花，齐临春之宝树。金榜日射兮摇屈

成，珠檐霞卷兮映新蒲。彤闕玲瓏其鱗次，瑤堂爽朗夫高隅；晴烟斐亶以翼棧，旭日炯晃乎綺疏。直檻橫欄，雄吞二川之秀；雕甍文础，華燠八里之衛。于是陟危梯于百尺，窺門角之回墉。空曠兮川岳，睇眄兮穹窿，恣心目兮寥廓，任徙倚兮從容。濯濯弱柳，拂拂長松，雙魚游碧，鸞鳳標丰，駕雲倒景，龍環峰。望涼山之集霰，卧化鯉之長虹。神霄巽峙，整背丁浴。其或晦暝變化，霧隱烟濃。萬壑奔赴，百谷朝宗。波濤怒兮涵涌，瀑布飛兮青空。雲天浮而鬱勃，烟嵐蕩而矇眊。至其明河不夜，彩霞凝暮，銀官啟畫，碧潭澄素。蟾光影兮分耀金，平芜春滿兮香霧，銅漏徹兮夢回，漁火疏兮唱住。則有騷人仙客，酒伯花侯，詩歌寄意，心目與謀。指清波而長賦，疏煩想于危樓。蒼生滿眼，未雨綢繆。見若桑麻，潤宜膏矣；見若環堵，歲勿掐矣；見若鴻雁，鼓莫槩(gāo)矣；見若荆棘，野無騷矣；雞犬不驚，任鳴噪矣。斯乃樂登眺，唱梅花，挝漁陽，調琵琶。美酒金樽置千斛，龍簫鳳笛過雲霞；春波樓外波千頃，搖蕩春光月色餘。帝力兮何有？樂土兮家家。”

駕雲亭 在龍浚山巔。宋宣和間，知事縣劉正凿山构亭。人云山不可凿，正曰：“此睡龍也，凿之則醒。”名其亭曰“最高”。后廢。明嘉靖二十六年，知縣緒東山建，更名“駕雲。”參政提學晉江王慎中記：“德化令緒君東山為政之期年，作亭于其縣之龍浚山之頂，而名之曰“駕雲之亭”。亭之所以作，非君以勞而思自休，以為游觀娛樂之地也。其說具于縣之人士所為，來請記之。書云：‘德化為邑，封域固險，然亦具有司應令典與貢，賦藝不后他縣，而人材之生，獨為寥簡，或綿都越井，無弦誦聲。每三年比士，縣之士闕焉不與登選之數，至闕數十歲而不得一焉。縣固以為耻，而君尤以為病。’于是乎有言者曰：‘縣之負此耻，固云人事，抑亦有地理也？’縣之山磅礴蟠除①不知其几百里，峰峦岡嶺，回互蹙沓，殆不可數。而龍浚一山，巍然膺縣治之南，蜿蜒夭矯。其

未若翔，其止若蛰，厥名为龙。惟亭于其上，以增益此山之势，如龙之昂然骧首而思奋。其于文事之兴，必有助矣。盖其说习传已久，县之人力既不足以自为，而为令者又漫然莫之省也。君独心喜其说，而力能敏于事，而龙得之山，于是有亭。亭之所为名，则君取其意，以符所以作亭之本旨。盖云之于龙类也。予既受书而不得辞，乃为之记。

夫度土相原，视景望气，敦琢胜美而会集休祥，古之作室建国者盖多有其法。若夫为亭于山，以起龙而致云，谓将有补于举贤选材之数，古无有也。岂亦沿前之说，支其方术，而屡变以巧耶？天地之高远，鬼神之幽微，质之而无端，叩之莫得其朕。而卜筮、瞽史、谶祝之教，先王皆存而用之。其兆证于事，而占效于物。盖精诚所极，非卜筮、瞽史、谶祝之能为神然，而知之者以为精诚，而愚者以为神故。卜筮、瞽史、谶祝常行于世，而其教为民之所由而不可废，何也？以其亦有益于人之勉功而作事也。彼其术虽屡变而巧，盖亦近于卜筮、瞽史、谶祝之言，以其传之久而信之深，距而攻之，未足以解惑祛蔽而因而修之，使士者悦于耳目之新，相率去其有所诿而怠以止之辒，兴起其志于欢忭鼓舞之中，而亶亶以进，虽户谗家诱，未有若斯之速也。嗟乎！孰知夫伐石斩木以营构于此，所以为授经挾册而谏督于彼乎？或者顾以其邻于巫与怪而诘之，其亦过矣。以予所闻，德化之士多聪明茂美之材，又知向学以自增益，人文之兴，必在于斯。时而亭方作，盖士之聪明而好学，其材必成，而为世之所择取，以施于用当昌硕光显矣。予知此亭之作，无与于选材之数，而人材之兴，会逢其时，将终有以名此亭也。姑记以为俟。”

嘉靖四十年，知县张大纲修。长乐知县吴遵诗：“危亭瞰碧虚，缥缈青林薄；坐久人不知，衣上露光落。”“绝构临层霄，虚窗荡元气，晨兴苍莽间，诸峰在平地。”知县施汀诗：“亭高百尺倚长空，亿兆苍生满眼中，布德行看兴礼乐，崇文会见靖兵戎。千山绵亘仙灵集，二水纵横秀气

鍾，喜得闲庭浑无事，何妨登眺与人同？”

万历间，知县杨文正重修。附残碑：“往堪與家谓邑形势为睡龙云，而龙浔山在邑东畔□□□□□驾雲，复铸洪钟，令寺僧撞击以醒龙焉。后衢坡张公□□□□□于郡国，非独人事，盖亦地脉使然。岁久月更，风雨剥蚀，□□□□□贞翁杨侯以敏妙巨材，来视邑治，省科条，清弊蠹，大事斧，□□□□□邑之父老子第讴吟歌祝，不啻桑楚之畏垒，仲卿之桐乡。□□□□□工估值凡费金钱若干，皆出自侯私帑。于是颓者以植，旧□□□□□之兴废有时，而侯作兴之功，直与兹山不朽也。世之莅民□□□□□政未易殫述。其大者，如构雲龙桥以便利涉，停纳串以省□□□□□日振起矣。有如邑之人民各安其俗，乐其业，无事于奢侈。□□□□□处。邑明通榜进士郭维翰驾雲亭宴集诗：“亭子高高宿晓雲，客泉空翠落纷纷。溪光掩映人烟接，虹影低横浦树分。暂借伴闲看变局，共拚一醉对斜曛。搔头莫问惊人句，谢眺当年已不群。”

国朝康熙五十四年，知县殷式训重建。教谕力子侗驾雲亭晓望诗：“天外孤亭暑气氲，荡胸高处俯层轩。霞明列嶂红千迭，雾带长溪白一痕。隔树草炖飞夜火，傍城林鸟散晨村。牧樵满眼雲间思，欲访渔郎问太玄。”

醒龙楼 在驾雲亭下。明知县绪东山建。悬钟其间，命僧朝夕撞击，盖取唤醒睡龙之意，今废。明知县黄承讚诗：“高阁钟声应地灵，睡龙今日瞳魔醒，会看处处皆霖雨，头角峥嵘满帝廷。”

早春亭 在龙浔山上。知县绪东山建，后废。吴遵诗：“百里桑麻雨露同，溪山无地不春风；东君若问春何处，尽在门前桃李中。”

真武楼、三官殿 俱在龙浔山上。知县绪东山建，后废。

祝圣寺 在县治东旧学地。明崇祯初，知县桂振宇建。以寺后为僧会司，西厅为道院，院后立遗爱祠，买置田租一千二百

斤，坐产东埔等处。未几，寺废，租入程田寺。明邑绅郭维翰记：“长林桂侯之莅吾邑也。仁风惠政，沾濡闾阎，其更新耳目而希踪卓鲁者，不啻纪也。纪其大者，教艺麦而给以种，教医疗而济以药，建宾馆而延士夫，祠文昌成巽塔。凿泮池于棨星门内，以作兴士类。筑春台，革民夫，置纠察，葺城隍，以惠神人。又瓮龙津、鸣凤两桥，以利涉道路邮亭。山川草木，焕然为一改观。而最要在于建祝圣寺。夫祝圣何昉乎？诗曰：‘虎拜稽首，天子万年。’臣子戴天履地，无一日不愿效于君，无一日不媚兹于君。然崇高富贵，君自有之也。惟有指南山而称寿，效忭舞而嵩呼，为足表臣子之殷衷，此祝厘之所由起也。侯于黉序故址，更而拓之，从中设世尊，庙貌巍然，丹堊绚烂，两虎轩爽而翼然。岁时节诞，率僚属俯伏，遥祝于其间。天威不违颜咫尺，敢陨越以贻天子羞？朔望约士民于寓下，宣解六条，俾晓畅其意。士民无不翘企而瞻注，曰：‘侯敦大体也，诚忠君也。’惟忠君，故为君爱民，与作之役，不费民间一钱。子耒者日饷以粟，故趋事易而成功。敏之以作事，谋始永终，知敝易道也。立僧纲道纪，住持其间，而贍以田。经画规制，出自焦心，其计长久类如斯。于是邑诸人士与乡父老谋立贞珉，以垂不朽。而属言于予，予不敏，无能为役。然窃闻之，民好佚矣，非常之原，且为黎民惧矣。何侯一规作而众欣然景从？若是诱之以在三，动之以固有，安得不瞿然而向化哉？吾因是而知侯之善于教也。方今圣上富春秋，综核吏治，师济在列，旦夕应推毂卓异，谅必有建大议，策大勋，不动声色，而恬然与民被煦濡者，吾邑其端倪耳。故掣括其大以登诸石。”

**北镇楼** 在县治北城。上可瞭远。明嘉靖三十九年，知县张大纲建，四十四年知县何谦修。崇祯十四年知县李元龙重建。国朝康熙二十五年知县范正谔重建。今废。址犹存。

**登高亭** 在登高山。宋时建。为邑人九日登高处。明时起送



科举宴于此，亦名“登科”。今废。

憩亭 在解阜门外里许。元东西团巡检接官亭故址。国朝知县和盐鼎建。今废。

飞仙亭 在清泰里。俯瞰岱仙瀑悬瀑千仞下临无际，匠人乘屋，必待雲与之齐。旧传有女仙马氏姊妹三人，白日飞举。郑氏女见之，遂自投崖下，有白龙负之升，因名。监生黄守仁《岱仙瀑赋》：“龙浚之东，浚溪之偏，一山特起，名曰‘飞仙’。上耸双峰，屹焉插天，有亭翼如，绝磴之巅。灵娥攸栖，忘其岁年。左有清流兮，从石壺而浚发，似九曲之沦涟。纤徐兮藻汇，宛转兮迴旋。若沧浪兮澎湃，复喷激兮透延。尔乃绕亭之下，劈峡而前。机泼泼兮流涓，涓泻淙淙兮声渊。渊落千丈兮素练，垂万仞兮若银河之倒悬。溅沫飞流兮，时分时合；湿雲横锁兮，若断若连。乱晴空兮雾白雪，阴幽谷兮带苍烟。山非匡庐兮，偏见白虹飞电；亭非陵洞兮，何来玉碎珠联？岂仙真日劳夫织经兮，朝浣纱而暮濯绵。于焉！高瞻远瞩，四顾周旋。念天下之水兮且百且千，冷泉之澄洁兮纪胜于白，灵泉之莹净兮见志于权。香炉瀑布兮得乐天②而名以宣，漱玉三峡兮赖子瞻而景以妍，东城之泉兮经赋于秦观，名水之涧兮曾咏于陈搏。何兹泉之潺湲兮，僻处穷乡而不获附于名山大川？岂山灵之有幸不幸，抑亦待其人而乃传？兹值采风一顾兮，不为巨眼所弃捐。采杜若，搴芳荃，搜崖寻壑，拂试加怜，为仙山而开生面兮。庶几与天台惠济相比肩。使古今上下俯仰兴怀者，如睹醉翁之酿泉。”进士李道泰诗：“上看碧涧县，下为雲雾逝，始知银河来，从无接流势。仙女骑白龙，山半每摇曳。石上三元君，丹成皆姑媿。游戏苍茫岩，千丈如阶砌，虚亭外嵌空，精爽接天际。解佩何足言？况复朝暮滞，万古壁间松，色绕青螺髻。”“朝朝喫两千山合，只看掌中肤寸雲；不是悬崖轻撒手，却因游戏会元君。”廩生黄遂权诗：“为访灵岩结伴行，阴阴山径

鸟交鸣；双尖插汉笼蚕白，万仞飞泉挂练青；阁倚悬崖临一切，石容坐客话三生。夜来触景联长句，皎月当空斗柄横。”

飞凤亭 在清泰里。飞凤山极巅一巨石，峻削凌云，形似飞凤，架石亭深广各丈许。相传有女仙驾凤来此，乡人常于此祈梦。监生黄守仁诗：“危亭迫太虚，搔首吸春瓮。醉去抱月眠，仙灵赠清梦。”监生黄尚仁诗：“石壁嶙峋古洞巍，为寻清梦叩灵妃。凭虚直欲凌空去，极顶真如夸凤飞。露重花心疑宿雨，风来薛叶想香衣。天台何处当前是？却愧还山向愿违。”

## 胜 迹

凤林 在程田寺。寺前平畴如绣。五代时邑人程国知所舍，入寺香灯田在焉。林今废<sup>③</sup>。明僧休耳诗：“欲为长者留名，寺额因之姓程；门外春畴两足，山山布谷催耕。”寺后薛萝峰万松苍鬱，每疾风振籁，声达城市。僧休耳诗：“山门都学栽松，境致无如此峰。有日不甘螻屈，破雷一任乘龙。”国朝永春举人周宗濂诗：“一峰松柏参天，培植不知何年，爽籁有时自发，颺颺惊起龙眠。”僧真净诗：“前身不是栽松，何缘得到此峰？试看虬髯猎猎，横枝真欲成龙。”贡生黄宪文诗：“亭亭翠盖护禅林，冠剑龙蛇不可寻；午夜闻雷何处雨，天风吹动海涛音。”寺东巨石垒块，相传五代唐僧行端坐禅于此。僧真净诗：“片石从无取舍，水鸥野鹿横眠；顶上偶然趺憩，错传老僧坐禅。”山后路旁有井一泓，为行端化身处，旱不涸，潦不涨。大樟数十围覆其上，叶不落井。今樟已枯<sup>④</sup>。周宗濂诗：“佛原不灭不生，悬崖撒手便行；何知真身未化，看取井中一泓。”僧真净诗：“正体原无去住，真身那用茶昆<sup>⑤</sup>？叶堕终不落井，慧泉宁有竭时？”行端赐号真济，建塔藏蜕，名

**真济塔。**僧休耳诗：“好个无缝塔子，总非潭北湘南。藏身了没踪迹，说尽前前后后三。”周宗濂诗：“此是阿谁塔子？巍然独特一方。真如原能真济，顶礼合皈法王。”寺东南岭上一石横锁，俗传行端在时不过此岭。僧休耳诗：“年年入市皆雨，洗尽山腰岭头。不是舆抬不过，争如末后风流？”僧真净诗：“脚跟踏遍天下，谁云不过岭头？任是乾坤神力，难回老汉风流。”

**梅花坞** 僧休耳诗：“短墙旧有茅亭，雪后园林不扃，只此二三老树，较他十里西冷。”周宗濂诗：“偶尔寻僧竺院，飘来梅花数片，满径尽是幽香，奚事孤山堪羨？”僧真净诗：“傍梅草即堪亭，爱月门留不扃，老我孤山十里，雪花亦觉清冷。”方竹园。周宗濂诗：“修竹万竿献绿，萧然自媚幽独，圆通真是不解，宁随刳毁鹿鹿。”僧真净诗：“一壑一邱密尔，秋风秋雨萧然，自古方多乖世，有如性不可圆。”

**纓溪** 在县东北里许，泉石幽佳，邑进士李道泰筑别业于此，编为八景。子监生肅綴以诗，今景不复睹矣。里人毛一夔诗：“先生补置林泉手，纵出东山逸兴余。过雨溪犹辋水画，栖松楼似有巢居；雲依半刹禅无语，鸟踏空庭迹是书。石丈不酬高客拜，试询幽意更何如？”

李肅纓溪八景诗：“巢松阁满湖烟雨蛰龙舒，绿浸楼空数架书；暮窗半闭轻钗落，闲杀风涛陶隐居。”“落月潭半插青山接石阴，碧轮穿透绿平沉；跳波练影争春暖，好泻幽泉入绮琴。”“磨石村堤横掩映画图中，杓覆青杨莫教通。鸡声数点催犁蚤，绿到平畴晓日红。”“苕带院晚钟佛火绕林虚，敲孤狐僧欲定初；茶铛烧尽鹤癡梦，一道溪雲半入庐。”“三峽洞明河倾倒小龙湫，星落嵯峨带阁浮；幽咽泉流风过处，声声唤出罌塘秋。”“流春桥晴虹一带锁溪门，闲送飞花第几村；似忆瀟陵添客思，解鞍欲上绿杨屯。”“杨柳汧(pān)暗黄催尽晓莺飞，翠浪丝丝欲染衣；拟

解小舟寻远屿，斜烟春水带孤晖。”桃花涯尽翻锦浪满溪风，前度刘郎应未逢；三十年来微笑后，从他历乱水流红。

**戴雲山** 在新化里，一名迎雪山。暑月顽雪不消，雲气常覆其上。寺居雲窝，西有石室，石如凤髻。六朝时有僧蜕骨于此，俗呼祖师磴。大戴峰顶一石如覆釜，与山同大。万岁虬松，倒悬峭壁间。石壁千仞，上有石厂(hǎn)可望不可即，恍惚仙居。稍下有谷七里许，古木参差，上亏日月。

小戴之峰，三山耸秀，有祖师旧室。上有方池，其深莫测，异鱼往来游泳。水分九派，注下九溪。寺后一泉，悬流千仞，若垂素练。一石数十丈，挺竖如柱，涧畔一石三四丈许，形如舟。山之西隅，有石圆如鼓，东隅有石如覆钟，俱大数十丈。

明永春庠生张助戴雲山十六景诗：“戴雲秋巘华表层层陟绛霄，雲间青盼一天遥。来为牛斗河边客，会见乾坤柱上标；海外六鳌应咫尺，瀛东五岳共嵒峤。可怜落落烟霞里，松柏千秋独后凋。”“迎雪春湖广莫壑天浑是冰，晶晶宝气见飞腾。玲珑皓色林间度，潋滟晴光水上升；佛国琉璃开洞府，泰阶玉烛调冥灯。皇图万里春长晓，碧落黄昏总□□。”“三山耸秀天外三山不可求，个中别是一丹邱。雪归草际仙踪杳，春入荒阴雪气柔；文藻峥峥花点缀，芙蓉朵朵玉雕镂。纷披暮壑丹霞幻，堆出奇峰十二头。”“一柱撑空雲霄万里是虚舟，一柱撑空四序流。不逐风波倾覆去，何妨烟暖往来浮？擎天未列高明位，立地先超族类俦。自信他山巖作砥，荣封莫道曲如钩。”“七里盘谷平林数里鬱如盘，逐涧千峰去复还。独寤偏宜適轴宿，无心好伴野雲闲；源中秦叟今何在？洞口桃花半未开。猿鹤清秋长啸语，岛门风不到人间。”“六朝真僧高隐梵僧氏不题，六朝尚有旧丹梯。曾登彼

岸高千界，也浚真源下九溪；此日元香饶道味，当年半臂入菩提。飘飘只履归何处？松树东枝影又西。”“石帽顶冠天开宝石如玄冠，八面高峰一帽团。垂拱万方犹共主，朝宗千百类周官；祥云捧出岩岩象，霁日刚承蔼蔼欢。带雪从他头尽白，九重春色未曾阑。”“风髻通玄凤嘴含花到席前，低头听法几千年。窍通混沌如曾凿，道入崆峒可问玄；空谷有神名罔象，托婴是处即寥天。何人扫榻云间卧，长作跏趺对石泉。”“云窝古寺云窝木末见香台，白气如山华盖开。有客频寻双涧入，真僧曾向六朝来；岩头不改他时月，腊后重看旧日梅。寂寂钟声天外度，伏龙飞鸟几徘徊。”“涧畔石舟卷石横如水上舫，何年阁在戴云东？蜿蜒努力痴相负，颺颺厉威枉自雄；尽世甘从俱没逝，阿谁肯立不波中。而今野渡招招子，不是仙舟莫与同。”

“天池洒雪绝壑九门碧涧危，悬岩千仞雪华飞。水从天汉经黄道，流出云霄滴翠微；珠玉纷纷随雨下，鸱鸢远远向池归。余波洗得冰轮净，散作清光满地辉。”“石壁悬松苍苍壁上万年松，落落云间第一峰。倒揭芳根承雨露，斜翻古幹作虬龙；山开锦幃丹青杂，树列珊瑚宝贝重。蹇傲霜中知杰骨，翹然修楚待秦封。”附□□□诗：“瞰回层云外，盘松石畔悬。岭阴岚气结，壑静籁声喧；霜幹春长阅，虬枝日半穿。神仙频有约，白鹤去仍还。”

“云中石厂(hǎn)断崖千尺岛门开，何物灵通日往回？穴地崎岖惟鸟道，洞天缥缈只天台；不扶九节仙人杖，空望孤标太古梅。列子从容垂足处，应无复有御风来。”“天外线泉悬崖一窍入云霄，石乳飞来下素条。巧织天孙抽玉缕，浣纱溪女瀑冰绡；乾坤缺处缝应合，抒袖空时帛自饶。片片彩霞纷作绮，玉人偏称锦为标。”“山西天鼓灵鼓西悬石当皮，三推何事削桐枝？声飞数里泉为响，林奏钧天风每迟。地巖岩扉空戛戛，梵音晚课共支支。几人和得玄中韵，直领真闻耳不垂。”“岩东石钟有石如钟古寺东，当年大冶属天工。纽悬云界千山外，声满桃都五夜中。暗度神龙时爰

暖，兼连瀑水日淙淙。冥心会到忘言处，隐隐清音听不穷。”

**九仙山** 距县治西北六十里。九峰矗立，名胜难以殚述。游踪不绝，题咏如林。明刑部侍郎詹仰庇诗：“百里相寻岂惮遥？名岩栖息意萧萧。松阴积雨迷玄洞，石壁当天挂斗杓！半夜钟传风外梵，空庭人醉月中飘。桃花谷口如通棹，高隐同君不用招。”

**永安岩** 在九仙山之麓，唐僧无比艺圃处。多种苕菜，旧名苕菜岩。雲济史禅僧涅盘于此。其南有亭翼然，可以眺远，雲山尽剑南之胜，松风皆方外之音。左史颜廷渠扁曰“觉路”，为入门初地云。稍左有玉液泉。岩北直上百余折为松径，多五须松。岁贡林檎诗：“几树松阴石径幽，参差交影舞龙蛇；风清近午寒涛起，彷彿天台顶上游。”松径北，蹲一巨石，状若蟾蜍，半覆以古树，宛然月中扶疏桂子。颌下可坐数人。旁数石，如落星。南为小石天，石形如一片瓦，可避雨，石上有二珠树。监生张士宾诗：“林影挂晴晖，洞霞篆罗绮，何年石上花，犹作蕊珠比？”转入宝林，鬱葱数里，鸟声上下，麋鹿猿虎间出其中，可爱可愕。春来绿战红酣，令人应接不暇。林中曲涧幽佳，周道俊书“泉石烟霞”四字。左史颜廷渠诗：“小涧飞流万玉鸣，空林霁色落霞明。几回扫石林中坐，无数风花扑面轻。”监生李乔霖诗：“斋鸟巢深枝，野猿拾定果；衣珠入宝林，悟处是仙岛。”

九仙山左为灵鹫岩，衣雲霞，抱泉石，修竹奇花，绝非凡境。庭前砌方石为池，立石桥，蒔小白莲，其花午开而酉苞，方中时烂然盈目。池水深黑，如巨星明于晦夜。岁贡林檎诗：“山回窈窕隐仙家，屐蹶千峰意自賒。羽翰高飞黄鹤驭，烟霞时度白香车；秋深珠

树笼雲影，亭午琪莲映日华。历历丹梯天可接，何须海上觅浮槎。”国朝进士李道泰诗：“地接天河不住倾，烟雲缥缈众星明；仙人顶上簪花落，冷艳香浮削玉轻。”岩前有泉仅斗，出石窦，味甚甘，更仆不可竭。古志云：“九仙山有仙石井，阔尺许，虽旱不竭”。即此。林檎诗：“冷然泉迸⑥石山巔，住⑦锡开山何代年？祇事金茎和玉屑，柳枝洒处涌青莲。”明万历壬子，僧应阳凿山阿为池，通胡卢池积水，直抵放生池。长数十丈，广半之，深又半之。负东揖西，因名“回照。”一石高数丈，立池畔，号“将军石。”国朝拔贡李宸铿诗：“拔壁凌空半入雲，灵岩保障独需君。松旄颭动旌旗摆，竺籟声喧鼓角闻；猛将弯弓会饮羽，丈人呼石总能军。论功何必封侯去？苔挂征袍旧豹文。”

九山多怪石，过小石天石刻，渐入佳景处。众石杂出，如峰，如殿，如鼓，如榻，如屏，如狮，陡起石门，标曰“入圣”，侍郎詹仰庇更为“兜率天”。石径横空如复道，盘树交阴。抵石洞，巨石垛迭，天成釜覆，一小石支之，如系如坠。内石弥勒一尊，大十尺，高倍之⑧。旁可具樽几散坐。左通天然室，僧无比修真处。俗传石故像果老，日有群仙奏广乐，无比厌之，改雕弥勒，仙乐遂绝。名弥勒洞，亦曰九仙洞。明举人郭维翰诗：“直入嵒砑洞，摩雲迺接天，谩言勾漏隐，到处可探玄。”举人李雲阶诗：“洞口石峻峭，直插青天末；恍从鹤跨来，灵芝香可掇。”监生张绅诗：“洞明一罅天，雲锁千层石；竺籟动疏林，中有餐霞客。”岁贡黄龙御诗：“峭壁青冥上，留雲一径穿；寻山人不识，更有太华莲。”岁贡周桐诗：“洞门封薜荔，石径绕松筠，过此关头去，人天更不分。”庠生李日见诗：“树迷洞口径，雲锁石边扉，不识何年凿，莓苔作石衣。”庠生周櫻诗：“古洞烟雲流，苍山猿鹤啸，峻峭尚可攀，临风同一眺。”监生林焯诗：“紫纒绝磴锁

苍苔，洞口千秋珠树开。大药已随真籍去，月明赢得列仙来。”岁贡赖煊诗：“古洞阴森峭壁环，千秋老佛卧雲间；扪萝蹊蹊参玄偈，猛破尘寰醉梦间。”张士宾诗：“鬼斧凿雲根，空峒接天上；神仙不可寻，万籁发潇爽。”李乔霖诗：“谁年斫山骨？辟户掩雲屯；何处耽空者，犹来叩石门？”颜廷渠诗：“雲开忽见青芙蓉，疑是蓬莱第一峰；洞里寻仙不可见，但闻天上奏飞龙。”天然室之北，垒石巍峻，为飞升台，以九仙故名也。又直上，奇峭壁立。明庠生周枫题曰“蓬莱第一。”周枫诗：“何须航海外？中土有蓬莱。窃竊洞天里，神仙日往来。”绝顶为尺五天，里人周绍熹题曰“大千世界”。周绍熹诗：“直上最高处，乾坤一览中，大千何世界？缥缈白雲空。”里人周瓚书“寿山”二字刻于灵鷲之巅，后享寿百岁，似预为之兆。周瓚诗：“高山凌汉表，四睇白雲低；敬祝万年寿，悠悠山与齐。”

灵鷲岩南有鷲岭，凿石为磴，攀萝而登，岭畔险壁处，累石作小塔，云系僧无比牧牛时所戏成。迄今垒块，虽石尤羊角，终不仆。颜廷渠诗：“岩峽鷲岭凿何年？灌木阴阴泣杜鹃。险磴忽思王子鹤，春粮不挂阮宣钱；寒生短褐来天外，翠着蓝舆过雨前。载酒喜逢吴季子，夜敲长剑醒龙眠。”岩西有魁星洞，峭石中虚，傍有雲路，前一竖石如笔颠，一方石如斗。岩东有说法台，石平如砥，坐可数百人。万历庚戌夏，邑绅张士宾建亭，颜曰“半闲”。张士宾句：“千峰到客雲双袖，半榻谈僧月一亭。”又诗：“层台古洞穿峰出，石面嶙峋扫自题。碧落依人多气色，山花爱客逐攀跻；风流竿籟松杉近，日返丹青崑岫低。半榻亭头闲寄傲，上方莫莫唤天鸡。”岁贡朱光山诗：“亭结雲头净，名浮可自禁；生寒逢①半日，招隐入山深，”说法台畔有点头石。



张士宾诗：“初登三乘域，说法坐高台。石聚头皆点，心安劫已灰；拈花孤月冷，薙草一亭开。漫说千人石，生公去不回。”过点头石数步，石上一巨踪，长老云：仙人踪，一在狮子岩前，一在此，相去五十里许。林檎诗：“飞舄曾游海上山，留连遗迹在人间，当时误采长生药，一入壶中去不还。”

灵鹫山上为耆闍掘玄珠石，巔有仙棋枰一局，隐隐雲封，棋子尚存三四，淡紫色。东有化身台，从山脊逶迤，过石刻，“只有天”辟石洞二：上曰“齐雲”，下曰“摩雲洞”，如奇龕，可坐数人。南为振衣冈。颜廷渠诗：“有客问峻嶒，凭虚下复升。踏梯雲一径，摩洞石千层；珠树浑如枣，玉楼半是冰。耽游归路晚，作伴喜逢僧。”张士宾诗：“怪石劈层空，摩雲绝壁东。虬枝苍藓匝，鸟磴夕阳蒙；凿洞盘方外，餐霞坐镜中。万林通一线，拂袖翠微笼。”赖熿诗：“怪石摩雲出，洞门接汉开。霜枝封藓古，幽胜即蓬莱。”庠生林昂诗：“更访名山上翠微，摩雲高磴展难移。琼枝压径千秋树，圭石当门百仞扉；人在天中红日近，眼看木杪绿波飞。冷然一啸寒风爽，迷却洞门何处归？”摩雲洞前障一峭石，题曰“面壁”。旁有石梯，下抵莲花峰。李乔霖诗：“苍苍石抱藤，冉冉雲抛练。忆我达祖师，对却十年面。”九仙诸峰，峭壁入汉，涓泉百道，沸成龙池。冬夏清流，常注半幔。以石壁半窟突，莫测其底，尽处累以乱石，澄清不泄。产异鱼，瘦若刀剑，咸四脚，性驯。旧传有大赤鲤，见者为祥。宗泉州守王梅溪禱雨于此，有应，凿“祭崇隆进祝圣南池”八大字纪之。明万历间，一村农利其鱼，私毒之。日中雷雨交作，如见异物，亟遁去。旁数树皆唐宋时物。稍东有龙吹亭，里人周则森募建。颜廷渠诗：“九

仙峰畔有龙池，池水清深龙欲飞。昨日洞门风霹雳，今朝池上雨沾衣。”李雲阶诗：“池水深千尺，孤峰挂百寻，忽惊神物起，风雨振空林。”林焄诗：“仙山锦绣屏，古刹莲花迹；龙为霖雨兴，抟雲天咫尺。”李乔霖诗：“一泓开照胆，倒浸月华低。莫将龙护法，风雨连宵迷。”林檠诗：“朝来雷电暗苍冥，谁倒龙宫行雨瓶？一自朝天龙去后，至今潭水尚精灵。”李日见诗：“石池千尺白雲光，神物朝天霖雨随；日午香生禅味足，莲花应借作慈航。”龙池左为仙峰岩，宇基宽广，兴废不知年代。万历间重建。国朝岁贡陈杖诗：“仙峰佳景即蓬莱，岩踞峰头绝点埃。古树亚枝盘鸟道，天花落水涌莲台；微雲送雨前山度，淡月邀僧入榻来，饱我烟霞忘世味，烹泉敲韵恣徘徊。龙池右，五峰簇峙如莲花，有莲花岩旧址，石大士、石镜、石盆犹存。复一峰为普陀岩，为醉仙幕，为望军石，为明镜台。其右为天宫，戴雲列帐，狮峰前茅，奇胜可穷千里目。林檠诗：“菡萏风凉一水清，何年化作五峰呈？披衣玩月同僧话，虎啸猿啼三两声。”龙池南巨石高丈，长倍之，状如墨鱼。题“彼岸”二字，张士宾更曰“石鲸”。林焄诗：“石舟侵水半，珠树覆石鱼；如何雲气结？水底有龙嘘。”龙池下有石洞，大小九处，大者容数榻，小者蹲数人。水从洞底出，曰九十九空洞。明嘉靖庚辛，乡人多避兵于此。九仙洞前怪石嵌嵌，人迹不到处，一涧如瀑布。古志云：“九仙南有泉，声淙淙若自雲间来；久晴鸣则雨，久雨鸣则晴。”亦名“灵龟瀑”。

张士宾九仙山十二景诗：“灵鷲奇花世尊当日一花拈，散落瑶琼泊岫岩；朵朵香风天外臭，芳姿更向月中纤。”“永安翠竹涧环万竹翠交加，般若台高转法华；夜半岩头风雨作，化龙疑是葛洪家。”“高台说法

当年说法有高台，聚石累累劫已灰，偶向亭头听半偈，散花天女雨中来。”

“层洞摩雲乍登洞壑接青霄，伸手摩雲五色饶；此去蓬莱应不远，虹霓漫借作长桥。”“魁星彩笔石洞嵌崖雲路通，斗杓高出万峰中；洞前彩笔骄如许，花放春三映日红。”“弥勒禅门玲珑古洞秘青霞，指点苍山木石除；绣佛何年留面目？白雲缭绕作袈裟。”“龙池霖雨雲树高悬百仞台，中含沧溟石池开；蟠龙时或朝天去，却念苍生带雨回。”“石井甘泉老僧杖锡夜归迟，晓起磷磷一勺滴；莫是山深来虎爬⑩，清涟千古照须眉。”

“宝林织翠给孤买地布黄金，到处尽将宝作林，翠织晴雲迷去住，山花片片着罗衾。”“夕照回光新筑回塘弄晚漪，晴雲如练镜中披；浮光返映维摩室，始信猕猴旧有池。”“莲峰月色崔嵬五出染晴霞，人道峰如菡萏花；可是太华分十丈，月明猿鹤映天涯。”“松迳风涛白日松风韵野涛，虬枝压径出平皋；扞衣欲觅知音者，弘景当年兴自高。”

朱光山九仙十二景诗：“灵鷲灵鷲有奇花，冰姿泥不染；方塘向午开，碧若梅花点。”“永安寻山登觉路，窈窕异尘寰；人与白雲净，禅如翠竹闲。”“说法僧向莲台坐，昙花傍雪飞；听玄心自了，头点石依依。”

“摩雲层洞累石间，片片摩雲白；有时跨鹤来，仙人应咫尺。”“魁星危石壁奎悬，晴霞绕洞口；璀璨天北方，屹然若魁斗。”“弥勒洞门杳可探，烟霞晴一眺；绣佛耳中声，风前猿鹤啸。”“龙池天光含碧虚，石窦深何底？风雨有时来，神龙惊且起。”“石井津从石髓生，一酌甘如许；应是玉壶冰，堪靖六月暑。”“宝林眺望历晴山，琼枝罗万丈；徘徊林中日，苍翠着衣上。”“夕池涧水涓涓出，凿塘一鉴空；万山回照入，倒映碧岩中。”“莲峰地旷诸天合，嵯峨矗五峰；夜深山月出，朵朵列芙蓉。”

“松径奇松日鬱苍，盘径清阴乱；吹万起涛声，琅琅来耳畔。”

龙湖 在新化里太湖山。四面崔嵬，旁罗列十二峰，山顶凹处似船。宋绍定庚寅，僧自超梦异人导至此山，因建寺居焉。寺前一湖，莹碧如镜，亦名青草湖。尝产青莲花。明里人张崑诗：“五百神仙拥此峰，黄金削出宝芙蓉。祇园昔日明霞布，福地今朝紫雾封，古树栖残听法鸟，春池梦觉护禅龙。毫光远向雲间度，晓色先开半夜钟。”

“微笑当年法眼开，龙湖祖意自西来。花前香色依然在，座上玄机不用猜。水演真源分复合，田多妙果种还培。雲关远挂天边月，笏地今知镜有台。”湖外稍下处，有卓泉水从石涧流注，点滴如珠，春不盈，冬不竭，一名碧水池。俗传僧自超开凿水源，伐石作笕，缘岭而上，欲令倒流入寺，今石迹犹存。颜廷渠诗：“高崖有碧泉，林密觉境闕。住僧相导引，扶携乃能至。苔湿怯石滑，藤交冠屐系。俯见水澄莹，不盈亦不匮。一酌心自清，久坐神亦悸。过幽不敢留，还步犹恐蹶。支木忽超越，回首弥玄邃。传言有神通，此事亦云异。总在天地间，真源偶相值。探幽复凭高，至理斯可契。”李雲阶诗：“寻幽到卓泉，共坐水之浒，泉从石罅来，滴滴细如缕。四序任推移，不盈亦不窳。自是有神功，雲霞润厥土。涧草暗逗香，丛林阴啸虎。杳鸞亚枝垂，苍苔封石古；兴至好呼卢，不用作伛偻。醉卧羽衣傍，翩翩孤鹤舞。归路入禅林，扣关问六祖。”张崑诗：“万仞峰头妙窍通，真源点点出空中。天河水向雲间落，石乳香从色外融；谷口霏微常带雨，湖边清冷自生风；传言一杓多灵变，隐钵龙归应有宫。”湖西普陀山上有化台，僧自超坐化处。国朝庠生赖宁远诗：“攀跻直上最高峰，俯瞰平湖烟水浓。七九丹成雲满塔，化台是处悟玄踪。”

石壺 在清太里石牛山上。晨起登山，毕景始到。由陟雲亭入林而西，逶迤千仞，为天台岭。上有分水、洋水东西流，东往

泉州，西往兴化。黄宪文诗：“巍巍一岭与天齐，极顶分流浚两溪。竹里人经千尺磴，道旁石可万言题；林深鸟语同猿啸，谷暗禅音似豹啼。鬲葛扳萝三五里，回头已觉夕阳西。”毛一夔诗：“后上依前上，长林莫辨天；人心皆出世，山意尽成仙；倚磴咸称极，问岩尚蹶颠。霞光悬木杪，恍在赤城边。”入壺平地数亩，一院居中。毛一夔诗：“这座灵岩结构阴，上方犹隔白雲深。春秋径就花情问，朝暮门开山影侵；五夜龙光存剑气，千年佛子悟雷音。欲参松石无穷理，须抱层峦不世心。”院前有池，产四脚鱼、午时莲。院后直上，怪石狰狞，作钟鼓、龙凤、鸟蛇之状。当路巨石，豁豁垛叠如阙如塞者三，各深二十余丈，委宛苍凉。罅处曦阳斜照，间有字迹，剥蚀难辨，为一天门。毛一夔诗：“片石堆岩起，通幽一窦先。填壑何窒户？拔径始开天；我谓奇无比，僧云实未然。登山初展眼，见此即称玄。”二天门，毛一夔诗：“又转一幽奇，比前较胜之。龙蛇多暗走，日月罕明窥；稍出天仍大，重看路更疑。白雲寻不见，谅有别心期。”三天门。毛一夔诗：“探奇已至再，此益费踌躇。石尽归玄象，门真透太虚；以休能致曲，有漏不同初。三复留题后，壺天咫尺余。”上即石壺洞顶址，全石如牛头，中可容数十人。康熙间，洞门震压未凿。毛一夔诗：“壺头古洞湫生秋，芜草寒花不自由。施鸟思僧仍下石，孤雲恋客复经邱；遥钟频送空山晚，野树徒私曲径幽。想得真人心亦老，黄蛇胆气性中收。”洞底有穴深杳，傍穴积沙中，常见男、女大小趾踵迹，游人以手灭之，顷而复见，盖山魃所出入也。洞顶望见兴、泉二郡，鸡鸣时可观海日。毛一夔诗：“天鸡遥报扶桑晓，五色烟霞尽东绕；两仪渐判阴阳开，浑沌谅同此时杳。须臾现出金轮王，一颗晶明沧海表；陶精浴魄不易高，欲起未起耐瞻眺。洞口豁然真可吞，如

何不教天地小？羲和叱驭挺三竿，抬头如挂石壶杪；万木共栖赤身鸟，千林顿醒黄梁鸟。岩麓钟磬启晨经，长啸孙登下山了。”黄守仁诗：“适兴登绝顶，壶光快壮游。三门阴雾锁，片石晚云留；风动天香霭，鸡鸣海日浮。梵堂钟数点，敲彻万峰秋。”洞北别开一洞，上下两石，深广二丈许，中虚一窍，窥见苍光，而雨点不能入。上石如莲花形，旁有指动石，以手撼之不动，以指点之则摇。稍过为龙藏，有风出小口，伛偻可入；约十余丈尽处一池，深黑。石壁斜倚，有大士影，宛如刻画。由洞而上，为演法台，道人张自观斗魑处也，石壁峭削千仞，头发、尻胫、鞭剑之迹，各入石寸许，辗转数十处；足趾入石，半其踵。游人跣足缘石以登，壁间作石级数十，为梯。巔有石罅，深不见底，当超而过之，非神全者莫敢往矣。毛一夔诗：“何许众山让特立？潘珣削起插天入。龙蛇走迹烂如泥，来去烟霞不一集。双眼快开万里青，层蛮踏作九霄级，身世虚危那可持？飞鸢惊坠豎自戩。有时长风发啸声，咸云岩下山鬼泣。真人驭鹤久未归，古洞空遗金粟粒。振衣秋气不胜多，落木黄昏催更急。”达顶有天成石冢，有洗剑泉一泓，水常赤。毛一夔诗：“嵯峨千古积山月，薄带霜威悚人发。紫气纵归牛斗间，铜花泻出寒流滑。”黄遂权诗：“神踪留异在雲端，携手攀跻共说难。山染秋光如点黛，人栖雲杪欲生翰；朱曦浴海扶轮上，青女流膏洗剑寒。此处离天疑尺五，望中风景托和盘。”对峙一峰，巉岩峻绝，游踪难到。极巔有剑插石上，可摇不可拔。毛一夔诗：“虎气半消龙精波，苔痕带露裂山骨；真人三尺挂碧天，万丈光芒犹恍惚。”黄宪文诗：“纡回山径即天台，古洞幽深片石开。树老千年时带雪，风嘘万壑欲成雷；藤桥有路通牛首，宝剑当空插法台。极目海隅缥缈处，五雲蚤捧太阳来。”

端午泉 在五华山。唐僧无晦穴井深数十丈得泉，指语人曰：“斯井千年，逢端午日则水溢，吾化后以斯为证。”至今五月朔，泉渐生，五日盈坎，寺僧挹注以办千人斋，翌日复故。

羊稠苻 在汤头社。石壁峻峭数百仞，上一石盘端平。旧传宋时有僧黄姓者，坐化于此。

白牛苻 在南埕社水口悬崖之下。相传尤溪道人章姓者常④乘白牛到处驱疫，因跌逝于此。

星山洞 在虎贲山。俯临绝壑千仞，洞内有余炭，盖昔人练汞处。

将军石 在上林社儒山三濂乡溪壑间。挺立数十丈，大可二十围，形体犴狰如介冑。李宸铨诗：“石势峻嶒号冠军，千年壁立独超群。刚肠不避风雷撼，铁幹从教苔藓纷；银甲秋霜添素铠，战袍春雨洗尘氛。凭虚屹镇江山老，自有声名不纪勋。”庠生谢祈出诗：“为有东流柱一擎，儒山千古壮干城。雲根碁磔留威猛，铁幹嵯峨想甲兵；古石障回维地脉，将军名号自天生。巍巍介冑扬波立，点检苍松作柳营。”

大士石 在桂林乡。片石突兀，高广十丈许。半壁一穴如龕，有石佛像三，居中者类大士。里人构亭其下。岁贡赖铨诗：“普陀名胜世称奇，此石鬼然恍似之。岂藉六鳌山驾至？犹疑一夕雨飞移。何年古佛超尘外？不数行人逸兴迟。别有洞天无限趣，诗成回首月明时。”康生赖育茹诗：“一室天然出鬼工，现身疑在水晶宫。慈悲漫道心如石，世界全归指点中。”

金鱼石 在桂林乡西南溪中。长四丈许，高三之一，广二之一。其色赤。每波涛汹涌，势如浮动。赖铨诗：“天然片石砥中流，

宛象沧溟锦鲤游。日浴鳞涵金迭丽，风吹浪鼓玉鸣休；千年隐见占潜跃，一水茱萸锁去留。多少行人频眺望，应疑养就赤龙浮。” 廩生林超凤诗：“谁家缀石锁渐流？却铸巨鳞拥上游。夹岸暴雷同在藻，浑身金质自凝休；日亲烧尾征消息，春至闻雷决去留。自此乘风腾万里，不教鱼服逐波浮。” 廩生涂廷观诗：“小涧鳞鳞一石鱼，冲流泼刺却随渠。桂林可是天池否？水击三千任所如。”

## 塔

翀霄塔 在南关外，邑治之东南。明天启间，署知县泉州通判闻人宗望倡建。知县林大俊经始，桂振宇落成，并建春台于其下，邑人为主三贤祠。顺治四年毁于寇。明大学士晋江蒋德璟记：“朗宁林侯莅德之三年，而凤翥东始有翀霄塔云。夫塔，佛之所谓窣堵波也。称翀霄者，右儒也。古常有西南两塔，兹称始者湮久复兴，故美而始之也。志称龙角风光而誉髦绎之曰：‘水流丁，罗管纒。’以是侯首建塔，次浚溪。特书塔者，塔重也。侯捐俸百四十缗，百为塔，四十为溪。而塔力巨，仍募三百助之，若溪则塔之余力。塔落成，署谕孝廉王君帅诸生谒璟碑之。”

按嘉靖中，邑绪侯建驾霄亭于龙浚峰巅，王道思先生纪之。其胜以地灵，为人材之粹。而璟家大人令江山时，尝筑九清、鹿溪二梁，及建牙海北，亦有起秀塔之役，其意与林侯合。然窃以为人材者，士之所自砥，山何权焉？天有所域，人自靡然而受之其间，欲以意与之衡，又不能移山走水，夺霄陋而耸以菁华，则其势不得不拱而望之有司。有司之权行，而山川之权遂轻。然而非真循吏视其子弟若吾阶芝兰，视其山与川若吾几筵间物，而必为桐乡树千百年不朽之举，则亦相与晏然坐以听之而已。



吾郡文献甲四海，独德化居万山中，自丁罔卿以乘铨显，郑计部以清新著。他如李郡丞诸右姓，人文彬彬鹊起，议者谓于方值巽，宜笔峰，若戴云五华绣屏之秀，可揽也。若夫丁溪者，故脉自在，于宋时一夜雷雨，篆溪为‘丁’，兹复混壅，两者实待侯而办。侯乃身肩之不烦，公私浹岁而告成。今试梯凤翥之巔而望，澄蓝如练，一纵一横者溪也；蜿蜒属于塔之麓者，云龙桥也。与浮图岿然相峙，如龙之变头角而出者，驾云亭也。宝铎鸣凤，水云万顷，若唐人所咏，‘雁塔曲江为一品’，白衫题名宴樱之处，而远近之色，交以其秀环而映者，九仙诸名山也。

於戏！其不谔与史所称，如辰阳长宋均、蒲亭长仇览，率以兴起贲序为务。而召父在南阳，行视水泉，开通沟洫，起水门堤淤各数十处。林侯有汉循吏风也哉！侯洁修峨然出尘，家世令潜称廉能，而长公光第读书署中，归而发解，得作兴之报良多，余且拭目人士之继起也。塔始于癸亥七月，竣于甲子五月，高八十余尺，周倍之。凡五级，翼以扶栏，中层为堂，容数十榻。查盘甫司李祈公彪佳尝登览之，甫告成而元式。赖君联登两榜，尽为兹塔之征应云。

侯讳大俊，号惺非。西粤朗宁人。由乡贡来令德邑<sup>⑮</sup>。”

南塔 在程田寺。高数丈，凡五级，夜常放光。后倾颓，得辟支佛骨佛牙舍利于塔顶。乃改建于佛殿之东，增为七级，高七寻，仍以牙骨藏之，其光不绝。今废。古谚云：“东塔团、西塔团，德化出状元。”

西塔 在登高山顶。塔下有亭，今废。宋县尉孙应凤诗：“忆昨慈恩登绝顶，今朝眼界更分明。飞檐高泻银河水，隔岸遥传宝铎声；翥凤呈辉看欲下，得龙露角望尤勍。凌风好向蓬莱去，一片香云绕足生。”

上涌双塔 在东西里。上涌乡旧属尤溪县，伪闽割属德化。环

乡皆山，中有平田十里许。初有谣云：“行到尤溪上涌乡，东西立塔足财粮，三百年中称德化，西北定架状元坊。”邑人徐子陵因倡建二塔，扁曰“魁星”，应谣语也。明宫讲李桂高诗：“一水中流分两塔，朋山直上第三层。台星到处魁星现，富贵相期梁与曾。”

## 龙 潭

**石山龙潭** 在县西十里。溪水流入山下二里许，潭面甚隘，道晦不可行，惟近潭浅地，遇日斜照，则见其极深窈。尝因旱水蓄，渔人至山下，见巨鱼千百为群，黑龙殿后，遂惊遁。相传无敢入。

**左溪龙潭** 在梅中里。双涧汇流，岩山间有上中下三函如窠，三泓如瓮，函水各入泓。上函独长，夹以石壁，高数十仞，其瓮窠水声如洪钟，遇阴晦，龙或出焉。上有龙王庙。宋泉州守真公德秀尝祷雨于此。

**火烽岭龙潭** 在县南十里。涧流极深，相传有龙，旱时每于此祈雨。

**黯坑龙潭** 在县北金鸡山瓮谷中。石涧悬泻，有大龙湫、小龙湫数潭相承，皆深不可测。峭壁夹之，杳冥昼晦，人踪罕到，大旱祈雨于此。

**赤脚龙潭** 在香林寺前。宋僧了他寂于潭上石盘。水深莫测，龙神甚灵，乡人祷雨则应。邑绅林汪远、林模尝放生于此。旧传有渔人没水，见双赤鲤，尾大如扉。林汪远诗：“神鲤今何在？于今料化龙，但看鳞与爪。尽作岭头松。”

论曰：“德化岩壑幽异，雲蒸霞蔚，中奇迹嶙峋而起，境则别有天地，诗亦思入风雲。披阅之下，引人入胜矣。至若王龟龄之刻石龙池，真西山之禱雨左溪，其充足发怀古之幽情也欤！”

### 校 注

① 蟠除：民国版《德化县志·艺文·记》作蟠际。

② 乐天：系“太白”之误。李白《望庐山瀑布》中，有“日照香炉生紫烟”句。

③ 林今度：据民国版《德化县志·古迹·胜迹》补。

④ 今樟已枯：据民国版《德化县志·古迹·胜迹》补。

⑤ 茶昆：应作“茶毗”、“茶毘”。系巴利文Jhapeti的音译，义译焚烧。

⑥ 泚：为平声，此处应用仄声，疑为“进”之误。

⑦ 住：民国版《德化县志·古进·胜进》为“住”，应为“驻”。

⑧ 大十尺，高倍之：据民国版《德化县志·古迹·胜迹》载：“高十尺，大倍之。”据1985年12月《德化县志·文物志》（征求意见稿）为“高二点七米，座宽三米，周长八点九米。”

⑨ 生寒：民国版《德化县志·古迹·胜迹》为“生闲”。

⑩ 虎爬：疑为“虎豹”之误。

⑪ 私：民国版《德化县志·古迹·胜迹》为“移”。

⑫ 层蛮：系“层峦”之误。

⑬ 积：据民国版《德化县志·古迹·胜迹》为“渍”。

⑭ 常：据民国版《德化县志·古迹·胜迹》为“尝”。

⑮ 据民国版《德化县志·艺文·记》补上。

（校注 李明志）

# 德化县志卷之十七

## 五行志

五行相尅，不循其常，则随所属而机先见。《诗》、《书》所载，《春秋》所纪，灾祥之应，历历不爽。有则必书以志异也。邑自雷雨画“丁”，祥固著焉，而水旱灾祲之警，亦复不少。前事不忘，勤恤民隐者，宁视等《齐谐》哉？志五行。

### 水

明洪武三十一年，县前溪水涨，民庐荡圮。

嘉靖四十三年五月十九夜，暴雨，黎明县前水深丈余，冲激之声若雷，民居漂流过半。东城崩坏。四十四年十一月初四日，寒甚，雨木冰。四十五年正月十六日，大雨雹。七月初十日午刻，云暗如昏，大风雨，冰雹似弹，平地盈尺，四山尽白，须臾而消。

万历二十五年，大水坏雲龙桥，桥上溺死者数十人，庐舍民畜漂没不可胜计。四十一年，大水复坏雲龙桥，民庐物畜漂溺甚多。

崇禎十五年，雨水如血，以瓮承屋溜，皆红，亦有一屋之溜，左白而右红者，以盂承空中，亦红白不等。

国朝顺治十三年正月十五日，大雨雪，平地五尺许。

康熙十五年四月十六日，雨。已刻，溪水暴涨入城，瞬息淹屋，白浪滔天。邑城自西至东，楼垣庐舍尽湮为壑，男女遭溺。沿溪百里，民畜田庐漂没殆尽。时海寇据邑。五十九年正月，大雪，平地四尺许。六十年五月，小铭社雨，水赤着物如染。

雍正七年正月，大雨雪。十三年正月大雪，林木尽冰。

明嘉靖四十五年秋冬，大旱无水。

## 火

国朝雍正四年八月，南关塔岸民居火，延烧数十家。

乾隆七年二月，彗星见于牛分。三月不雨，至于五月，野多石田，次年米贵。九年正月，彗星见于室壁之分。

## 木

明嘉靖四十一年，田鼠大作，一亩之田多至数千。春食秧，冬食谷，畦畔皆鼠，道草为不生。次年米贵，人多饥死。

崇禎九年，县署后垣有大枫，合数抱，枯已数年，忽生枝叶。论者以为邑令姚迟爱民之祥。

国朝顺治十七年，县东沙堤高池生五色祥荷，明年李道泰登

第。

康熙四年饥，邑民往戴雲山掘取土芮食之，赖以全活。土芮，叶圆，藤紫，实似芋。十九年春，米斗银六钱。冬，有年。二十八年，禾一茎两穗，或三四穗。县麻中植兰，叶中挺髀，开花并蒂，西园落酥①，一蒂四实。知县范正格绘图纪瑞。陈应奎诗：“亭毒鼓太和，仁风嘘万类。大化契天心，植物解其意。绿野蔚垂雲，黄金涨平地。忽尔见西畴，同茎生数穗，有似一乳中，伯仲相次第。贯珠佩瓔珞，交须复舒臂。合颖未为多，两岐岂足异。况以幽谷姿，饮德欲清粹，双蝶翅回翔，两虬(yi)尾相比，居然勿佩间，挺为王者瑞。落苏紫离离，骈合似列驷，元苞罗阴阳，四象自位置。夫子治园蔬，澹泊以明志，隐寓造物功，栽培同所蔚，伊昔中牟宰，报政称三异，较此熟为优？前后宁殊致。圣世协休徵，祯祥在抚字，入告绘斯图，青史留盛事。”三十五年，大饥。明年又饥。知县严居敬煮粥以赈。五十九年六月。程田寺池生瑞莲。

雍正三年五月石杰社隆斗堂池生瑞莲。

乾隆五年闰六月，南埕社植②香斋池生瑞莲。九年四月，知县鲁鼎梅种莲于县学泮池，逾月瑞莲生。明年王必昌登第。

## 金

明洪武二十年，黑虎为灾。群虎四出，白昼噬人于廊下，或夜闯室尽噬，缘是死亡转徙相续，户口耗，田野荒。

国朝康熙二十年，附郭在坊新化里，虎白昼四出，闻人声随

至，不匝月，吞噬百余人。下寮乡民卢荣思等伏銃杀一虎，头似马，项上赤鬣两垂，后左脚独小。是冬又有虎在梅上、梅中等里，噬人甚多。至二十二年，害始息。

## 土

明正德十二年，地生白毛，石鳞木柯皆有之，一夜长二三寸，或四五寸，两阅月乃没。

论曰：“先民有言，善言人者必有验于天。盖和气致祥，乖气致异，往往然也。尧水汤旱，雉雉祥桑，盛世所有，岂皆嘉瑞？而妖不胜德，禳却何神欤？古称子产当国，郑不复火，平仲相齐，彗为退舍。中牟螟不入境，九江虎皆渡河，则修德弭灾，又不仅庙堂宜然矣。”

### 校注

- ① 落酥：即落苏。为茄子的别名。
- ② 植：据民国版《德化县志·祥异》补。

（校注 李明志）

# 德化县志卷之十八

## 摭佚志

一时闻见，千秋之耳目系焉。苟有所佚，则悉登之，亦多见而识之意也。德化纪载兵燹，几经不无挂漏。访诸故老，采之残编，有足生人遐想者，未可听其若灭若没也。爰拾其遗，汇为一帙，以补前集之未逮，志摭佚。

德化县令宋时有题名记。绍兴十九年，知县事林及记刘文敏以下四十四人。淳熙九年重立。知县事吴一鸣记林及以下三十八人。自后历元及明。阙不立，故历官年月多无考。

宋东西团，蒋氏所居，门外有异木，大十四五围，叶有稜刺，莫知其名，百鸟不敢栖。

茅岐社夏碧村，昔有农夫耕于野，妇馐之饭，有沙，怒欲殴妇。值张道人过之，为劝止曰：“吾为若去沙。”一顿足而地震，曰：“沙去矣。”今环村五里许无沙。

宋时有道人游普光寺，戏画山水于壁间，波涛汹涌如真。寻失道人所在。

清泰里承泽乡美山前有巨石，高数丈，形如龟。宋淳熙间，



鸣三日夜，黄龟朋生；庆元间鸣，黄奎登第，嘉泰初复鸣，龟朋登第。

宋时汤泉下团宝藏寺，有洪钟，声闻数里外。先是，牧者系牛，其地忽有一人，追之，须臾不见。后掘地得钟，乃建寺以宝藏名。今废。宋县尉孙应凤诗：“枕畔鐃（hōng）然宝藏钟，声从何处入高墉？蜀颅衰臂今如许，唤起穹庐一卧龙。”

三淙溪右乱石垒积，相传昔有洞穴，为魑魅所居。元至正间，道人吴济川书符遣其五男曰凯阳者往镇之。凯阳持符入洞，须臾雷雨大作，山崩石坠，洞口压塞，凯阳死焉。今呼其地为鬼砦。

明嘉靖癸亥，知县张大纲偕永春颜廷渠、惠安黄克晦往游戴雲，夜二鼓方至。颜诗云：“传呼林外火，来度岭头天。”黄诗云：“鸟移惊树火，僧度过桥人。”诘旦欲登其巅，适山雨作意，不果。寺西山上，有石冢岿然，僧云“佛冢”也。寺前后田皆僧自耕。张诗云：“佛寂空留冢，僧贫已种田。”黄素以丹青名，复画须菩提达摩折芦渡江于壁而去。

琼山上有石堂、石灶、石鼎，相传秦汉时，隐士居此练液养形，仙去，后人建祠祀之，号道德仙。立石碣大书“秦汉隐君子”。明嘉靖间，里人李繁艰于嗣往祷之，梦与隐君子会。衣带上书云：“泰阶平旋。”得男，因名雲阶，字膺平，号泰堂。万历丁酉，顺天中式，任吉安同知，九摄邑篆，皆著声绩。国朝岁贡李献馥诗：“谁来结屋碧雲间？秦汉遗踪邈莫攀。高士声名三尺碣，幽人风气几丛兰；相传有字酬清梦，不尽逢仙醒世顽。欲解当年归隐故，苔

青石迹任斑斑。”

龙浔山上，有断碑一片字画端整。盖万历年署知县德政记也。文缺不可读，录其存者以备好古之赏识云。……

遣往思曩者之一日，而咏歌以志不忘甘棠之咏曰。……

化入人久而愈思，至咏其庐井草舍憩息之处，而爱……

化缺以永兼署德化，德化之民喜曰：“真吾父母也。已……”

政不能更，仆其最异者爱民礼士，锄强扶弱，租税之……

曰：是角而翼也，亟除去之，恶少恣睢诬讟曰：“是莠而……”

霜律躬，而以痼瘵视赤子，以躬修为倡导，而以蒲鞭……

以异南国之咏甘棠也。侯治永春大有贤声，而摄南……

州太守德化苍编攀留不能得，以吾年伯父郑封君……

能一日离侯也。心碑心史，是宜永思，侯之德也。侯讳……

新化里龙湖寺，旧有洪钟，每撞击，声闻邑治。明季时，知县某命移于龙浔山之醒龙楼。舁至中途，寺僧追及，以指弹之三，初弹铿然，再弹哑，三弹无声矣。既而，多方敲击，竟不鸣。清康熙间钟犹存。

涌溪下流东固坂沙际，有古钟一枚，圆径一尺，高二尺，不知何代物。罅裂为三，旁落一小片，如掌，取而合之，洪水荡决终不去。

汤泉里桂林乡有古树，幹似椿，叶似松，围丈，高十余寻，冬夏长青。相传昔有詹姓者，尝为通判，自外省携归，植于祠宇之

旁，后以其祠为英显。庙树今存。廩生赖麟丹诗：“扶疏老幹绿纷披，来自京华凤擅奇。楚国冥灵应伯仲，青州松柏想伧夷；长留蔽芾垂千载，未许鸛鷖借一枝。种树宪公今已远，临风俯仰有余思。”涂廷观诗暨彭：“(lǎn shān) 树色着烟斜，谁识当年培植家？好是燕山凝雨露，直将雲气结丹花。”

新化里小尤乡有大樟，围七丈许。年丰则枝叶茂秀，荒则枯落，因名卜年树。

石杰社泗州溪边山上蹲一巨石，稍下，土中产小石，其大如豆，四方端砥平正，类削成。紫黑色。掬取不竭，雨后尤多。

国初时，邑西关外泮岭有紫花藤，抱老桐而上。大可十围，离奇拗曲，如蛇盘龙伸，花从树杪，纷披至地，盖数百年物也。后桐仆藤被斧。进士李道泰诗：“绿茵何处不平铺？踏遍西郊倚树跌。百丈流酥争拂地，春风更播锦毳毼。孤藤托生胡道中，千年紫花披枯桐；桐枯厄为百斧攻，弥天紫帐失穹窿。三月花开曾相忆，坐藉落花煮花食，停杯花前频太息，惆怅连抱移不得。只今唯有老根存，蜿蜒无力虬龙奔，人命草菅此足言，笑我对树空抚扪。移根归山伴松树，洗尽尘华绝恶趣，离支今同烟霞窟，有时流花随瀑布。”

## 跋

粤稽志乘，祖述麟经，载考体裁，箕裘马史。编年著代，必溯流以穷源；彰善扬徽，务信今而传后。曰纪传，曰实录，毋貽芜秽之讥；为编次，为发凡，须定不刊之则。稽古来懿迹，特著篇章；发潜德幽光，用昭简策。丰功骏业，既炳炳而烺烺；末技片长，亦鱼鱼而雅雅。端委具举，巨细兼综，方将振采寰区，宁第生辉下邑哉？

德之志册，代有撰修。宋元以来，残于兵，燬于火，几同夏五之无征。有明而后，订所见，考所闻，依然《商颂》之缺失。当桂侯重纂，未寿枣梨；迨范公继成，爰登剞劂。然而亥豕多误，抑且纲目未分。躐后居前，凌乱不殊《齐纪》；挂一漏十，阙略有若《唐书》。良由采辑弗周，众长莫展，见闻未广，一卷空沿。今则历过一周，文献将愈散失，年逾六甲，修明难缓须臾矣。

恭逢夔堂鲁老师台，鱼头华胄，雉尾宏才。善读父书，早与红绫之宴；克绳祖武，旋铨赤县之司。抒绣虎英奇，奏飞凫伟略。花栽潘县，无非笔底之花；锦制闽邦，悉属怀中之锦。情殷造士，化雨沐丁水之波；念切作人，春风被龙浔之野。月有课，甲乙亲填；期有程，丹青手定。贾华董茂，疏派维严；宋艳班香，兼收勿碍。斯文章、政事并为一科，而吏治、儒林不分二族

者也。于是广集绅士，各竞铺张；独揽裁成，并归陶铸。例缘义起，文以类从。载笔之下有精思，表扬之间皆直道。大端皎皎，果然字里流辉；末艺超超，亦尔行间生色。至于一流一峙，大造锺灵；一殖一生，化工发育。为民生之攸赖，见物力之普存。他如道书传仙佛之踪，丛谈摭遗佚之事，搜罗殆遍，照揭靡遗。从兹域中罔不耀之珍，境内无或埋之宝。闻昔人所未发，不啻束晰补亡；述前志所已传，岂等抄胥缮写？璋窃欣附骥，幸获扳龙。逢盛典而心倾，读鸿文而神爽。只愧才非欧柳，奚堪持鼓雷门？惟是笔慕江花，谬云寓书宋闕（ta）。

治下岁贡生、门生连如璋谨识。